

THEOLOGIA UNIVERSA

A D U S U M

SACRÆ THEOLOGIÆ CANDIDATORUM.

A U C T O R E

R. P. T H O M A
E X C H A R M E S,

*Provincia Lotharingia Capuccinorum Definitor,
Custode Generali, necnon antiquo Sacra
Theologia Professore.*

T O M U S T E R T I U S.

Continens Tractatus DE DEO CREATORE;
ET INCARNATO, NEC NON DE GRATIA.

EDITIO TERTIA VENETA;


*Omnibus, quæ ab ipso AUCTORE vel addita,
vel emendata sunt, locupletata.*



V E N E T I I S,
EX TYPOGRAPHIA BALLEONIANA
MDCCLXXIX.

SUPERIORUM PERMISSU.





I N D E X T I T U L O R U M. T R A C T A T U S

DE DEO CREATORE.

D I S S E R T A T I O I.

<i>De Angelis.</i>	1
Cap. I. <i>De existentia Angelorum.</i>	2
Cap. II. <i>De natura Angelorum.</i>	4
Cap. III. <i>De statu in quo Angeli conditi sunt.</i>	6
Cap. IV. <i>De loco, motu, potentia motrice, &c.</i>	7
Cap. V. <i>De peccato Angelorum, & ejusdem pœna.</i>	9
Cap. VI. <i>De variis Angelorum ordinibus.</i>	14
Cap. VII. <i>De missione, illuminatione & custo- dia Angelorum.</i>	16

D I S S E R T A T I O II.

<i>De visibilis hujus mundi creatione.</i>	20
Cap. I. <i>De primi hominis creatione.</i>	21
Cap. II. <i>De dōtibus quas homo innocens accepit a suo auctore.</i>	25
Quæst. I. <i>An homo in sua creatione gratiam sanctificantem & dictas alias dōtes a Deo ac- ceperit?</i>	ibid.
Quæst. II. <i>An justitia originalis, sanctitas, &c. fuerint homini innōcenti naturales, &c.</i>	32
Cap. III. <i>De peccato primi hominis.</i>	39

T R A C T A T U S

DE DEO INCARNATO.

D I S S E R T A T I O I.

<i>De Incarnationis possibilitate.</i>	44
--	----

DISSERTATIO II.

De Incarnationis convenientia 61

DISSERTATIO III.

De necessitate Incarnationis. 68Cap. I. *Utrum constans fuerit in Deo voluntas peccatum absque condigna satisfactione non remittendi?* 70Cap. II. *Utrum pura creatura condignam pro peccato possit exhibere satisfactionem?* 73

DISSERTATIO IV.

De existentia Incarnationis. 81Cap. I. *Utrum Messias a Deo promissus, jam advenit?* ibid.Cap. II. *Utrum Jesus Nazarenus sit Messias in Legge promissus?* 101

DISSERTATIO V.

De causis Incarnationis. 107Cap. I. *De causa finali, seu motiva Incarnationis.* 108Quæst. I. *Utrum generis humani redemptio fuerit finis Incarnationis?* ibid.Quæst. II. *Utrum generis humani redemptio ita fuerit finis adequatus & totalis Incarnationis, ut, homine non peccante, Verbum non fuisset incarnatum?* 110Cap. II. *De causa Incarnationis meritoria.* 122

DISSERTATIO VI.

De quidditate Incarnationis. 131Cap. I. *De persona assumente.* 132Cap. II. *De natura assumpta.* 135Quæst. I. *De corpore a Verbo divino assumpto.* ibid.Quæst. II. *De anima a Verbo divino assumpta.* 143Qu. III. *De defectibus a Verbo divino assumptis.* 155Art. I. *De defectibus corporis a Verbo assumptis.* ibid.Art. II. *De defectibus anima a Verbo divino assumptis.* 162Art. III. *De defectibus anima & corpori communibus a Verbo assumptis.* 171

Cap. III.

Cap. III. De unione hypostatica.	177
Quæst. I. De quidditate unionis hypostatica.	178
Quæst. II. De modo quo facta est unio hypostatica.	184
Quæst. III. De proprietatibus unionis hypostaticæ.	207

Quæst. IV. De consequentibus unionem hypostaticam.	216
--	-----

Art. I. Utrum ex unione substantiali Verbi cum humanitate sequatur Christum esse compositum?	ibid.
--	-------

Art. II. Utrum, ex unione substantiali Verbi cum humanitate sequatur idiomatum communicatio?	220
--	-----

§. I. Utrum in Christo detur vera & realis communicatio idiomatum, & quomodo?	221
---	-----

§. II. Quot & quanam sint regula observanda, ut recte fiat idiomatum communicatio?	229
--	-----

DISSERTATIO VII.

De termino totali Incarnationis, seu de Christo.	231
--	-----

Cap. I. De scientia Christi.	232
------------------------------	-----

Cap. II. De gratia, donis, ac virtutibus Christi.	243
---	-----

Cap. III. De libertate Christi.	258
---------------------------------	-----

Quæst. I. Utrum Christus circa præcepta fuerit liber, & quomodo?	259
--	-----

Quæst. II. Qua ratione conciliari possit Christi libertas cum ejus impeccabilitate?	261
---	-----

Cap. IV. De merito Christi.	265
-----------------------------	-----

Cap. V. De satisfactione Christi.	272
-----------------------------------	-----

Quæst. I. Utrum Christus vere & propriè pro nobis satisfecerit?	273
---	-----

Quæst. II. Utrum Christus satisfecerit ex vera justitia?	279
--	-----

Quæst. III. Utrum Christus satisfecerit ex justitia rigorosa?	281
---	-----

Art. I. An satisfactio Christi fuerit æquivalens?	282
---	-----

Art. II.

Art. II. An satisfactio Christi fuerit ex propriis?

287.

Art. III. An satisfactio Christi fuerit ex aliis indebitis? 289

Art. IV. An satisfactio Christi fuerit ad alterum? 291

Cap. VI. De variis Christi titulis & officiis. 292.

Quæst. I. De predestinatione Christi. ibid.

Quæst. II. De filiatione Christi. 294

Quæst. III. De servitute Christi. 298

Quæst. IV. De dignitate capitis in Christo. 301

Quæst. V. De regia & judiciaria Christi dignitate. 305

Quæst. VI. De Christi Sacerdotio. 307

Quæst. VII. De Christi patrocinio. 310

Quæst. VIII. De mediatione Christi. 313

Art. I. Utrum Christus sit mediator Dei & hominum secundum humanitatem vel divinitatem? 315

Art. II. Utrum invocatio Sanctorum opposita sit mediationi Christi? 318

Cap. VII. De adoratione, sive cultu Christi, ejus Matris, Sanctorum, Imaginum & Reliquiarum. 326

Quæst. I. Utrum Christus, Beata Virgo, & Sancti, sint colendi, & quo cultu? 328

Quæst. II. Utrum imagines Christi, B. M. V. & aliorum Sanctorum sint colenda, & quo cultu? 336

Quæst. III. Utrum vera Crux & reliquia Sanctorum sint colenda, & quo cultu? 346

Cap. VIII. De B. V. Maria Matre Christi. 350

Art. I. De Virginitate perpetua B. M. Matris Christi. ibid.

Art. II. De impetecabilitate B. M. Virginis. 353

T R A C T A T U S

DE GRATIA CHRISTI.

Proœmium.

357

D I S S E R T A T I O I.

De gratia actuali. 363*Cap. I. De necessitate gratia actualis interioris in statu natura lapsa.* 360*Quæst. I. Utrum gratia Christi actualis interior necessaria sit in presenti statu, ad operis salutaris effectiorem, aut saltem inchoationem?* 363.*Quæst. II. Utrum gratia Christi actualis interior sit necessaria ad perseverandum in accepta justitia usque ad finem vita?* 379.*Quæst. III. Utrum gratia Christi interior sit necessaria ad boni moralis ordinis naturalis effectiorem?* 388*Quæst. IV. Ad quodnam bonum morale naturale efficiendum gratia interior necessaria sit, vel non?* 400*Art. I. Utrum homo in presenti statu possit absque gratia universam legem naturalem observare?* ibid.*Art. II. Utrum homo in presenti statu, absque gratia possit Deum ut auctorem natura, diligere?* 407*Art. III. Utrum homo lapsus possit absque gratia omnes vincere tentationes?* 414*Cap. II. De natura & divisione gratia actualis.* 422.*Quæst. I. De gratia sufficiente.* 423*Quæst. II. De gratia efficaci.* 445*Art. I. Systema Novatorum circa gratia efficaciam.* 447


Art. II.

Viii *Index Titulorum.*

Art. II. <i>Systemata Scholasticorum circa gratiæ efficaciam.</i>	458
Cap. III. <i>De dispensatione & distributione gratiæ sufficientis.</i>	490
Quæst. I. <i>Utrum gratia sufficiens detur omnibus adultis?</i>	491
Art. I. <i>Utrum omnibus justis detur gratia sufficiens ad præcepta implenda?</i>	ibid.
Art. II. <i>Utrum fidelibus peccatoribus detur gratia sufficiens, ut a peccato resipiscant, & convertantur?</i>	498
Art. III. <i>Utrum infidelibus detur gratia sufficiens, ut ad fidem adduci possint?</i>	505
Quæst. II. <i>Utrum omnibus infantibus detur gratia sufficiens ad salutem?</i>	515


DISSERTATIO II.

<i>De gratia habituali.</i>	519
Cap. I. <i>De natura gratiæ habitualis?</i>	520
Cap. II. <i>De effectibus gratiæ habitualis.</i>	531
Quæst. I. <i>De justificatione.</i>	ibid.
Art. I. <i>De natura justificationis.</i>	532
Art. II. <i>De dispositionibus ad justificationem.</i>	539
§. I. <i>Utrum aliqua dispositiones requirantur ad justificationem?</i>	519
§. II. <i>Quot & quanam dispositiones requirantur ad justificationem?</i>	542
Art. III. <i>De proprietatibus justificationis.</i>	550
Quæst. II. <i>De merito bonorum operum.</i>	561
Art. I. <i>De existentia meriti.</i>	562
Art. II. <i>De conditionibus ad meritum requisitis.</i>	567i
Art. III. <i>De objecto meriti.</i>	575



TRACTATUS

DE DEO CREATORE.

Nota.  Irca creationem, hæc est fides nostra, in Symbolo Nicæno Constantino-politano definita: *Credimus in unum Deum, Patrem omnipotentem, factorem cali & terræ, visibilium omnium & invisibilium conditorem. Cum itaque illud Symbolum omnes creaturas in visibiles, seu corporeas, & invisibiles, seu spirituales distribuat: hunc ordinem sequemur agemusque, 1. De Angelis; 2. De visibilis hujus universi productione.*

DISSERTATIO I.

De Angelis.

Nota. **D**E Angelis multas quæstiones congrunt Theologi, quæ, vel ad Philosophiam spectant, vel sunt penitus incertæ, vel
Charmes, Theol. Schol. Tom. III. A ceræ

certe prorsus inutiles videntur; nos vero Sac. Scripturæ & traditionis lumine ducti, ea principaliter examinanda suscipimus, quæ his duobus momentis possunt probari. Agemus itaque, 1. De existentia, & creatione. 2. De natura. 3. De statu in quo conditi sunt. 4. De loco, motu, potentia motrice, & locutione Angelorum. 5. De eorum peccato & ejusdem poena. 6. De variis eorum ordinibus. 7. Tandem de missione, illuminatione, & custodia Angelorum.

CAPUT PRIMUM.

De existentia Angelorum.

Nota. **A**ngelus, juxta Patres & Theologos: nomen est officii, non naturæ: definiri potest, *substantia creata, spiritalis, completa.*

Dicitur 1. *Substantia creata*, id est, per se subsistens, & ex nihilo producta.

Dicitur 2. *Spiritalis*, id est, incorporea, juxta illud Hebr. 1. *Omnes sunt administratorii Spiritus*. Atqui ex Lucæ 24. *Spiritus carnem & ossa non habet.*

Dicitur 3. *Completa*: quia est integra, nec ordinatur ad alterius compositionem, & per hoc ab anima rationali distinguitur.

CONCLUSIO.

Existunt Angeli. Est de fide contra Sadducæos.

Prob. 1. Ex Scriptura, in qua frequens est memoria Angelorum: Genes. 19. *Venerunt duo Angeli Sodomitæ*; & cap. 22. *Angelus Domini de calo clamavit dicens, Abraham*, &c. Matth. 18. *Angeli eorum in calis vident semper faciem Patris.* Unde D. Aug. in Ps. 102. ait: *Esse Ange-*

Angelos novimus ex fide, & multis apparuisse scriptum legimus, ac tenemus, nec inde dubitare fas nobis est.

Prob. 2. Ex Conc. Lateranensi, cap. firmiter, ubi definitur, Deum sua omnipotenti virtute simul, ab initio temporis utramque de nihilo condidisse creaturam, & spiritualem & corporalem, Angelicam videlicet & mundanam & deinde humanam quasi communem, & spiritui & corpore constitutam.

Dices: Moyſes non deſcripſit creationem Angelorum; ergo non dantur.

Reſp. nego conſeq. Ideo enim Moyſes creationem Angelorum prætermiſit, quia periculum erat ne Iſraelitæ, idololatriæ maxime deſediti, Angelorum excellentiam cognoſcentes, ipſos, tanquam Deos colerent.

Quæres 1. Quo tempore Angeli fuerunt creati?

Reſp. Simul cum mundo creati ſunt, nec ante, ut conſtat ex cap. firmiter; & probatur ex Genef. 1. In principio creavit Deus ælum & terram, ubi ſub nomine cali comprehendit Angelos; & Exodi 20. Sex enim diebus fecit Dominus ælum & terram & mare, & omnia quæ in eis ſunt; ergo & Angelos qui in cælis continentur.

Quæres 2. Quo in loco creati ſunt Angeli?

Reſpond. Id omnino certum non eſt. Probabile eſt in cælo quidem eos fuiſſe conditos, juxta illud Lucæ 10. Videbam Satanam ſicut fulgur de calo cadentem; Sed non in cælo empyreo, quod eſt ſedes beatorum, alias non potuiſſet dicere, In ælum conſcendam. Iſaiæ 14.

C A P U T II.

De natura Angelorum.

Constat ex definitione Angelorum, ipsos esse spirituales & intellectuales; restat resolvendum utrum sint immortales, & ejusdem, vel diversæ speciei.

Quæres 1. *An Angeli sint immortales?*

Resp. Sunt immortales ab intrinseco, non ab extrinseco.

Prob. 1. pars. Illi sunt immortales ab intrinseco, qui carent principio corruptionis; atqui Angeli carent principio corruptionis: nempe principium corruptionis est materia, cujus, cum partes dissolvuntur, totum perire necesse est; atqui Angeli, utpote spirituales, non constant materia; ergo.

Prob. secunda pars. Illi non sunt immortales ab extrinseco, qui possunt ab aliqua causa extrinseca destrui; atqui Angeli possunt a Deo destrui, Sap. 11. *Quomodo autem posset aliquid permanere, nisi tu voluisses?* Ergo, &c.

Dices: Ex D. Damasceno (x) *Angelus immortalis est, non natura, sed gratia;* ergo non est immortalis ab intrinseco.

Resp. dist. ant. Angelus est immortalis gratia naturali creationis, *conc.* gratia supernaturali, *nego ant.* hic est ergo SS. Patrum sensus, quod Angelus non a se, sed a Deo per creationis beneficium immortalitatem habeat, illud autem beneficium vocatur gratia; quia est indebitum.

Quæ-

(x) L. 1. de fide orthodoxa, cap. 3.

Quæres 2. *An Angeli sint ejusdem, vel diversa speciei?* Hæc quæstio non pertinet ad fidem, cum nec colligi possit ex Scriptura & traditione, nec sit definita.

Resp. Probabilior est sententia quæ asserit omnes Angelos esse ejusdem speciei, soloque numero differre.

Prob. Illa sententia videtur probabilior quæ propius accedit ad modum loquendi Patrum; atqui talis est sententia quæ docet Angelos omnes esse ejusdem speciei; ergo, &c. *Prob. min.* ex Patribus, *Angeli omnes*, ait D. Basil. (y) *ut appellationis unius, sic & natura omnino sunt ejusdem invicem.* D. Damasc. lib. de duabus voluntatibus, ait: *Angeli & homines suam quique divisam & distinctam habent hypostasim, etsi ejusdem natura sint.* Quia ex Div. August. in Psalm. 103. *natura Angeli est quod sit Spiritus, Ex eo quod est, inquit, Spiritus est, ex ea quod agit, Angelus est.* Atqui omnes Angeli sunt Spiritus; ergo.

Dices: Angeli differunt forma; ergo differunt specie.

Resp. nego antec. Angeli enim solo numero, seu individuatione, differunt, non forma; differt enim Gabriel a Michael, quod hanc, non autem illam individuo naturam habeat, licet ejusdem sit speciei cum aliorum Angelorum natura.

C A-

(y) L. 3. contra Eunomium.

C A P U T III.

De statu, in quo Angeli conditi sunt.

QUÆRES. 1. *Utrum Angeli creati fuerint beati?*

Resp. Angeli fuerunt creati beati beatitudine naturali, non autem beatitudine supernaturali.

Prob. prima pars. Beatitudo naturalis consistit in perfectione quæ omnem excludat miseriam: atqui Angeli fuerunt creati in illa perfectione; miseria enim est poena peccati; ergo, &c. hinc D. August. l. de corrept. & gratia, ait: *Diabolus & Angeli ejus beati erant antequam caderent.*

Prob. secunda pars. De ratione beatitudinis supernaturalis, quæ consistit in intuitiva visione, est stabilitas & confirmatio in bono; sed Angeli, statim ut creati sunt, stabiliti & confirmati non fuerunt in bono, ut patet ex lapsu malorum Angelorum; ergo, &c.

Resolves, Beatitudinem bonorum Angelorum supernaturalem, fuisse præmium illorum in bono perseverantiæ, ut asserit D. Aug. (2) dicens: *Angeli sancti, cadentibus aliis per liberum arbitrium, per idem liberum arbitrium steterunt ipsi; & hujus mansionis debitam mercedem recipere meruerunt, tantam scilicet beatitudinis plenitudinem, qua eis certissimum sit, semper se in illa mansuros.*

QUÆRES 2. *An Angeli creati fuerint in statu gratiæ sanctificantis?*

Resp. affirm. Ut constat, tum ex Scriptura, Ezech. 18. ubi quod de Rege Tyri ad litteram dicitur

(2) Lib. de corrept. & grat. cap. 11.

dicitur, a SS. Patribus de Lucifero intelligitur: *Ambulaſti perfectus in viis tuis a die conditionis tue, donec inventa eſt iniquitas in te.* Ergo per peccatum amiſit perfectionem, non naturalem; ergo ſupernaturalem; ſed perfectio ſupernaturalis conſiſtit in gratia ſanctificante; ergo, &c. hinc D. Aug, (a) ait: *Cum amore caſto, quo illi adharerent, creavit; ſimul in eis condens naturam, & largiens gratiam.* Contrarium noſtræ reſponſionis damnatum eſt contra Bajum Propoſit. IX.

Reſolv. Angelos in primo inſtanti ſux creationis recepiſſe fidem, ſpem, & alias virtutes; quæ gratiam ſanctificantem conſequuntur.

C A P U T IV.

De loco, motu potentia motrice, & locutione Angelorum.

QUÆRES I. *An Angeli ſint in loco & quomodo?*

Reſpond. ad primum. Angeli vere ſunt in loco.

Prob. Ex Apoc. cap. 20. ubi dicitur, diabolum fuiſſe legatum & miſſum in abyſſum; ergo Angelus eſt in loco, alias eſſet nullibi quod repugnat.

Reſp. ad ſecundum. Angeli non ſunt in loco circumſcriptive, ſed definitive.

Prob. prima pars. Eſſe in loco circumſcriptive, eſt ita contineri loco, ut res, quæ in eo eſt, correfpondeat variis partibus loci; atqui Angeli non correfpondent variis partibus loci, nam ſola illa res correfpondet variis partibus

(a) Lib. 12. de Civ. Dei, cap. 9.

bus loci, quæ habet partes; atqui Angeli partes non habent, cum omnis materiæ sint expertes; ergo.

Prob. secunda pars; Rem esse in loco definitivè, est eam certo spatio ita contineri, ut non sit alibi; atqui Angeli certo spatio ita continentur, ut non sint alibi; nam extensionem virtualem limitatam habent; ergo.

Dices contra primam partem: Div. Athanasius, Epistol. ad Serapionem, ait: *Angeli consistunt in certis locis, loco circumscribuntur;* ergo.

Resp. dist. ant. Loco circumscribuntur, improprie, *conc.* proprie, *neg.* Circumscribi improprie est spatio comprehendi, seu rem ita certo spatio contineri, ut alibi non sit, hoc autem satis erat Patribus, ut probarent immensitatem soli Deo, non Angelis competere.

Quæres 2. An Angeli moveantur localiter?

Resp. affirmative. Nam moveri localiter, est transire de loco in locum fluxu continuo; idque factum esse declarat Scriptura, Luc. 2. *Missus est Angelus Gabriel a Deo in civitatem Galilee, cui nomen Nazareth, ad Virginem & ingressus Angelus ad eam, dixit & discessit ab illa Angelus.* Et Lucæ 2. *discesserunt Angeli a Pastoribus in calum.* Ibi certe est motus localis, nempe derelictio termini a quo, & progressus ad terminum ad quem.

Quæres 3. An Angeli possint movere corpora localiter?

Resp. affirmative, ut constat, Daniel. cap. 14. ubi Angelus portavit Prophetam Habacuc ex Judæa in Babylonem, *Et portavit eum capillo capitis sui, posuitque eum in Babylone supra lacum.* Et Matth. 4. *assumpsit eum (Jesum) diabolus in sanctam Civitatem, & statuit eum super pinnaculum templi.*

Quæ-

Quæres 4. *Utrum, & quomodo Angeli inter se colloquantur.*

Respond. ad primum. Angeli inter se colloquantur, ut fide constat ex Script. Isaïæ 6. *Duo Seraphim clamabant alter ad alterum, Sanctus, Sanctus, Sanctus Dominus, &c.* Et Epist. can. Judæ, *Cum Michael Archangelus cum diabolo disputans altercassetur dixit: imperet tibi Dominus.*

Resp. ad 2. Angelus alterum alloquitur Angelum, suam intellectionem aut volitionem ad illum dirigendo per actum quo vult, ut utraque, vel alterutra, illi pateat. Ratio Div. Thomæ est, (b) quia loqui ad alterum, nihil aliud est, quam conceptus mentis alteri manifestare. Atqui Angelus, intellectionem & volitionem ad alterum dirigendo, illi manifestat suos conceptus; & non dirigendo, illi occultat; ergo, &c.

C A P U T V.

De peccato Angelorum & ejusdem pœna.

Quæres 1. *Cujus speciei fuerit primum peccatum Angelorum?*

Resp. Fuit peccatum superbia.

Prob. Ex Tobia 4. ubi Spiritus sanctus dicit: Superbiam nunquam in tuo sensu, aut in tuo verbo dominari permittas: in ipsa enim initium sumpsit omnis perditio. Et Isaïæ 14. de diabolo, sub nomine Regis Babylonis, dicitur: Detracta est ad inferos superbia tua
quo-

[(b) 1. p. q. 107. art. 1.

quomodo cecidisti de calo, Lucifer, qui mane oriebaris? qui dicebas in corde tuo: in calum constendam similis ero Altissimo. Unde S. Chrysost. homil. 15. in Joann. ait: Neque diabolus cecidisset; nisi se scelere superbia coinquinasset.

Quæres 2. Quodnam fuit objectum superbia Angelorum Apostatarum?

Resp. Est incertum, probabilius tamen est, illud peccatum superbiæ in eo positum fuisse, quod æqualitatem cum Deo desideraverunt, non quidem absolute, (neque enim potuerunt ante peccatum judicare illam æqualitatem esse possibilem) sed conditionate, si nimirum esset possibilis, in eoque desiderio mirum in modum sibi complacuerint.

Prob. Ex citato textu Isaïæ 14. In calum constendam, super astra Dei exaltabo solium meum, similis ero Altissimo. Idipsum diserte docet D. Gregor. lib. 34. moral. cap. 17. Ei a quo conditus fuerat subesse despexit appetiit, ut & præesset ceteris, & nulli subesset, dicens: ascendam super altitudinem nubium, & similis ero Altissimo; cujus eo ipso similitudinem perdidit, quo esse ei superbe similis in celsitudine concupivit.

Quæres 3. An omnes Angeli, qui cum Lucifero ceciderunt, fuerunt ex uno tantum ordine, aut ex una tantum hierarchia?

Resp. Probabile est, quod fuerint ex quolibet ordine, & ex qualibet hierarchia.

Prob. Quia Apost. Rom. 8. inter humana salutis hostes recenset Angelos, principatus & virtutes, Neque Angeli, inquit, neque principatus, neque virtutes neque creatura alia poterit nos separare a gratia Dei.

Quæres 4. Quot Angelos Lucifer in suam partem traxerit?

Resp. Cum D. Thom. (c) *Eum quam plurimos secum traxisse, quanquam non tot, quot in gratia, cum suo duce Michaelē, remanserunt.* Nam Apocal. 12. de apostatarum Angelorum principe legitur: *Et cauda ejus trahebat tertiam partem stellarum cali, & misit eas in terram* atqui per illas stellas intelliguntur Angeli qui ceciderunt; ergo duæ illorum partes missæ non sunt in terram.

Quæres 5. Quotuplex pœna consecuta est peccatum demonum?

Resp. quadruplex, nempe 1. Cæcitas mentis. 2. Obstinatio voluntatis in malo. 3. Exclusio a gloria. 4. Tormentum ignis.

Quæres 6. Qua & quanta sit demonum cæcitas?

Respond. In hoc consistit, quod priventur omni penitus lumine supernaturali, non vero naturali.

Prob. 1. pars: Quia lumen super-naturale, est ordinatio quædam ad vitam æternam; atqui dæmones nullum habent ordinem ad vitam æternam; ergo privantur omni lumine super-naturali gratiæ: Unde de dæmone dicitur Ezech. 28. *Ejeci te de monte Dei & perdidisti te o Cherub & elevatum est cor tuum in decore tuo: perdidisti sapientiam tuam in decore tuo, in terram projeci te.* Et ideo dicuntur ab Apost. (d) *mundi rectores tenebrarum harum.*

Prob. secunda pars: Quia intellectus in naturalibus non minuitur, nisi cum minuitur natura, cujus est facultas; atqui dæmonum natura per peccatum non est immutata; ergo nec eorum intellectus in naturalibus; unde

S. Dio-

(c) 1. p. q. 63. art. 2.

(d) Ephes. 6.

S. Dionys. (e) dicit: *Naturalia dona in Angelis reprobis integra remanserunt.*

Quæres 7. *An tanta sit in demonibus obstinatio voluntatis, ut nullum possint exercere a summo bono omnino bonum?*

Resp. affirm. Ratio est 1. summum Dei vindicis odium, quo voluntas eorum male affecta, semper Deo displicere velit. 2. Privatio concursus divini, cujus defectu nihil, nisi malum, ipsis placere potest; unde vocantur spiritus mali, Psalm. 77. *immissiones per Angelos malos.*

Quæres 8. *Utrum detur aliquis locus in terra visceribus, ad cruciatum demonum destinatus?*

Resp. affirm. Ut clarissime testatur D. Petrus Epist. 2. cap. 2. *Deus Angelis peccantibus non pepercit, inquit, sed rudentibus inferni detrahtos ad tartarum tradidit cruciandos.* Et licet nonnulli ex illis, ante diem judicii, poenas suæ damnationis luant in hoc aere nostro, ubi ad hominum exercitationem divagari permittuntur, juxta illud Ephes. 6. *Non est nobis colluctatio adversus carnem & sanguinem, sed adversus Principes & potestates, adversus mundi rectores tenebrarum harum, contra spiritualia nequitia in caelestibus, id est in aere nostro.* Tamen fides docet, in die judicii; omnes prorsus in carcerem infernalem esse detrudendos, qui est terra miseria & tenebrarum, ubi umbra mortis, & nullus ordo, sed sempiternus horror inhabitat. Job 10.

Quæres 9. *An demones in inferno torqueantur igne vero & corporeo?*

Resp. affirm. Ut tradit communis Patrum & Ecclesiæ consensus.

Prob. 1.

Prob. 1. Ex Script. Deuter. 32. Ignis succensus est in furore meo, & ardebit usque ad inferni novissima. Isaia 33. quis poterit habitare de vobis cum igne devorante? quis habitabit ex vobis cum ardoribus sempiternis? Et Matth. 25. discedite a me maledicti in ignem aeternum, qui paratus est diabolo & Angelis ejus. Ex quibus sic argumentor: Scriptura sacra sumi debet in proprio sensu, quando nulla est necessitas illam in sensu metaphorico accipiendi; atqui nulla est necessitas nomen, ignis, toties repetitum, in sensu metaphorico accipiendi, cum nullum sequatur absurdum, si intelligatur de vero igne corporeo; ergo, &c. Hinc, Div. Hieronym. Epist. 59. arguit Origenem, quod ignem tartareum ad metaphoram transtulerit.

Prob. 2. Ex Patribus: Sanct. Gregor. (f) de igne infernali affirmat, corporeum esse non ambigo. Et S. August. (g) Adharebunt, inquit, Spiritus incorporei, corporeis ignibus cruciandi.

Quæres 10. Quomodo daemones ab igne corporeo torqueantur?

Resp. Hæc quæstio est mere philosophica, de qua nihil certum posse haberi in hac vita, ingenue fatetur D. August. ibid. dicens: Quamvis miris, tamen veris modis etiam Spiritus incorporeos posse pœna corporalis ignis affligi. Non ergo mirum est si in tot, tamque varias, circa præsentem controversiam, sententias, abierunt Theologi, quas referre contra nostrum institutum est.

CA-

(f) Lib. 4. dial. c. 29.

(g) Lib. 21. de Civ. Dei, cap. 10.

CAPUT VI.

De variis Angelorum ordinibus.

Nota. **C**ertum est, quod Angelorum numerus sit maximus, ut constet ex Daniel. 7. *Millia millium ministrabant ei, & decies millies centena millia assistebant ei.* At quantus sit hic numerus, res est penitus incerta, de qua tum Scriptura, tum traditio, sine quibus id sciri non potest, tacent.

Nota 2. Cum Angeli inter ceteras omnes creaturas dignitate præstent, dubium esse non potest, quin innumera earum multitudo sit ordinatissima; hinc vulgo dicitur *exercitus*, qui nonnisi ex ordine coalescit, & *chorus* qui proprie est societas psallentium, in qua ne minima dissonantia debet reperiri.

Nota 3. Hierarchia, est multitudo ordinata sub unius sacri Principis gubernatione.

Ordo, seu chorus, est hierarchia Angelica gradus unus: conveniens in hierarchiæ suæ communi modo illuminationis, distinctus secundum officia diversa. His positis:

Quæres 1. Quot sunt hierarchia Angelorum?

Resp. Cum Div. Dionysio lib. de celesti hierarchia, cap. 6. sunt tres, nempe *Suprema*, quæ immediate a Deo recipit illuminationes, easque transmittit Angelis secundæ hierarchiæ. *Media*, quæ divinas illuminationes immediate recipit ab Angelis primæ hierarchiæ, easque transmittit Angelis tertiæ hierarchiæ. *Infima*, quæ divinas illuminationes recipit ab Angelis secundæ hierarchiæ, easque transmittit hominibus.

Quæres 2. Quot sunt ordines, seu chori Angelorum?

Resp.

Resp. Sunt novem, quorum tres in qualibet Hierarchia continentur.

In prima hierarchia, continentur, *Seraphini*, *Cherubini*, & *Throni*.

In secunda hierarchia, sunt, *Dominationes*, *Virtutes*, & *Potestates*.

In tertia hierarchia, sunt *Principatus*, *Archangeli*, & *Angeli*. Porro illa diversa nomina sortiuntur ex diversis, quibus funguntur, ministeriis & officiis.

1. *Seraphini*, sic dicuntur, quia charitatem divinam, qua ardent, in alios Angelos transfundunt.

2. *Cherubini*, sic appellantur, quia eminentem scientiam, qua præditi sunt, aliis communicant.

3. *Throni*, sic dicuntur, quia ipsis majestas divina insidet tanquam Judex, unde divina judicia aliis Angelis denuntiant.

4. *Dominationes*, sic dicuntur, quia in eis maxime elucet supremum Dei in re creatas dominium, dominatumque exercent in inferiores Angelos, tanquam in subditos.

5. *Virtutes*, sic dicuntur, quia, virtute quasi divina pollentes, causas universales movent, per eos patrantur miracula, &c.

6. *Potestates*, sic dicuntur, quia, potestatem creatoris participant, potestates infernales cohibent, efficiuntque ne hominibus noceant.

7. *Principatus*, sic dicuntur, quia moderamine suo inferioribus Angelis principantur, nec non Regnis & Principatibus, quos regunt & custodiunt.

8. *Archangeli*, sic dicuntur, quia majora & summa hominibus annuntiant ipsisque committitur custodia Pontificum, Regum, Principum, & aliorum Pastorum.

9. *Angeli*, sic dicuntur, quia minora annuntiant, hominumque privatorum custodes constituuntur.

C A P U T VII.

De missione, illuminatione & custodia Angelorum.

QUæres 1. *Utrum & a quo Angeli mittantur?*

Resp. Angeli hominibus a Deo mittuntur, tum ad quædam ipsis exhibenda ministeria, tum ad ventura ipsis prænuntianda; id patet ex Script. Exodi 33. *Mittam præcursorem Angelum tuum.* Tob. 12. Angelus Raphael ait: *Tempus est ut revertar ad eum qui me misit.* Et Lucæ 1. *missus est Angelus Gabriel a Deo.*

QUæres 2. *Utrum Angeli ab aliis Angelis superioris hierarchia mitti possint?*

Resp. affirm. Ut communis Theologorum fert sententia: ratio est, quia ibi potest esse missio unius ab alio, inter quos est prælatio, atqui inter Angelos, sive bonos, sive malos, est prælatio, ut constat ex *Daniel.* 10. ubi Michael dicitur, *unus de principibus primis.* Et ex *Job* 41. ubi *Leviathan* dicitur, *Rex super universos Filios superbia:* ergo.

QUæres 3. *Utrum Angeli illuminent homines?*

Resp. affirm. Estque de fide: nam illuminare nihil aliud est, ex D. Thoma, quam veritatem aliquam revelare; atqui Angeli revelant homi-

hominibus plures veritates ; ut constat ex Scriptura , Daniel. 8. ait ad me (Gabriel) *intellige Fili hominis . Et cap. 9. docuit me , Gabriel , dixitque : Daniel nunc egressus sum ut docerem te & intelligeres . Et Matth. 2. Angelus Domini apparuit in somnis Joseph , dicens ; surge & fuge in Ægyptum futurum est enim , ut Herodes quærat puerum ad perdendum eum .*

Quæres 4. *An Angeli deputentur ad custodiam hominum ?*

Respond. affirm. Est de fide. Prob. Ex Scriptura , Psalm. 90. *Angelis suis Deus mandavit de te , ut custodiant te . Et Hebr. 1. Apost. ait : Nonne omnes sunt administratorii spiritus , in ministerium missi propter eos , qui hereditatem accipient salutis ?*

Accedit unanimis consensus Patrum , dicentium cum Origene , homil. 8. in Genes. *Angeli tenent curam animarum nostrarum , & eis ab infantia , tanquam tutoribus & curatoribus , committuntur .*

Quæres 5. *An singuli fideles suum habeant Angelum custodem ?*

Resp. affirm. Hocque ita certum est , contra Calvinum (h) , ut quamvis oppositum non sit hæreticum , utpote nondum ab Ecclesia definitum ; nihilominus est erroneum .

Prob. 1. ex Scriptura , Matth. 18. *videte , ne contemnatis unum ex his pusillis : dico enim vobis , quia Angeli eorum in calis semper vident faciem Patris mei , qui in calis est . Ubi Christus 1. non dicit , Angelus , sed Angeli , significans non unum , sed plures pluribus præfici . 2. Non dicit simpliciter , Angeli , sed Angeli eorum , id est ,*

(h) Lib. 1. institut. cap. 14.

id est, Angeli cuilibet deputati hæc veritas ita primorum fidelium mentem pervaserat, ut, *Act.* 12. porro e carcere educto & pulsante ostium domus Mariæ matris Joannis, fideles, qui ibi multi erant, dixerint, *Angelus ejus est*.

Prob. 2. Ex Patribus Græcis & Latinis.

Eusebius Cæsariensis (i) ait: *Angelum unicuique ad custodiam divinitus datum, nos ex Scriptura didicimus.*

S. Hieronym. in cap. 18. Matthæi, *Magna dignitas animarum, ut unaquaque ab ortu nativitatis habeat in custodiam sui Angelum delegatum.* Et S. Anselmus, in elucidario, ait: *Unaquaque anima, dum in corpus mittitur, Angelo committitur.*

Quæres 6. An quilibet homo etiam reprobus & infidelis suum habeat Angelum custodem?

Resp. affirm. Ut communiter docent Theologi: tum quia Patres citati, asserentes unicuique deputatum esse Angelum custodem, non distinguunt inter fideles, & infideles ac reprobos, *Putemus Angelos dici*, inquit D. Bern. (k) *qui singulis hominibus dati creduntur.* Tum quia Deus vult sincere omnium, etiam infidelium & reproborum, salutem; ergo neminem excludit a mediis salutis generalibus, inter quæ est Angelorum custodia.

Quæres 7. Utrum singula regna habeant Angelos custodes?

Resp. affirm. Id enim constat ex Scriptura, *Daniel.* 10. ubi fit mentio Angeli, qui præerat regno Persarum, & alterius Angeli, qui præerat regno Græcorum: Princeps regni Græcorum

(i) Lib. 13. de præparatione evangelica, c. 7.

(k) Lib. 5. de considerat. cap. 5.

eorum sic Daniele allocutus est: *Princeps regni Persarum restitit mihi 21. diebus, & ecce Michael, unus de Principibus primis, venit in adiutorium meum, & ego remansi ibi juxta regem Persarum.* Unde Div. Basilii de Angelis agens, ait: *Alii ipsorum gentibus prapositi sunt, alii fidelium singulos consequuntur.*

Immo, communis est sententia Patrum, singulas dioceses, civitates, & communitates, suos habere Angelos titulares. Ita censent Origenes, Homil. 20. in Numeros, Ambros. lib. 2. in Lucam, &c.

Quæres. 8. Quanam ministeria circa nos exercent Angeli custodes?

Resp. 1. Homines a periculis & malis imminuentibus liberant. Genes. 48. dicit Jacob, *Angelus qui eripuit me de cunctis malis.*

2. Impediunt ne dæmones hominibus noceant, Tobia 8. *Raphael Angelus apprehendit demonium, & reliquit illud in deserto, ne videlicet noceret Tobia.*

3. Pias cogitationes suggerunt ad prosecutionem boni, & fugam mali. Hinc Deus Moyse de Angelo dixit, Exodi. 13. *Observa eum & audi vocem ejus, nec contemnendum putes: quia non dimittet cum peccaveris, & est nomen meum in illo.*

4. Preces nostras Deo offerunt, suasque ipsi nostris conjungunt, ut declaratur Apocal. 8. *Alius Angelus venit . . . ut daret de orationibus Sanctorum omnium super altare aureum, quod est ante thronum Dei.*

5. Clientum suorum animas in Purgatorio consolantur, easque, plene purgatas, ad cælum deducunt, ut colligitur ex Lucæ 16. *Factum est autem ut moreretur mendicus, & portaretur ab Angelis in sinum Abraha.*

Quæres. 2. Utrum licet quilibet homo ad suum custod-

custodiam habet Angelum bonum, ita etiam ad pugnam habeat Angelum malum?

Resp. 1. Certum est quod dæmones hominibus semper nocere conentur, eos, Deo ita permittente, impugnando, & ad peccatum inducendo, quare Apost. Ephes. 6. dicit: *Nobis non est colluctatio adversus carnem & sanguinem, sed adversus principes & potestates, adversus mundi rectores tenebrarum harum, contra spiritualia nequitia in caelestibus, id est, in aere.*

Resp. 2. Non est credendum, quod Deus cuilibet homini tentatorem mittat ad exercitium; quia hoc repugnat bonitati Dei, qui, ut dicitur Jacobi 1. *Neminem tentat.*

Resp. 3. Valde probabile est, Luciferum, qui propter superbiam & æmulationem opera Dei audet usurpare, cuilibet homini dæmonem tentatorem deputasse, ut colligi posse videtur ex 1. Petri 5. *Vigilate, quia adversarius vester diabolus, tanquam leo rugiens, circuit quarens quem devoret.*

DISSERTATIO II.

De visibilis hujus universi creatione.

Nota. **M**Oyses, Genes. 1. narrat creationem hujus mundi aspectabilis sex diebus perfectam fuisse, refertque quid singulis diebus productum fuerit, ad quem remittimus eos qui ordinem creationis voluerint scire, ut de solo homine, qui, tanquam opus Dei præstantissimum, ultimo loco formatus est, disseramus; agemusque, 1. De ejus creatione. 2. De dotibus quas accepit a suo auctore. 3. De ejus peccato.

C A-

CAPUT PRIMUM.

De primi hominis creatione.

QUÆRES 1. *Quinam fuerunt primus homo, & prima mulier?*

Resp. *Fuerunt Adamus & Eva. Est de fide contra Præadamitas.*

Prob. *Quia, Genes. 2. ubi fit recapitulatio creationis cæli & terræ; dicitur: Homo non erat qui operaretur terram; & statim sequitur: Formavit igitur Dominus Deus hominem, &c. eod. cap. dicitur: Adæ vero non inveniebatur adjutor similis ejus. Atqui si fuissent Præadamitæ, inventi fuissent viri ac mulieres sibi in natura similes, nec Eva potuisset dici mater sanctorum viventium. Genes. 3. nam Præadamitæ fuissent viventes, ergo.*

QUÆRES 2. *Ubinam fuerunt conditi Adamus & Eva?*

Resp. *Adamus & Eva extra paradisum volutatis conditi sunt, in quem paulo post translati fuere.*


Prob. *Ex Genes. 2. ubi dicitur: Tulit ergo Deus hominem, & posuit eum in paradiso voluptatis, ut operaretur & custodiret illum; id est, ut docet D. August. (1) ut operaretur per agriculturam, non laboriosam, sed delitiosam... custodiret autem eundem paradisum ipse sibi, ne aliquid admitteret, quare inde mereretur expelli. Illud autem intelligitur de Adamo & Eva.*

Dices: *Eva formata est in paradiso; ergo.*

Prob. ant. *Juxta narrationem Moysis, Deus postquam posuit hominem in paradiso, formavit mulierem ex costa Adami; ergo.*

Resp.

(1) L. 8. de Genesi ad litteram, cap. 10.



Resp. nego ant. Equidem productio Evæ narratur postquam narrata est translatio hominis in paradysum; verumtamen, juxta ordinem productionis rerum, prius formata est Eva, quam homo in paradiso poneretur, hoc patet tum ex hoc cap. 2. *Genes.* ubi per vocem, *hominem*, intelligit Adamum & Evam; nam sic habet textus, *Tulit ergo Deus hominem, & posuit eum in paradiso voluptatis... præcepitque ei dicens: Ex omni ligno paradisi comede, de ligno autem boni & mali ne comedas, &c.* Ergo cum hominem posuit in paradiso, cui præcepit: atqui præcepit Adamo & Evæ: nam Eva serpenti interroganti, respondit, *De fructu vero ligni, quod est in medio paradisi, præcepit nobis Deus ne comederemus.* Præterea. *Genes.* 1. dicitur: *Creavit Deus hominem ad imaginem suam; ad imaginem Dei creavit illum, masculum & feminam creavit eos.* Ergo per *hominem*, intelligit utrumque sexum, quem comprehendit vox, *homo*.

Quæ. 3. Quomodo Adam & Eva fuerint producti.

Resp. 2. Adam ex limo terra formatus fuit a Deo, qui inspiravit in faciem ejus spiraculum vita, id est, animam, ita refertur *Gen.* 1. per hoc significatur discrimen inter corpus & animam, quod illud ex præsupposito subjecto, limo nimirum, productum sit, anima econtra ex nihilo creata sit.

Resp. 2. Corpus Evæ fuit formatum ex costa Adami, quam Deus extraxit, & spatium quod occupabat replevit carne. *Genes.* 1.

Quæres 4. Quare Deus fecit mulierem ex viri costa?

Resp. Propter varias rationes. 1. Ut vir magis diligat uxorem, & sint duo in carne una, ut exprimit Scriptura. 2. Ut appareat qualis esse debeat societas inter virum & uxorem:

mulier enim non est facta ex capite, ne dominetur; non ex pedibus, ne serviat, sed ex costa, ut vitæ focia sit. 3. Ut adumbretur Sacramentum Ecclesiæ, quæ de latere Christi secundi Adam in cruce dormientis formata est, ut tradit D. August. tract. 9. in Joann. *Dormit Adam, inquit, ut fiat Eva; moritur Christus, ut fiat Ecclesia; dormienti Ada fit Eva de latere, mortuo Christo lancea percutitur latus, ut profluant Sacramenta, quibus formetur Ecclesia.*

Quæres 5. *Quare Scriptura dicit mulierem esse datam viro in adiutorium?*

Resp. Hoc dicitur, eo quod data sit ad Fideliorum generationem: *Ad quod aliud adiutorium mulier facta sit viro, inquit D. Aug. (m) si generandi causa subtrahatur?* Ex quo sequitur naturam humanam in statu innocentiae propagaturam fuisse ex conjunctione maris & feminae; quibus Deus dixit, non secus ac aliis animantibus, *crescite & multiplicamini.*

Quæres 6. *In quo consistit imago & similitudo Dei, ad quam homo factus est?*

Resp. In eo consistit quod homo intellectu, voluntate libera, & dominio in alias creaturas sit præditus, ut docet D. August. tract. 8. in *Epist. primam Joannis*; ratio est; quia homo, pro modulo suo, per illas facultates imitatur suum exemplar: nempe per intellectum efformat verbum, in quo ipsi repræsentantur omnia quæ sub ejus notitiam cadunt; per voluntatem liberam, non solum producit amorem eorum omnium quæ intellectus amanda proponit, sed etiam actuum suorum est dominus, atque præest cunctis animantibus; unde postquam dixit Deus, *faciamus hominem ad imaginem*

(m) Lib. 6. de Genes. ad litteram, cap. 7.

finem & similitudinem nostram, addit, & præ
sit piscibus maris, & volatilibus cali, &c.

Quæst. 7. In quo statu primus homo fuerit creatus?

Nota ante responsionem. Status naturæ, est, certa conditio, qua, juxta legem divina provi-
dentia, tota natura humana certo modo se habet
in ordine ad suum finem ultimum. Sextuplex
potest distingui status naturæ, quorum tres
reales, scilicet, status natura innocentis: status
natura lapsa: & status natura per Christum re-
parata. Et tres possibiles, nempe, status na-
tura pura; status natura integræ; & status na-
tura lapsa, non reparata.

Status naturæ innocentis, est, *Conditio natura
humana in justitia originali creata.*

Status naturæ lapsæ, est, *Conditio natura hu-
mana justitia originali priuata.* In hoc statu
sunt omnes posterii Adami ante Baptismum.

Status naturæ reparatæ, est *Conditio natura
humana in justitia per Christum restituta.* In
hoc statu sunt omnes posterii Adami post Ba-
ptismum.

Status naturæ puræ, est, *Conditio natura hu-
mana considerata in meris suis perfectionibus na-
turalibus, absque gratia & peccato, obnoxia ta-
men iisdem, quibus nunc premitur, infirmitati-
bus: nimirum fami, siti, ægrotudini, morti &
concupiscentiæ.* Utrum hic status fuerit possi-
bilis? videbimus infra.

Status naturæ integræ, est, *Conditio natura,
in qua homo, nec gratia supernaturali pradi-
tus, nec peccato infectus, nullam appetitus sensitivi
adversus rationem experiretur rebellionem.* Licet
hic status non extiterit, tamen reduci potest
ad statum naturæ puræ, quatenus homo esset
absque gratia & peccato; & ad statum inno-
centiæ, quatenus rebellionem appetitus sensiti-
vi non experiretur.

Sta-

Status naturæ lapsæ non reparatæ, est: *Conditio natura, in qua fuisset homo post peccatum, si Deus eum per suam infinitam misericordiam non redemisset.* De hujus status possibilitate nulum unquam fuit dubium. His notatis:

Resp. Primus homo fuit creatus in statu justitiæ originalis.

Prob. Quia Eccl. 7. *Deus fecit hominem rectum*; atqui illa rectitudo est justitia originalis, qua anima hominis erat perfecte subdita Deo, & appetitus sensitivus perfecte subditus animæ, & ipsum corpus erat immortale & incorruptibile, quæ sunt totidem effectus justitiæ originalis, & hominis innocentis dotes; de quibus

C A P U T II.

De dotibus, quas homo innocens accepit a suo auctore.

Nota. Illæ dotes sunt, gratia sanctificans, subjectio partis inferioris ad superiorem, immortalitas, & immunitas a miseria, de quibus quæritur. 1. An homo innocens illas acceperit in sui creatione; 2. An justitia originalis & illæ dotes homini innocenti naturales fuerint, vel supernaturales.

Q U Æ S T I O I.

An homo in sua creatione gratiam sanctificantem, & dictas alias dotes a Deo acceperit?

C O N C L U S I O I.

Homo, in suo ortu, accepit a Deo gratiam sanctificantem.

Prob. 1. Ex Script. Eccl. 17. *Deus creavit de Charmes, Theol. Schol. Tom. III.* B ter-

terra hominem & secundum se vestivit illum virtute . Atqui per hunc textum SS. Patres & Interpretes intelligunt gratiam sanctificantem, quam Adamus accepit in sua creatione; ergo, &c. unde Apost. exhortans ad recuperationem gratiæ sanctificantis per peccatum amissæ, dicit, Ephes. 4. *Renovamini spiritu mentis vestra, & induite novum hominem, qui secundum Deum creatus est in justitia, & sanctitate veritatis.*

Prob. 2. Ex D. August. (n) Fecit Deus, inquit, sicut scriptum est, hominem rectum, ac per hoc voluntatis bona: non enim rectus esset, bonam non habens voluntatem: bona igitur voluntas, opus est Dei. Atqui D. August. per bonam voluntatem, intelligit gratiam sanctificantem: Quasi vero, inquit, l. de grat. cap. 21. aliud sit bona voluntas, quam charitas, quam Scriptura nobis esse clamat ex Deo, & a Patre datam, ut filii ejus essemus. Ergo, &c. Sed:

Quæres: An sit de fide, primum hominem, in primo instanti sua creationis, gratiam habuisse sanctificantem?

Resp. negative: Quia nec satis expresse in Scripturis continetur, nec definitum reperitur, porro ut aliquid, quod explicite non continetur in Scripturis, sit de fide catholica, requiritur definitio Ecclesiæ.

Dices: Hanc veritatem Concil. Trid. defini- vit: Si quis, inquit, sess. 6. de peccato origin. can. 10. non constitetur primum hominem Adam, cum mandatum Dei in paradiso fuisset transgressus, statim sanctitatem & justitiam, in qua constitutus fuerat, amisisse, &c. anathema sit. Ergo.

Resp.

(n) L' b. 4. de Civ. Dei, cap. 11.

Resp. nego ant. Aliud est enim in sanctitate constitutum fuisse, aliud in ea creatum esse, nam & in paradiso constitutus, id est, positus fuit Adam, quamvis in eo creatus non fuerit.

CONCLUSIO II.

Homo, in suo ortu, tantam accepit a Deo scientiam, ut non potuerit esse errori obnoxius.

Prob. Ex Script. Eccl. 17. Deus . . . disciplina intellectus replevit illos; creavit illis scientiam Spiritus, sensu implevit cor illorum. Unde D. August. lib. 3. de lib. arbit. cap. 18. ait: Approbare falsa pro veris, ut erret invitus, non est natura instituti hominis, sed poena damnati. Ergo.

Dices; Eva, adhuc innocens, decepta fuit a serpente, ut ipsa testatur, Gen. 3. Serpens decepit me, & comedi. Ergo homo innocens errare potuit.

Resp. nego ant. Non enim Eva innocens erat quando fuit decepta, nam licet peccatum nondum opere compleverat, tamen corde, per internam nimirum elationem, jam illud patraverat. Nec arbitrandum est, inquit D. Augustinus (o) quod esset hominem dejecturus iste contator, nisi praeceisset in anima hominis quadam elevatio comprimenda.

Instab. Adamus ipse de fructu vetito comedit, ut æqualitatem cum Deo, a serpente promissam, consequeretur; ergo fuit seductus.

Resp. nego ant. Nam ideo tantum comedit fructum vetitum, ne contristaret uxorem, ad hanc

(o) Lib. 11. de Genes. ad litteram, cap. 5.

hanc comestionem eum invitantem, ut docet Divus Augustinus (p) dicens: *Non enim frustra dixit Apostolus: Adam non est seductus, mulier autem seducta est (q) nisi quia illa, quod ei serpens locutus est, tanquam verum esset, accepit: ille autem ab unica noluit consortio dirimi, nec in communione peccati, nec ideo minus reus, sed sciens prudensque peccavit.*

CONCLUSIO III.

Appetitus sensitivus in Adamo innocente ita perfecte rationi erat subditus, ut nullis inordinatis concupiscentia motibus fuerit obnoxius. Est de fide.

Prob. 1. Ex Eccl. 17. Deus fecit hominem rectum; atqui non fuisset rectus, si inordinatis concupiscentia motibus fuisset obnoxius; ergo, &c. Hinc Concilium Trid. sess. 5. can. 5. definit concupiscentiam ideo ab Apostolo peccatum dici, quia ex peccato est, & ad peccatum inclinat.

Probat. 2. Tunc primum in Adamo & Eva exorta est concupiscentia, quando de sua nuditate erubuerunt; atqui solum post peccatum de sua nuditate erubuerunt; nam, ut ait Divus Augustinus Ante peccatum erat uterque nudus, Adam scilicet & uxor ejus: & non erubescabant. Post peccatum vero, aperti sunt oculi amborum, cumque cognovissent se esse nudos &c. quem locum exponens D. Aug. (r) ait: Verum est, omnino nuda erant corpora duorum hominum in Paradiso conversantium, nec pudebat

(p) Lib. 14. de Civit. Dei, cap. 11.

(q) 1. ad Timoth. 2.

(r) Lib. 11. de Genes. ad litteram, cap. 1.

bat eos: quid enim pueret, quando nullam legem senserant in membris suis repugnantem legi mentis suæ, quæ illos pœna peccati post perpetrati-
onem pravaricationis secuta est iustitia pu-
niente commissum; ergo.

CONCLUSIO IV.

Homo innocens, fuit conditus immortalis & ab omni miseria liber. Est de fide contra Pelagium.

Prob. prima pars 1. Ex Script. Rom. 5. Per unum hominem peccatum intravit in mundum, & per peccatum mors. Ergo ante peccatum, corpus hominis non erat morti obnoxium, quæ, Rom. 6. dicitur stipendium peccati.

Sap. 2. dicitur: Deus mortem non fecit: invidia autem diaboli mors intravit in mundum; Atqui si corpus hominis innocentis mortale fuisset, Deus ipse fecisset mortem, quam in mundum invexisset, plasmando corpus quod esset morti obnoxium; ergo.

Probat. 2. Ex Synodo Palæstina, quæ hanc Pelagii propositionem damnavit ut hæreticam: Adam mortalis factus est, ita ut, si peccaret, si non peccaret, moriturus esset. Et Conc. Trid. sess. 5. can. 1. definit: Si quis non confiteatur primum hominem Adam incurrisse per offensam pravaricationis huiusmodi, iram atque indignationem Dei, atque adeo mortem, quam antea illi comminatus fuerat, anathema sit.

Respondent Pelagiani, textus Scripturæ, qui homini peccanti mortem comminantur, intelligendos esse de morte animæ, non vero corporis; ergo, &c. Sed:

*Contra est: Illi textus intelligendi sunt de morte, quam Deus homini minatus fuerat; atqui mortem corporis comminatus est, ut cor-
Charmes, Theol. Schol. Thom. III. B 3 ita*

stat ex his, Genes. 3. verbis; *Quia comedisti de ligno, ex quo praeceperam tibi ne comederes in sudore vultus tui vesceris pane donec revertaris in terram de qua sumptus es: quia pulveris es & in pulverem reverteris*. Hæc porro de morte animæ intelligi non possunt. *Prob. secunda pars. 1.* Ex D. Augustino, qui expresse nostram conclusionem tuetur: *Quam igitur, inquit, (f) felices erant primi homines, & nullis agitabantur perturbationibus animorum, nullis corporum ladebantur incommodis, &c.*

Prob. 2. ratione, desumpta ex eodem Div. August. *Quis enim, inquit lib. 12. de Civ. Dei. cap. 12. primos illos homines in Paradiso negare audeat beatos fuisse ante peccatum? fuerunt ergo beati beatitudine naturali; atqui ex eodem, lib. 14. cap. 10. Quis tandem absolute dici beatus potest, qui timore afficitur, vel dolore, quid autem timere vel dolere poterant illi homines in tantorum tanta affluentia bonorum, ubi nec mors metuebatur, nec ulla corporis mala valendo: nec inerat quod carnem animumve hominis feliciter viventis offenderet? ergo.*

Solvuntur Objectiones.

Objicies contra primam partem. Corpus quod constat ex elementis contrariis, est mortale; atqui corpus primorum parentum, ante peccatum, constabat ex elementis contrariis, non secus ac nunc; ergo.

Resp. dist. maj. Corpus, quod constat ex elementis contrariis, est mortale, si suæ naturali conditioni permittatur, *conc.* si pugna elementorum contrariorum impediatur, *neg. maj.*

Porro

(f) Lib. 14. de Civit. Dei, cap. 10.

Porro per dotem immortalitatis, quam homo innocens a Deo accepit in suo ortu, pugna elementorum fuit taliter impedita, ut nullam alteri læsionem afferre potuerit, & sic homo mori non potuerit.

Inst. 1. Corpus, quod tandem consenuisset; erat mortale; atqui corpus Adami innocentis tandem consenuisset; ergo.

Resp. nego min. Quia, ex D. August. *lib. 1. de peccat. meritis, cap. 3.* corpus Adami innocentis habebat.... & de lignorum fructibus refectiōem contra defectionem, & de ligno vitæ stabilitatem contra verustatem.

Inst. 2. Homo innocens, saltem ab extrinseco, puta igne, aqua, ferro, subversione molis, &c. obrui potuisset; ergo erat mortalis.

Resp. dist. ant. Potuisset obrui, si singulari Dei providentia non fuisset conservatus, *conc.* si sic fuisset conservatus, *nego antec.* & *conseq.* Deus enim impeditus fuisset, ne objecta extrinseca corpori hominis innocentis aliquod detrimentum inferrent, cum, ut ait Divus Augustinus ibidem, *Deus vellet (eum) à mortalitate ad immortalitatem, sine media morte venturum.*

Inst. 3. D. August. ibidem, *cap. 5.* ait: *illud corpus, hominis innocentis, jam erat mortale.* Ergo &c.

Resp. dist. antec. Jam erat mortale, id est, poterat mori, *conc.* debebat mori, *nego antec.* Hic est verus sensus D. Augustini qui, *lib. 1. contra Julianum, operis imperfecti*, dicit: *Poterat mori; poterat namque peccare, sed non debebat mori: quando enim dixit Divus Augustinus: Corpus jam erat mortale, addit, sed ipsum mortale non est factum mortuum, nisi propter peccatum.* Et *lib. 6. de Genes. ad litter.*

cap. 25. *Mortalis ergo erat, inquit, condicione corporis animalis, immortalis autem beneficio conditoris.*

Objicies contra secundam partem. Homines in statu innocentiae famem, sitim passi fuissent; ergo.

Prob. ant. Illi, famem, sitim, &c. passi fuissent, qui, ut iis incommodis mederentur, usi fuissent cibo & potu; atqui homines in statu innocentiae, ut fami & siti mederentur, usi fuissent cibo & potu, Genes. 1. Ecce dedi vobis omnem herbam & universa ligna, ut sint vobis in escam; ergo, &c.

Respond. nego min. Non enim cibus datus est hominibus innocentibus, ut famem & sitim extinguerent, sed ut ipsas vitarent: Vivebat itaque, inquit Divus Augustinus, (1) homo in paradiso sicut volebat cibus aderat, ne esuriret: lignum vite, ne illum senectus dissolveret: nihil corruptionis in corpore, vel ex corpore ullas molestias ullis ejus sensibus ingerebat.

Q U Æ S T I O II.

An justitia originalis, sanctitas, immortalitas, &c. fuerint homini innocenti naturales, vel supernaturales?

Nota. 1. **N**aturale dicitur, quod est secundum exigentiam naturæ, ipsique debitum, vel tanquam ejus pars, vel tanquam proprietas, ex ejus principiis fluens, ita ut sine injustitia ipsi denegari non possit. Econtra supernaturale, est quod superat omnem naturæ hu-

(1) Lib. 14. de Civit. Dei, cap. 26.

ræ humanæ exigentiam, eique plane indebitum est.

Nota 2. Novatores, Lutherani, & Calvinistæ, ut ostenderent hominem per peccatum fuisse ita læsum in donis naturalibus, ut liberum arbitrium in eo penitus extinctum fuerit, docuerunt justitiam originalem, sanctitatem & immortalitatem naturæ innocenti fuisse debitas ac plane naturales: *Statuimus*, inquit Luther. ad cap. 3. Genes. *justitiam non fuisse quoddam donum, quod ab extra accederet, separatum a natura hominis, sed fuisse vere naturalem; ita ut naturā Ada esset diligere Deum, credere Deo, agnoscere Deum, &c.* Hac tam naturalia fuere in Adamo, quam naturale est, quod oculi lumen recipiant, &c. Postea addit, Porro hac omnia probant originalem justitiam fuisse de natura hominis: ea autem per peccatum amissa, manifestum est naturalia non mansisse integra, sicut Scholastici delirant. Calvinus pariter, lib. 1. instit. cap. 15. docet, divinæ justitiæ & bonitati repugnare, primitus hominem creari absque justitia originali ejus naturæ debita.

His accesserunt Bajus, Jansenius, & Quesnellus.

CONCLUSIO.

Justitia originalis, sanctitas, & immortalitas in homine innocente, fuit supernaturalis; ac consequenter possibilis fuit status natura pura.

Probat. 1. Auctoritate SS. Pontific. Pii V. Gregor. XIII. & Urbani VIII. qui has Baji propositiones damnarunt.

XXI. Humanæ nature sublimatio & exaltatio in consortium divinæ natura debita fuit integritati primæ conditionis, & proinde naturalis dicenda est, & non supernaturalis.

B 5

XXIII.

XXIII. Absurda est eorum sententia, qui dicunt hominem ab initio, dono quodam supernaturali & gratuito, supra conditionem naturæ suæ fuisse exaltatum, ut fide, spe, & charitate, Deum supernaturaliter coleret.

LXXIX. Falsa est Doctorum sententia, primum hominem potuisse a Deo creari & institui sine iustitia naturali. Similes sunt propositiones 1. 3. 7. 9. 24. 26. 55. 78. videantur in Prolegomenis nostris.

Item Clemens XI. damnavit has Quesnellii propositiones:

XXXIV. Gratia Adami non producebat, nisi merita humana.

XXXV. Gratia Adami est sequela creationis, & erat debita naturæ sanæ & integræ.

Probat. 2. Ex Divo Augustino, qui pluribus locis nostram conclusionem astruit, lib. 4. contra Julian. cap. 16. Quid est, inquit, gustato cibo prohibito, nuditas indicata, nisi peccato nudatum, quod gratia contegebat? gratia quippe Dei magna ibi erat, ubi terrenum & animale corpus bestialem libidinem non habebat. Qui ergo vestitus gratia non habebat in nudo corpore quod puderet; spoliatus gratia, sensit quod operire deberet. Ergo si donum integritatis in natura innocente fuit gratia, natura innocens sine eo potuit creari, nam quod est gratuitum, est indebitum naturæ, ejusque exigentiam superat.

Lib. 8. de Genes. ad litteram, cap. 25. de Adamo dicit: Mortalis ergo erat conditio corporis animalis: immortalis autem beneficio conditoris. Ergo immortalitas non erat debita naturæ humanæ, sed ei, mirabili Dei gratia, prestabatur, ait Divus Doctor lib. 13. de Civitate Dei, cap. 20. Ergo natura humana potuit primitus creari sine immortalitate sibi indebita.

Prob. 3. 1

Prob. 3. ratione. Deus potest hominem creare cum defectibus naturalibus; *Quamvis*, inquit Divus Augustinus lib. 1. retract. capit. 9. *Ignorantia & difficultas, etiamsi essent primordia hominis naturalia, nec sic culpandus, sed laudandus esset Deus.* Atqui concupiscentia, mortalitas, &c. sunt defectus naturales, qui non possunt nisi creatoris gratia, impediri, ergo, &c.

Solvuntur Objectiones.

Obicies 1. Deus non potuit hominem creare cum concupiscentia; ergo justitia originalis, quæ est virtus cohibitiva concupiscentiæ, est naturalis homini.

Probat. ant. Ex D. August. (u) Ignorantia & concupiscentia, sunt poenæ peccati; atqui poenæ peccati non possunt infligi a Deo homini innocenti; ergo Deus non potuit hominem creare cum ignorantia & concupiscentia.

Resp. dist. maj. Sunt poenæ peccati, in præsentī rerum statu, *conc.* in statu naturæ puræ, *nego maj.* in hoc enim statu fuissent primordia naturalia. *Non supplicium peccati*, ait D. Augustinus ibidem cap. 20. *sed proficiendi admonitio, & perfectionis exordium.*

Inst. 1. Deus non potuit creare hominem cum eo quod inclinat ad peccatum; atqui concupiscentia inclinat ad peccatum; ergo, &c.

Resp. dist. maj. Deus non potuit creare hominem cum eo quod inclinat ad peccatum per se, prout sunt habitus vitiosi, *conc.* per accedens, cujusmodi sunt divitiæ, ignorantia, &c. *nego major.* Porro concupiscentia per se, est po-

(u) Lib. 3. de lib. arbitrio, cap. 18.

potentia concupiscendi bona sensibilia, quo sensu est bonum naturæ, quatenus est principium actuum ad naturæ functiones & conservationem necessariorum, & rectæ rationi consentaneorum, licet quatenus erumpere potest in motus inordinatos, sit defectus naturæ connaturalis, & a Deo permissus ex munere causæ primæ: immo Deus plura auxilia ordinis naturalis concederet ad motus illos reprimendos, nec ad illos alio modo concurreret, quam nunc ad entitatem actus mali concurrir.

Inst. 2. In statu naturæ puræ, homo membrorum rebellionem erubesceret; sed repugnat quod homo, absque peccato præcedente, erubescat; ergo.

Resp. nego min. Non enim repugnat, quod sicut in illo statu esset membrorum rebellio propter carentiam iustitiæ originalis, qua pars inferior superiori perfecte subicitur; ita esset erubescencia connaturalis, quæ ex tali rebellionem oriretur.

Inst. 3. Ergo homo erubesceret de opere Dei; atqui hoc est absurdum; ergo, &c.

Resp. nego illatum, nam opus Dei est natura, non defectus naturæ; habet enim natura ex nihilo creata, ut per se defectibilis sit; unde rebellio membrorum in statu naturæ puræ, non esset a natura, qua bona, sed a natura, qua defectibilis est.

Objicies 2. Deus non potuit creare hominem sine ordinatione ad suum finem ultimum; ergo nec potuit eum creare sine iustitia & sanctitate ad illum finem assequendum ordinatis.

Resp. dist. antec. Sine ordinatione ad suum finem ultimum, vel naturalem, vel supernaturalem, *conc.* sine ordinatione ad finem supernaturalem, *nego ant.* Duplex itaque est finis, nempe naturalis & supernaturalis. *Naturalis,*
con-

consistit in perfecta quadam contemplatione Dei abstractiva, & ejusdem, ut auctoris naturæ, amore, qui viribus naturæ non depravata elici potest. *Supernaturalis* vero, consistit in Dei visione intuitiva, & amore fructivo; ad priorem finem natura humana fuisset ordinata, si in puris naturalibus condita fuisset, illumque mediis naturalibus consequi potuisset.

Inst. 1. Deus non potuit creare hominem sine ordinatione ad id quod naturaliter appetit; atqui homo naturaliter appetit finem suum ultimum supernaturalem; ergo, &c.

Respond. dist. min. Homo naturaliter appetit finem suum ultimum supernaturalem, in præsentī statu, *conc.* in statu naturæ puræ, *neg. min.* itaque homo naturaliter appetit id, ad quod creatus est: atqui in statu naturæ puræ homo creatus esset ad solam beatitudinem naturalem; ergo solam beatitudinem naturalem appeteret naturaliter; in præsentī vero statu, homo, cum ordinatus sit ad beatitudinem supernaturalem, eam naturaliter appetit.

Inst. 2. Quod naturaliter appetitur, in quovis statu appetitur; atqui, ex concessis, homo naturaliter appetit beatitudinem supernaturalem in præsentī statu; ergo & eam appetiisset in statu naturæ puræ.

Resp. dist. maj. Quod naturaliter appetitur, appetitu innato, *conc.* appetitu elicito, *neg. maj.* atqui homo in præsentī statu naturaliter appetit beatitudinem supernaturalem, appetitu elicito, *conc.* appetitu innato, *neg. minor. & conseq.* Itaque appetitus naturalis, alius est innatus, alius elicitus; *appetitus innatus*, est rei proclivitas ad proprium bonum, etiam absque discursu aut reflexione, sic qui sitit, appetit potum. *Appetitus elicitus*, est naturalis actus rei aliquod bonum appetentis supposito discursu.

fu, seu reflexione, tale est desiderium hominis, qui, admirando effectum, causam videre cupit. Porro appetitus videndi Deum intuitivè, est elicitus, quatenus homo, supposita revelatione, desiderat videre eum, quem scit sibi propositum esse tamquam beatitudinem suam, per actus supernaturales, possidendam.

Inst. 3. Deus non potuit creare hominem in eo statu, in quo homo non posset amare Deum propter se; atqui in statu naturæ puræ, homo non posset amare Deum propter se; ergo.

Respond. dist. min. Homo non posset amare Deum propter se, amore supernaturali, *conc.* amore naturali, *nego min.* Itaque duplex amor distinguitur, nimirum *naturalis*, quo Deus amatur ut auctor naturæ; & *supernaturalis*, quo Deus amatur ut beatificator supernaturalis; porro homo in statu naturæ puræ non potuisset amare Deum amore supernaturali, ad hoc enim requiritur gratia, qua in illo statu non donatus fuisset, potuisset autem amare Deum amore naturali, ad quem sufficere possunt media naturalia, quibus Deus hominem juvasset in illo statu.

Inst. 4. Amor Dei naturalis, fictitius est, & impossibilis; Ergo.

Resp. nego ant. Cujus falsitas constat ex hac Baji proposit. damnata a Pio V. & Greg. XIII. *Distinctio illa duplicis amoris, naturalis videlicet, quo Deus amatur ut auctor natura; & gratuiti, quo Deus amatur ut beatificator, vana est & commentitia, & ad illudendum Sacris litteris & plurimis veterum testimoniis excogitata.*

Inst. 5. Divus Augustinus (x) ait: Unde est
in ho-

(x) Lib. 3. de gratia & lib. arbit. c. 18.

in hominibus charitas Dei & proximi, nisi ex ipso Deo? nam si non ex ipso Deo, sed ex hominibus, uicerunt Pelagiani: si autem ex Deo, uicimus Pelagianos. Ergo nullus potest esse amor Dei propter se, ex solis naturæ viribus.

Resp. dist. conseq. Nullus est amor Dei supernaturalis ex solis naturæ viribus, *conc.* naturalis, *nego conseq.* Porro D. August. hic loquitur de amore supernaturali, & ad salutem æternam sufficiente.

Inst. 6. Divus Augustinus variis locis, docet omnem amorem creaturæ rationalis esse charitatem, aut cupiditatem; atqui per charitatem intelligit Dei amorem supernaturalem, qui producitur per Spiritum sanctum; ergo.

Resp. nego min. Nam Divus Augustinus per charitatem, non intelligit amorem supernaturalem, sed amorem boni & honesti, qui est amor alicujus virtutis, ex quo sequitur tantum, omnem amorem creaturæ rationalis esse bonum, vel malum; sed inde non sequitur, omnem amorem creaturæ rationalis, qui non sit Dei propter se dilecti, esse vitiosam cupiditatem, ut constat ex hac propositione Bajana: *Omnis amor creatura rationalis, aut vitiosa est cupiditas, qua mundus diligitur, qua a Joanne prohibetur: aut laudabilis illa charitas, qua per Spiritum sanctum in corde diffusa, Deus amatur.*

C A P U T III.

De Peccato primi hominis.

QUÆRES 1. Quodnam fuerit peccatum primum
rum parentum?

Respond. Fuit superbia, quæ est inobedientiæ origo.

Probat.

Probat. Ex Scriptura, Tob. 4. qui, deterrens Filium suum a superbia, dat hanc rationem: In ipsa enim initium sumpsit omnis perditio. Et Apostolus, Roman. 5. dicit: Per inobedientiam unius hominis peccatores constituuntur multi. Atqui inobedientia est actus superbiæ: primus enim actus superbiæ est, nolle alterius imperio subjici; ergo, &c. Hinc Divus Augustinus (y) ait: Ab homine peccante nihil aliud appetitum est, nisi non esse sub dominatione Dei, quando illud admissum est, in quo ne admitteretur, sola deberet jussio dominantis attendi.

Quæres 2. Quanam fuit causa peccati primorum parentum?

Resp. Causa illius extrinseca fuit diabolus, intrinseca vero fuit eorum voluntas.

Prob. prima pars: Ille fuit causa extrinseca peccati primorum parentum, qui illos ad divinæ legis infractionem induxit; atqui diabolus induxit primos parentes ad divinæ legis infractionem, Evæ dicens: In quocumque die comederitis ex eo.... eritis sicut dii, &c.

Probat. secunda pars: Causa interna peccati primorum parentum fuit, vel ignorantia, vel concupiscentia, vel voluntas; atqui nec fuit ignorantia, qua non laborabant primi parentes, nec concupiscentia, cujus motibus, ante peccatum non erant obnoxii; ergo.

Dices: Causa interna peccati primorum parentum fuit concupiscentia fructus vetiti; juxta illud: Vidit mulier quod bonum esset lignum ad vescendum, & pulchrum oculis, &c. ergo non fuit voluntas.

Resp. nego ant. Quando enim Eva concupivit fructum vetitum, jam interne peccaverat, sibi

(y) Lib. 8. de Genesi, cap. 12.

sibi complacendo in independentia quam ei serpens hisce verbis promiserat , *Eritis sicut dii scientes bonum & malum.*

Quæres 3. *Quale fuit peccatum primorum parentum ?*

Resp. Fuit peccatum mortale , & quidem gravissimum , nimirum superbia , qua independentiam , quæ attributum est Deo proximum , sibi tribuere concupierunt.

Quæres 4. *Quanam fuerunt pœna peccati primorum parentum.*

Resp. Multiplices fuere , tum quoad corpus , tum quoad animam.

Prima pœna quoad corpus , fuit ejectio a beatitudine in hujusce vitæ miseras , famem , nempe , sitim , dolores , labores ; &c. *Secunda pœna* , fuit mors corporalis ; utraque illa pœna describitur Genes. 3. quando Deus dixit mulieri , *Multiplificabo arumnas tuas . . . in dolore paries Filios , & sub viri potestate eris .* Et Adamo , *maledicta terra in opere tuo . . . in sudore vultus tui vesceris pane , donec revertaris in terram de qua sumptus es : quia pulvis es & in pulverem reverteris .*

Quoad animam , *prima pœna* fuit spoliatio omnium donorum supernaturalium . Adamus enim fuit spoliatus justitia originali , & consequenter omnibus sancti Spiritus donis , & virtutibus per se infusis.

Secunda pœna , fuit vulnus facultatum naturalium . Adamus quippe per peccatum in animæ potentiis quatuor accepit vulnera , scilicet *ignorantiam* in intellectu , *malitiam* in voluntate , *infirmiorem* in irascibili , & in concupiscibili appetitu *concupiscentiam* , quæ vulgo fomes peccati nuncupatur , & quam cum statim post peccatum experti fuissent Adamus & Eva , ipsos puduit se nudos videre .

Dixi :

Dixi: *Vulnus facultatum naturalium*: quia licet naturalia in Adamo peccante fuerint fauciata, non fuerunt tamen omnino extincta, ut docet Concil. Trident. *sess. 5. can. 1.*

Tertia pœna, fuit mortis æternæ debitum morale, quod Adamus per suum peccatum contraxit, & in hanc miseram sortem omnes posteros traxit, a qua non possunt exurgere nisi per merita mediatoris nostri Jesu Christi qui nos Deo reconciliavit in sanguine suo, factus nobis justitia, sanctificatio, & redemptio; *nisi*, enim, *quis renatus fuerit ex aqua & Spiritu sancto, non potest introire in regnum Dei.*





TRACTATUS

D E

DEO INCARNATO.

Nota. 1.



DEI incarnati nomine, intelligitur compositum resultans ex unione naturæ divinæ cum humana, in una verbi divini persona.

Nota. 2. Actio, per quam illa unio facta est, variis insignitur nominibus: dicitur enim a SS. Patribus, *assumptio*, *incorporatio*, *inhumanatio*, *attemperatio*, *œconomia*, sed præsertim vocatur, *incarnatio*, quæ vox primis Ecclesiæ temporibus usurpari coepit, ut constat ex his Symboli Nicæni verbis, *Et incarnatus est*; & licet in Scriptura non legatur, fundatur tamen in his verbis, Joann. 1. *Et Verbum caro factum est*.. Non quod Verbum assumpserit solam carnem animæ destitutam, ut nonnulli Ariani docuerunt.

cuerunt ; aut carentem mente , sicut Apollinarista blasphemarunt ; sed quod totam naturam humanam sibi conjunxerit : nam & nomen , *caro* ; non raro pro tota humanitate sumitur in Scripturis : sic Genes. 6. *Omnis caro corruperat viam suam* ; Luc. 3. *Videbit omnis caro salutare Dei* , id est , omnis homo .

Nota 3. Hunc de augustissimo Incarnationis mysterio tractatum septem dissertationibus absolvemus , quarum *Prima* , Erit de Incarnationis possibilitate . *Secunda* , De ejus convenientia . *Tertia* , De ejus necessitate . *Quarta* , De ejus existentia . *Quinta* , De ejus causis . *Sexta* , De ejus quidditate . *Septima* , De ejus termino , nempe de Christo Domino .



DISSERTATIO I.

De Incarnationis possibilitate .

Nota . **D**UO circa Incarnationis possibilitatem expenduntur ; *primum* , si re-possibilis Incarnatio ; *secundum* , utrum possibilitas Incarnationis ratione naturali possit demonstrari . Pro quo solvendo supponimus , quæ in tractatu de SS. Trinitate (a) notavimus , demonstrationem aliam esse *a priori* , per causas ;

(a) Dissert. x. cap. x.

fas ; aliam a posteriori , per effectus . Item aliquid posse demonstrari , vel positive , vel negative , supposita , vel non supposita mysterii revelatione . His , inquam , suppositis sit :

CONCLUSIO I.

Mysterium Incarnationis est possibile . Est non solum contra Gentiles , sed etiam contra Socinianos , qui omnes , quas possunt , rationes contra hujus mysterii possibilitatem opponunt .

Prob. 1. Quod revera peractum est , illud est possibile ; atqui Incarnatio revera peracta est , ut planum fiet Dissertatione quarta ; ergo .

Prob. 2. Illud est possibile , quod nullam involvit repugnantiam ; ergo , &c. *Prob. min.* Si quam Incarnatio involveret repugnantiam , hæc peteretur , vel ex parte Verbi assumentis , vel ex parte naturæ assumptæ , vel ex parte unionis utriusque ; atqui ex neutro capite repugnantia deduci potest , ut patebit objectionum solutione ; ergo .

Objectiones ex parte Verbi assumentis .

Objicies 1. Illud implicat contradictionem , ex quo sequeretur Deum fore mutabilem ; nam in illa suppositione , esset Deus , & non esset ; esset ex hypothesi ; non esset , quia immutabilitas est Deo essentialis , Malac. 3. *Ego Dominus , & non mutor .* Atqui ex possibilitate Incarnationis sequeretur Deum fore mutabilem ; ergo .

Probat. min. Quod acquirit novam formam , vere & proprie mutatur ; atqui Deus , supposita Incarnationis possibilitate , acquireret novam formam , videlicet humanam naturam , quam antea non haberet ; ergo .

Resp.

Resp. dist. major. Quod acquirit novam formam, tanquam subjectum quod ab illa forma perficiatur, vere mutatur, *conc.* tanquam terminus qui illam formam ultimo complet ac perficit, *nego maj.* Atqui Verbum divinum acquireret novam formam, tanquam terminus qui illam ultimo compleret ac perficeret, *conced.* tanquam subjectum quod ab illa forma perficeretur, *nego min.* Itaque Verbum divinum per Incarnationem non recipit in se humanitatem, & consequenter non est subjectum ab illa perfectibile, sed est terminus illius intrinsecus, quatenus, seipsum illi communicando, illam perficit ac ultimo complet, subindeque non mutatur.

Inst. 1. Verbum divinum per Incarnationem reciperet in se humanitatem; ergo esset subjectum ab ea perfectibile

Prob. ant. Qui de non homine fit homo intrinsece, recipit in se humanitatem tanquam illius subjectum; atqui Verbum divinum per Incarnationem de non homine fit homo intrinsece; ergo.

Resp. dist. maj. Qui de non homine fit homo intrinsece, per sui conversionem in humanitatem, *conc.* per assumptionem humanitatis, solamque illius terminationem, *nego maj.* unde D. Athanasius in Symbolo ait: *Deus factus est homo, non conversione divinitatis in carnem, sed assumptione humanitatis in Deum.* Proindeque in Incarnatione nulla prorsus facta fuit mutatio in Verbo divino.

Inst. 2. Verbum divinum per Incarnationem reciperet novam denominationem intrinsecam; nimirum, denominationem hominis; ergo reciperet in se humanitatem, ac proinde mutaretur intrinsece.

Resp. dist. ant. Reciperet novam denominationem
tio-

tionem intrinsecam petitam ab unionem substantiali & intrinseca sui cum humanitate, conc. petitam a forma intrinseca de novo in se recepta, nego ant. Itaque Verbum divinum per Incarnationem recipit intrinsecam hominis denominationem, quia intrinsece unitur humanitati, sed per illam unionem humanitas non perficit Verbum; e contra Verbum perficit humanitatem, proindeque tota mutatio in naturam humanam refunditur, quæ recipit personam Verbi, cui substantialiter unitur, & per quam terminatur omnimoda illius communicatio.

Inst. 3. Qua ratione natura humana dicitur mutari per Incarnationem, eadem Verbum divinum diceretur mutatum; ergo in utramque naturam refunderetur.

Prob. ant. Ideo natura humana dicitur mutari, quia in se recipit naturam divinam, cui antea non erat unita personaliter; atqui similiter Verbum divinum per Incarnationem in se recipit naturam humanam, quam sibi copulat personaliter, cui antea non erat unitum; ergo pari ratione per Incarnationem dicitur mutari.

Resp. nego minor. Disparitas enim est, quod Verbum divinum sibi copulat naturam humanam per modum terminantis illius dependentiam in ratione personæ; e contra natura humana in se recipit personam Verbi tanquam intrinsecum sui complementum, ita ut jam non in se subsistat, sed in Verbo, per quod ultimo completur substantialiter, sicque intrinsece perficitur.

Inst. 4. Humanitas est intrinseca Verbo; ergo in illo recipitur.

Resp. nego consequ. Non enim humanitas est Verbo intrinseca, quod recipiatur in illo ut sub-

subjecto sustentationis; sed quod subsistat vi subsistentiæ Verbi, id est, quod a Verbo, sup-
 plente defectum subsistentiæ propriæ, accipiat
 ultimum complementum substantiale & intrin-
 secum.

Obijcies 2. Actus purus non potest uniri
 cum ullo alio; atqui persona divina est actus
 purus; ergo, &c.

Probat. maj. Actus purus non potest dicere
 potentialitatem ad aliud, alias non esset pu-
 rus; atqui si persona divina uniretur cum alio,
 diceret potentialitatem ad illud; ergo.

Respond. dist. min. Si persona divina uniretur
 cum alio per modum partis componentis,
conced. per modum termini infiniti supple-
 vices alicujus termini creati, *nego min.* Porro
 Verbum divinum in Christo non habet ratio-
 nem partis propriæ dictæ; pars enim propriæ
 dicta, est quid incompletum & perfectibile a
 sua comparte; atqui Verbum divinum est infi-
 nite completum & tam perfectum se solo,
 quam compositum, quod ex ipso & humani-
 tate resultat; ergo, &c.

Inst. 1. Persona divina non potest uniri cum
 humanitate, nisi cum ipsa constituat unum per
 se; atqui ex pluribus non potest constitui unum
 per se, nisi unum eorum habeat rationem actus,
 aliud vero rationem potentiæ; ergo.

Resp. dist. min. Ex pluribus non potest con-
 stitui unum per se, nisi, &c. si illud unum
 per se, fiat per compositionem & informatio-
 nem, *conced.* si fiat per terminationem depen-
 dentiæ unius ad alterum, *nego min.* Porro Ver-
 bum divinum unitur humanitati, ut constituat
 unum per se, nempe Christum, non per mo-
 dum compositionis formalis, sed duntaxat per
 modum personæ divinæ terminantis, ac sup-
 plentis vicem personæ creatæ.

Inst. 2.

Inst. 2. Quæ constituunt unum per se, sunt entia incompleta; ergo habent rationem actus & potentia.

Resp. dist. antec. Quæ constituunt unum per se, in ratione naturæ, *conc.* in ratione suppositi, *nego ant.* Porro Verbum & natura humana in hoc mysterio constituunt unum per se, non in esse naturæ, sed in esse suppositi, sub qua ratione natura assumpta propria subsistentia, est incompleta, Verbum vero assumens est infinite completum in omni ratione, unde non est perfectibile, sed humanitatis perfectivum in ratione suppositi.

Inst. Verbum divinum non potest complere naturam creatam in ratione suppositi; ergo.

Prob. ant. Quod complet aliquid, se habet per modum causæ illius formalis; atqui Verbum divinum non potest habere rationem causæ formalis; ergo, &c.

Respond. dist. major. Quod complet aliquid, per modum formæ adhærentis & incompletæ, *conc.* per modum termini infinite perfecti & nullatenus perfectibilis, *nego major.* porro sic Verbum divinum complet naturam humanam, quæ sic a Verbo terminata, in se non subsistit, sed in Verbo, cujus fit natura.

Obijcies 3. Si verbum divinum incarnaretur, Pater, & Spiritus sanctus, simul incarnarentur; falsum consequ. ergo.

Prob. major. Tres personæ unam eandemque numero habent naturam; ergo una non potest incarnari, quin cæteræ incarnentur.

Resp. nego consequ. Ratio est, quia unio, in Incarnatione, non est facta in natura tribus personis communi, sed facta est in persona Verbi realiter distincta a personis Patris, & Spiritus sancti.

*Objectiones ex parte naturæ humanæ
assumptæ.*

Objicies 1. Ut Incarnatio sit possibilis, necesse est ut natura humana sua propria spolie-
tur subsistentia; atqui natura humana non po-
test sua propria spoliari subsistentia; ergo.

Prob. min. Persona definitur: *Natura ratio-
nalis individua substantia*; atqui impossibile est
dari aliquam naturam actu existentem, quin sit
individua substantia; ergo natura humana non
potest spoliari sua propria subsistentia.

Resp. dist. minor. Quin sit individua substan-
tia, si rō individua, sumatur pro rō singulari,
conc. si sumatur pro incommunicabili alteri ut
supposito, nego min. & conseq. Itaque, *indivi-
duum* sumitur duobus modis, 1. ut significat
substantiam actu existentem extra causas, sin-
gularem, & determinatam. 2. Ut denotat sub-
stantiam incommunicabilem alteri tanquam sup-
posito, & ita per se, non in alio, existentem;
fatemur non posse dari naturam actu existen-
tem, quin sit individua priori modo, qui spe-
ctat ad unitatem numericam; negamus autem
non posse dari naturam actu existentem, quia
sit individua posteriori modo per propriam
subsistentiam, potest enim uniri substantialiter
cum alia substantia perfectiori, nempe cum
Verbo divino, in quo casu non subsistit subsi-
stentia propria, sed subsistentia Verbi, a quo
substantialiter perficitur & completur, in quo
sistit, a quo terminatur, & cujus juris tota
efficitur.

Inst. 1. Subsistentia non distinguitur ab ipsa
substantia; ergo natura humana non potest sua
spoliari subsistentia.

Resp. dist. ant. Subsistentia non distinguitur
a sub-

ca substantia, tanquam res a re, *conc.* tanquam modus a re modificata, *nego ant.* Itaque subsistentia est modus, quo substantia ultimo terminatur & redditur incommunicabilis alteri tanquam supposito, porro res aliqua integra subsistere potest absque suo certo subsistendi modo, v. gr. digitus sine inflexione.

Inst. 2. Subsistentia est ipsamet natura; ergo non distinguitur ab illa tanquam modus a re modificata.

Resp. dist. ant. Subsistentia est ipsamet natura, præsuppositive, *conc.* formaliter, *nego ant.* Itaque subsistentia præsupponit naturam, sed secundum se & formaliter nihil aliud est quam negatio communicabilitatis, seu, unionis substantialis cum alia perfectiore, quæ negatio tollitur, cum natura humana personam Verbi in se recipit, quia tunc desinit esse sui juris, ac proinde desinit habere subsistentiam propriam, cum desinat habere illius effectum, qui est reddere naturam proprii sui juris, non autem alieni.

Inst. 3. Subsistentia est modus magis intrinsecus substantiæ, quam figura quantitati; atqui non potest quantitas actu separari ab omni prorsus figura; ergo nec humana natura ab omni prorsus supposito.

Resp. conc. totum. Neque enim dicimus naturam humanam in mysterio Incarnationis privari posse omni subsistentia, sed solum privari posse sua propria subsistentia, cujus tamen loco participet alienam perfectionem, puta divinam qua perficiatur & ultimo compleatur.

Inst. 4. Natura humana non potest existere per existentiam alienam; ergo nec potest subsistere per subsistentiam alienam.

Resp. nego conseq. Disparitas est, quod existentia effectus, sit naturam actu & formaliter

ter ponere in seipsa extra nihil ; ergo , hac sublata , impossibile est hanc naturam actu remanere , quia nec formalis effectus absque sua causa conservari potest , nec ab illa separari ; alioqui & natura simul existeret , & non existeret ; at vero subsistentia non facit naturam esse actu , sed illam solum reddit incommunicabilem ; porro indifferens est ut incommunicabilis reddatur per propriam subsistentiam , vel per alienam perfectiorem a qua perficiatur .

Objicies 2. Si natura humana in Verbo careat propria subsistentia , erit in statu violento ; consequens repugnat ; ergo .

Probat. seq. major. Quod frustratur appetitu naturali , est in statu violento ; atqui si natura humana in Verbo careat propria subsistentia , frustrabitur appetitu naturali quem habet ad propriam subsistentiam ; ergo , &c.

Resp. nego min. Neque enim violentum dici potest quidquid ab auctore naturæ sit in creaturis , immo præcipuus naturæ ordo in hoc consistit , ut omnia Creatori ad nutum obediunt , ergo cum ipsi obediunt , non possunt dici violentiam pati ; porro natura humana potentiam passivam obedientialem habet , ut terminetur subsistentia aliena , saltem increata ; & ideo nullam patitur violentiam per illam terminationem , per quam in statum nobiliorem exaltatur .

*Objectiones ex parte unionis Verbi cum
natura humana .*

Objicies 1. Inter unibilia debet esse quædam proportio ; atqui inter Verbum divinum & naturam humanam nulla esset proportio ; quippe Verbum divinum infinitum est , natura vero creata finita ; ergo non sunt inter se unibilia ,

Resp.

Resp. dist. maj. Debet esse proportio habitudinis, qualis est inter perfectivum & perfectibile, terminans & terminatum, *conc.* proportio entitatis ad entitatem, *negō maj.* Licet ergo inter Verbum & naturam humanam nulla sit proportio entitatis, est tamen proportio habitudinis, quatenus natura humana est terminabilis, & Verbum infinite terminativum. Sic licet inter Deum videndum & intellectum creatum, nulla sit proportio entitatis, cum inter utrumque sit infinita distantia, nihilominus intellectus creatus elevari potest ad elicendam visionem intuitivam, per quam Deo unitur in ratione objecti, propter habitudinem, quam creatura intellectiva habet ad objectum intelligibile.

Subsumes: Infinitum & finitum non possunt simul uniri in ratione terminantis & terminati; ergo nulla solutio.

Prob. subs. Infinitum & finitum magis invicem pugnant quam duo contraria; atqui duo contraria nequeunt esse simul in eodem subiecto; ergo infinitum & finitum non possunt simul esse in eodem supposito.

Resp. dist. maj. Magis invicem pugnant, in perfectione, *conc.* in impossibilitate, *negō maj.* Porro impossibilitas contrariorum provenit duntaxat ex eorum repugnantia naturali; sed Verbum divinum & natura humana nullam inter se habent repugnantiam respectu ejusdem suppositi, & consequenter, quamvis sint magis diversa, quam contraria, possunt facilius subsistere in eodem supposito, quam duo contraria.

Objicies 2. Implicat contradictionem unum & idem esse simul mortale & immortale, finitum & infinitum, &c. atqui ex unionem naturæ divinæ & humanæ in uno supposito illa omnia sequuntur absurda; ergo.

Resp. dist. maj. Implicat unum & idem esse simul mortale & immortale, &c. & sub eodem respectu, *conc.* sub diverso respectu, *nego maj.* Porro. Deus incarnatus. ratione naturæ divinæ est immortalis, & ratione naturæ humanæ est mortalis; at compositum aliquod esse mortale sub uno respectu, & immortale sub alio, non sunt contradictoria, quia contradictoria debent esse de eodem secundum idem, ex Philosophis.

Inst. 1. Ex unione naturæ divinæ & humanæ in uno Verbi supposito, duo saltem gravia sequerentur incommoda; *Primum*, quod Verbum divinum localiter moveretur ad motum humanitatis. *Secundum*, quod natura humana, quæ Verbo divino subsisteret, deberet esse ubique, sicut ubique Verbum est; atqui illa duo sunt absurda; ergo.

Resp. nego sequel. ant. Et utrumque incommodum oppositum. 1. Quidem Verbum divinum non movetur ad motum humanitatis, quia est immensum, & per suam immensitatem ubique est. 2. Natura humana non potest esse ubique sicut Verbum, quia ubique non terminatur a subsistentia Verbi, sed in certo quodam & determinato spatio.

Inst. 2. Ex unione utriusque naturæ in uno Verbi supposito, sequeretur divinam hypostasim non esse immensam; falsum. *conseq.* ergo.

Prob. ant. Hypostasis non valet ultra naturam a se terminatam extendi; ergo si hypostasis divina terminaret naturam humanam, non esset immensa.

Resp. dist. antec. Hypostasis non valet ultra naturam propriam a se terminatam extendi, *conc.* ultra naturam alienam quam facit subsistere, *nego. antec.* Porro natura propria, quam divina hypostasis terminat, est divinitas, quæ cum sic ubique, eam ubique terminat.

Obji-

Objicies 3. Ex Verbo divino & humanitate non potest fieri unum per se; ergo non possunt substantialiter uniri.

Resp. nego ant. Nam ex Verbo divino & humanitate assumpta, resultat unum per se subsistens in duabus naturis, nempe Christus Dominus, qui est Deus homo.

Inst. Entia completa non possunt constituere unum per se; atqui Verbum divinum & humanitas sunt entia completa; ergo.

Resp. dist. maj. Entia completa tum ratione naturæ, tum ratione personæ, non possunt constituere unum per se, *conc.* completa ratione naturæ, sed quorum unum sit incompletum ratione personæ, *negō maj.* Porro in Incarnatione Verbum divinum est omnimode completum, verum humanitas assumpta, est completa in ratione naturæ tantum, cum a Verbo compleatur in ratione suppositi: unde non habet suam totalitatem, quæ est terminatio naturæ in se, ratione cuius est sui juris, & incommunicabilis alteri ut supposito.

CONCLUSIO II.

Possibilitas mysterii Incarnationis, siue supposita, siue non supposita illius revelatione, potest equidem ratione naturali demonstrari negative, sed nulla omnino ratione potest demonstrari positive.

Prob. prima pars. Illud demonstratur negative, quod nullo argumento insolubili potest impugnari; atqui possibilitas mysterii Incarnationis nullo argumento insolubili potest impugnari, ut constat ex propositione superiori, in qua momenta quæ a Paganis contra eam obijci solent, fuerunt dissoluta; ergo, &c.

Prob. secunda pars: 1. Illud mysterium nulla

ratione naturali potest demonstrari positive ; quod sola révelatione cognosci potest ; atqui, ex Scriptura, mysterium Incarnationis sola révelatione cognosci posset : Coloss. 1. *Mysterium quod absconditum fuit a saculis, & generationibus, nunc autem manifestatum est in sanctis ejus, quibus voluit Deus notas facere divitias gloriæ sacramenti hujus in gentibus, quod est Christus.* Ergo.

Hinc Concilium Toletanum XI. cap. 1. de confessione fidei : ait : *Partus virginis, nec ratione colligitur, nec exemplo monstratur ; quia si ratione colligeretur, non esset admirabilis : si exemplo, non esset singularis.* Idem habet Divus Augustinus Epist. 3. ad Volusianum, ubi addit : *Demus Deum aliquid posse, quod nos fateamur investigare non posse. In talibus rebus tota ratio facti, est potensia facientis.*

Prob. 2. ratione. Omnis demonstratio fit a priori, & per causam, vel a posteriori, & per effectum ; atqui mysterium Incarnationis nec a priori, nec a posteriori potest demonstrari ; non a priori, quia nihil est in rerum natura, quod sit causa naturalis hujus mysterii, aut quod naturaliter exigat ejus dispensationem ; non etiam a posteriori, cum nullus sit effectus in rerum natura, qui necessariam habeat cum hoc mysterio connexionem ; ergo nulla ratione naturali positiva demonstrari potest.

Solvuntur Objectiones.

Objicies 1. Id naturali ratione potest demonstrari possibile, quod naturali ratione cognoscitur non repugnare ; atqui naturali ratione cognosci potest mysterium Incarnationis non repugnare ; ergo.

Resp. dist. maj. Id naturali ratione potest demonstrari

monstrari possibile, quod, &c. negative, solvendo nimirum omnia quæ in contrarium afferuntur argumenta, *conc.* positive, seu per causam aliquam aut effectum quo possimus cognoscere & probare talem possibilitatem, *nego maj.* solutio patet ex conclusione præcedenti.

Inst. 1. Evidenter solvere omnia argumenta impossibilitatem Incarnationis suadentia, est Incarnationis possibilitatem demonstrare positive; atqui intellectus perspicax & perfectus, potest evidenter solvere omnia argumenta impossibilitatem Incarnationis suadentia; ergo.

Resp. dist. maj. Omnia argumenta solvere evidenter positive, *conc.* negative, *nego maj.* Equidem intellectus perspicax potest argumenta quæ fiunt contra Incarnationis possibilitatem solvere evidenter, *negativus*, negando nimirum principia ex quibus inferuntur, & ostendendo illationes ex illis principiis non convincere, nec evidenter probare illud mysterium esse impossibile; sed non potest illa solvere evidenter *positive*, nimirum ostendendo evidenter, quod principia, ex quibus procedunt, falsa sunt, & consequenter quod eorum contradictoria sunt vera; ergo nedum potest demonstrare tale mysterium esse possibile, sed dubitare potest an aliqua principia naturalia sibi, divinitus saltem, sint occulta, ex quibus aliqua hujus mysterii implicantia deduci possit.

Inst. 2. Intellectus perfectus, v. g. angelicus, evidenter *positive* cognoscit Deum posse efficere quidquid non implicat contradictionem, atqui mysterium Incarnationis non implicat contradictionem; ergo, &c.

Resp. dist. maj. Potest evidenter positive cognoscere Deum posse efficere, indeterminate & in genere, quidquid, &c. *conc.* determinate & in particulari, *nego maj.* Alias Dei omnipoten-

tentiam, in qua sunt omnia possibilis, comprehenderet, quod est impossibile.

Subsumes: Atqui Angelus evidenter positive cognoscit nullam esse contradictionem; quod Deus fieri possit homo; ergo nulla solutio.

Prob. subsumpt. Angelus potest evidenter cognoscere subsistentiam divinam infinitam esse in terminando, & subsistentiam naturæ creatæ ab illa esse distinctam; ergo potest evidenter cognoscere, quod subsistentia divina possit supplere vices personalitatis creatæ, terminando naturam creatam.

Resp. nego consequ. Quanquam enim Angelus cognoscere possit subsistentiam divinam esse infinitam in terminando, & subsistentiam creatam esse distinctam & separabilem a natura humana, tamen non potest cognoscere naturaliter, quo pacto Verbum uniri posset humanitati; quippe non posset cognoscere an subsistentia humana esset a sua natura realiter separata, & utrum ipsa natura subsisteret subsistentia Verbi, siquidem ille subsistendi modus, est ordinis supernaturalis, & obedientialis.

Inst. 3. Angelus naturaliter cognoscere potest, naturam humanam posse spoliari propria subsistentia; ergo naturaliter potest cognoscere, naturam humanam posse subsistere subsistentia Verbi.

Resp. transeat antec. nego consequ. Quanquam enim Angelus posset naturaliter cognoscere naturam humanam posse spoliari propria subsistentia, non sequitur tamen, quod possit naturaliter cognoscere eam subsistere subsistentia Verbi; tum quia infinita est, inter naturam humanam, & Verbi subsistentiam, proportio; tum quia posset judicare Deum conservare illam naturam individualement absque omni subsistentia, sicut de facto conservat species Eucharisticas absque omni subiecto.

Di-

Dixi: *transeat ant.* Quod multi negant, 1. Quia nullum est in naturalibus exemplum, quo constet naturam creatam spoliari posse subsistentia sibi propria. 2. Quia natura humana ita determinata est ad propriam subsistentiam, ut absque ea naturaliter non possit existere.

Inst. 4. Cum Angelus comprehendat naturam humanam, cognoscit omnes modos, quibus illa existere potest; ergo cognoscit eam subsistere posse per subsistentiam Verbi.

Resp. dist. ant. Cognoscit omnes modos naturales, quibus potest subsistere, *conc.* supernaturales & obedientiales, *nego antec.* Alias comprehenderet omnipotentiam Dei; porro modus, quo natura humana subsistit in Verbo, est supernaturalis & obedientialis.

Instabis 5. Lucæ 4. dicitur, *Exibant autem demonia a multis clamantia & dicentia: quia tu es Filius Dei*, & increpans non sinebat ea loqui, quia sciebant eum esse Christum. Ex quo sic argumentor: dæmones cognoverunt Jesum Nazarenum esse Christum Deum & hominem; atqui illud non cognoverunt per revelationem divinam, cujus erant incapaces, ergo cognoverunt per nativam intelligendi virtutem.

Resp. dist. maj. Dæmones cognoverunt, &c. conjecturaliter, *conc.* certo & evidenter, *nego maj.* atqui illud non cognoverunt per revelationem divinam sibi immediate factam, *conc.* per revelationem in Scripturis exaratam, ac miraculis declaratam, *nego min.* Potuerunt ergo dæmones, tum ex vaticiniis Prophetarum, tum ex mirandis operibus quæ Jesus quotidie operabatur, cognoscere ipsum esse Messiam promissum, quæ cognitio erat conjecturalis, non certa & evidens, unde tentator ad eum ac-

cessis quærens : si filius Dei es, dic ut lapides isti panes fiant.

Objicies. 2. Ratio naturalis suadet mysterium Incarnationis esse evidenter credibile; ergo pariter suadet esse evidenter possibile.

Resp. nega. conseq. Disparitas est, quod credibilitas rei sumatur ab auctoritate dicentis fide digni; unde quo quis magis judicatur verax in dicendo, eo etiam facilius & firmitus ei fides datur. At possibilitas rei petitur ex internis illius rei principiis, a quibus habet quod non repugnet, nec ullam involvat contradictionem.

Objicies 3. SS. Patres variis exemplis naturalibus possibilitatem Incarnationis demonstrant, qualia sunt, unio animæ spiritualis cum corpore materiali in homine; insertio rami in arborem natura diversam; conjunctio ignis & ferri in ferro candente, &c. ergo.

Resp. nego ant. Equidem illis exemplis possibilitas Incarnationis potest illustrari, ac verisimilis reddi, supposita illius revelatione, eoque sine illa exempla usurpant SS. PP. verum, illis nullo modo potest demonstrari, siue supposita, siue non supposita illius mysterii revelatione; immo illa omnia Symbola, seclusa revelatione, nullam hujus mysterii suspensionem possunt ingerere, cum nullus hominum, ante hujus mysterii revelationem, quidpiam de illo unquam fuerit suspicatus.

DISSERTATIO II.

De Incarnationis convenientia.

Nota: **C**onveniens hic dicitur, id quod decens ac consentaneum est: quia vero convenientia explicari non potest sine relatione rei convenientis, ad rem, cui convenit; ideo quæritur, utrum Incarnatio fuerit conveniens, 1. Deo Redemptori; 2. Homini redimendo; 3. Toti universo; pro quibus solvendis, sit:

CONCLUSIO I.

Incarnatio fuit maxime Deo conveniens.

Probat. Illud est Deo maxime conveniens, per quod præcipua illius attributa hominibus manifestantur; atqui per Incarnationem præcipua Dei attributa, nimirum omnipotentia, sapientia, bonitas, misericordia, & justitia, hominibus manifestantur; ergo.

1. Quidem in Incarnatione elucet omnipotentia Dei; quia Incarnatio est operum Dei maximum, cum per eam uniantur duo extrema a se infinite distantia, & evehatur creatura ad esse personale Dei; unde Beata Virgo Maria de hoc ineffabili mysterio benedicens Deum, (b), ait: *Fecit mihi magna qui potens est.*

2. Elucet sapientia, quia debiti difficillimi adinvenit decentissimum solvendi modum, in quo mirabiliter jura misericordiae conciliantur cum juribus justitiæ divinæ.

3. Elu-

(b) Lucæ. I. v. 49.

3. Elucet bonitas, quia non despexit proprii plasmatis infirmitatem, sed sese illi communicavit, quantum communicari potest, se ipsum ad servi conditionem deprimendo, ut servum ad Deum usque eveheret.

4. Elucet misericordia Dei, quia pro impiis & inimicis suis redimendis unigenitum suum morti crudelissimæ tradidit; Joann. 3. *Sic Deus dilexit mundum, ut Filium suum unigenitum daret.*

5. Elucet justitia, quia peccatum non impunitum relinquit, sed pretium condignum, quod pro eo solvendum erat, a mediatore nostro repetiit; ergo in mysterio Incarnationis præcipua Dei attributa mirifice manifestantur.

Solvuntur Objectiones.

Obijciēs cum Socinianis. Quod dedecet summam Dei majestatem, non est conveniens; atqui Incarnatio dedecet summam Dei majestatem; ergo.

Prob. min. Summam Dei majestatem dedecet humiliari; atqui Deus per Incarnationem sese humiliasset; ergo.

Resp. dist. maj. Dedecet summam Dei majestatem humiliari, secundum se, *conc.* secundum carnem assumptam, *negō maj.* Cum itaque divinitas sit omnino invariabilis, secundum se, nec exaltationis, nec humiliationis, est capax; sed ratione naturæ humanæ sibi unitæ potest humiliari ad manifestationem suæ magnitudinis.

Inst. 1. Dedecet majestatem Dei sese exinanire, atqui per Incarnationem, Deus sese exinanisset; ergo.

Resp. negō maj. Solum enim peccatum Deum dedecet; ergo Verbi exinanitio, quæ facta fuit in af-

in assumptione humanitatis, majestatem divi-
nam non dedecet.

Inst. 2. Indecens est, ut qui omnia excedit,
contineatur in corpore infantis; ergo non est
conveniens Incarnatio.

Resp. dist. ant. Si ita contineatur ut in illo
coarctetur, *conc.* si in illo non coarctetur,
nego ant. Porro Deus ita continetur in corpo-
re humano, ut etiam sit ubique.

Inst. 3. Conveniens non est Deo aliter se
habere in tempore, quam ab æterno; atqui ab
æterno fuit sine carne; ergo.

Resp. dist. maj. Conveniens non est Deo ali-
ter se habere in tempore; secundum perfectio-
nes intrinsecas, *conc.* secundum communicatio-
nem ad extra, *nego maj.* Itaque Deus per In-
carnationem aliter se habuit solum per com-
municationem ad extra; atqui summa sui com-
municatio, Deo, qui est summe bonus, est
convenientissima; ergo.

Obijcies. 2. Prodigalitas, non est conveniens
Deo; atqui est magna prodigalitas, quod vita
Filii Dei, quæ pretiosissima est, exponatur pro-
fundenda pro vili ac misero peccatore, qui
cæteroquin alia via redimi potuit; ergo.

Resp. nego min. Quia Deus non subiecit Fi-
lium suum morti, ut ab illâ absorberetur, sed
ut, devicta morte, resurgeret immortalis; er-
go in Deo non fuit prodigalitas, sed maxi-
ma liberalitas amoris qui nunquam expletur,
nisi cum amantem dedit amato, quare sic Deus
dilexit mundum, ut Filium suum unigenitum
daret.

Inst. Non est conveniens, ut majus bonum
ordinetur ad minus; atqui in Incarnatione ma-
jus bonum ordinaretur ad minus, videlicet,
Incarnatio Dei ad reparationem generis huma-
ni; ergo.

Resp.

Resp. dist. maj. Non est conveniens, ut minus bonum ordinetur ad minus, tanquam medium ad finem ultimum, *conc.* tanquam causa ad effectum, *nego maj.* Incarnatio itaque ordinatur, 1. Ad reparationem generis humani, tanquam causa ad effectum quem producit; 2. Ordinatur ad gloriam Dei, tanquam ad finem ultimum; porro gloria Dei excellentior est vita Christi.

Objicies 3. Quod minus cedit in gloriam Dei, non est conveniens Deo; atqui satisfactionem exigere pro peccato, minus cedit in gloriam Dei, quam illud gratis remittere, ergo.

Resp. nego min. Nam opus, in quo cum summa misericordia elucet etiam summa justitia; magis cedit in gloriam Dei, quam opus in quo sola misericordia maxime commendatur; igitur Deo congruum fuit, ut ex misericordia præberet mediatorem, qui debitum ex justitia solveret; sic enim *misericordia & veritas obviaverunt sibi, justitia & pax osculata sunt.*

Inst. 1. Illud opus non est justitiæ, in quo maxima committitur injustitia; atqui id fit in mysterio Incarnationis; ergo.

Probat. min. Innocentem tradere ad supplicium, est maxima injustitia; atqui in Incarnatione, Christus innocens traditus est ad supplicium; ergo.

Resp. dist. major. Si illud supplicium habeat rationem punitionis, *conc.* si habeat rationem satisfactionis tantum & reparationis, *nego maj.* Disparitas est, quod in punitione attenditur peccantis iniquitas; in satisfactione vero pro alio, spectatur satisficientis charitas; porro in satisfaciendo, unus potest ferre poenam pro altero.

Inst. 2. Deus Pater poenas peccati alieni repetiit a Filio; ergo supplicium, ad quod illum tradidit, habuit rationem punitionis.

Resp.

Resp. dist. antec. Poenas peccati alieni, quas in se Filius susceperat, a Filio repetiit, *conc.* quas in se non susceperat, *nego antec.* Christus itaque, tanquam peccatoris sponzor, poenas peccati in se voluntarie susceperat; unde illas merito repetiit ab illo Pater.

Instab. 3. Læditur iustitia, quoties ad finem consequendum eligitur medium iniquum; atqui per Incarnationis decretum, Deus Pater ad redemptionem hominis elegit medium iniquum; ergo.

Probat. min. Deus Pater, ad redemptionem hominis, prædefinivit crucifixionem Christi, quæ scelus fuit gravissimum; ergo elegit medium iniquum.

Resp. dist. antec. Prædefiniit, permittendo, *conc.* impellendo, *nego ant.* Unde licet crucifixio Christi iniqua fuerit ex parte Judæ proditoris, Judæorum, Pilati; tamen æquissima fuit ex parte Dei Patris, qui eam permisit, & permissam ordinavit ad hominum salutem.

Quæres obiter, *An convenientius fuerit Verbum incarnari, quam Patrem & Spiritum sanctum?*

Resp. affirm. 1. Quia conveniens erat ut idem esset Filius hominis in tempore, qui jam erat Filius Dei in æternitate: confusio enim visa fuisset in Trinitate, si duo dicti fuissent Filii, unus æternus & increatus, alter temporalis & incarnatus. 2. Quia, ut ait S. Leo (c) *Cum per Verbum omnia facta sint, conveniens erat, ut idem esset hominis reparator, qui ejusdem fuerat conditor.*

CON-

(c) Serm. 12. de passione Domini.

CONCLUSIO II.

Incarnatio homini redimenda maxime fuit conveniens.

Prob. Homo consideratur, vel in individuo, vel in specie; atqui incarnatio fuit maxime conveniens homini utroque modo spectato; ergo.

1. Incarnatio fuit conveniens homini in individuo, id est, naturæ, quæ reipsa a Verbo assumpta est; quia per Incarnationem factum est, ut hic homo esset Deus, ac proinde caput Angelorum & hominum, supremo patriæ cultu colendus, atqui illæ prærogativæ homini in individuo sunt maxime convenientes & consentaneæ; ergo.

2. Incarnatio fuit conveniens homini in specie, id est, toti naturæ humanæ; tum quia tota natura humana, per conjunctionem Verbi cum uno ex ejus individuis, fuit exaltata ad supremum honorem cognationis & consanguinitatis cum Deo; tum quia ex Verbo incarnato in totam naturam humanam innumera beneficia defluerunt; de plenitudine, enim ejus nos omnes accepimus, Joann. 1. Atqui illæ omnes excellentiæ sunt maxime convenientes homini in specie; ergo.

CONCLUSIO III.

Incarnatio toti universo fuit maxime conveniens.

Prob. Quia totum universum aliquid dignitatis sortitum est in ipsa hominis ad divinum consortium sublimatione; tum quia in aliqua sui parte ad fastigium divinitatis evectum est; tum quia, cum homo totius universi sit nomenclatura, in quo, tanquam in summa, omnia.

nia continentur, illius dignitas & excellentia in alias omnes creaturas redundat; ergo, &c. Hinc est, quod Apostolus, Ephes. i. de Patre æterno dicat: *Proposuit in dispensatione plenitudinis temporum, instaurare omnia in Christo, quæ in Calis. & quæ in terra sunt, in ipso.*

Quæres: An convenienter mysterium Incarnationis in plenitudine temporis fuit adimpletum?

Resp. affirm. Quia sicut sol naturalis in medio planetarum positus est, ut superiores & inferiores illuminare possit; ita conveniens fuit, ut Christus, verus sol justitiæ, in medio annorum veniret, ut sæcula anteriora per fidem suæ Incarnationis futuræ illuminaret, & sequentia per doctrinam Evangelicam illustraret, & per Sacramenta a se instituta sanctificaret.

Dices: Convenientius Incarnatio facta fuisset in mundi initio, quam in plenitudine temporis; ergo.

Resp. nego antec. Conveniens enim erat, ad commendationem tam excellentis mysterii, ut plurima sæcula præcederent ejus executionem, ut nempe tot sæculorum decursu Salvator postularetur a Patriarchis, prædiceretur a Prophetis, a Legis mosaicæ umbris præfiguraretur, & esset desideratus cunctis gentibus; nam, ut ait D. Aug. tract. 3. in Joann. *Quanto major Judex veniebat, tanto præconum series longior præcedere debebat.*

Prob. antec. Incarnatio est unicum remedium humani generis post lapsum; ergo convenientius facta fuisset statim post lapsum hominis.

Resp. nego consequ. Neque enim conveniebat, ut Deus homini, statim post lapsum, mederetur.

retur per Incarnationem, ne remedium illud, vel ex superbia contemneret, vel sibi debitum existimaret; debuit ergo prius suam infirmitatem, inopiam, & imbecillitatem agnoscere, & sic efficacius medici charitatem implorare.

Inst. Opus Incarnationis est opus immensæ charitatis; atqui charitas non tardat subvenire necessitatem patienti; ergo non conveniens fuit differri Incarnationem.

Resp. dist. min. Non tardat subvenire necessitatem extremam patienti, *conc.* necessitatem non extremam, *nego min.* Porro homo lapsus, nunquam fuit in extrema salutis necessitate, quia etsi Incarnationis executio fuerit dilata, ejus tamen efficacia effectum habuit anticipatum, per fidem in Christum venturum, quam habuerunt priora etiam sæcula, & per quam homines in lege naturæ & scripta justificati sunt; quare Apoc. 3. Christus dicitur: *Agnus occisus ab origine mundi.*

DISSERTATIO III.

De necessitate Incarnationis.

Nota I. **A** Liquid duobus modis necessarium dicitur, absolute, nimirum, & hypothetice.

Necessarium absolute, est illud quod, quolibet facta hypothesi, aliter esse non potest; eo modo necessarium est Deum existere.

Necessarium hypothetice duplex est; *Primum*, quod in tali hypothesi absolute & simpliciter necessarium est, ut cibus ad vitam con-

conservandam. *Secundum*, quod in tali hypothesi necessarium est tantum secundum quid, id est, valde utile & maxime conveniens, ut equus ad iter faciendum.

Nota 2. Quærent hic Theologi 1. Utrum Incarnatio fuerit absolute necessaria: 2. Utrum fuerit necessaria ex hypothesi lapsus hominis; 3. Ex hypothesi, quod Deus hominem lapsum reparare ac salvum facere voluerit. 4. Ex hypothesi, quod Deus voluerit sibi pro offensa per peccatum illata condigne satisfieri. Circa quod:

Certum est 1. Incarnationem non fuisse absolute necessariam; nam illud non est absolute necessarium, quod potest a Deo poni, vel non poni; atqui talis est Incarnatio: est enim opus ad extra, circa quod Deus est omnino liber; ergo.

Certum est 2. Incarnationem non fuisse absolute necessariam ex hypothesi peccati hominis; nam Deus hominem perditum potuit relinquere in peccato & statu damnationis, sicut reliquit apostatas Angelos, ut asserit Scriptura, Sap. 11. *Quis imputabit tibi, si perierint nationes, quas tu fecisti?* Et D. August. lib. de nat. & gratia, cap. 5. *Si omnibus debitum damnationis supplicium redderetur, non injuste redderetur.* Unde maximæ Dei misericordiæ & charitati tribuitur, quod hominem lapsum redemerit, ad tit. 3. *Secundum suam misericordiam salvos nos fecit.*

Certum est 3. Incarnationem non fuisse absolute necessariam etiam ex hypothesi, quod Deus hominem lapsum voluerit reparare; cum Deus per omnipotentem virtutem potuerit naturam humanam multis aliis modis liberare, nempe, vel peccatum gratis condonando, vel imperfectam hominis satisfactionem acceptando, &c.

Un-

Unde Div. August. (d) merito stultos vocat qui contra sentiunt. *Sunt stulti*, inquit, *qui dicunt, non poterat aliter sapientia Dei homines liberare, nisi susciperet hominem, ut nasceretur ex femina, & a peccatoribus omnia illa pateretur; quibus dicimus, poterat omnino; sed si aliter faceret, similiter vestra stultitia displiceret.*

Tota ergo controversia præsens versatur circa quartam hypothesim, nempe, utrum incarnatio necessaria fuerit simpliciter, ex hypothesi, quod voluerit Deus hominem reparare, & quidem non nisi condigna atque rigorosa pro peccato satisfactione, cujus difficultatis resolutio a duobus capitibus pendet: *Primum*, an constans fuerit in Deo voluntas peccatum non remittendi absque condigna satisfactione. *Secundum*, an pura creatura condignam pro peccato possit exhibere satisfactionem? si enim hoc posset pura creatura, ad hunc finem non esset absolute necessaria Incarnatio: si vero hoc non possit, Incarnatio, in hac hypothesi, fuit absolute necessaria; itaque sit:

CAPUT PRIMUM.

Utrum constans fuerit in Deo voluntas peccatum absque condigna satisfactione non remittendi.

Nota 1. **S**atisfactio sumitur duobus modis; 1. *Improprie*, pro redditione cuiuscumque debiti, sive per furtum, sive per commodatum, sive etiam per læsionem honoris & famæ, contracti. 2. *Proprie*, pro injuriæ illa-

(d) L. de agone Christiano, cap. 12.

illatæ compensatione, & honoris læsi restaura-
tione; per priorem æqualitas in rebus; per po-
steriorem æqualitas in actionibus & personis con-
stituitur.

Satisfactio proprie sumpta, definitur: *Reddi-
tio voluntaria honoris æquivalentis, ex propriis,
& aliunde non debitis, ad compensandam inju-
riam alteri, per peccatum, illatam.*

Dicitur 1. *redditio*: per quod distinguitur a
gratuita donatione, & convenit cum restitutio-
ne, cum sicuti res per restitutionem, ita per
satisfactionem honor ablati reddatur.

Dicitur 2. *voluntaria*: quia est actus virtutis
justitiæ, actus autem virtutis debet esse a vo-
luntate libera; hinc redditio honoris involun-
taria, non dicitur *satisfactio*, sed *satispassio*,
qui enim coacte reddit alteri quod suum est,
non tam active se habet, saltem moraliter,
quam passive.

Dicitur 3. *æquivalentis*: quia cum satisfactio
sit actus justitiæ commutativæ, requirit æquali-
tatem arithmeticam, qua tantum honoris red-
ditur, quantum fuit ablatum.

Dicitur 4. *ex propriis*: hoc est; ex bonis,
quorum dominium perfectum ipse debitor ha-
beat; si enim satisfactio fieret ex bonis credito-
ris, semper eadem maneret inæqualitas.

Dicitur 5. *& aliunde non debitis*: quia si per-
sona quæ satisfacit, personæ offensæ offerret ea
quæ eidem solvere tenetur ex aliis titulis v. g.
justitiæ, gratitudinis, &c. non perfecte & ri-
gorose satisfaceret, quia non ex propriis satis-
faceret.

Dicitur 6. *ad compensandam injuriam, &c.*
per quod satisfactio distinguitur 1. *A merito*,
quod refertur, non ad injuriam compensan-
dam, sed ad præmium merenti, vel alteri,
cui meretur, obtinendum. 2. *A restitutione*,
quæ

quæ compensat, non injuriam personæ factam, sed damnum, in rebus injuste ablatiis & retentis, illatum.

Nota 2. Sociniani (e) necessariam fuisse Christi satisfactionem negant, quia, inquiunt, Deus peccatum gratis, & sine ulla satisfactione, voluit remittere, ac reipsa remisit; contra quos:

CONCLUSIO.

Deus nunquam voluit peccatum sine condigna satisfactione remittere.

Prob. Ex Apost. qui Hebr. 10. testatur sacrificium Christi necessarium fuisse ad reatum peccati tollendum: *Impossibile enim est*, inquit, *sanguine Taurorum & Hircorum auferri peccata: ideo ingrediens mundum dixit: hostiam & oblationem noluiisti, corpus autem aprasti mihi.* Et cap. 9. jam dixerat, *sine effusione sanguinis, non fit remissio.* Ergo si necesse fuit nos a peccatis mundari sanguine Christi, signum est evidens Deum noluisse absque debita satisfactione peccatum remittere.

Confirmatur, quia verisimile non videtur Deum voluisse proprium suum Filium tam acerbæ morti subjici, si non fuisset decretum de homine non redimendo, nisi per satisfactionem condignam & perfectam: quare Apostolus, Rom. 3. testatur Deum constituisse Christum sponso-rem pro peccatore, ut ostenderet se velle in peccatum justitiam rigorosam exercere, *Quem proposuit Deus*, inquit, *propitiationem per fidem in sanguine ipsius, ad ostensionem justitiæ suæ, propter remissionem præcedentium delictorum.*

Soci-

(e) Socinus, l. 1. de servatore Christo, cap. 1. Crellius lib. de satisfact. Christi contra Franzium.

Sociniani multa obijciunt, ut ostendant Deum seipſa voluisse sine ulla satisfactione peccata condonare; verum commodius solventur dissertatione septima quando agemus de satisfactione Christi.

C A P U T II.

Utrum pura creatura condignam pro peccato possit exhibere satisfactionem?

Nota 1. **P**ura creatura hic dicitur, ea, quæ Deo hypostatice non est unita, sed est purus homo, aut Angelus.

Nota 2. Valor operis satisfactorii, est ipsius dignitas, ratione cujus redditur aptum ad compensandam injuriam honoris ablati: porro quantitas illius valoris repetitur ex duobus capitibus.

1. *Petitur ex objecto operis*, quia quo præstantius est objectum, eo, cæteris paribus, opus satisfactorium nobilius est: sic actus virtutis Theologicæ nobilior est actu virtutis moralis.

2. *Petitur ex dignitate persona satisfaciens*, quia persona satisfaciens se ipsam subjicit & offert illi cui satisfacit; ergo eo plus subjicit, quo dignior est, ac proinde operis satisfactorii valorem auget; sic satisfactio homini plebejo exhibita a magistratu dignior est, quam satisfactio hominis plebeji exhibita magistratui.

Nota 3. Gravitas offensæ ex duobus capitibus petitur:

1. *Petitur ex dignitate persona offensa*; quia offensa, quantum est ex se, deprimit personam offensam, sicque, quo plus hæc dignitatis habet, tanto plus aliquid deprimit, majoremque habet malitiam; sicut majus est dam-

Charmes, Theol. Schol. Tom. III. D num,

rum, si aurum in lutum, quam si plumbum abjiciatur.

2. *Gravitas offensa petitur ex vilitate personae offendentis*, unde gravior est offensa, si rusticus percutiat Regem, quam si Rex percutiat rusticum. His notatis sit:

CONCLUSIO.

Nulla pura creatura, quantacumque gratia exornata, potest pro suo, vel alieno, peccato, siue mortali, siue etiam veniali, condigne Deo satisfacere.

Prob. 1. Ex C. Trid. sess. 14. cap. 8. Dum satisfaciendo patimur pro peccatis, Christo Jesu, qui pro peccatis nostris satisfecit, ex quo omnis nostra sufficientia est, conformes efficimur; ergo citra Christi satisfactionem non haberet homo, quo condigne satisfaceret. Hinc Psal. 48. dicitur: Frater non redimit, redimet homo, id est, redimet Homo-Deus, ut interpretantur Patres communiter cum D. Basil. in hæc verba, dicens: Redimet homo, non homo nudus, sed homo Deus J. C. quia nullus alius condignum offerre poterat pretium.

Prob. 2. Ex SS. PP. S. Cyrillo (f) quo pacto, inquit, unus pro omnibus mortuus, justum pro omnibus pretium exsolvere potuit, si perperam illam puri cujusdam hominis esse dicamus? ubi supponit hominem purum, gratia ornatissimum, qualem Nestorius dicebat esse Christum, non potuisse pretium condignum exsolvere.

S. Augustin. Enchiridii, cap. 108. ait: Neque per ipsum liberaremur unum mediatorem Dei

(f) Epist. 1. ad Monachos Aegypti, c. 17. relata In Conc. Ephes.

Dei & hominum Jesum Christum, nisi esset & Deus.

S. Fulgentius (g) Nullatenus humana natura, ait, ad auferendum peccatum mundi sufficiens atque idonea fieret, nisi in unionem Verbi Dei transfret.

Sanctus Anselmus (h) ex professo ostendit solum hominem Deum posse pro peccato satisfacere. Hanc satisfactionem, inquit, non potest facere nisi Deus, nec debet nisi homo, necesse est ut eam faciat Deus homo.

Prob. 3. ratione Theologica. Nempe, tres sunt potissimum conditiones ad condignam satisfactionem requisitæ, Prima, ut sit æquivalens, Secunda, ut sit ex propriis; Tertia, ut sit ex aliunde indebitis; atqui puri hominis satisfactio, nec potest esse æquivalens, nec fieri ex propriis, & aliunde indebitis; ergo, &c.

1. Satisfactio puri hominis non potest esse æquivalens. Siquidem, ut valor satisfactionis sit æquivalens gravitati injuriæ, requiritur, ut inter valorem satisfactionis & gravitatem offensæ sit æqualitas; atqui inter valorem satisfactionis a pura creatura exhibitæ, & offensæ Dei gravitatem, non potest esse æqualitas; ergo, &c. Prob. min. Inter offensam infinitam & satisfactionem finitam, non est æqualitas; atqui offensæ Dei est infinita, saltem extrinsece & objective, satisfactio vero puræ creaturæ est finita; ergo, &c. Prob. min. Gravitas offensæ præcipue desumitur ex dignitate personæ læsæ, econtra valor satisfactionis præcipue petitur ex dignitate personæ satisfaciens; ergo offensæ personæ infinitæ illata, est infinita, & satisfactio

(g) L. de Incarnat. & gratia, c. 1.

(h) Lib. 2. Cur Deus homo, p. 6.

ctio a pura creatura exhibita, est finita, juxta conditionem ejus naturæ; atqui Deus offensus, est infinitus, pura vero creatura satisfaciens, est finita & veluti nihilum præ Deo. *Omnes gentes quasi non sint, sic sunt coram eo, & quasi nihilum & inanereputata sunt ei.* Isaia 40.

2. *Satisfactio pura creatura non potest esse ex propriis.* Quia, qui satisfacere Deo non potest, nisi ex bonis quæ sunt sub dominio Dei, non potest satisfacere ex propriis; atqui creatura pura satisfacere non potest, nisi ex eis, quæ sunt sub dominio Dei, Paralip. 29. *Cuncta enim quæ in calo sunt & in terra, tua sunt.* Ergo ex propriis satisfacere non potest.

Nec dicas: Privatus quilibet satisfacere potest reipublicæ ex bonis, quæ sunt sub illius reip. dominio, idque tanquam ex propriis; ergo a pari creatura pura potest satisfacere ex bonis, quæ sunt sub Dei dominio, idque tanquam ex propriis.

Resp. nego consequ. Disparitas est, quod bona privati sint tantum sub dominio reipublicæ alto & semipleno, quatenus respublica iis uti potest, ubi, & quando publica necessitas postulat. At Deus in omnia nostra bona particulare & absolutum dominium habet, neque in res tantum, sed etiam in omnes actus nostros, cum ab eo dependeant in esse, & in conservari.

3. *Satisfactio creatura pura non potest esse ex aliunde indebitis.* Quia, quod Dei proprium est, illi quoque est debitum, cum alicui nihil magis debitum sit, quam quod ejus est; ergo.

Solvuntur Objectiones.

Obicies 1. Qui Deo tantum potest reddere bonum, quantum ipsi malum per peccatum intulit,

tulit, potest condigne satisfacere Deo; atqui homo purus, gratia sanctificante præditus, potest Deo tantum reddere bonum; quantum ipsi malum per peccatum intulit; ergo.

Respond. nego maj. & min. Quia ad condignam satisfactionem, necesse est ut fiat ex propriis & aliunde indebitis; atqui homo purus nihil potest Deo conferre ex propriis & aliunde indebitis: nam bonum quod Deo redderet, ut meritum foret, deberet esse ex gratia, quæ plene gratuita est, & in Deum auctorem referri debet.

Prob. min. Homo purus, per actum perfectæ contritionis, reddit Deo totum, quod ab ipso per peccatum abstulerat, nempe rationem ultimi finis; ergo condigne satisfacit Deo.

Resp. nego consequ. Licet enim redditio rei ablata sufficiat ad restitutionem, satis tamen non est ad condignam satisfactionem pro injuria Deo per peccatum illata, quæ, cum sit infinita, non potest condigne reparari, nisi per satisfactionem infinitam, cujus homo purus, quantalibet gratia sit ornatus, non est capax.

Inst. I. Tantus est valor actus perfectæ charitatis, quanta est gravitas injuriæ Deo per peccatum illatæ; ergo.

Resp. nego antec. Ratio est; quia valor actus charitatis moraliter æstimatur ex dignitate personæ satisfaciens, & proinde est finitus quando est a persona finita elicitus; e contra gravitas offensæ Dei moraliter æstimatur ex dignitate personæ læsæ, a qua consequenter infinitam quamdam gravitatem contrahit. Porro homo purus non potest per actum finitum adæquare gravitatem offensæ infinitam.

Subsumes: Atqui malitia peccati est finita; ergo.

Prob. subseq. Privatio rectitudinis finitæ, est

finita; atqui malitia peccati est privatio rectitudinis oppositæ, quæ est finita; ergo.

Resp. dist. min. Malitia peccati, sumpta pro macula, est privatio rectitudinis oppositæ, *conceditur* sumpta pro offensa & injuria Dei, *negatur* min. & sic ad consequens. Itaque duo in malitia peccati distinguenda sunt. *Primum, est macula*, quæ est difformitas orta ex aversione a Deo & privatione rectitudinis actui debitæ, hæc est finita, tolliturque per conversionem ad Deum. *Secundum, est injuria*, qua homo per voluntariam a Deo aversionem, illum inhonorat, violando jus divinum, quo homo tenetur magis diligere Deum, quam ullam creaturam; hæc est infinita extrinsece & objective, nec tollitur nisi per condonationem, vel per æquivalentem compensationem, quæ nunc fit in nobis ex applicatione satisfactionum Christi.

Inst. 2. In hoc statu per actum contritionis perfectæ deletur peccatum, non tantum quoad maculam, sed etiam quoad injuriam; ergo purus homo talem actum eliciens condigne satisfaceret.

Resp. dist. ant. In hoc statu deletur, &c. virtute satisfactionum Christi, quæ nobis applicantur, *conceditur* virtute ipsius actus contritionis. *duntaxat, negatur ant.*

Inst. 3. Homo purus, per actum charitatis perfectæ, posset mereri vitam æternam de condigno; ergo &, per eundem actum, posset condigne satisfacere pro peccato.

Resp. 1. dist. ant. Per actum perfectæ charitatis, cui adjunguntur merita Christi, *conceditur* per actum charitatis secundum se sumptum, *negatur ant.* Id testatur Concil. Trident. sess. 14. cap. 8. *Omnis gloriatio nostra in Christo est, inquit, in quo vivimus, in quo meremur, in quo satisfacimus: facientes fructus dignos, peni-*

pœnitentia, qui in illo vim habent, ab illo offeruntur Patri, & per illum acceptantur a Patre.

Respond. 2. dato antec. nego conseq. Disparitas est, quod meritum, cum respiciat mercedem, nullam requirat personarum æqualitatem, bene autem satisfactio, quæ, cum a persona offensa specificetur, non potest condigne exhiberi, nisi a persona ejusdem ordinis & dignitatis.

Objicies 2. Purus homo potest Deo satisfacere ex propriis; ergo potest condigne satisfacere.

Prob. ant. Purus homo est dominus & arbiter suorum actuum; ergo.

Resp. dist. ant. Est dominus suorum actuum, dependenter a Deo, *conc.* independenter, *neg. antec.* Neque enim libertas hominis, actiones ejus eximit a dominio Dei, cum, & secundum entitatem, & secundum bonitatem, a Dei dominio dependeant.

Objicies 3. Peccatum veniale est quid finitum; ergo pro eo potest homo purus condigne satisfacere.

Resp. dist. antec. Est quid finitum physice & entitative, *conc.* objective & terminative, *neg. antec.* Infert enim Deo infinito injuriam, quæ condigne compensari per opus finitum, non potest.

Inst. 1. Si homo purus non posset Deo condigne pro peccato veniali satisfacere, posset propter illud excludi a vita æterna; atqui falsum conseq. ergo.

Resp. dist. ant. Posset excludi a vita æterna, si Deus pro illo exigeret satisfactionem condignam & rigorosam, *conc.* secus, *neg.* Porro Deus non exigit, ut homo justus, pro suo peccato veniali, rigorosam exhibeat satisfactio-

nem, sed ex æquitate & misericordia acceptat imperfectam, quam homo, gratia instructus, potest exhibere; cujus voluntatis divinæ signum est, quod Deus propter veniale peccatum amicitiam cum peccante non abrumpat, neque illum a se abiciat.

Inst. 2. Peccatum veniale meretur tantum poenam temporalem; atqui homo purus potest condigne satisfacere pro poena temporali; ergo.

Resp. nego min. Potest equidem homo purus satisfacere pro poena temporali, ad quod sufficit proportio poenæ toleratæ cum poena debita; sed non potest satisfacere, ad quod requiritur proportio æqualitatis inter personam satisfaciendam, & personam cui fit satisfactio, talis autem æqualitas inter Deum & hominem non reperitur.

Inst. 3. Homo justus, per actum contritionis, condigne satisfacit pro peccato veniali; ergo.

Resp. dist. antec. Satisfacit in præfenti statu per applicationem satisfactionis Christi, *conc.* in alio statu, *nego ant.* Incarnatione enim sublata, non posset homo condigne satisfacere ad æqualitatem pro veniali.

Inst. 4. Ergo, sublata Incarnatione, homo justus, venialiter peccans, æternum periret; falsum consequens.

Respond. nego illatum: Quia, ut jam dictum est, Deus pro peccato veniali non exigit satisfactionem rigorem, & ideo, in quocumque statu, homo justus potest mereri gratiam, cui annexa est peccati remissio.

DISSERTATIO IV.

De existentia Incarnationis.

Nota. **M**essiam a Deo promissum jam advenisse inficiantur, nedum Gentiles, sed & Judæi, cujus tamen adventus contra Gentiles invictè demonstratur fidei nostræ motivis credibilitatis, quæ, in *Tractatu de Fide*, exponemus, ad quæ, ne in fastidiosas repetitiones impingamus, Lectorem remittimus, ut probemus contra Judæos, 1. Messiam jam dudum advenisse. 2. Jesum Nazarenum esse Messiam in Lege promissum.

CAPUT I.

Utrum Messias, a Deo promissus, jam advenierit?

Nota: **I**nnumeris propemodum oraculis Prophetarum potest, contra Judæos, demonstrari adventus Messix jam præteritus; nos vero, brevitatis gratia, ea seligimus, quibus tempus adventus Messix designatur; tales sunt Prophetix Jacob *Genes. 49.* Danielis, *cap. 9.* Aggæi, *cap. 2.* & Malachiæ, *cap. 3.* Itaque.

CONCLUSIO.

Messiam jam a multis sæculis advenisse, probatur efficaciter ex Prophetarum vaticiniis.

*Prima probatio ex vaticinio Jacob Gen. 49.
vers. 8. & 10.*

Jacob morti proximus, prædicens filiis suis quæ eorum posteris eventura erant, sic Judam

alloquitur: *Juda, te laudabunt fratres tui adorabunt te filii patris tui non auferetur sceptrum de Juda & dux de femore ejus, donec veniat qui mittendus est, & ipse erit expectatio gentium*. Atqui ex hac Prophetia patet Messiam jam advenisse; ergo.

Prob. minor. Ut ex hac Prophetia pateat Messiam jam advenisse, sufficit ut hæc tria constant: 1. Per *Sceptrum & Ducem*, intelligi principatum politicum; 2. Per eum, qui *mittendus est*, ad cujus adventum sceptrum auferendum est e tribu Juda, intelligi Messiam; 3. Jam diu *sceptrum*, seu principatum politicum, e tribu Juda ablatum esse; atqui hæc tria constant; ergo.

1. Per *Sceptrum & Ducem*, intelligitur principatus politicus; nam vox hebræa, *Schebet*, pro qua vertitur *sceptrum*, significat supremam auctoritatem; & vox, *Mechokek*, pro qua vertitur, *Dux*, significat Ducem, Legislatorem, & Magistratum; unde Septuaginta sic vertunt; *Non deficiet Princeps de Juda, & Dux de femoribus tuis*. Et Chaldaica paraphrasis, *Non auferetur habens principatum a domo Juda, neque Scribe*, id est, Legislator, *a filiis filiorum ejus*. Ergo.

2. Per eum qui *mittendus est*, intelligitur Messias; nam vox hebræa, *Siloch*, significat mittere, sicut interpretatur Jo: 9: *Lava in natatoria Siloe, quod interpretatur missus*. Porro Messias per excellentiam vocatur mittendus, *Obsecro, Domine*, inquit Moyses, Exodi 4. loquens de Messia, *mitte quem missurus es*. Hinc Chaldaica paraphrasis & S. Pagninus vertunt: *Donec veniat Messias*; qui solus potest dici *expectatio gentium*, juxta promissionem Messie factam Jacob, Genes. 28: *Benedicentur in te, & in semine tuo cunctæ tribus terræ*, de quo Messia.

sia sibi promisso hic evidenter loquitur Jacob :
 3. Omnis supremus principatus jam dudum sublatuſ est, non solum de tribu Judæ; sed etiam de tota gente Judæorum, qui a multis sæculis vagi sunt, ac ubique terrarum, juxta prophetiam Osee 3. depressi sunt, *Sine rege, & sine principe, sine sacrificio, & sine altari, & sine ephod, & sine theraphim.* Ergo ex vaticinio Jacob patet Messiam jamdiu advenisse.

Solvuntur Objectiones.

Objiçunt 1. Judæi, in Jacob vaticinio, per vocem, *Schebet*, non significatur *Sceptrum*, seu *Virga* dominationis, sed *Virga* tribulationis, ita quod sensus sit : *Non recedet virga tribulationis a Juda, donec veniat Messias.* Atqui usque modo Judæi ubique terrarum tyrannica servitute premuntur; ergo Messias nondum venit.

Resp. dist. maj. Quia 1. Jacob tribu Judæ nonnisi fausta & felicia prænuntiat, nimirum honorem ab aliis tribubus, victoriam de hostibus, supremam potestatem, ubertatem, &c.

2. Quia vox, *Schebet*, nusquam significat virgam tribulationis, nisi vocem habeat adjunctam, qua determinetur ad tribulationem significandam, v. gr. Psalm. 2. *Reges eos in virga ferrea.* Isaïæ 10. *ve Assur, virga furoris mei & baculus ipse est.* Atqui tantum abest, ut vox, *Schebet*, per aliquid adjunctum determinetur ad significandam tribulationem, quin econtra per hæc verba sequentia, *& Dux de femore ejus,* determinetur ad significandam supremam auctoritatem; ergo, &c.

Objiçunt 2. In vaticinio, particula, *donec*, non significat cessationem regie dignitatis in Juda, sed ejusdem continuationem, ut sensus.

fit: Postquam venires Messias, qui sceptrum Tribui Juda restitueret, nunquam deinceps ab ea auferetur. Ergo nondum venit Messias.

Resp. nego ant. Absque ullo enim, vel levissimo fundamento, particula, *donec*, vertitur in particulam *postquam*, absque ullo scripturarum exemplo, in quibus particula, *donec*, cessationem rei naturaliter significat; sic, Genesi 26. de Isaac dicitur: *Ibat. proficiens, atque succrescens, donec magnus effectus est*, tunc enim desinit succrescere. Porro veteribus Judæis ita exploratum fuit Jacob per particulam, *donec*, determinasse Messiam venturum cum sceptrum de Juda defecerit, ut, cum in Herode illud defecisse cognoverant, aliqui Herodem ipsum, alii Joannem Baptistam, Messiam esse arbitrati fuerint.

Instant 1. Jacobæum vaticinium in Davide, longo tempore post mortem Jacob, primum vim habuit; ergo ex illo concludi minime potest non defuturum in Tribu Juda sceptrum donec veniat Messias.

Resp. nego conseq. Jacob enim non prædixit, fore, ut statim a sua morte, Tribus Juda sceptrum obtineret, sed prædixit dantaxat, fore, ut, ex quo Tribus Juda sceptrum obtinuisset, eo non destitueretur simpliciter & absolute donec Messias veniret.

Instant 2. Juxta illam explicationem nondum venit Messias; nam in extremis Asiæ partibus extat imperium Judæorum, in quo præficiuntur Dnces ex Tribu Juda, ut testantur aliqui Rabini; ergo.

Resp. nego anteced. Illud enim imperium est prorsus fictitium, nam ex relationibus viatorum, qui totam peragrarunt Asiam, constat Judæos ubique terrarum dura premi servitute; immo ipsimet, tempore mortis Christi decla-

naverunt se omni auctoritate ac reipublicæ forma destitutos, cum clamaverunt (i) *Nobis non licet interficere quemquam, non habemus regem, nisi Casarem.*

Obijciunt 3. Per vocem, *Siloch*, in Jacob vaticinio, significatur urbs, *Silo*, quatenus pertinet ad Saul & Jeroboam, qui in *Silo*, ubi servabatur Arca, uncti fuerunt in reges, ita ut sensus sit: *Non auferetur sceptrum de Juda, donec veniant Saul & Jeroboam in Silo, ubi consecrentur in reges.* Ergo illa prophetia non potest intelligi de Messia.

Resp. nego ant. Quia 1. prophetia redderet hunc sensum ridiculum: *Non auferetur, &c. donec veniat urbs Silo.* 2. Quia, nec Saul, nec Jeroboam, uncti sunt in *Silo*, sed Saul in Ramatha. (k) & Jeroboam in Sichem. (l) 3. Quando unctus est Saul, Arca erat in Cariathiarim, in domo Aminadab (m) & quando unctus est Jeroboam, Arca erat Jerosolymis, quo translata fuerat a Davide de Cariathiarim (n) 4. Quia, nec in Saule, nec in Jeroboam defecit sceptrum de Juda; *non in Saule*, quia quando unctus est, nondum erat sceptrum in Tribu Juda, ut constat; *non in Jeroboam*, quamvis enim decem tribus illum secutæ fuerint, stetit tamen semper incolume regnum Judæ, cujus regia erat Jerusalem.

Quæres: *An prophetia Jacob fuerit completa in Jesu Nazareno?*

Resp. affirm. Quia, ex quo David, in quo Judæ vaticinium vim habere cœpit, sceptrum accepit, penes Tribum Juda perpetuo mansit
supre-

(i) Joanni. 18. vers. 31. & cap. 19. vers. 15.

(k) 1. Reg. 10.

(l) 3. Reg. 12.

(m) 1. Reg. 7. vers. 2.

(n) 2. Reg. 6.

suprema auctoritas, sive singularibus personis ex ea regnum capessentibus, sive tota tribu libere aliarum tribuum personas ad Ducatum evehente, usque ad Herodem, in quo, cum esset alienigena, Idumæus nempe, seu ex posteris Esau, ut docet Iosephus (o) extincta est omnis Judaicæ tribus auctoritas, & quo regnante, natus est Jesus Nazarenus, in quo impleta sunt omnia, quæ de Messia prædicta sunt a prophetis, ut videbimus cap. sequenti.

Objicies 1. Vaticinium Jacob non fuit impletum in Jesu Nazareno; ergo.

Prob. antec. Jesus Nazarenus non venit statim ut Herodes regnum a Romanis obtinuit; ergo, &c.

Resp. nego consequ. Nam particula, *donec*, sæpe in Scriptura sumitur late & indeterminate, nempe, pro aliquo temporis intervallo, ut hic sumitur pro tempore adventus Christi; unde, ad verificationem vaticinii Jacob, sufficit, quod Jesus natus sit sub Herode alienigena: immo requiritur quod Jesus non venerit, nisi sublato sceptro, cujus ablatio debuit esse signum illius adventus, ut, non solum docti, sed & vulgus, pro certo habebant, juxta illud Samaritanæ; Joann. 4. *Scio quia Messias venit.*

Inst. 1. Herodes non erat alienigena; ergo.

Resp. nego ant. Certum est enim, ex omnibus historicis, Herodem fuisse alienigenam Ascalonitam secundum aliquos, Idumæum secundum alios, quos conciliat. D. Epiphan. hæresi 20. dicens, cum posse dici, *Idumæum*, & *Ascalonitam*, quod nempe ex Antipatre Ascalonita, in Idumæa captivo, inibi natus fuerit.

Inst.

(o) Lib. 14. Antiq. Judaicarum, cap. 2.

Inst. 2. Idumæi, ex quo a Joanne Hircano, annis ante Christum 90. subacti fuerunt, circumcissioni, aliisque Judaicæ religionis ritibus, subjecti fuere, omnibusque Judæorum privilegiis donati, teste Joseph. (p) Ergo Herodes fuit Judæus..

Resp. dist. conseq. Fuit Judæus, nomine, & religione, *conc.* genere, & sanguine, *nego conseq.* Genus autem Herodis hic quærimus, non religionem..

Inst. 3. Atqui Herodes fuit Judæus genere; ergo..

Prob. antecedi. Ex Nicolao Damasceno, qui apud Josephum, *lib. 4. antiquit. cap. 2.* scribit, *Herodem genus duxisse a primoribus Judæorum, qui in Judæam venerant e Babylonia.* Ergo..

Respond. nego conseq. Neque enim audiendus est Nicolaus Damascenus cum subjungat ibidem Josephus, Nicolaum hoc scripisse, non tam ad posteritatis cognitionem, quam ex adulatione, ut inde Herodis gratiam sibi conciliaret.

Objicies 2. Sceptrum non permansit in Tribu Juda usque ad adventum Jesu Nazareni; ergo vaticinium Jacob in eo non fuit impletum.

Prob. antec. Sceptrum desit in Tribu Juda tempore Sedeciæ, qui postremus rex, fuit in Babyloniam captivus a Nabuchodonosore ductus; nimirum sexcentis circiter annis ante Nativitatem Jesu Nazareni; ergo..

Resp. nego antec. Num, durante captivitate Babylonica, rex Judæorum erat *Joachim*, de Tribu Juda, quam, in ipsa captivitate, ad folium

lium regni exaltavit *Evilmerodach* rex, filius & successor Nabuchodonosoris (*q*) ; post mortem regis Joachim, *Zerobabel*, ex Tribu Juda & regio sanguine oriundus, recepit legislativam potestatem, & Ducis nomen ; non ergo penitus ablatum fuit sceptrum de Juda, neque Dux de femore ejus in captivitate Babylonica, cujus tamen utriusque potestatis, regiar, & ducalis, ablatio, erat adventus Messie certum indicium, in Jacob vaticinio designatum.

Inst. i. Post transmigrationem Babylonis, Machabæi, qui erant ex Tribu Levi, utpote Sacerdotes, Tribu Judæ præfuerunt per 400. circiter annos ante adventum Jesu Nazareni ; ergo potestas suprema ducalis fuit tunc temporis ablata a Tribu Juda.

Resp. dist. antec. Machabæi præfuerunt Tribui Juda, auctoritate ab illa Tribu accepta, *conc.* auctoritate propria ab illa Tribu independente, *nego ant.* Itaque, tempore Machabæorum, suprema potestas semper mansit penes Tribum Juda, quæ summos Sacerdotes de Tribu Levi, & Concilium, *Sanhedrin*, eligebat, ut, suo nomine & secundum suas leges, rempublicam administrarent, ut patet, *i. Machab. 9.* ubi, defuncto Juda Machabæo, *Congregati sunt omnes, Judæi, amici Juda, & dixerunt Jonathan ejus filio . . . Te hodie eligimus esse pro eo nobis in Principem & Ducem ad bellandum bellum nostrum* : Et subditur : *Et suscepit Jonathan tempore illo principatum* . Quemadmodum igitur dici non potest sceptrum Polonicum in natione Polonica defecisse, & ad gentem germanicam transiisse, eo quod germanum in regem elegerit : ita nec potest dici sceptrum in Tri-

Tribu Juda defecisse, aut in Tribum Levi transisse, quando Tribus Juda in Duces elegit Machabæos, ut rempublicam, suo nomine, & secundum suas leges, administrarent: quare sceptrum semper in Tribu Juda remansit, donec Herodes alienigena regnum Judæorum, sine spe restitutionis, a Romanis obtinuit, absque electione, & consensu Judæorum: quod contigit tempore adventus Jesu Nazareni.

Inst. 2. Post captivitatem Babylonicam, suprema potestas non magis mansit penes Tribum Juda, quam penes Tribus Benjamin & Levi, quæ se Tribui Judæ ita adjunxerunt, ut nullo post hæc, quam Judæorum nomine appellarentur & censerentur (r); ergo.

Resp. nego antec. Nam suprema potestas ad solam Tribum Juda pertinebat, tum quia sedes regni fuit in Jerusalem, quæ pertinebat ad Tribum Juda; tum quia Tribus Levi & Benjamin, ita in unum populum, sub Regibus & Ducibus de Tribu Juda, coiverant, ut unicam duxerunt Tribum, nomine Juda appellatam, instituere censerentur; adeoque suprema auctoritas, quæ penes populum mansit, semper Tribui Juda propria fuit.

Objicies 3. Sicut Jacob prædixit, non defuturum sceptrum in Juda, donec veniat Messias, ita prædixit non defuturas benedictiones in Tribubus Joseph donec veniret idem Messias: *Filius accrescens Joseph . . . benedictiones Patri sui confortata sunt benedictionibus Patrum ejus, donec veniret desiderium collium arcerum.* Atquæ vaticinium de posteritate Joseph, non fuit impletum in Jesu Nazareno; ergo nec vaticinium de Juda.

Probi-

(r) Lib. I. Parall. cap. xi. v. 12. & 13.

Prob. min. Posterius Joseph simul ac sceptrum Israeliticum in Jeroboam adepti sunt, a veri Dei cultu ad vitulos aureos deflexerunt, & diu ante adventum Jesu Nazareni, puta annis 717. juxta chronologiam doctissimi Calmet (f) a Salmanassare, Assyriorum rege, in perpetuum exilium abducti fuerunt, 4. Reg. 17. Ergo.

Ut hæc gravis objectio solvatur, Theologi, & Interpretes, in duas abiere sententias circa transmigrationem decem Tribuum Israel sub Salmanassare.

Prima, est eorum, qui volunt illam transmigrationem fuisse perpetuam, sicque, *distinguunt maj. primi argumenti*, Jacob prædixit benedictiones, in Tribubus Joseph, id est, in Ephraim, Manasse, & aliis Tribubus Israel, non defuturas, conditionate, nempe, si, & quandiu Deo fideles permanerint: *concedunt*; absolute, *negant*; & ideo Jacob non dixit: *Non auferentur benedictiones, donec*, &c. quomodo dixit: *Non auferetur sceptrum de Juda, donec*, &c. sed dixit: *Benedictiones confortata sunt*, &c. quæ dictionis differentia denotat, promissionem factam Joseph, non figere cessationem illarum benedictionum circa tempus Nativitatis Messiae: ex qua responsione ruit tota vis argumenti.

Secunda Sententia, est eorum, qui *negant min. utriusque argumenti*; quia, inquiunt, captivitas 10. Tribuum non fuit perpetua, ipsæ enim, cum Tribubus Juda & Benjamin, e Babylone reversæ sunt, sicut prænuntiatum fuerat a Prophetis, Jerem. 3. v. 18. *in diebus illis, ibit domus Juda ad domum Israel, & venient*

(f) Tab. Chronolog. Biblior. p. 253.

naient simul de terra Aquilonis, ad terram quam dedi Patribus vestris. Et Ezech. 27. vers. 21. Hac dicit Dominus, ecce ego assumam Filios Israel de medio nationum, ad quas abierunt, & congregabo eos undique, & adducam eos ad humum suam, & faciam eos in gentem unam in montibus Israel, & Rex unus erit omnibus imperans: & non erunt ultra dua gentes, nec videntur amplius in duo regna . . . & erunt mihi populus, & ego ero eis Deus. Ibi clare prædicatur unio duodecim tribuum post captivitatem. Item Amos 9. vers. 14. Converteram captivitatem populi mei, Israel, & edificabunt civitates desertas, & inhabitabunt . . . & plantabo eos super humum suam, & non evel- lam eos ultra de terra sua, quam dedi eis, dicit Dominus. Item Tobias, qui erat de Tribu Nephthali, monet Filium, cap. 14. quod: Fratres sui, qui dispersi sunt a terra Israel, revertentur ad eam: omnis autem deserta terra ejus replebitur, & domus Dei, qua in ea incensa est, iterum readificabitur, ibique reuertentur omnes timentes Deum. Quare Esdras, lib. 1. Cap. 6. vers. 16. narrat hunc reditum, fecerunt autem, inquit, Filii Israel, Sacerdotes & Levita & reliqui Filiorum transmigrationis Dedicationem domus Dei in gaudio, & obtulerunt . . . hircos caprarum pro peccato totius Israel duodecim, juxta numerum Tribuum Israel. Quare duodecim hircos immolarunt: nisi quia 12. Tribus redierant, & unum populum consti- tuebant.

Instit. Osee 1. vers. 6. dicitur: Voca nomen ejus absque misericordia, quia non addam ultra misereri domui Israel, sed oblivione obliviscar eorum, & domui Juda miserebor, & salvabo eos in Domino Deo suo. Ergo captivitas decem Tribuum Israel, fuit perpetua.

Respond.

Respond. nego consequ. Oseas enim, cap. 11. de filiis Israel, ait: *Avolabunt quasi avis ex Aegypto, & quasi columba de terra Assyriorum, & collocabo eos in domibus suis, dicit Dominus.* Ergo, ex Cap. 1. videtur tantum sequi, quod Deus non eodem modo misertus sit domui Israel, quo misertus est domui Judæ, quæ rediit cum duce suo, cum econtra decem Tribus Israel redierint sub duce Tribuum Judæ & Benjamin, quibus fuerunt unitæ & quasi insitæ, nec amplius populum distinctum formaverint, ut prophetavit Ezechiel supra.

II. Probatio ex vaticinio Danielis.

9. vers. 24.

Danieli oranti apparuit Gabriel Archangelus, eique adventum Messiae, & illius adventus tempus revelavit, his verbis: *Septuaginta hebdomades abbreviatae sunt super populum tuum, & super urbem sanctam tuam, ut consummetur pravaricatio, & finem accipiat peccatum, & deleatur iniquitas, & adducatur justitia sempiterna, & impleatur visio & prophetia, & ungatur Sanctus Sanctorum.*

Scito ergo & animadvertite: ab exitu sermonis (id est edicti Regis Persarum) ut iterum adificetur Jerusalem, usque ad Christum ducem, hebdomades septem, & hebdomades sexaginta duæ erunt: & rursum adificabitur platea, & muri in angustia temporum.

Et post hebdomades sexaginta duas, (ab urbis ædificatione) occidetur Christus: & non erit ejus populus, qui cum negaturus est, & civitatem, & Sanctuarium dissipabit populus cum duce venturo: & finis ejus vastitas, & post finem belli statuta desolatio.

Confirmabit autem pactum multis hebdomada una, & in dimidio hebdomadis deficiet Hostia &
Sacr-

Sacrificium: & erit in templo abominatio desolationis: & usque ad consummationem & finem perseverabit desolatio. Ex hac prophetia, sic argumentum conficitur.

Ille, de quo fit mentio in Danielis Prophetia, est Messias; atqui jam diu hebdomadæ, post quas venturus dicitur, elapsæ sunt; ergo jam diu venit Messias.

Prob. maj. Soli Messiae adaptari possunt characteres a Daniele, in sua Prophetia, delineati; ergo, &c. namque:

1. Dicitur, *Christus*, quæ vox græca idem sonat, ac hebraica, *Messias*.

2. Dicitur, *Dux*, quo titulo insignitur Messias Isaia 55. *Ecce testem dedi eum, Ducem, ac Præceptorem gentibus.*

3. Dicitur, *Sanctus Sanctorum*, quod nomen soli Messiae convenit, qui est Sanctus per excellentiam, Isaia 54. *Redemptor tuus Sanctus Israel, Deus omnis terra vocabitur.*

4. Dicitur, quod sit impositurus finem peccato, iniquitatem deleturus, justitiam sempiternam adducturus; quæ omnia soli Messiae conveniunt, juxta illud Isaia 61. *Spiritus Domini . . . misit me, ut mederer contritis corde, & prædicarem captivis indulgentiam, &c. & illud Malachia 4. Orietur vobis timentibus nomen meum Sol justitia.*

5. Dicitur, quod, per ejus adventum, debeat impleri *Visio & Prophetia*, quod soli Messiae convenit, qui, cum sit veritas, finem imposuit umbris & figuris, quæ eum designabant.

6. Dicitur, quod sit morti tradendus; atqui id de Messia Prophetæ prædixerant, *Sicut ovis ad occisionem ducetur; inquit Isaia, 53.*

Porro hi characteres ita sunt Messiae proprii, ut veteres Rabbini, teste D. Hieronym. in Da-

in Daniel. cap. 9. hoc vaticinium de Messia interpretati fuerint.

Prob. min. In sacra Scriptura, hebdomada duobus tantum modis sumitur, nimirum. 1. Pro septem diebus, sic *Leviticus* 22. sumitur. 2. Pro hebdomada annorum, *Levit.* 25. *Numerabis quoque tibi septem hebdomades annorum*, id est, septies septem annos, qui simul efficiunt 49. annos. Atqui si 70. hebdomades sumantur pro hebdomadibus dierum; si 70. sumantur pro hebdomadibus annorum, (ut de facto sumi debent) jam diu præterierunt: nam septuaginta hebdomades dierum conficiunt dies 490. septuaginta vero hebdomades annorum conficiunt 490. annos. Hoc porro spatium a multis jam sæculis elapsum est; ergo Messias jam diu venit.

Quæres: An Prophetia Danielis fuerit completa in Jesu Nazareno?

Resp. affirm. Idque ostenditur ex tribus capitibus. 1. Ex circumstantiis illius, qui Danieli, ab Angelo Gabriele, promittitur. 2. Ex eventibus mortem illius comitantibus. 3. Ex eventibus mortem ejus sequentibus.

1. Ex circumstantiis illius Messiae, qui venturus Danieli promittitur, ostenditur quod Messias ille sit Jesus Nazareus, namque... 1. Per adventum Messiae, promissi, peccatum debet finem accipere, deleri iniquitas, & adduci justitia sempiterna; atqui finem accepit peccatum & deleta est iniquitas per Jesum Nazarenum, qui dedit semetipsum pro nobis, ut redimeret nos ab omni iniquitate (1) & per eum adducta est justitia sempiterna, nam factus est nobis justitia, & sanctificatio & redemptio

(1) 2. ad Tit. vers. 14.

prio (u) ergo, &c. . . . 2. Messias promissus, dicitur, *Christus*, id est, unctus, & *Sanctus Sanctorum*; atqui Jesus Nazarenus est unctus, quia ex plenitudine divinitatis cum humanitate conjunctus, factus est plenus gratia & veritate; item est *Sanctus Sanctorum*, quia non tantum est Sanctus sanctitate accidentali, sicut alii qui dicuntur sancti; sed est Sanctus sanctitate substantiali per sui cum divinitate substantialem unionem. . . . 3. In adventu Messiae debent impleri *Visio & Prophetia*; atqui figurae & Prophetiae, quae Messiam annuntiabant, impletae sunt in Jesu Nazareno, ut tradit Div. Matth. cap. 12. *Omnes Prophetae, & lex usque ad Joannem prophetaverunt* 4. Messias promissus debuit occidi post hebdomadas 69. atqui Jesus Nazarenus, juxta Chronologicos exactiores, occisus est in medio hebdomadae septuagesimae; ergo, &c.

2. Idem ostenditur ex eventibus mortem Messiae promissi comitantibus, nimirum, 1. Quod non erit populus, id est, nihil ad Christum, a quo alienus habebitur populus Judaicus, qui eum negaturus est. 2. Quod in dimidio hebdomadis (Septuagesimae) deficiet Hostia & Sacrificium; atqui haec comitata sunt mortem Jesu Nazareni, tunc enim populus Judaicus eum negavit, cum dixit: *Non habemus Regem nisi Caesarem, crucifige, crucifige eum*. Tunc item defecit Hostia & Sacrificium, non quod reipsa sacrificia Judaica tunc cessaverint, sed quod eorum vis & praeceptum evanuerint, quando Christus ea abrogavit, dicens, *Consummatum est*, quod quidem mysterium, velo templi scisso, adumbratum est.

3. Idem

3. Idem ostenditur ex eventibus mortem Messiae sequentibus, nimirum, quod *Civitatem & Sanctuarium dissipabit populus cum Duce venturo*; quod *finis ejus vastitas*; quod *post finem belli statuta desolatio*, quæ usque ad consummationem & finem perseverabit. Atqui hæc omnia Jesu Nazareni mortem secuta sunt, non quidem immediate, hoc enim non requirit Prophetia, sed paucis aliquot annis: etenim 40. post Christi mortem annis, Titus Vespasiani filius, Dux ille venturus cum exercitu Romano, Jerosolymam oppugnavit, & penitus evertit; tuncque & ipsum templum a militibus dissipatum & combustum fuit, Judæique occisi, alii capti, abducti, & undequaque ita dispersi, ut populus esse desierint, quæ desolatio ab annis 1700. & amplius durat, & usque ad mundi finem duratura est.

Obicies 1. Non potest assignari tempus, quo 70. hebdomades sint enumerandæ; ergo ex Prophetia Danielis non potest colligi, saltem certe, Messiam promissum jam advenisse.

Resp. transeat ant. nego consequ. Nam etsi manifestum non esset, a quo præcise tempore enumerandæ forent 70. hebdomades, tamen adhuc esset evidens elapsam esse ultimam, in cuius medio Messias prænuntiatur morti tradendus; nam desinere debuit ante cessationem sacrificii veteris; atqui sacrificium illud jam diu desiit: in uno enim Jerosolymorum templo, juxta Legis Mosaicæ præscriptum, sacrificia offerri poterant: ergo, cum a mille septingentis annis, & amplius, Jerosolymorum templum dirutum fuerit; sacrificia apud Judæos omnino desierunt.

Dixi, transeat ant. Quia, juxta fere omnes Chronologos hodiernos, 70. hebdomades ducunt initium ab anno 20. Artaxerxis Longimani,

ni, qui eo anno Nehemiæ fecit facultatem iterum ædificandi, non templum, sed urbem Jerusolymitanam, juxta illud Nehemiæ, 2. Esdræ 2. anno 20. *Artaxerxis dixi ad Regem . . . si placet servus tuus ante faciem tuam, ut mittas me in Judæam ad civitatem patris mei: & ædificabo eam . . . & dedit mihi Rex juxta manum Dei mei bonam mecum.*

Inst. 1. Ergo Prophetia Danielis non fuit completa in Jesu Nazareno.

Prob. ant. Juxta Prophetiam, ultima hebdomas debuit incidere in tempus Passionis Christi; atqui si initium 70. hebdomadum ducatur ab anno 20. Artaxerxis Longimani, ultima hebdomas non incidit in tempus Passionis Jesu Nazareni; ergo &c.

Resp. nego min. Nam, juxta exactiorem Chronologiam doctissimi Calmet (x) annus vigesimus Artaxerxis incidit in annum mundi 3550. quibus si addantur 490. anni, quibus constant 70. hebdomades annorum, conficiunt annos 4040. qui est annus quartus post Jesu Nazareni Passionem, quæ advenit anno mundi 4036. cum medio, & consequenter in medio hebdomadis septuagesimæ; nempe anno, ab edicto Artaxerxis 486. cum medio.

Inst. 2. Artaxerxes, anno sui regni septimo, Judæis dedit facultatem reædificandi urbem Jerusolymitanam (y); ergo ab eo anno hebdomades Danielis ducunt initium.

Respond. nego antec. Nam Artaxerxes, edicto dato anno regni sui septimo, potestatem non facit rursus ædificandæ civitatis Jerusalem, sed tantum Templi restaurandi, & cultus veri Dei resti-

(x) Dictionario Historico, Chronologico, v. *Artaxerxes* 3

(y) Esdræ 1. cap. 7.

restituendi: unde non alterius rei fit mentio in edicto quod Esdras anno 7. Artaxerxis obtinuit.

Prob. antec. 1. Esdræ cap. 7. dicitur: *Dedit ei (Esdræ) Rex . . . omnem petitionem ejus.* Atqui non est dubium, quin Esdras petierit urbis reædificationem; quomodo enim sine muris manere potuissent tot Judæorum millia, quæ secum reducerat Esdras, cum tot, tamque infensos haberent hostes vicinos? Ergo.

Resp. nego min. Nihil enim tunc temporis a Rege petierat Esdras, quod murorum civitatis instaurationem spectaret, sed tantum ea, quæ ad Dei cultum & observationem Legis pertinerent, quod ex una lectione citati capitis septimi Esdræ manifestum est.

Objicies 2. In Prophetia dicitur, quod hebdomades sint abbreviata; ergo non debent summi pro 70. hebdomadibus integris.

Respond. nego consequ. 1. Quia in Hebræo Legitur: *Hebdomada 70. decisa sunt*, juxta quem sensum nulla remanet difficultas. 2. Quia hebdomadæ, non ideo dicuntur abbreviata, quod integræ non sint, sed quod cum Deus hebdomadas plures quam 70. constituere potuisset ante Messie adventum, tamen 70. duntaxat statuit, ob Danielis, aliorumque Sanctorum, orationes & suspiria.

III. Probatio ex vaticinio Aggai, cap. 2. vers. 7.

Cum Judæi, qui viderunt magnificentiam Templi a Salomone ædificati, tristitiam ex eo concepissent, quod Templum a Zorobabele constructum ad veteris Templi gloriam non accederet, ut narratur 1. Esdra 3. Aggaus sic eos consolatur: *Hac dicit Dominus*
exer-

exercituum, adhuc unum modicum est, & ego commovebo calum, & terram, & mare, & aridam. Et movebo omnes gentes: & veniet desideratus cunctis gentibus: & implebo domum istam gloria. magna erit gloria domus istius novissima plusquam prima, & in loco isto dabo pacem, dicit Dominus exercituum. Ex hac Prophetia sic argumentor: Nulli dubium est quin de adventu Messiae locus iste intelligatur, qui solus potest dici, *desideratus cunctis gentibus*; in quo benedicendae sunt omnes gentes; solus potest dici daturus pacem veram, & caelestem, qui solus innocens reconciliavit Deo peccatores; atqui ille Messias jam diu advenit; ergo, &c.

Prob. min. 1. Messias promittitur venturus post unum tempus modicum, post unum pusillum, ut habet Hebraica editio; atqui ab anno 2. Darii Hystaspis, quo praedixit Aggaeus, usque ad tempus praesens, plusquam duo annorum millia effluxerunt; ergo Messias jam diu advenit.

Prob. min. 2. Messias promittitur venturus stante adhuc Templo a Zorobabele constructo, in quo debuit annunciare pacem, cujus major futura erat gloria, quam gloria primi Templi a Salomone constructi, nimirum ob praestantiam Messiae illud ingredientis: nullo enim alio sensu superare potuit gloriam Templi Salomonis, cujus stupenda erat magnificentia, quod fuit decoratum Arca foederis, unde Deus reddebat oracula: oleo divinae unctionis: igne perpetuo: virga Aaron: praesentia Dei in propitiatorio, &c. quibus caruit Templum Zorobabelis; atqui a mille sexcentis annis & amplius, illud Templum a Tito funditus dirutum fuit ac combustum, ergo concludendum est, jam diu advenisse Messiam, eumque esse Jesum Nazarenum.

Objiciunt Judæi. Christus non intravit in Templum Zorobabelis, sed in illud, quod Herodes, post Templum Zorobabele penitus dirutum, construxit; ergo Prophetiæ Aggæi promissiones, non possunt referri ad secundum Templum, sed ad tertium Herodianum.

Resp. nego antec. 1. Quia hæc particula demonstrativa, *ista domus*, indigitat secundum Templum, quod tunc a Zorobabele construebatur. 2. Quia templum quod Judæi vocant Herodianum, hoc ipsum est Templum Zorobabelis, quod, in aliquibus duntaxat suis partibus collapsum, Herodes reparavit, ornavit atque ditavit, ut notat Cornel. a Lapide in Aggæum.

IV. Probatio ex vaticinio Malachia Prophetarum ultimi. Cap. 3. v. 1.

Prophetiam Aggæi confirmat Malachias, dicens: *Ecce ego mitto Angelum meum, & preparabit viam ante faciem meam: & statim veniet ad Templum suum Dominator, quem vos quaritis, & Angelus Testamenti, quem vos vultis. Ecce venit, dicit Dominus exercituum.* Ibi profecto intelligitur Messias, qui est Dominus quem expectabant Judæi, & Angelus testamenti quem desiderabant, quia fœdus sempiternum Deum inter & homines constituere debebat; atqui promittitur venturus statim, & juxta Septuaginta, subito, immo ecce jamjam venit juxta Prophetiam: promittitur venturus ad Templum a Zorobabele constructum, quod a 17. sæculis & amplius, est ita destructum, ut nulla prorsus illius iterum excitandi spes affulgere possit; ergo Messias jam venit. Estque Jesus Nazarenus, qui statim post suam Nativitatem in Templo oblatus est, cujus

jus Angelus, seu Præcursor prædicitur, nimirum, Joannes Baptista, qui per suam prædicationem homines disposuit ad illum, ut verum Messiam, recipiendum: *Hic est enim de quo scriptum est*, ait, Matth. 11. *Ecce ego mitto Angelum meum ante faciem tuam, qui præparabit viam tuam ante te.*

C A P U T II.

Utrum Jesus Nazarenus sit Messias in Lege promissus?

C O N C L U S I O.

Jesus Nazarenus est Messias in Lege promissus.

Propositio jam probata manet ex mox dictis, nihilominus:

Prob. ulterius: Omnes Prophetiæ de Messia editæ, in Jesu Nazareno fuerunt impletæ; ergo.

Probat. Anteced. Percurrendo singulas Prophetias.

1. Messias debuit nasci ex familia David, Isaïæ 11. *Egredietur virga de radice Jesse.* At Jesus Nazarenus ex semine David ortus est, Matth. 1. *Liber generationis Jesu Christi, Filii David,* &c.

2. Debuit nasci in Bethlehem, Michææ 5. *Et tu Bethlehem Ephrata, parvulus es in milibus Juda: ex te mihi egredietur, qui sit dominator in Israel, & egressus ejus ab initio, a diebus æternitatis.* At Jesus natus est in Bethlehem, Matth. 2. *Cum ergo natus esset Jesus in Bethlehem Juda.*

3. Nasci debuit ex Virgine, Isaïæ 7. *Ecce Virgo concipiet & pariet Filium.* At Jesus na-

tus est ex Matre Virgine, Matth. 1. *Cum esset desponsata Mater ejus Maria Joseph, antequam convenirent, inventa est in utero habens de Spiritu sancto.*

4. Debuit adorari a Regibus, Psal. 71. *Reges Arabum & Saba dona adducent : & adorabunt eum omnes Reges terra. Quod impletum in Jesu legitur Matth. 2. Magi ab Oriente venerunt Jerosolymam dicentes: Ubi est qui natus est Rex Judaeorum? venimus adorare eum.*

5. Debuit fugere in Aegyptum, Osee, c. 11. *Ex Aegypto vocavi Filium meum. At impletum est in Jesu, Matth. 2. Consurgens, Joseph, accepit Puerum & Matrem ejus nocte, & secessit in Aegyptum.*

6. Debuit vendi 30. argenteis, Zachar. 11. *Et appenderunt mercedem meam 30. argenteis. Quod in Jesu impletum dicitur, Matth. 26. At illi, Judæ, constituerunt 30. argenteis.*

7. Novum sacerdotium debuit instituere, Psalm. 109. *Tu es Sacerdos in aeternum secundum ordinem Melchisedech. Quod impletum est in Jesu, Matth. 26. Cœnantibus autem illis, accepit Jesus panem, &c.*

8. Debuit prodi ab amico & familiari, Ps. 43. *Etenim homo pacis meae, qui edebat panes meos, magnificavit super me supplantationem : quod impletum est in Jesu, Joann. 18. Sciebat autem & Judas qui tradebat eum, locum, &c.*

9. Messias debuit potari felle & aceto, Ps. 68. *Et dederunt in escam meam fel, & in siti mea potaverunt me aceto : quod in Jesu impletum legitur, Matth. 27. Dederunt ei vinum bibere cum felle mixtum.*

10. Debuit ingredi Jerosolymam, sedens super asinam, & a civibus cum gaudio excipi, Zachar. 9. *Jubila, filia Jerusalem, ecce Rex tuus veniet tibi justus & Salvator : ipse pauper & ascen-*

ascendens super asinam, & super pullum filium asina: quod impletum est in Jesu, Matth. 21. Et adduxerunt asinam & pullum . . . & eum desuper sedere fecerunt . . . turba autem clamabant, dicentes: Hosanna filio David: Benedictus qui venit in nomine Domini.

11. Debut crucifigi & cum iniquis reputari, Psalm. 21. *Foderunt manus meas & pedes meos. Et Isaia 53. Cum iniquis reputatus est. Hoc autem fuit impletum in Jesu, Matth. 37. Duxerunt eum ut crucifigerent. Crucifixi sunt cum eo duo latrones.*

12. Messias debuit resurgere, Psalm. 15. *Non derelinques animam meam in inferno, nec dabis sanctum tuum videre corruptionem. At impletum est in Jesu, Matth. ult. Angelus dixit mulieribus: nolite timere vos: scio enim quod Jesum, qui crucifixus est, quaritis: non est hic: surrexit enim sicut dixit.*

13. Messias debuit ascendere in cælum, Psalm. 46. *Ascendit Deus in jubilo. Id autem in Jesu impletum legitur, Actor. 1. videntibus illis, Apostolis, elevatus est . . . cumque intruerentur in calum euntem illum, &c.*

14. Debut mittere Spiritum sanctum, Joel. 2. *Effundam Spiritum meum super omnem carnem. Id autem in Jesu impletum legitur. Actor. 2. Factus est repente de calo sonus, tanquam advenientis Spiritus vehementis . . . & repleti sunt omnes Spiritu sancto.*

15. Messiae promissa fuit conversio gentium. Isaia 49. *Ecce dedi te in lucem gentium, ut sis salus mea usque ad extremum terra. Illudque magnum opus perficere debuit per eos qui credituri erant in eum, Isaia 66. Ponam in eis signum, & mittam ex eis qui salvati fuerint, ad gentes . . . ad insulas longe . . . & annuntiabunt gloriam meam gentibus, & adducent omnes*

fratres vestros de cunctis gentibus donum Domino. Et assumam ex eis Sacerdotes & Levitas, dicit Dominus. Atqui vocatio gentium facta est per Jesum Nazarenum, qui, Apostolorum suorum ministerio, totum mundum, idololatriæ deditum, ad veri Dei cultum reduxit.

Solvuntur Objectiones.

Objiciunt Judai, Adventus Messiae debet esse magnificus & gloriosus, Psalm. 49. Deus noster manifeste veniet & non silebit. Ignis in conspectu ejus exardescet. Atqui talis non fuit adventus Jesu Nazareni, qui in vili stabulo, & in medio duorum animalium, natus est; ergo, &c.

Respond. dist. maj. Adventus Messiae secundus, quando, nimirum, veniet in majestate sua judicaturus vivos & mortuos, conced. nam ex Matth. 25. Tunc sedebit super sedem majestatis suae. Adventus Messiae primus, nego maj. tunc enim, juxta Prophetiam Zachariae 9. Rex veniet justus & Salvator: ipse pauper, & ascendens super asinam & super pullum filium asinae. Ecce illius Regis tota magnificentia.

Inst. 1. Cum venerit Messias, Super solium David, & super regnum ejus sedebit, Isai. 9. atqui Jesus Nazarenus non sedit super solium David; ergo.

Resp. dist. major. Sedebit super solium David, ita ut per solium David intelligatur Regnum spirituale, quod est Ecclesia, cujus Christus est Caput, conced. Regnum temporale, nego maj. Loquitur itaque Isaias hic de Ecclesia, quæ in æternum duratura est, unde addit: Super regnum ejus sedebit, ut confirmet illud, corroboret in judicio & justitia, amodo & usque

usque in sempiternum. Regnum autem David temporale, in æternum non debuit, nec potuit durare, unde Christus ipse ait, Joann. 18. *Regnum meum non est de hoc mundo*.

Inst. 2. In adventu Messię futura est Israelitarum exaltatio, & rerum omnium abundantia; atqui tantum abest, ut Israelitę in Jesu Nazareni adventu fuerint exaltati & ditati, quin potius fuerunt depressi & ad extremam egestatem redacti; ergo, &c.

Resp. dist. maj. Futura est Israelitarum exaltatio secundum spiritum, & rerum omnium spiritualium abundantia, *conc.* secundum carnem exaltatio & rerum temporalium abundantia, *nego maj.* itaque Israelitę dupliciter sumuntur. 1. Carnaliter, pro iis qui secundum carnem sunt posteri Israel. 2. Spiritualiter, pro iis qui fidem Israel imitantur, hi veri sunt Israelitę, qui in adventu Christi constituti sunt in regno gratię & sanctitatis, juxta hanc Isaia 61. *Prophetiam, Spiritus Domini misit me... ut ponerem lugentibus Sion, & darem eis coronam pro cinere, oleum gaudii pro luctu, pallium laudis pro spiritu mœroris; & vocabuntur in ea fortes justitia, plantatio Domini ad glorificandum*. Quam Prophetiam cum legisset Jesus Nazareus in Synagoga Nazareth, declaravit eam dicens: *Hodie impleta est hæc Scriptura in auribus vestris. Et omnes testimonium illi dabant*.

Inst. 3. Messias promissus debet Judæos liberare a servitutis jugo; atqui eos non liberavit Jesus Nazareus; immo ab ejus adventu sub durissima servitute gemunt; ergo &c.

Resp. dist. maj. A servitute peccati & mortis æternę, *conc.* A servitute principum *nego maj.* Certum est autem quod Jesus Christus non modo Judæos, sed & omnes gentes a ju-

go mortis æternæ & peccati liberavit, Colof. 1. *Eripuit nos de potestate tenebrarum, & tranſtulit nos in regnum Filii dilectionis ſuæ.*

Inf. 4. Meſſias debet omnes gentes imperio ſuo ſubjicere, Pſalm. 2. *Dabo tibi gentes in hereditatem tuam, & poſſeſſionem tuam terminos terra;* atqui Jeſus Nazarenus non ſubjecit omnes gentes imperio ſuo; ergo.

Reſpond. diſt. maj. Debet omnes gentes imperio ſuo ſpirituſuali ſubjicere, *conc.* temporali & caduco, *nego major.* Porro Jeſus Chriſtus omnes gentes ſuo ſpirituſuali imperio ſubjecit, fidem interius, occulta gratiæ ſuæ ſubminſtratione, ſuadendo, mores reſormando, &c.

Inf. 5. Atqui Meſſias debet omnes gentes ſubjicere imperio ſuo temporali; ergo, &c.

Prob. ant. Meſſias promiſſus, futurus eſt bellator, Pſalm. 44. *Sagitta tua acuta, populi ſub te cadent;* ergo.

Reſp. diſt. antec. Meſſias futurus eſt bellator, ſenſu ſpirituſuali, *conced.* ſenſu carnali Judæorum, qui Meſſiam Ducem, annis & opibus præpotentem, expectabant, a quo ab omnibus ſuis hoſtibus forent liberandi, *nego antec.* Porro Jeſus Chriſtus ſpirituſuali modo bellator & victor fuit, quia de infidelitate, de errore, dæmone, immo & de ipſamet morte plenam reportavit victoriam, nam, ex Heb. 2. *Participavit carni & ſanguini, ut per mortem deſtrueret eum qui habebat mortis imperium, id eſt, diabolum.*

Inf. 6. Verus Meſſias debuit idolorum cultum extinguere; atqui Jeſus Chriſtus illum non extinxit; ergo, &c.

Reſp. diſt. maj. Debuit cultum idolorum extinguere paulatim & per gradus, *conc.* ſimul & uno momento, *nego maj.* Eſt quippe ordo divi-

divinæ providentiæ, ut non nisi per quosdam gradus ad finem suum perveniat.

Inst. 7. Verus Messias ab Ecclesia recipi debuit; atqui Synagoga, quæ tunc sola erat Ecclesia, non recepit Jesum Nazarenum; ergo.

Resp. dist. maj. Messias debuit ab Ecclesia nova, quæ tunc formabatur, recipi, *conc. a Synagoga, nego maj.* Immo, juxta prophetias de Messia factas debuit a Judæis rejici & crucifigi & a gentibus recipi, id expresse prædixit, *Isaias 65. Invenerunt me, qui non quaesierunt me; dixi: ecce ego, ecce ego, ad gentem quæ non invocabat nomen meum. Econtra, expandi manus mea: tota die ad populum incredulum, qui graditur in via non bona, post cogitationes suas. Hoc autem impletum est in J. C. qui Jo: 1. In propria venit, & sui eum non receperunt.*

DISSERTATIO V.

De Causis Incarnationis.

Nota. **C**irca causam Incarnationis efficientem nulla est controversia: certum enim est, ipsam opus esse totius Trinitatis; est enim opus ad extra; sed opera ad extra, sunt totius Trinitatis; ergo, &c. Itaque restat agendum 1. De causa finali, seu motiva Incarnationis. 2. De causa ejusdem meritoria, duplici Capite.

CAPUT I.

De causa finali, seu motiva Incarnationis.

Nota. **H**ic duplex movetur quæstio, *Pri-*
ma, quæ spectat dogma, utrum
 generis humani redemptio fuerit finis Incar-
 nationis. *Secunda*, quæ spectat scholæ diffi-
 dium, utrum generis humani redemptio, ita
 fuerit finis adæquatus & totalis Incarnationis,
 vi præsentis decreti, ut, homine non peccan-
 te, Verbum non fuisset incarnatum.

Q U A E S T I O I.

*Utrum generis humani redemptio fuerit
 finis Incarnationis?*

C O N C L U S I O.

Incarnatio facta est ad liberandum hominem
 a peccato. Et de fide contra Pela-
 gianos negantes peccatum originale, & neces-
 sitatem gratiæ Christi ad delenda peccata, do-
 centesque Christum datum esse hominibus ut
 exemplum, Doctorem & Legislatorem, non
 ut Redemptorem proprie.

Prob. prop. 1. Ex Scriptura, Joann. 3. Mi-
sit Deus Filium suum in mundum, ut salve-
tur mundus per ipsum: Matth. 18. venit Filius
hominis salvare, quod perierat. 1. Ad Tim. 1.
fidelis sermo, & omni acceptione dignus, quia
Christus Jesus venit in hunc mundum peccato-
res salvos facere. Quibus verbis expresse &
clare declaratur Verbum incarnatum esse ad
liberandum homines a peccato & damnatione
æterna.

Prob. 2.

Prob. 2. Ex Concilio Nicæno I. in Symbolo. Qui propter nos homines, & propter nostram salutem, descendit de Calis, & Incarnatus est de Spiritu sancto, & homo factus est.

Prob. 3. Ex traditione PP. quorum textus referemus quæst. sequenti, contenti hic proferre testimonium S. Bernardi, Epist. 190. contra Abailardum. Si verum est dicere, inquit, quod Christus non venit ad hominem liberandum, sed tantum ad institutionem vite & charitatis commendationem, (ut Abailardus volebat) hoc modo ipse Abailardus cum Pelagio evacuat pretium sanguinis Christi. Ergo.

Quæres 1. An Christus venerit, tum propter peccatum originale, tum propter peccata actualia.

Resp. affirm. Idque est de fide, cum expresse legatur in Scripturis, 2. ad Tit. Dedit semetipsum pro nobis, ut nos redimeret ab omni iniquitate. Et 1. Joann. 1. Sanguis Jesu Christi emundet nos ab omni peccato. Et c. 3. ait: In hoc apparuit Filius Dei, ut dissolvat opera diaboli; atqui non solum peccatum originale, sed & actualia, sunt opera diaboli; ergo.

Quæres 2. An Christus magis præcipue venerit ad delendum peccatum originale?

Resp. affirm. Quia propter illud peccatum magis præcipue Christus venit, quod est majus extensive; atqui peccatum originale, peccato actuali majus est extensive, cum per illud primus parens omnes suos posteros reddiderit inimicos Dei, Filios iræ, & indignos vitæ æternæ; ergo.

Quæres 3. Utrum venisset Christus, si, Adam non peccante, peccassent ejus posterii?

*Resp. Nihil de hac re certum potest defini-
ri, cum id nullibi revelatum reperiat. Quis, ait Apostol. Roman. 11. cognovit sensum Domini, aut quis consiliarius ejus fuit? Ab
his*

his ergo otiosis quæstionibus abstinendum iudicamus.

Q U Æ S T I O II.

Utrum generis humani redemptio ita fuerit finis adequatus & totalis Incarnationis, ut, homine non peccante, Verbum non fuisset incarnatum?

Nota. **P**ræsens quæstio non est de possibili, certum est enim, quod Deus potuisset incarnari virtute alterius decreti, si homo non peccasset, in hoc enim nulla est repugnantia; sed quæstio est de facto, nimirum, utrum in præsentirerum ordine, ac virtute præsentis decreti, Christus venisset, etiamsi homo non peccasset: circa quod duplex est sententia.

Prima, est Scoti & ejus discipulorum, qui docent Verbum, etiam homine non peccante, incarnandum fuisse vi præsentis decreti, non quidem in carne passibili, sed in carne impassibili. Hinc, secundum hos Theologos, Verbum fuit incarnatum vi duplicis virtualiter decreti: *Per primum*, decreta est Incarnatio in carne impassibili propter ejus excellentiam ante prævisionem lapsus hominis. *Per secundum*, decreta est Incarnatio in carne passibili propter redemptionem hominis lapsi.

Secunda, Est Divi Thomæ & majoris partis Theologorum, qui docent redemptionem hominis fuisse motivum totale & adequatum Incarnationis, ita ut Verbum, vi præsentis decreti, incarnatum non fuisset, si homo non peccasset; cum quibus sit:

CON-

C O N C L U S I O.

Verbum divinum vi presentis decreti, non fuisset incarnatum, si homo non peccasset.

Prob. 1. ex Scriptura, in qua Filius Dei dicitur simpliciter venisse; ut redimeret genus humanum: immo hoc unicum assignat motivum, Joann. 3. Non misit Deus Filium suum ut judicet mundum, sed ut salvetur mundus per ipsum. Hinc D. Paulus rationem reddens, cur Christus carnem assumpserit, ait: Quia ergo pueri participaverunt carni & sanguini, & ipse similiter participavit eisdem, ut per mortem destrueret eum, qui habebat mortis imperium, id est, diabolum. Atqui in his textibus, non solum agitur de adventu Christi in carne passibili, sed de ejus adventu simpliciter; ergo illius unicum est motivum nempe redemptio generis humani.

Dicunt Scotista: Quamquam Scripturæ redemptionem hominis pro motivo Incarnationis assignent, tamen non negant aliud motivum; ergo datur aliud.

Resp. dist. antec. Non negant aliud motivum expresse, conced. tacite, nego antec. In his quippe rebus, in quibus, quid voluerit Deus, e. Scriptura magis, quam ex nostris conjecturis, expiscandum est, tacite saltem negatur aliud motivum, quando unicum refertur; sic dum Scriptura unius mundi creationem exponit, plures tacite negat.

Instat: Scripturæ alia motiva non obscure designant, puta quod venerit Christus. 1. Ut Doctor noster, Joann. 1. Erat lux vera, quæ illuminat omnem hominem. 2. Ut Pastor, Jo: 11. Ego sum Pastor bonus. 3. Ut largitor vitæ per gratiam, Joann. 10. Ego veni ut vitam habeant.

beant. 4. Ut Sponsus Ecclesiæ, Ephes. 5. Ergo, &c.

Resp. dist. antec. Scriptura, alia designat Incarnationis motiva, in motivo redemptionis hominum comprehensa, *conced.* a motivo redemptionis distincta, *nego antec.* Itaque illæ Christi adventus rationes a motivo redemptionis exiguntur, tanquam illius appendices: venit enim Christus ut doctor, sed ut illuminet hominem existentem in tenebris peccati, *Jo:* 1. venit ut pastor, sed ut quæreret ovem quæ perierat, *Luca* 15. venit ut largitor vitæ, sed instar medici ad ægrum, quem semivivum latrones reliquerunt, *Luc.* 10. venit ut sponsus, sed cui applicatur illud quod, *Exodi* 4. Moyse tribuit Sephora, *Sponsus sanguinum tu mihi es:* ut qui suo sanguine sibi coemerit ac desponsaverit animas nostras; ergo illæ omnes rationes adventus Christi, quas designat Scriptura, in singulari motivo redemptionis nostræ comprehenduntur.

Prob. 2. ex tradit. PP. Qui nullum aliud motivum afferunt, immo sæpe quodlibet aliud excludunt.

Sanctus Irenæus, lib. 5. contra hæreses cap. 14. ait: *Si non haberet caro salvari, nequaquam id est, nullo modo, Verbum Dei caro factum esset: & si non haberet sanguis justorum inquiri, nequaquam sanguinem habuisset Dominus.*

Sanctus Athanasius, orat. 3. contra Arianos: *Dominus, inquit, non habuit causam, ut esset Verbum, nisi quod esset patris germen & sapientia unigenita; cum tamen homo efficitur; tum causa substituitur, cur eum oporteat carnem gestare: necessitas quippe hominum indigentiaque anterior est, quam illius natiuitas, qua sublata non induisset carnem.*

S. Chry-

S. Chrysoft. homil. 5. in Epist. ad Hebr. *Carnem nostram suscepit propter benignitatem solum & clementiam, ut nostri misereretur, non enim est alia dispensationis causa, quam hac sola.*

Origenes homil. 24. in Numeros: *Si non fuisset peccatum mansisset, Christus, hoc quod in principio erat, Deus Verbum.*

Div. August. Serm. 8. de verbis Apost. *Si homo non periisset, Filius hominis non venisset.* Et Serm. 9. *nulla fuit causa veniendi Christo Domino, nisi peccatores salvos facere: tolle morbos, tolle vulnera, & nulla est causa.* Consentiant alii Patres.

Argumenta ex ratione deprompta non afferimus, ex Scripturis enim solum & traditione, explorandum est quod ab una Dei voluntate pendet.

Scotista respondent Sanctos Patres intelligendos esse de adventu Christi in carne passibili, non vero in carne impassibili, sed:

Contra est: Quia SS. PP. absolute & simpliciter negant Christum venturum fuisse, hac sublata causa; ergo sicut nunc simpliciter & absolute dici non potest quod Christus nequaquam venerit, quia non venit in carne impassibili, ita nec SS. PP. potuerunt dicere, quod, sublata hac causa, Christus nequaquam venisset, intelligendo quod non venisset in carne passibili.

Solvuntur Objectiones.

Obicies 1. Ille, homine non peccante, venturus fuisset, saltem in carne impassibili, quem Deus futurum decrevit, antequam Adami futuritionem decerneret; atqui Deus Christum futurum decrevit, antequam Adami futuritionem decerneret; ergo, &c. *Resp. nego minor. Prob.*

Prob. min. Is, quem Deus voluit esse initium viarum suarum, antequam quidquam operaretur ad extra, haud dubie decretus fuit, antequam Adami futuritio decerneretur; atqui Deus Christum voluit esse initium viarum suarum, antequam quidquam operaretur ad extra, Proverb. 8. *Dominus possedit me in initio viarum suarum, antequam quidquam faceret*, quod intelligitur de Sapientia incarnata; ergo, &c.

Resp. dist. min. Deus Christum, quatenus est Verbum divinum, voluit esse initium viarum suarum, *conc.* quatenus homo, *subdist.* Voluit esse initium viarum suarum, antequam quidquam faceret circa salutem hominis lapsi, *conc.* circa hominis existentiam naturalem, *nego min.* Itaque textus allatus intelligitur litteraliter de Verbo divino, quod est Sapientia increata, hoc constat, tum quia ibidem Sapientia de se ipsa dicit: *Cum eo (Deo) eram cuncta componens*; tum quia singula membra illius textus Verbo æterno apprime conveniunt: dicitur enim 1. *Dominus possedit me*, id est, genuit me, prout sonat verbum, *possedit*; dicitur 2. *In initio viarum, suarum*, id est, ut sim principium viarum suarum, unde versio ex Hebræo S. Pagnini habet: *Dominus possedit me principium via sua*. Dicitur 3. *Antequam quidquam faceret*, &c. id est, ab æterno, per quod significatur divinitas & æqualitas cum Patre, unde Hebræum habet: *Ante opera sua*; nimirum ad extra, quale opus est Incarnatio; sic interpretantur hunc locum plures Patres.

Verum cum plures alii Patres hunc textum de incarnata quoque Sapientia interpretentur, in ea suppositione dicendum erit, eo textu significari Christum, ut est Homo Deus, esse in initio viarum Dei ad hominem lapsum redimendum, atque perducendum ad beatitudinem,

nem, ad quam ante omnes prædestinatus est Christus, ut interpretantur iidem Patres.

Inst. Septuaginta legunt: *Dominus condidit me initium viarum suarum*, id est, creavit; ergo textus ille intelligitur litteraliter de Sapientia incarnata.

Resp. dist. ant. Condidit improprie, id est, produxit, *conc.* condidit proprie, id est, creavit, *nego ant.* Nam Septuaginta, versu sequenti, habent: *Ante sæculum fundavit me*, id est, ab æterno; porro æternitas adjuncta verbo, *condidit*, satis indicat illud verbum significare generationem, non vero proprie dictam creationem ex nihilo, quam impossibile est esse antequam Deus quidquam faceret.

Obicies 2. Ille, homine non peccante, fuit futurus, qui futurus fuit ante omnem creaturam; atqui Christus fuit futurus ante omnem creaturam; ergo.

Prob. min. Coloss. 1. Christus, dicitur, *Primogenitus omnis creatura*. Ergo, &c.

Resp. dist. antec. Christus, ut Deus, dicitur Primogenitus omnis creaturæ, *conc.* ut Homo, *subdist.* Dicitur Primogenitus prioritatem honoris & dignitatis, *conc.* prioritatem temporis vel intentionis, *nego antec.* Itaque Apostolum loqui de Christo, prout est Deus, constat ex antecedentibus & consequentibus, quippe ait: Christus, qui est imago Dei invisibilis, primogenitus omnis creatura: quoniam in ipso condita sunt universa in calis & in terra, visibilia & invisibilia.... omnia per ipsum & in ipso creata sunt. Atqui Christus, ut homo est, non est imago Dei invisibilis, nec ab eo, ut homo est, creata sunt omnia, sed tantum, prout Deus est; ergo.

Inst. Hæc verba quæ sequuntur, Christus est caput corporis Ecclesia... primogenitus ex mortuis intel-

intelliguntur de Christo ut homine; ergo Christus, ut homo, est primogenitus omnis creaturæ.

Resp. conc. antec. Cum autem in Christo duplex sit natura, non mirum est, quod Scriptura modo de eo secundum divinitatem, modo secundum humanitatem loquatur, quod ex antecedentibus & consequentibus dijudicandum est, *dist. conseq.* Est primogenitus ordine dignitatis & excellentiæ, *conc.* ordine intentionis vel temporis, ita ut prædefinitus fuerit ante omnes creaturas, *nego conseq.* cum D. Hier. in hunc locum, *Primogenitus*, inquit, non quod Deus illum ante omnem creaturam producere constituerit, sed quod illi creaturam omnem subjecerit. Itaque vox, *primogenitus*, per Hebraïsum sæpe, in Scriptura, significat præstantissimum in suo genere, quomodo David, *Pf.* 88. dicitur primogenitus, *Ego primogenitum ponam illum.* Et Ephraim, *Jerem.* 31. *Ephraim primogenitus meus.*

Subsumes, atqui Christus ut homo, est primogenitus omnis creaturæ ordine intentionis; ergo.

Probat. subs. Christus dicitur finis ad quem omnes creaturæ ordinantur, *Hebr.* 2. *Decebat eum, propter quem omnia, & per quem omnia, auctorem salutis eorum per passionem, consummare.* Atqui finis propter quem sunt omnia, prius volitus est, quam omnia decernerentur; ergo.

Resp. dist. maj. Christus, ut Deus, est finis ad quem omnes creaturæ ordinantur, *conc.* ut homo, *subdist.* Est finis, eo quod, postquam, supposito peccato, decretus est, omnia ad illum Deus referri voluerit, *conc.* quia, ut ait Apostolus, *1. Corinth.* 3. *Omnia vestra sunt, vos autem Christi, Christus autem Dei.* Eo quod ante omnia decretus sit, *nego maj.* nam in his, quæ ex instituto dependentiam habent, non necesse est, ut id prius existat, aut decre-

cretum fuerit, ad quod referuntur cætera. Locus autem Apostoli, non de Christo ut homine, sed de Deo Patre intelligendus est, ut series sermonis satis indicat.

Objicies 3. Sancti Patres docent Christum prædefinitum fuisse ante omnem creaturam; ergo, homine non peccante, venturus fuisset, saltem in carne impassibili.

Prob. ant. Ex D. Iræneo, *lib. 3. cap. 33.* dicente: *Cum præexisteret salvans, oportebat, & quod salvaretur, fieri, ut non vacuum sit salvans.* Ergo Christus fuit prædefinitus ante Adam, ejusque peccati prævisionem.

Respond. nego conseq. Ibi enim D. Irenæus loquitur de Christo, ut Deo, qui ab æterno fuit salvans in actu primo, hoc est, valens salvare in natura assumpta; non vero loquitur de Christo, ut homine, alias & de eo in carne passibili acciperetur, cum in ea tantum sit salvans, quem tamen in carne passibili decretum esse ante peccatum adversarii non dicent. Et vero D. Irenæus clare sententiam nostram docet, loco in probatione citato.

Inst. 1. D. Cyrill. *lib. 5. Thesauri, cap. 8.* ait: *præfundatur, id est, decernitur, ante nos Christus, & in illo nos omnes superadificamur; idque ante initium mundi in præscientia Dei, ut cum ordine divino benedictio maledictionem antecesserit, &c. ergo.*

Resp. nego conseq. Nam S. Cyrillus solum vult Christum fuisse præfundatum ante nos, quia definitus est in divina misericordia, non quidem ante prævisum peccatum nostrum, sed antequam actu peccaremus, ut, nempe, homine peccante, remedium jam paratum esset, quod patet ex his ejus verbis paulo superius: *Sciebat enim mortales nos futuros propter peccatum, & ideo ex misericordia sua ante sæcula*

constituit, ut Verbum suum homo fieret. Ergo propter liberationem a peccato præviso, Christus factus est homo; hocque solo sensu benedictio prævisa maledictionem actualem antecessit, non autem maledictionem prævisam.

Inst. 2. D. Cyrillus addit: Creator noster Christum, nostra salutis fundamentum, etiam ante initium mundi fundavit, ut si pravaricatione caderemus, in ipso rursus renovaremur. Ergo Christus fuit decretus ante lapsum hominis.

Resp. dist. conseq. Ante lapsum hominis personalem, conc. originalem, subdist. actu commissum, conc. prævisum, nego. Sensus itaque D. Cyrilli est, Christum tam firmum esse nostræ liberationis a peccato originali fundamentum, ut, si laberemur postea in peccata actualia, iterum reparari in Christo possemus, ut patet ex his verbis: Ut si pravaricatione, personali, caderemus, in ipso rursus renovaremur.

Objicies 4. D. August. (2) docet ante peccatum, matrimonium futurum fuisse Sacramentum, scilicet, in Christo & in Ecclesia. Ergo ante peccatum Christus fuit decretus.

Resp. dist. conseq. Christus fuit decretus ante peccatum, actu commissum, conc. ante peccatum, prævisum, nego conseq. constat ex ipso textu Augustini. Ante peccatum, inquit, dictum est in paradiso, relinquet homo patrem & matrem & adhærebit uxori suæ; quod magnum Sacramentum dicit Apostolus in Christo & in Ecclesia; ergo ante peccatum actu commissum decretus fuit Christus, non vero ante idem peccatum prævisum, quia si non fuisset futurum, Christus, vi præsentis decreti, non venisset, & consequenter matrimonium non fuisset

(2) Lib. 1. de nuptiis & concup. cap. 11.

set signum conjunctionis Christi cum Ecclesia.

Inst. 1. Adamus ante suum peccatum cognovit mysterium Incarnationis, ut tradunt multi Patres cum D. Thom. (a) ergo ante peccatum futura erat Incarnatio.

Resp. nego consequ. Adamus enim potuit illud mysterium cognoscere; quia tunc reipsa futurum erat; quamvis non fuisset futurum, nisi in peccatum lapsurus fuisset.

Inst. 2. Ex D. August. (b) licet Adamus innocens habuerit cognitionem Mysterii Incarnationis, Non tamen sui peccati prae sciens fuit. Ergo Deus non erat incarnandus, etiam Adamo non peccante.

Respond. nego consequ. Ex antecedente sequitur tantum, quod Adamus in statu innocentiae finem & motivum Incarnationis ignoraverit; non vero sequitur, quod Deus, Adamo non peccante, incarnandus fuerit.

Obijcies 5. Ille futurus fuit, Adamo non peccante, qui est caput Adami innocentis, immo & Angelorum; atqui Christus est caput Adami innocentis, immo & Angelorum, Colossenses 2. *Est caput omnis principatus & potestatis.* Ergo.

Resp. dist. min. Christus est caput Adami innocentis & Angelorum, dignitate & excellentia, *conc.* influxu, *nego min.* Dona enim, quæ primis parentibus ante lapsum & Angelis sanctis concessa sunt, erant dona Dei creatoris, non autem Christi redemptoris: unde hæc verba: Joanni. 1. *De plenitudine ejus nos omnes accepimus,* de hominibus lapsis intelligi debent.

Inst. D. Bernardus Serm. 22. in Cantica, ait:

Qui

(a) 2. 2. q. 2. art. 7.

(b) Lib. 11. de Genesi ad litt. cap. 18.

Qui erexit hominem lapsum, dedit stanti Angelo ne laboretur; sic illum de captivitate eruens, sicut hunc a captivitate defendens: & hac ratione fuit utrique redemptio, solvens illum & servans istum. Ergo Christus fuit caput Angelorum influxu.

Resp. dist. conseq. Christus, ut Deus, *conc.* ut homo, *nego conseq.* solum vult D. Bernardus gratiam Angelo ad non peccandum, sicut homini ad resurgendum a peccato necessariam fuisse; at non eodem modo, nec ex meritis Christi, sed ex pura creatoris liberalitate.

Objicies 6. Deus decrevit Incarnationem propter suam gloriam externam, nam *omnia propter semetipsum operatus est Dominus*. Ergo non eam decrevit propter generis humani redemptionem.

Resp. dist. ant. Decrevit Incarnationem propter gloriam suam, tanquam propter finem remotum, *conc.* proximum, *nego.* Deus enim Incarnationem, quam ad suam gloriam externam ultimate refert, proxime voluit propter redemptionem generis humani.

Instabis 1. Inordinatum est perfectius referre ad minus perfectum; atqui Incarnatio est quid perfectius redemptione generis humani; ergo inordinatum est illam referre ad generis humani redemptionem.

Resp. dist. maj. Inordinatum est perfectius referre ad minus perfectum, tanquam ad finem ultimum, *conc.* tanquam ad finem proximum prius efficaciter intentum, *nego major.* & sic ad conseq. Itaque, Deus, qui est liberrimus ad extra, potuit absque inordinatione decernere Christum propter redemptionem generis humani, tanquam finem immediatum, ordinatum ad suam gloriam externam, quæ est finis ultimus omnium rerum.

Inst. 2.

Inst. 2. Inordinatum est magis amare quod est minus amabile, atqui si Deus Incarnationem ordinavit ad redemptionem hominis, magis amavit hominem redimendum, quam Christum, licet sit Christo minus amabilis; ergo.

Respond. 1. retorq. argument. Contra adversarios, Deus Christum in carne passibili ordinavit ad redemptionem hominis; ergo magis amavit hominem redimendum, quam Christum in carne passibili.

Resp. nego min. Amor enim major, vel minor, non mensuratur ex ordinatione unius ad aliud, sed ex majori complacentia, & majoribus donis collatis; atqui Deus multo plus sibi in Christo complacuit, quam in puro homine redimendo, eique multo plura ac majora contulit dona; ergo.

Instabis 3. Si Deus Incarnationem ordinavit ad hominis redemptionem, amavit hominem redimendum ut finem, Christum vero incarnandum ut medium; atqui magis amatur finis, quam medium ad finem; ergo.

Resp. dist. minor. Si medium ametur tantum propter bonitatem finis, *conc.* si ametur principaliter propter bonitatem suam absolutam, quæ sit præstantior bonitate finis, *nego minor.* Deus autem amat Christum, quatenus est medium aptissimum ad redemptionem hominis, verum eum multo magis amat propter ejus bonitatem absolutam infinite præstantiorem salute hominum, ad quam ordinatur, licet, vi præsentis decreti, Incarnationem non decrevisset, nisi homo fuisset redimendus.

Objicies 7. Si Verbum ita propter peccatum delendum Incarnatum esset, ut, eo sublato, Incarnaturum non fuisset, *sequeretur 1.* Incarnationem esse bonum nobis per accidens concessum, nimirum ex occasione peccati; *seque-*

retur 1. humanitatem Christi posse lætari de primorum parentum peccato, quod tanto bono, quantum est Incarnatio, occasionem præbuit, immo & gratias agere Adamo de peccato; atqui illa sunt absurda; ergo.

Resp. nego seq. maj. Nam 1. quæ ex occasione alterius libere & positive decernuntur, non dicuntur decerni per accidens ex parte illius, a quo decernuntur; ergo licet Christus non fuerit prædefinitus, nisi ex occasione peccati, fuit tamen prædefinitus propter suam expetibilitatem; ergo non per accidens ex parte Dei, sed propter se. 2. Humanitas Christi non potest lætari de peccato Adami, sed de summa Dei in homines charitate, qua sola, ex occasione peccati prævisi, motus est ad Incarnationem prædefiniendam, sic, enim, *Deus dilexit mundum, ut Filium suum unigenitum daret.* Unde horum verborum, quæ canit Ecclesia in benedictione cerei paschalis: *O felix culpa, qua talem ac tantum meruit habere redemptorem,* sensus est, quod Adami culpa, ex summa Dei misericordia, homini per Verbum Incarnatum redempto, feliciter cesserit.

C A P U T II.

De causa Incarnationis meritoria.

Nota 1. **M**eritum, est, *Valor operis in ordine ad præmium, & duplex est, unum de condigno, alterum de congruo.*

Meritum de condigno, est opus bonum, cui, stricto jure, præmium debetur, ita ut sine injustitia negari non possit.

Méritum de congruo, est opus bonum, cui, ex quadam duntaxat decentia, præmium debetur. In hoc differunt quod ad meritum de condigno

digno requiratur status gratiæ ex parte operantis, & promissio ex parte præmiantis, quod non requiritur ad meritum de congruo.

Nota 2. Incarnatio considerari potest duobus modis. 1. *Secundum substantiam*; nempe, prout dicit hypostaticam Verbi cum humanitate unionem. 2. *Secundum varias illius circumstantias* v. gr. quod facta sit ex tali gente, familia, muliere, hoc vel illo tempore, &c.

Nota 3. Quæstio hic est, utrum Christi humanitas, veteres Patriarchæ & B. Virgo Mariæ meruerint Incarnationem Verbi? quam sequentibus conclusionibus resolvemus. Itaque

CONCLUSIO I.

Humanitas Christi, nec de condigno, nec de congruo, meruit hypostaticam cum Verbo Divina unionem.

Prob. 1. Quia Christi humanitas sine unionem hypostatica nunquam fuit, siquidem in prima instanti suæ Conceptionis unita fuit cum Verbo; ut fides docet adversus Nestorium: ergo illam non meruit, alias effectus esset prior suæ causa. 2. Quia principium meriti non cadit sub meritum; atqui unio hypostatica fuit principium meritorum Christi; ergo, &c. Hinc Incarnatio in Scripturis clementiæ divinæ unice tribuitur, ad Tit. 3. *Benignitas & humanitas apparuit Salvatoris nostri Dei, non ex operibus iustitiæ quæ fecimus nos, sed secundum suam misericordiam salvos nos fecit.*

Suffragatur D. August. cap. 36. Enchiridii dicens: *Hic granditer & evidenter Dei gratia commendatur; quid enim natura humana in homine Christo meruit, ut in unitatem personæ unici Filii Dei singulariter esset assumpta? ...*

qua bona opera praeceperunt, quibus mereretur iste homo una fieri persona cum Deo?

Objicies 1. Apoc. 5. de Christo dicitur; *Dignus est Agnus, qui occisus est, accipere virtutem & Divinitatem.* Ergo humanitas Christi meruit suam cum Divinitate unionem.

Resp. nego conseq. Neque enim textus agit de merito Christi in ordine ad unionem personalem cum Divinitate, sed solum in ordine ad manifestationem suae Divinitatis, id est, ad gloriam externam, quatenus Christus morte sua meruit, ut suum nomen, toto passim orbe, cultu patriae celebraretur, ut docet Apost. Philipp. 2. *Humiliavit semetipsum factus obediens usque ad mortem, mortem autem Crucis, propter quod & Deus exaltavit illum, & donavit illi nomen quod est super omne nomen, ut in nomine Jesu omne genuflectatur.*

Objicies 2. Psalm. 44. de Christi humanitate praenuntiatur: *Dilexisti justitiam, & odisti iniquitatem, propterea unxit te Deus, Deus tuus, oleo latitiae pra consortibus tuis.* Ex quo sic arguo: unctio, de qua loquitur Psalter Regius, est unio hypostatica Divinitatis cum humanitate; atqui hanc unionem meruit Christi humanitas, ut constat ex hac particula causali, *propterea*; ergo.

Respond. 1. nego maj. Nam juxta multos Patres (c) per illam unctionem, non intelligitur unio hypostatica, sed gloria quae Christo resurgenti concessa est in mercedem amoris, quod dum viveret, flagrarat in justitiam.

Respond. nego min. Particula enim, *propterea*, non sumitur in hoc textu causaliter meritoe, sed finaliter, ita ut sensus sit, quod humani-

(c) D. Hieronym. Epist. 140. Ambros. in cap. 1. ad Hebr.

manitas Christi fuerit uncta divinitate, non quia aliquid egisset istius unctionis meritorium; sed potius eo fine, ut iustitiam diligeret, & omnia præstaret quæ ab eo perfecta sunt. Ita D. August. in illud Psalmum, Gregor. Nazianz. orat. 36. &c.

CONCLUSIO II.

Veteres Patriarcha, nec de condigno, nec de congruo meruerunt Incarnationem sumptam secundum substantiam.

Prob. Veteres Patriarchæ nulla ratione meruerunt id quod cuilibet merito præsupponitur; atqui Incarnatio, secundum substantiam sumpta, præsupponitur cuilibet merito: de fide enim est nullum, in statu naturæ lapsæ, meritum esse, nisi ex meritis Dei incarnati; ergo veteres Patriarchæ nulla ratione meruerunt Incarnationem secundum substantiam.

Objicies 1. D. Thom. in 3. quæst. 3. artic. 1. ait: *Acceleratio Incarnationis potuit cadere sub merito de condigno, Incarnatio autem sub merito de congruo.* Ergo veteres Patriarchæ meruerunt de congruo Incarnationem, sumptam secundum substantiam; D. enim Doctor hic distinguit Incarnationem secundum substantiam, ab Incarnatione sumpta secundum circumstantiam temporis, quæ secundum hanc circumstantiam mereri potest de condigno.

Resp. nego consequ. Licet enim D. Thomas illam tenuerit sententiam, dum scriberet in sententias, eam tamen correxit in sua Summa, dicens: *Gratia non potest cadere sub merito, quia est merendi principium; unde multo minus Incarnatio cadit sub merito, quia est principium gratia, secundum illud Joann. 1. Gratia & veritas per Jesum Christum facta est.*

Instab. D. Thom. in loco citato Summæ ad-

dit: *Ex congruo tamen meruerunt SS. Patres Incarnationem desiderando & petendo. Ergo non correxit priorem sententiam.*

Resp. dist. antec. Meruerunt Incarnationem, quoad circumstantiam temporis, hoc est, meruerunt accelerationem Incarnationis, *conced.* quoad substantiam, *nego antec.* Alioquin Divus Thomas sibi contradiceret, cum paulo antedocuerit Incarnationem esse principium cuiuscumque meriti, ac proinde eam nullo modo cadere sub meritum.

Objicies 2. Veteres Patriarchæ enixissime postulaverunt Incarnationem; ergo arbitrati sunt se posse eam promereri.

Resp. dist. ant. Postulaverunt Incarnationem, secundum illius mysterii ipsis revelati accelerationem, *conc.* secundum substantiam, *nego ant.* Quando enim Moyses dixit Deo, *Exod. 4. Obsecro, Domine, mitte*, addit, *quem missurus es*; id est, mitte quamprimum quem mittere jam statuisti.

CONCLUSIO III

Veteres Patriarcha aliquas Incarnationis circumstantias meruerunt, non quidem de condigno, sed de congruo.

Prob. prima pars. 1. Quia Abraham meruit, ut Christus de sua stirpe nasceretur. *Gen. 22. Benedicentur in semine tuo*, id est, in Christo ex te oriundo, *omnes gentes terra, quia obedisti voci meæ. 2.* Quia Daniel, suis precibus ac votis, meruit accelerationem adventus Messiae: *Ab exordio precum tuarum*, inquit Angelus, *cap. 9. egressus est sermo . . . septuaginta hebdomades abbreviata sunt super populum tuum, &c.*

Prob. secunda pars. Quia ad meritum de condigno requiritur ex parte præmiantis promissio,

sio, ut si talia egerint, tales circumstantias mererentur; atqui nulla talis promissio ex parte Dei facta est antiquis Patriarchis; ergo.

Dixi, *aliquas meruerunt circumstantias*, quia non meruerunt circumstantias Incarnationis, secundum præsens decretum, necessarias, v. g. quod Christus nasceretur, quod moreretur; nec proinde quod moreretur pro nobis; licet enim ab his circumstantiis abstrahat Incarnatio, ut decerni potuit, tamen ab iis non abstrahit, ut actu decreta est.

Objicies. Patriarchæ non meruerunt, etiam de congruo, hanc Incarnationis circumstantiam, quod Christus de eorum stirpe nasceretur; ergo, &c.

Prob. ant. Patriarchæ non meruerunt circumstantias Incarnationis, secundum præsens decretum, necessarias; atqui circumstantia, quod Christus ex stirpe Patriarcharum nasceretur, est, secundum præsens decretum, necessaria; ergo, &c.

Resp. nego min. Incarnatio enim, secundum substantiam spectata, abstrahit ab hac circumstantia, quod Christus ab hac, vel illa stirpe nasci debeat, & ideo sancti Patriarchæ illam potuerunt mereri de congruo, ut de facto illam meruere: valde quippe congruum fuit, ut Deus illam concederet Patriarchis in præmium eorum virtutum, puta, obedientiæ, religionis, &c.

CONCLUSIO IV.

Beata Virgo non meruit divinam maternitatem de condigno, bene vero de congruo.

Prob. prima pars: Quia ad meritum de condigno requiritur Deum inter & B. Virginem pactum de danda illi maternitate; atqui Deum

inter & B. Virginem nullum tale pactum intercessit; ergo.

Dices : D. Ambros. (d) de beata Virgine, ait: *Quid in singulis immoror, qua digna fuit, ex qua filius Dei nasceretur.* Et de eadem concinit Ecclesia: *Ut dignum Filii tui habitaculum effici mereretur.* Ergo B. Virgo meruit, ut fieret Mater Dei.

Resp. nego consequ. Ex textibus allatis sequitur equidem, quod B. M. V. fuerit condigne disposita, ut esset Mater Dei, ad quod sufficit ut per gratias & dona Dei ita fuerit preparata, ut, quantum fert conditio creaturæ, decenter maternitatem reciperet; sed nulla ratione sequitur, quod de condigno divinam maternitatem meruerit.

Prob. secunda pars. Beata Virgo aliquo merito meruit maternitatem; ergo merito saltem de congruo.

Prob. antec. 1. Ex ipso B. Virginis Cantico, Luc. 2. *Quia, inquit, respexit humilitatem ancilla sua: quorsum autem Deus respexit humilitatem B. Virginis, nisi ut illi concederet maternitatem, propter quam eam Beatam omnes nationes dicturæ essent: Ecce enim ex hoc beatam me dicent omnes generationes.* Ita sensit Ecclesia, quæ sic B. Virgini congratulatur, *Quia quem meruisti portare, resurrexit, &c.*

Prob. 2. ex Patrib. D. Hieron. (e) ait: *Propono tibi B. Virginem, qua tanta extitit puritatis, ut Mater Domini esse mereretur.*

D. Augustin. (f) *Concipere meruit & parere eum, quem constat nullum habuisse peccatum.*

S. Gregor. in lib. 1. Reg. cap. 1. *Meritorum*
uer-

(d) Lib. 2. de Virginibus.

(e) Lib. 2. Epist. 17. ad Eustochium.

(f) Lib. de natura & gratia, cap. 16.

verticem, inquit, usque ad solium Divinitatis
erexit.

Solvuntur Objectiones.

Objicies 1. B. Virgo non potuit mereri maternitatem, quin simul meruerit Incarnationem, atqui Incarnationem mereri non potuit; ergo nec maternitatem.

Resp. dist. maj. Non potuit mereri maternitatem Dei, ante decretam Incarnationem, nisi meruerit etiam Incarnationem, *conc.* Non potuit mereri maternitatem Dei, ex hypothesi jam decretæ Incarnationis, *nego major.* potest autem intelligi ante decreta Incarnatio, quam decerneretur hæc, vel illa mater, cum id ita factum esse non repugnet, ac proinde maternitatem huic, aut illi, intuitu bonorum operum, concessam esse.

Inst. 1. Qui meretur aliquid, meretur quoque quod illud consequitur; atqui Incarnatio sequitur maternitatem; ergo, &c.

Resp. dist. min. Incarnatio sequitur maternitatem, in genere consideratam, *conc.* Hanc aut illam numero maternitatem, *nego min.* Nam Deum venturum in carne passibili, dicit quidem eum ex aliqua matre nasciturum esse, sed non ex hac aut illa: quare posito decreto quod veniat Deus in carne passibili, & nascatur ex matre, datur adhuc huic, aut illi matri, locus promerendi, ut ex se potius quam ex alia, nascatur.

Inst. 2. Incarnatio dicit hanc numero carnem assumi; ergo sequitur hanc numero maternitatem.

Respond. nego conseq. Nam hæc caro non est necessario hujus matris. Itaque, prævisis meritis B. Virginis, cogitandus est Deus ita dispo-

fuisse causas naturales, ut sub forma purissimæ ejus Sanguinis esset pars illa materiæ, ex qua Christi corpus formandum esset; & quamvis merito non daretur, quod B. Virgo talem habuisset materiæ partem, tamen ea obtenta, Deo sic causas naturales disponente, cogitari adhuc possit obtinuisset suis meritis, ut ex illa materiæ parte Christus nasceretur.

Objicies 2. B. Virgo ante omne meritum electa est, ut esset Mater Dei; ergo maternitatem non meruit.

Resp. nego ant. Cum D. Ambros. Epist. 82. *Quid loquar quanta sit virginitatis gloria, inquit, qua meruit a Christo eligi, ut esset etiam corporale Dei templum?* Ergo electio non excludit omne meritum.

Inst. Scriptura sacra gratiæ adscribit, quod B. V. Christum conceperit, Lucæ 1. *Ne timeas Maria, invenisti gratiam apud Deum.* Ergo divina maternitas merito tribuenda non est.

Respond. nego conseq. Ut enim quid tribuatur gratiæ, sufficit quod ejus meritum pendeat a gratia, quo sensu *vita æterna* dicitur *gratia Dei*, licet cadat sub merito.

Instab. 2. Gratiæ singulares, quibus cumulata fuit B. Virgo, ei concessæ sunt intuitu maternitatis divinæ; ergo cum illæ gratiæ ei omnino gratis concessæ fuerint, gratuita quoque debuit esse maternitas divina.

Resp. dist. antec. Intuitu maternitatis decernendæ propter merita, ad quæ disponderetur per illas gratias: *conc.* intuitu maternitatis jam decretæ absolute, *nego ant.* Equidem B. Virgo, a primo suæ conceptionis instanti, eximiis gratiis ac privilegiis fuit præventa, quibus, per nobiliores omnium virtutum actus, correspondens, non solum condigne fuit disposita, ut esset Mater Dei, sed etiam meruit de congruo
divi-

divinam illam maternitatem ; congruum enim erat , ut Deus intuitu bonorum operum sanctissimæ mulierum , illi concederet maternitatem .

Obijcies 3. Omnia merita B. Virginis fundata fuere in hoc numero Christo, ex hac numero Matre genito ; ergo merita B. Virginis non præcesserunt maternitatem , quæ consequenter non cecidit sub meritum .

Resp. dist. ant. Fundata fuere in hoc numero Christo, ex hac numero Matre genito *specificative*, id est, qui genitus est ex hac Matre, *conc.* ex hac numero Matre genito *reduplicative*, id est, quatenus ex hac Matre genitus est ; *negō antec.* nam licet nulla B. Virginis merita fuerint, nisi ex illo , qui est Filius hujus Matris, tamen non fuerunt ex illo, quatenus fuit Filius hujus Matris ; quod enim Christus ex hac numero Matre natus sit, non fuit circumstantia necessaria ad merendum ; prius enim Christus cogitatur nasciturus ex aliqua Matre , quam ex hac numero Matre .

DISSERTATIO VI.

De quidditate Incarnationis.

Nota : **C**Um Incarnatio nihil aliud sit essentialiter, quam unio hypostatica naturæ divinæ simul & humanæ in una Verbi persona, agemus hic, 1. De persona assumente, 2. De natura assumpta, 3. De utriusque unionē hypostatica, triplici capite.

CAPUT PRIMUM.

De Persona assumente.

Nota 1. **S**cholastici varias hic congerunt quæstiones *de possibili*, v. g. utrum plures personæ unicam humanitatem assumere possint? utrum una persona possit assumere plures humanitates simul? utrum Pater & Spiritus sanctus tam potuerint incarnari quam Filius? utrum Persona divina possit assumere naturam Angelicam.

Communis est sententia illa omnia fuisse possible, quia nulla ex parte implicant. Verum jam non semel monuimus, satis otii nobis non esse, ut in hujusmodi otiosis quæstionibus *de possibili* immoremur; itaque:

Nota 2. Error fuit Sabellianorum, Patrem, Filium, & Spiritum sanctum inter se non distinguere, nisi nomine tenus, & penes quasdam temporarias ejusdem realiter personæ functiones: ex quo falso principio concludebant, Filium non potuisse reipsa incarnari, quin Pater, & Spiritus sanctus simul cum eo incarnarentur; unde *Patripassiani* dicti sunt; contra quos:

CONCLUSIO.

Sola Filii personæ naturam humanam assumpsit. Est de fide.

Prob. 1. Ex Scriptura, quæ, Joann. 1. expresse asserit Verbum divinum incarnatum esse, *Verbum caro factum est, & habitavit in nobis*; nullibi autem id de Patre aut Spiritu sancto affirmat. Immo Filius declarat se solum fuisse incarnatum, cum de Patre dicit, *Pater major me*

mo est; neque enim minor est Pâtre, nisi ratione humanitatis assumptæ.

Probat. 2. Ex traditione perpetua Ecclesiæ, quæ in omnibus suis Symbolis, Apostolico, Nicæno, Constantinopolitano, Incarnationem soli Filio tribuit: *Conceptus est de Spiritu sancto, natus ex Maria Virgine. Et homo factus est, &c.* Et quæ Patripassianos, tanquam hæreticos, anathemate profligavit.

Solvuntur Objectiones.

Objicies 1. Una persona non potuit sine alia incarnari; ergo non sola persona Filii humanam naturam assumpsit.

Prob. ant. Opera ad extra sunt communia toti Trinitati; atqui Incarnatio est opus ad extra; ergo.

Resp. dist. maj. Opera ad extra, quatenus sunt actio, *conc.* quatenus sunt terminus illius actionis, *nego maj.* Itaque in Incarnatione duo sunt distinguenda, nempe actio, per quam assumpta est humanitas, & terminus illius actionis. Actio, communis est toti Trinitati, quia procedit a potentia & virtute, quæ tribus personis communis est. Terminus vero illius actionis, particularis est Filio, quia pendet a substantia relativa, quæ singularis est personæ Verbi, ut docet Concilium Toletanum VI. his verbis: *Cum tota cooperata sit Trinitas ad formationem suscepti hominis, quoniam inseparabilia sunt opera Trinitatis, solus tamen Filius suscepit humanitatem in singularitate personæ, non in unitate divinæ naturæ, id est, in eo quod proprium est Filii, non quod commune Trinitati.*

Inst. Atqui Incarnatio, quatenus est terminus
actio.

actionis incarnativæ, est communis toti Trinitati; ergo, &c.

Prob. subs. Terminare est agere; atqui ex dictis actiones ad extra sunt communes toti Trinitati; ergo Incarnatio, quatenus est terminus, communis est toti Trinitati.

Resp. dist. maj. Terminare est agere, grammatice, *conc.* est agere, physice, *nego major.* Itaque terminare nihil aliud est physice, quam esse terminum, quod actionem non importat; quis enim dicat parietem agere, quando potentiam alicujus visivam terminat?

Objicies 2. Una persona non potest videri intuitive absque altera; ergo nec potest incarnari sine altera.

Resp. nego conseq. Disparitas est, quod essentia divina, quæ est primarium visionis intuitive objectum, identificatur tribus personis, & consequenter non potest sine illis videri intuitive; e contra tres personæ a se invicem realiter distinguuntur, ac proinde terminatio humanitatis, quæ est effectus relativus, potest prodire ab una persona, absque eo quod prodeat ab aliis.

Inst. Natura divina est communis tribus personis; atqui, juxta D. Damascenum citatum a D. Thoma, (g) tota natura divina est incarnata; ergo.

Resp. dist. minor. Tota natura divina est incarnata, mediate, *conc.* immediate, *nego min.* Neque enim unio facta est in natura, sed in persona, qua mediante natura dicitur incarnata; est ergo incarnata, inquit D. Thom. ratione persona ad quam terminata est unio, non autem prout communis est tribus personis. Dicitur

tur autem tota natura divina incarnata, non quod sit incarnata in omnibus personis, sed quia nihil deest de perfectione divina natura, persona incarnata.

Obicies 3. Assumptio hominis; quæ fit per gratiam, est communis omnibus personis; ergo & ea quæ fit hypostatice.

Resp. nego consequ. Nam assumptio quæ fit per gratiam adoptionis, terminatur ad quamdam participationem divinæ naturæ secundum quamdam assimilationem ad bonitatem illius, juxta illud 2. Petri 1. *Ut divina consortes natura, &c.* & ideo hujusmodi assumptio communis est tribus personis, & ex parte principii effectivi, & ex parte termini: sed assumptio, quæ fit hypostatice, licet sit communis ex parte principii, non est tamen communis ex parte termini, de facto enim terminatur ad unam hypostasim. Ita D. Thom. ad 3.

C A P U T II.

De natura assumpta.

Nota: **C**Um natura humana duabus partibus essentialiter constet, corpore nimirum & anima; ideo, majoris claritatis causa, de utroque, & de naturæ humanæ defectibus sigillatim agemus, triplici quæstione.

Q U Æ S T I O I

De corpore a Verbo divino assumpto.

Nota 1. **C**irca corpus a Verbo divino assumptum varie erraverunt Hæretici; namque:

1. Simon magus, Menander, Saturninus,
Basil-

Basilides, Marcion, Manes, &c. docuerunt corpus Christi, non fuisse verum corpus carneum, sed apparens tantum, & phantasticum.

2. Valentinus, Apollinaris & Apelles, docuerunt corpus Christi non fuisse terrenum ex carne B. M. Virginis formatum, sed fuisse e cælo delatum, & per uterum Virginis, tanquam per canalem, transmissum.

Nota 2. Controvertitur inter Catholicos, utrum Verbum immediate assumpserit dentes, ungues, capillos, tres humores, & maxime sanguinem; quam controversiam, post debellatos Hæreticos, dirimemus. Itaque:

CONCLUSIO I.

Verbum divinum, verum & reale corpus assumpsit. Est de fide.

Prob. 1. Ex Script. Joann. 1. *Verbum caro factum est.* Luc. ult. *Videte manus meas & pedes, quia ipse sum: palpate & videte, quia Spiritus carnem & ossa non habet, sicut me videtis habere.* Ex quibus sic arguo: qui habet carnem & ossa, verum & reale corpus habet; & non corpus phantasticum; atqui Christus carnem & ossa habet; ergo.

Probat. 2. Verus homo habet verum corpus reale; atqui ex Script. Patribus & Conciliis, Christus est verus homo; ergo, &c.

Prob. min. 1. Ex Script. Joann. 8. *Quaritis me interficere, hominem qui veritatem locutus sum vobis.*

Prob. min. 2. ex Patrib. S. Athanasius, lib. de Incarnat. contra Apollinarem: *Perfectus Deus, inquit, & perfectus homo Christus.* S. Gregor. Nazianz. in orat. de Nativitate Christi, ait: *Ipse Dei Filius . . . humana omnia, excepto peccato, suscepit.* D. August. Epist. 3. ad Volu-
fia-

fianum, dicit Christum esse aequalem Patri secundum divinitatem, minorem autem Patre secundum carnem, hoc est, secundum hominem. Ergo Christus est verus homo.

Prob. min. 3. Ex Conciliis generalibus, Nicæno I. Incarnatus est, Filius Dei, & Homo factus est. Constantinopol. IV. Act. 10. Confitemur unicum Dei Verbum incarnatum; & factum fuisse propter nos secundum nos . . . duplicem docentes unum eundemque Christum & Dominum, Deum scilicet perfectum, & hominem perfectum in una persona.

Confirm. Ex D. August. qui, lib. 83. questionum quest. 14. sic premit phantastias: Si phantasticum fuit corpus Christi, ergo fefellit Christus, & si fefellit, veritas non est: est autem veritas Christus: non igitur corpus Christi phantasma fuit; alioquin esset dicendum, quod ejus nativitas ex Virgine, passio, mors, & resurrectio fuisset solum quid phantasticum & imaginarium. Quis autem hoc dicat sine hæresi & impietate? nam si Christus vere non resurrexit sic ut & mors ejus sit phantastica: igitur inanis erit predicatio & fides nostra, inquit Apostol. 1. Cor. 15. & vita Christi perpetua fictio fuit, & perpetua illusio & deceptio.

Solvuntur Objectiones.

Objicies 1. Christus, Philipp. 2. dicitur, in similitudinem hominum factus. Ergo non habuit veram carnem, sed apparentem & phantasticam.

Resp. nego conseq. Nam illa similitudo phantastica non est, sed vera & naturalis, qualis est inter individua ejusdem speciei, sic homo est similis homini. Hinc Apostolus subjungit: Factus est obediens usque ad mortem; homo ve-

ro, nisi verum corpus habeat, non moritur.

Inst. 1. Quando, Rom. 8. dicitur: *Misit Deus Filium suum in similitudinem carnis peccati*, illa similitudo non est vera & naturalis, sed tantum exterius apparens; ergo quando Christus dicitur *in similitudinem hominum factus*, illa similitudo est externæ tantum apparentiæ.

Respond. nego conseq. Disparitas desumitur ex ipsa Scriptura, quæ, cum dicit Christum missum fuisse *in similitudinem carnis peccati*, sufficienter declarat illam similitudinem esse tantum quoad externam apparentiam, asserendo Christum esse sanctum, & ab omni, vel minima, peccati umbra immunem, Luc. 1. *Quod nascetur ex te sanctum, vocabitur Filius Dei.* 2. Cor. 5. *Qui non noverat peccatum, pro nobis peccatum fecit*, hoc est, poenas peccati tulit. Cum vero dicit Christum *in similitudinem hominum esse factum*, nullibi innuit illam similitudinem esse tantum externæ apparentiæ, econtra declarat illam similitudinem esse veram, realem, & naturalem, cum ubique asserat Christum esse verum hominem, 1. ad Timoth. 2. *Unus mediator Dei & hominum, homo Christus Jesus.*

Inst. 2. Atqui Scriptura sufficienter declarat se loqui de similitudine quoad externam tantum apparentiam; ergo.

Probat. subsumpt. Scriptura addit: *Et habitus inventus ut homo*. Atqui habitus externam speciem significat cum exclusione substantiæ, idque innuit particula, *ut*, ergo.

Resp. dist. min. Habitus, sumptus pro vestimento, *conc.* sumptus pro figura, *nego minor.* Porro hic habitus sumitur pro figura, unde translatio Erasmi Roterod. habet: *Et figura repertus ut homo*. Figura autem per se realitatem non excludit a subjecto in quo reperitur, sic

sic licet nihil magis sit simile, quam ovum ovo, non sequitur ovum non esse realiter ovum.

Inst. 3. particula, *ut*, in hoc textu, est nota meræ similitudinis, non autem veritatis; ergo realitatem excludit.

Resp. nego antec. Particulæ enim, *Ut velut, quasi*, &c. non excludunt rei veritatem, sic Christus, qui 1. Joann. v. 14. dicitur, quasi Unigenitus, *Vidimus gloriam ejus, quasi Unigeniti a Patre*. Dicitur absolute Unigenitus vers. 18. *Unigenitus Filius, qui est in sinu Patris, ipse enarravit*.

Objicies 2. Apostolus 2. Cor. 5. ait: *Et sc cognovimus secundum carnem Christum, sed nunc jam novimus*. Ergo Christus non habet veram carnem.

Respond. nego consequ. Alias sequeretur nullum hominem habere veram carnem, cum Apostolus dicat, *Neminem novimus secundum carnem*. Sensus ergo est, licet olim pluris fecerimus Christum habere pro consanguineo, nunc mortui veteris vitæ affectibus, augustius de eo sentimus, nec amplius eum novimus *secundum carnem*, sed, *secundum spiritum*, ut auctorem omnis gratiæ & salutis, qualem eum toto orbe prædicamus.

Objicies 3. Apparitiones Angelorum in veteri testamento, quæ fuerunt signa apparitionis Christi, non fuerunt secundum corporis veritatem; ergo cum signa respondere debeant signatis, Christi apparitio in carne non fuit secundum rei veritatem.

Resp. nego consequ. Apparitiones enim illæ debuerunt esse quoad similitudinem, non quoad rei veritatem, alias, ut docet D. Damasc. l. 3. c. 26. jam non forent signa, sed res ipsæ. Præterea ex Coloss. 2. quæ contingebant in veteri testamento, erant umbra futurorum; ergo ap-
p-ri-

paritiones debuerunt esse secundum apparentiam, cum apparitio Filii Dei in mundo, secundum corporis veritatem fieri postea deberet.

Inst. Scriptura apparentes Angelos non minus homines vocat, quam Christum; atqui tamen non inde sequitur eos fuisse veros homines; ergo nec Christus.

Resp. nego consequ. Disparitas est, quod Scriptura nihil adscribit illis Angelis, quod sit proprium veri hominis, econtra multa Christo attribuit, quæ soli vero homini convenire possunt, v. gr. Conceptionem & Nativitatem ex Virgine, passionem, mortem, & Resurrectionem.

CONCLUSIO II.

Verbum divinum carnem e calo non derulit, sed eam sumpsit ex Maria Virgine. Est de fide.

Prob. 1. Ex Scriptura, Lucæ 1. Angelus ad Mariam dixit: *Quod nascetur ex te sanctum, vocabitur Filius Dei*, Rom. 1. de Christo dicitur: *Qui factus est ei ex semine David secundum carnem*. Et Galat. 4. *Misit Deus Filium suum, factum ex muliere*. Atqui quod natum est ex muliere, quod factum est ex semine David, verum corpus habet terrenum, & non e cælo delatum. Ergo.

Prob. 2. Ex Conciliis General. & speciatim Ephesino, in quo approbata est S. Cyrilli Epistola ad Nestorium, in qua dicitur: *Non dubitarunt (Sancti PP.) sacram Virginem Deiparam appellare . . . quod sacrum illud corpus, anima intelligente perfectum, ex ea traxerit*.

Objicies. Apostol. 1. Corinth. 15. Christum Adamo opponens, ait: *Primus homo de terra, terrenus; secundus homo de calo, celestis*. Ergo Christus habuit corpus cæleste.

Resp. nego consequ. Christus enim non dicitur homo

homo celestis, quod habuerit corpus celeste; sed quod substituerit subsistentia Verbi Divini.

Inst. Corpus celeste omnium præstantissimum est; ergo Deo est tribuendum.

Respond. nego consequ. Nam ad maximam Dei gloriam pertinuit, ut corpus infirmum & terrenum ad sublimitatem omnium maximam evehret.

CONCLUSIO III.

Verbum Divinum immediate assumpsit dentes, ungues, capillas, tres humores & maxime sanguinem. Est communis contra Durandum, in 4. dist. 10. quæst. 1. & Franciscum Maironis, dist. 43.

Prob. 1. generaliter, Verbum immediate assumpsit quidquid ad naturæ humanæ perfectionem & integritatem pertinet; atqui dentes, ungues & capilli, ad naturæ humanæ perfectionem & ornatum pertinent; tres vero humores, & maxime sanguis, ad ejusdem integritatem spectant; ergo.

Nec obstat, quod Verbum immediate non assumpsit lacrymas, sudorem, sputum, &c. Dispar est enim ratio; nam lacrymæ, sudores, sputum, &c. sunt pura excrementa, nec per se requiruntur ad naturæ humanæ constitutionem & integritatem, cum non sint quid permanens in homine, sicque non habeant locum in Beatis; at vero dentes, ungues, capilli, & humores, ad perfectam corporis humani constitutionem, & naturæ humanæ integritatem requiruntur, ac sunt quid in homine permanens, sicque locum habent in Beatorum corporibus gloriosis; ergo.

Prob. specialiter de sanguine; 1. Ex Scriptura Hebr. 2. Quia ergo pueri communicaverunt carni & san-

& sanguini, & ipse similiter participavit eisdem, scilicet per unionem hypostaticam, ut explicat S. Cyrillus, *L. de fide ad Reginas* dicens: *Verbum ex Deo factum est particeps carnis & sanguinis*. Ergo cum caro immediate unita sit, idem de sanguine; de quo, simili modo, loquuntur Apostolus & Cyrillus, sentiendum est.

Prob. 2. Quia eadem Scriptura declarat nos per Sanguinem Christi redemptos fuisse, *1. Petri 1. Non corruptibilibus auro & argento redemptis estis . . . sed pretioso Sanguine quasi Agni immaculati Christi*. Hinc Clemens VI. (h) infert, unicum guttam Sanguinis Christi, propter unionem ad Verbum, sufficere potuisse pro redemptione generis humani.

Obicies: Subsistentia Verbi supplevit solum subsistentiam humanam; atqui subsistentia humana non terminat sanguinem proximè; ergo nec subsistentia Verbi.

Resp. nego min. Nam subsistentia humana omnes naturæ humanæ partes, etiam integrantes, terminat; atqui sanguis est pars naturæ humanæ integrans, pertinens ad naturalem constitutionem, immo & conservationem hominis; ergo.

Inst. Subsistentia humana cum natura, quam terminat, personam constituit; atqui non constituit personam cum sanguine; ergo sanguinem non terminat.

Resp. dist. maj. Cum natura totali, quam terminat, personam constituit, *conc.* cum natura partiali, *nego maj.* Porro sanguis, sicut corpus, & anima separatim, sunt naturæ partiales, quæ personam non constituunt, nisi uniantur.

Q U Æ

(h) Extrav. Unigenitus, de poenit. & remiss.

Q U Æ S T I O II.

De anima a Verbo Divino assumpta.

Nota. **H**Æretici, alii animam, alii facultates animæ Christo denegarunt; namque:

1. *Ariani*, docuerunt Verbum carnem assumpsisse absque anima, cujus vices obibat ipsummet Verbum. *August. hæresi 49.* hocque docebant; ut ipsimet Verbo mortem & passionem adscriberent.

2. *Apollinarista*, animam quidem a Verbo assumptam admiserunt, sed quæ Verbum haberet pro mente.

3. *Monothelita*, quorum Duces fuerunt Cyrus Alexandrinus, Macharius Antiochenus, Sergius Constantinopolitanus & ejus in Sede Constantinopolitana successores Pirrhus & Paulus, & tandem Theodorus Pharanitanus, docuerunt Verbum Divinum voluntatem humanam non assumpsisse, ac proinde unicam voluntatem, eamque Divinam, in Christo admittebant; contra quos:

C O N C L U S I O I.

Verbum assumpsit veram animam humanam.
Est de fide contra Arianos.

Prob. 1. Ex Scriptura, Joann. 10. Christus ait: *Ego pono animam meam, ut iterum sumam eam, in Resurrectione. Nemo tollit eam a me; sed ego pono eam a me ipso: & potestatem habeo ponendi eam, & iterum sumendi eam.* Atqui illi anima, quam Christus potest ponere, & quam, semel demissam, potest iterum sumere, haud dubie non est ipsamet Divinitas, quam Christus nunquam dimisit, cum non distinguatur a per-

persona Verbi; ergo est vera anima humana.

Probat. 2. Ex traditione, cujus testes sunt, D. Athanas. In Symbolo, ubi Christus dicitur, *perfectus Deus & perfectus homo, ex anima rationali, & humana carne subsistens.* Et D. Aug. Epist. 187. ad Dardan. *Quaro, inquit, quemadmodum accipias hominem Christum: non utique, sicut quidem heretici, Verbum Dei & carnem, hoc est, sine anima humana, ut Verbum esset pro anima; ergo.*

Objiciunt Ariani: loca, in quibus anima Christo tribuitur, metaphorice sunt intelligenda; ergo Christus non habuit veram animam humanam.

Prob. ant. Hic textus Isaïæ 1. *Kalendas vestras & solemnitates vestras odit anima mea,* Metaphorice est accipiendus; ergo.

Resp. nego conseq. Disparitas est, quod Scriptura veteris testamenti, cum Deo animam tribuit, non ei tribuit historice affectiones quæ sine anima esse non possunt, econtra ostendimus, inquit D. August. Lib. 33. quæstionum, quæst. 80. *Per innumerabiles locos Evangelica Scriptura narratum de illo (Christo) ab Evangelistis, quod in his affectionibus fuerit, quæ sine anima esse non possunt &, miratus est Jesus, &, iratus, &, contristatus, &, exhilaratus, & multa alia innumerabilia: sicut etiam illa quæ conjuncta simul officia & corporis & anima ostendunt: sicut sunt quod, esurivit, quod, dormivit, quod, fatigatus ab itinere sedit, & alia hujusmodi.*

Instant 1. Etiam in veteri testamento varii motus iræ, lætitiæ, &c. Deo tribuuntur, nec ideo consequens est Deum habuisse animam; ergo licet Christus illas affectiones habuerit; non sequitur quod animam vere humanam habuerit.

Resp.

Resp. nego consequ. Disparitas enim est inter ea quæ dicta sunt prophetice, & ea quæ dicta sunt historice, quod illa figurate, ista vero secundum rerum proprietatem accipienda sint. Ut docet D. August. ibidem: *Dicta sunt enim illa, inquit, propheticiis imaginationibus, non narratoria manifestatione: nam & membra Dei dicta sunt, & manus, & pedes, &c. Et quemadmodum ista non indicant eum habere corpus, sic nec illa animam. Quemadmodum autem narratur aliquid, ubi nominata sunt manus Christi, & caput, & cetera quæ indicant ejus corpus: ita etiam, quæ de animi affectionibus eodem narrationis tenore nominata sunt, indicant ejus animam.*

Instant 2. Si Christus assumpsit animam, fuerunt in eo tres substantiæ, nimirum natura divina, corpus, & anima; atqui hoc falsum est, ut docet D. Damascenus, *Lib. 3. de fide, c. 16.* Ergo.

Resp. dist. maj. Fuerunt in Christo tres substantiæ, quarum duæ sunt partiales, *conc. totales, nego major.* Quamvis itaque possit dici, quod sint tres substantiæ in Christo, ut docet D. Bernard. *Serm. 4. in vigilia Natalis Domini: In hac speciali commixtione, inquit, Trinitas est in substantiis, unitas vero in persona.* Et Concil. Tolet. XV. probat in Christo fuisse tres substantias & duas naturas; attamen ab hac loquendi formula communiter abstinendum est, & duæ solum substantiæ perfectæ & totales in Christo ponendæ, natura divina, nimirum, & humana, ex quibus Christus proxime compositus fuerit, siquidem corpus & anima unicam naturam humanam constituunt.

CONCLUSIO II.

Verbum assumpsit animam mente præditam. Est de fide contra Apollinarem.

Prob. 1. Ex Scriptura, Isaïæ 52. de Christo dicitur: Ecce intelliget Puer meus, in quem locum S. Fulgentius, de fide ad Petrum, cap. 24. ait: Firmissime tene, & nullatenus dubites, Christum Filium Dei habere veram nostri generis carnem, & animam rationalem.

*Prob. 2. duplici ratione: 1. In Christo fuerunt passiones humanæ, nimirum, gaudium, tristitia, metus, ira, &c. Atqui illæ passiones nihil aliud sunt, quam affectiones animæ rationalis, cum ex perceptione boni præsentis, vel mali imminentis oriantur; ergo, &c. 2. Christus oravit Patrem; atqui oratio in Christo est actus mentis humanæ; ergo, &c. Probat. min. Oratio est actus religionis, quo orans, supremam Dei excellentiam, suamque a Deo dependentiam agnoscit; atqui Christus non potuit suam dependentiam a Deo agnoscere per intellectum divinum, nempe ut Deus est omnino independens; ergo per intellectum humanum; ergo, &c. Quare D. August. Epist. 57. ad Dardanum, sugillat eos qui dicunt, *Verbum Dei esse anima pro mente humana, & probat ex eo quod Christus sit homo perfectus: Non est autem homo perfectus, inquit, si vel anima carni, vel anima ipsi mens humana defuerit.**

Obicies: Verbum in Christo supplet vices animæ humanæ, prout rationalis est; ergo anima Christi non est prædita mente humana.

Resp. nego ant. Nam anima Christi fuit principium & subjectum voluntarium quarundam passionum, v. g. metus, tristitiæ, &c. Atqui Verbum

bum non potuit esse principium & subiectum huiusmodi passionum, alias esset mutabile, nec proinde Deus; ergo.

Inst. 1. Lux major evacuat lucem minorem; ergo mens divina mentem humanam in Christo evacuat.

Respond. dist. antec. Evacuat lucem minorem corporis illuminantis, *conc.* corporis illuminati, *nego ant.* Neque enim præsentē sole, adamantis splendor evanescit; porro mens humana in Christo est quasi lux illuminata a luce Verbi divini.

Inst. 2. Mens humana est imago Verbi; ergo hæc, Verbo præsentē, evanescere debet.

Resp. dist. ant. Mens humana est imago Verbi, a Verbo perficienda, *conc.* supplens vicem Verbi, *nego ant.* Equidem imago rei, supplens illius vicem, evanescit, re præsentē, sed non evanescit, si a re, cuius est imago, perficienda sit: sic imago hominis in speculo, quia perficitur ab homine, non evanescit eo præsentē, immo resultat ex ejus præsentia.

CONCLUSIO III.

Verbum assumpsit voluntatem humanam, proindeque in Christo, non una, sed duplex est voluntas: non una, sed duplex est volitio, seu operatio. Est de fide, contra Monothelitas, definita in VI. Synodo, Act. 4. 8. 11. & 18.

Prob. 1. Ex iis Scripturæ locis in quibus voluntas divina a voluntate humana aperte distinguitur; Matth. 26. *Pater, si possibile est, transeat a me calix iste; verumtamen non sicut ego volo, sed sicut tu.* Lucæ 22. *Non mea voluntas, sed tua fiat.* Joann. 6. *Descendi de caelo; non ut faciam voluntatem meam, sed voluntatem ejus qui misit me.* Ergo in Christo fuit voluntas Patri subiecta; non divina, quæ

subjectionis est incapax ; ergo humana ; ergo divina simul & humana ; nam divinam nunquam Monothelitæ excluderunt a Christo.

Prob. 2. Ex iis textibus in quibus dicitur Christum Deo Patri obedivisse. Philipp. 2. *Factus obediens usque ad mortem.* Joann. 4. *Cibus meus est, ut faciam voluntatem ejus qui misit me.* Hebr. 5. *Didicit, ex iis qua passus est, obedientiam.* Ex quibus sic argumentor ; obedientia est actus voluntatis ; atqui non est actus voluntatis divinæ ; quia obedientia superiorem agnoscit, Deus autem superiorem non habet ; ergo est actus voluntatis humanæ ; ergo in Christo fuit voluntas humana.

Probat. 3. Traditione PP. Gregor. Nyssenus, in libro contradictionum contra Apollinarem laudato in VI. Synodo, Actor. 10. ait: *Alia est humana voluntas (in Christo) & alia divina ... qui enim dixit, non mea voluntas, humanam hoc sermone significavit ; addens vero, tua, ostendit conjunctionem sue deitatis ad Patrem, cujus nulla voluntatis est differentia propter communitatem natura: nam, Patri, dicens, voluntatem etiam Filii demonstravit.*

S. Athan. lib. de Incarnatione contra Arianos ; dicit : *Cum ait, non mea voluntas, sed tua fiat. Et, spiritus quidem promptus est, caro autem infirma, duas voluntates ibi ostendit, alteram humanam, qua est carnis ; alteram divinam, qua Dei est.*

S. Ambros. lib. 10. in Lucam, n. 59. de Christo dicit : *Quod autem ait : non mea voluntas, sed tua fiat ; suam ad hominem retulit ; Patris, ad divinitatem : voluntas enim hominis, temporalis ; voluntas divinæ, aterna. Ergo.*

Prob. Ex VI. Synodo, in qua Patres, in sermone ad Imperatorem Constantinum ; dixerunt : Perfectum igitur (Christum) in divinitate, & in huma-

humanitate perfectum, secundum antiquas Patrum traditiones, & divinam Chalcedone sancitam formulam predicamus: atque uti naturas duas accepimus, ita & duas naturales voluntates, & naturales ipsius operationes agnoscimus. Quippe neutram in Christo naturam, in ejus Incarnatione, voluntatis expertem, aut operationis, audebimus asserere, ne earum proprietates perimentes, natura una perimamus.

Solvuntur Objectiones.

Objicies 1. Juxta doctrinam SS. Patrum, unica fuit in Christo voluntas, unicaque voluntatis operatio; ergo *Resp. nego ant.*

Prob. ant. S. Dionysius, lib. de divinis nominib. docet, unam esse in Christo Dei virilem operationem. Ergo.

Resp. nego ant. Fraudulenter enim Monothelitæ textum D. Dionysii corruerunt, ac, rō unam, pro, rō novam, substituerunt, quod ipsis exprobrat Martinus Papa I. in Concilio Later. consultatione tertia. B. Dionysio, inquit, asserente novam quamdam Dei virilem operationem inter nos conservatam: uterque eorum apertissime contra Patrem mentitus est. Et Cyrus quidem in suo septimo capitulo, novam immutando, & unam pro nova asserendo... Sergius autem immutationem novi cum illo confirmans, & non solum hoc, sed, &, Dei virilem, amputans penitus vocem, & unam absolute in Christo Deo dogmatizans operationem. Porro D. Dionysius dixit esse in Christo novam operationem, quia plane novus ac mirus est modus operandi divina & humana in Christo propter utriusque naturæ divinæ & humanæ hypostaticam unionem.

Resp. 2. Dato, non concesso anteced. *diff. conseq.* Est una in Christo operatio, mixta,

quæ ab utraque natura, divina, & humana, procedat, *conc. simplex, nego consequ.*

Itaque triplex fuit genus actionum Christi, nimirum, *pure divina*; quæ a Christo emanant ut Deus est, id est, absque ullo ad humanam naturam respectu, ut est sanatio infirmi a Christo absente; *pure humana*, quæ naturæ humanæ fuerunt propriæ, ut, edere, flere, pati, velle, intelligere, &c. *mixta*, quæ ab utraque natura prodierunt, v. g. dum Christus suo contactu curabat ægrotos; in ea quippe curatione agebat utraque natura, divina nempe per suam omnipotentiam, & humana per suum contactum. Hæc non est simplex, sed duplex operatio, divina nempe & humana, quæ, licet non sint divisæ, sunt tamen a se invicem realiter distinctæ; ideo hæc operatio a Græcis *Theandrica*, & a Latinis *Dei virilis*, id est, Dei hominis operatio, dicitur; de qua locutus est Divus Dionysius, ut exponit S. Maximus martyr scholio in Epistolam quartam Dionysii: *Illam miscellaneam solam*, inquit, *Dei virilem appellavit, siquidem ut Deus tantum operabatur, quando absens Centurionis filium sanabat: in quantum vero homo tantum, etsi Deus erat, quando comedebat & tristabatur: mixtim autem operabatur miracula, cæcis oculos illiniendo restituens, hemeroissæ fluxum solo tactu sistens.*

Objicies 2. S. Cyrillus, lib. 4. in Joann. affirmat Christum unam quamdam cognatam operationem per ambas naturas ostendisse, ergo una tantum fuit Verbi & naturæ humanæ operatio.

Respondi. *dist. consequ.* Fuit una tantum operatio, unitate improprie dicta, seu unionem, *conc. unitate proprie dicta, nego consequ.* Non itaque D. Cyrillus loquitur de unitate numerica, sed de unionem, quæ petitur ex arctissima con-

conjunctione duorum inter se, nempe Verbi & naturæ humanæ, quæ ad operationes Theandricas, modo sibi convenienti, concurrunt, Verbum quidem jubendo, humana natura vero, per suum contactum, exequendo. Ita respondet S. Martinus Papa apud Euthimium: *Unam actionem, inquit, vocat unionem: cognatam vero, ratione partium, utpote quæ ejusdem fuerit in omnium efficiente imperio, & sanctæ carnis attactu.*

Obicies 3. D. Greg. Nyssenus, in Synodo VI. Actor. 12. asserit, ita divinitatem, per corpus quod induit, communem omnium revera salutem operari, ut propria sit carnis perpassio, Dei sit operatio. Ergo non fuit in Christo voluntas humana operans.

Resp. nego consequ. Nam passiones voluntatis humanæ, sunt veræ actiones, sic Sancti patiuntur, quando a Deo per gratiam moventur, & tamen habent proprias voluntates operantes.

Obicies 4. D. Athanas. Oratione 4. ait: Deus existens proprium corpus habuit, & hoc usus instrumento, homo propter nos factus est. Atqui instrumentum non agit, sed agitur; ergo.

Resp. dist. min. Instrumentum artificiale, quod agendi principio caret, & sola moventis impressione movetur, conc. instrumentum naturale, quod propria agendi virtute præditum est, nego minor. & consequ. Nam natura humana in Christo, si sit divinitatis instrumentum, non est instrumentum artificiale, sed naturale, quia ex se ipsa propriam exercet actionem, nec tantummodo patitur.

Obicies 5. Actiones sunt suppositorum; atqui in Christo unicum est suppositum; ergo & unica operatio.

Resp. dist. maj. Actiones sunt suppositorum, denominative, conc. elicitive, nego maj. Itaque

Sola natura est principium elicativum actionum; non vero personalitas, quæ est verus, naturæ terminus & ultimum complementum; unde persona, quæ est principium *quod* actionis quæ ipsi tribuitur ut toti cuidam, non agit nisi per naturam, quæ est principium *quo* actionis; quare unitas vel multiplicitas actionum desumitur ab unitate & multiplicitate naturæ, non vero ab unitate vel multiplicitate suppositi.

Inst. 1. Voluntas operans, est proprietas personalis; ergo unitas, vel multiplicitas, voluntatis operantis, desumitur ab unitate, vel multiplicitate personæ.

Resp. nego ant. Voluntas enim est proprietas naturæ intellectualis, non vero est proprietas personalis; alias tres essent in Trinitate voluntates & operationes divinæ realiter distinctæ, cum in ea sint tres personalitates realiter inter se distinctæ.

Prob. ant. Proprietas naturalis necessaria est; atqui voluntas non est necessaria, sed libera; ergo.

Resp. dist. major. Proprietas naturalis, ut est potentia, est necessaria, *conc.* ut est actus huius potentie, *subdist.* si sit actus potentie necessariæ, prout est intellectus, *conc.* si sit actus potentie liberæ, qualis est voluntas, *nego maj.* Atqui voluntas, ut est potentia, est necessaria, *conc.* ut est actus illius potentie, *nego minor.* *Et conseq.* Responsio est D. Thomæ (1) dicentis: *Quod ipsa potentia voluntatis est naturalis, & consequitur naturam ex necessitate, sed motus, vel actus huius potentie (qui etiam voluntas dicitur) quandoque quidem est naturalis & necessarius, puta respectu felicitatis: quandoque*

(1) 3. p. q. 18. art. 1. ad 3.

doque autem ex libero arbitrio rationis proveniens, & non necessarius, neque naturalis & ideo oportet ponere voluntatem humanam, non solum prout est potentia naturalis, aut prout est motus naturalis; sed etiam prout est motus rationalis; id est, ex libero arbitrio proveniens.

Inst. 2. Si fuissent duæ in Christo voluntates operantes, fuissent inter se aliquando pugnantes; atqui hoc repugnat sanctitati Christi; ergo.

Resp. nego major. Nam ex summa gratia; & maxime ex originali iustitia, fuit in Christo perfectissima rectitudo voluntatis humanæ ita ut nunquam repugnarit voluntati divinæ; ut fide constat, Joann. 8. *Ego qua placita sunt ei, facio semper.*

Inst. 3. Deus habuit voluntatem efficacem, ut Christus moreretur; Christus vero habuit voluntatem inefficacem vitandi mortem, *Pater*, inquit, *si possibile est, transeat a me calix iste*; atqui illi duo actus sunt contrarii; ergo Christus habuit actum contrarium voluntati divinæ.

Resp. nego min. Nam actus voluntatis humanæ Christi, tum efficax, quo mortem acceptavit, tum inefficax, quo mortem refugit, semper fuit perfecte conformis voluntati divinæ; Deus enim, ad nostrum exemplum & solatium, voluit, ut simplici displicentia refugeret mortem tanquam malum naturæ suæ disconveniens; ergo nulla ex parte humana Christi voluntas divinæ contraria fuit.

Objiciunt ultimo Monothelita, Honorium I. summum Pontificem hæresi Monothelitarum adhæsisse ex animo; verum eum ab illa calumnia vindicavimus Tomo I. unde a facto hujusmodi discutiendo hic supersedemus.

Quæres, quomodo explicari possint Christi operationes?

Resp. Ad explicandas Christi operationes, sequentes tenendæ sunt regulæ.

Prima regula. In Christo fuerunt unus operans, & duæ operationes; ratio est, quia unitas, aut multiplicitas operantis, desumitur ab unitate, vel multiplicitate personæ; unitas vero, aut multiplicitas operationis, desumitur ab unitate aut multiplicitate naturæ; atqui in Christo unica fuit Verbi persona, duæ vero, & diversæ naturæ; ergo.

Secunda regula. Una natura nunquam divisim, sed semper cum altera conjunctim operatur, quia utraque hypostatice est conjuncta; hinc licet operationes humanæ a sola prodeant humana natura, a divina, cum qua conjunctim operatur, summam dignitatem nanciscuntur, & ratione suppositi cooperantis, divinæ dici possunt: unde recte dicitur, *Deus comedit, esuriit, mortuus est, &c.*

Tertia regula. Omnes actiones humanæ, etiam naturales & indeliberatæ, fuerunt in Christo liberæ, utpote, quæ nutu divinitatis gubernatæ fuerunt. Unde D. August. Tract. 49. in Joann. ait: *Turbaris tu nolens, turbatus est Christus, quia voluit; esuriit Jesus, verum est, sed quia voluit; mortuus est Jesus, verum est, sed quia voluit; in illius potestate erat sic affici, vel non affici.*

Quarta regula. Natura humana Christi fuit instrumentum, per quod natura divina operabatur ea quæ ad salutem nostram, & ad mediatoris officium pertinebant, ita tamen ut natura illa humana actus sibi proprios elicuerit; Operatio, inquit D. Thom. 3. p. q. 19. artic. 1. ad 2. *qua est humana natura in Christo, in quantum est instrumentum divinitatis, non est alia.*

alia ab operatione divinitatis; non enim est alia salvatio, qua salvat humanitas Christi & divinitas ejus; sed est eadem operatio Dei hominis, quæ ideo Theandrica, seu, Dei virilis dicitur; habet tamen natura humana in Christo, in quantum est natura quadam, quamdam propriam operationem præter divinam.

QUÆSTIO III.

De defectibus a Verbo divino assumptis.

Nota: **N**aturæ humanæ defectus, alii se tenent ex parte corporis; alii ex parte animæ; alii ex parte utriusque, de quibus distinctis agemus Articulis.

ARTICULUS I.

De defectibus corporis a Verbo assumptis.

Nota: **C**orporis defectus, alii sunt communes omnibus hominibus in statu naturæ lapsæ, ut sitis, fames, dolor, corruptibilitas, mors, &c. alii particulares aliquibus tantum hominibus, qui ex particularibus causis oriuntur, ut febris, lepra, claudicatio, cæterique morbi distincti a consumptione humidi radicalis, calorisque naturalis. Itaque:

CONCLUSIO I.

Verbum assumpsit omnes humani corporis defectus communes. Est de fide contra Julianum Halicarnensem, qui, præter unitatem naturæ, quam in Christo profitebatur cum Eutyche, assererat carnem Christi fuisse incorruptibilem & impassibilem: unde ejus sectatores, Incorrupticolas, dicti sunt.

Prob. 1. ex Scriptura, Quæ refert Christum, in vitæ suæ mortalis cursu, varia dedisse infirmitatis signa & argumenta; nam Matth. 4. Esuriit. Joann. 4. Fatigatus ex itinere, sedit ad fontem. Luc. 19. Fleuit super Jerusalem. Tandem 2. Cor. 13. Crucifixus est ex infirmitate. Vetus testamentum prædixerat, quod novum accidisse refert; A planta pedis usque ad verticem non est in eo sanitas, inquit Isaïas c. 1. & c. 53. vere languores nostros ipse tulit, & dolores nostros ipse portavit.... vulneratus est propter iniquitates nostras, attritus est propter scelera nostra. Atqui fames, defatigatio, passio & mors, &c. sunt communes corporis humani defectus; ergo Verbum assumpsit illos defectus.

Probat. 2. Ex tradit. PP. & Conciliorum: S. Cyrill. Jerosolymit. ait: Passus est Jesus pro hominibus vere: non enim apparentia est Crux, neque opinio redemptio: vere crucifixus est, &c. Unde Concil. Ephesinum, Anathematismo 12. definit: Si quis non constetetur Dei Verbum carne passum & crucifixum, mortemque gustasse, anathema sit.

Probat. 3. Quia conveniens erat, ut Verbum divinum hos defectus assumeret, 1. Ut verum hominem nobis per omnia similem sese exhiberet, & ideo ex Apostol. Hebr. 4. fuit renatus per omnia pro similitudine absque peccato.... 2. Ut nobis esset exemplum patientiæ, Hebr. 12. Sustinuit a peccatoribus adversus semetipsum contradictionem, ut non fatigemini animis vestris deficientes.... 3. Ut proprio sanguine nos redimeret.

Solvuntur Objectiones.

Objicies r. David, Psalm. 15. prædixit carnem Christi fore incorruptibilem, Non dabis Sanctum tuum videre corruptionem. Ergo.

Rsp.

Resp. dist. ant. Prædixit carnem Christi fore incorruptibilem, post ejus mortem, *conc.* ante ejus mortem, *nego ant.* Loquitur ergo Psalter Regius de corruptione putredinis, quam non sensit caro Christi, non vero de corruptione alterationis & mortis; id explicat D. Fulgent. Epistola ad Reginum, capit. 4. *Christus ergo, inquit, non vidit corruptionem, quia nullam sensit ejus caro putredinem; hoc autem, non ejusdem carnis incorruptibilitas, sed resurrectionis celeritas, fecit.*

Inst. 1. Atqui caro Christi fuit incorruptibilis ante ejus mortem; ergo.

Prob. ant. Christus, qui ex Scriptura novus Adam dicitur, carnem prioris Adam innocentis gessit; atqui caro Adami innocentis fuit incorruptibilis, id est, non erat Adamo occasio doloris; ergo.

Resp. nego maj. Ratio est, quia Verbum eam carnem assumpsit, quam sanavit; atqui non sanavit carnem Adami innocentis; ergo eam non assumpsit, sed eam ipsam carnem assumpsit, qualis fuit post peccatum, nempe infirmitatibus & doloribus obnoxiam.

Inst. 2. Illi defectus & dolores sunt poenæ peccati; atqui nullum fuit, nec esse potuit in Christo peccatum; ergo &c.

Resp. dist. maj. Sunt poenæ peccati, proprii vel alieni, *conc.* proprii semper, *nego maj.* Itaque in nobis tales defectus & infirmitates sunt poenæ peccati proprii, vel originalis, vel actualis, in Christo autem fuerunt poenæ peccati alieni, nempe hominis, pro quo se vadem ac sponsorem dedit.

Inst. 3. Visio beatifica excludit omnem dolorem sensibilem; atqui anima Christi, a Conceptione, fuit visione beatifica donata; ergo non fuit obnoxia doloribus sensibilibus.

Respond.

Respond. dist. maj. Excludit omnem dolorem sensibilem, si non impediatur ne animæ felicitas in corpus & potentias inferiores resiliat, *conc.* si impediatur, *nego major.* Porro Deus, per miraculum, impedit ne animæ Christi felicitas in ejus corpus resiliaret, ut posset pati & ea operari quæ erant necessaria ad finem Incarnationis, *Virtute Divinitatis Christi*, ait D. Thom. quæst. 15. art. 5. ad 3. *Dispensative sic beatitudo in anima continebatur, quod non derivabat ad corpus, ut ejus possibilitas & mortalitas tolleretur. Et eadem ratione delectatio contemplationis sic retinebatur in mente, quod non derivabatur ad vires sensibiles, ut per hoc dolor sensibilis excluderetur.*

Objicies 2. Clemens Alexandrinus, lib. 6. *Stromat.* de Christo dicit: Ipse autem passionis erat expertus, ut quem nullus subiret motus affectionis, neque voluntas, neque dolor. Ergo Christus non fuit dolori obnoxius.

Resp. dist. conseq. Christus non fuit dolori involuntario & indeliberato obnoxius, *conced.* deliberato & voluntario, *nego conseq.* Nec de alio dolore intelligendus est Clem. Alexandr. licet hic non satis accurate videatur locutus; alias contradiceret Christo per os Jeremiæ, Thren. 1. dicenti: *Videte si est dolor sicut dolor meus.*

Objicies 3. D. Hilarius lib. 10. de Trin. ait: Homo itaque Jesus Christus... in quem quamvis aut ictus incideret aut vulnus descenderet... afferrent quidem hac impetum passionis, non tamen dolorem passionis inferrent, ut telum aliquod aut aquam perforans, aut ignem compungens, aut aera vulnerans. Ergo, ex S. Hilario, Christus non sensit dolorem, qui tamen communis est naturæ humanæ defectus.

Respond. dist. conseq. Ex S. Hilario, Christus non

non sensit dolorem, quatenus Deus est, *conc.* quatenus homo, *subdist.* Non sensit dolorem, qui sit ineluctabilis, indeliberatus, mentem perturbans & a sua sede dejiciens, qualem nos experimur, *conc.* dolorem omnem simpliciter & absolute, *nego conseq.* Itaque verba D. Hilarii ex scopo ipsius sunt interpretanda; agit porro contra aliquos hæreticos, qui asseriebant Divinitatem in Christo, doloribus, cæterisque humanitatis infirmitatibus, subjectam fuisse, *Volunt*, inquit ibidem, *plerique eorum* (hæreticorum) *non in natura cum impassibilis Dei fuisse: ut qui timuit, & doluit, non fuerit in ea spiritus incorruptione quæ non dolet: sed inferioris a Deo Patre natura.* Contra quos:

Docet 1. Dolorem, non in Divinam, sed in humanam duntaxat naturam cecidisse: *Volunt enim*; inquit Commentario in Matth. c. 31. *ex infirmitate corporis arumnam spiritui adherere, ac si virtutem illam incorrupta substantia; imbecillitatis sua sorte assumptio carnis infecerit, & aternitas naturam fragilitatis accepit* mori ergo nihil in Deo potuit, neque ex se metus Deo ullus est; in Christo enim Deus erat mundum reconcilians sibi.

Docet 2. Christum vere doloris sensum expertum fuisse: *Ut*, inquit, *cum in eodem* (Christo) *esset & infirmitas ad passionem, & ad vitam Dei virtus, non alius aut divisus a se esset qui & pateretur & viveret; passus quidem est Unigenitus Deus quæ homines pati possunt.*

Docet 3. Dolores & infirmitates, quas Christus assumpsit, fuisse immunes a defectibus & imperfectionibus dolorum & infirmitatum, quas nos patimur; *Quia*, inquit, *dum homo Christus est, habet & naturam hominis, quia homo est: nec est in vitiosa hominis infirmitate, quia Christus est.* Hujus discriminis varias asserere

fert causas : 1. Quia dolores , quos Christus passus est , non erant ex peccato , sicut in nobis sunt : *Missus namque est , inquit , in peccati carnis similitudine , portans quidem in carne peccata , sed nostra & pro nobis dolens .* 2. Quia Christus , non ex necessitate , sed , ex propria voluntate patiebatur . *Si in passione sua , inquit , necessitas est , & non salutis tua donum ... adscribe infirmitatem .* 3. Quia dolores Christi , illius mentem non perturbabant , sed erant deliberati , ordinati , & ad nutum ejus moderati : *Non est itaque , inquit , in ea natura , qua supra hominem est , humana trepidationis anxietas .* Unde quando anima ejus turbata est , *Joann. 5.* illam commotionem Christus in seipso volens ac lubens excitavit , *Joann. 11.* *Turbavit seipsum .*

CONCLUSIO II.

Verbum non assumpsit defectus corporis humani particulares , quales sunt morbi & deformitas .

Prob. prop. generaliter : Quia illi defectus particulares ex triplici veluti radice oriuntur . 1. Ex culpa , puta intemperantia . 2. Ex aeris intemperie . 3. Ex defectu virtutis formatricis : atqui ex nulla harum radice evenire potuerunt in Christo . 1. *Non ex culpa* , nam fuit temperatissimus & impeccabilis , ut mox videbitur ; 2. *Non ex aeris intemperie* , nam optimi fuit temperamenti , unde facillime potuit inclementiæ aeris resistere . 3. *Non ex defectu virtutis formatricis :* nam corpus ejus formatum est de Spiritu sancto , cujus virtus deficere non potest ; ergo , &c.

Objicies , Christus mortalitatem assumpsit ; ergo , & morbos particulares *Resp. nego consequ.*

Prob.

Prob. conseq. Mors absque morbo contingere non potest; ergo si mortalitatem assumpsit, morbos quoque assumpsit.

Resp. nego ant. Nam natura humana, in corpore bene formato, & convenienter gubernato, sic potest intelligi deficere, ut sensim, debilitato naturali calore & humido radicali, vita absque morbis particularibus repente deficiat.

Prob. proposit. *specialiter de deformitate:* Ex Scriptura, Psalm. 44. *Speciosus forma pra filiis hominum*, quem locum S. Bernardus, *Serm. 1. de omnibus Sanctis*, & S. Chrysost. *hom. 28. in Matth.* de corporis Christi pulchritudine interpretantur. *Sicut in faciendis signis erat mirabilis*, inquit D. Chrysost. *sic visu gratiosissimus fuisse traditur.* Ergo.

Prob. ratione: Pulchritudo oritur ex tribus; nimirum, ex membrorum integritate, eorumdem debita proportionie, & colore convenienti orto ex bono temperamento; atqui corpus Christi, utpote virtute Spiritus sancti formatum, iis qualitatibus haud dubie fuit donatum; ergo.

Objicies; Isaia 53. de Christo dicitur: *Non est species ei, neque decor;* ergo, &c.

Resp. dist. Non est species, neque decor, tempore passionis, *conc.* extra tempus passionis, *nego ant.* Ibi enim Christus praedicatur, qualis erat futurus tempore passionis: in hunc locum scribens D. Hieron. ait: *Despectus erat & ignobilis quando pendeat in Cruce, & factus est pro nobis maledictum.*

Inst. 1. Oris venustas non decet praedicatorum Evangelii; atqui Christus fuit praedicator Evangelii; ergo.

Resp. dist. maj. Oris venustas mollis & effeminata, *conc.* gravis & majestuosus, *nego maj.* talis enim pulchritudo, est viro digna.

Inst. 2.

Inst. 2. Divus Augustinus in *Psalm.* 49. de Christo ait: *Ipse sponsus, non carnis, sed virtute formosus*; ergo vult pulchritudinem Christi repetendam esse a Divinitate, vel animæ virtutibus.

Resp. dist. conseq. Vult Christi pulchritudinem repetendam esse a Divinitate, vel animæ virtutibus, sine exclusione pulchritudinis corporalis, *conc.* cum tali exclusione, *nego conseq.* Unde horum verborum, *Non carne, sed virtute formosus*, sensus est, *non tam carne, quam virtute formosus*; unde non deprimit formositatem corporis Christi absolute, sed comparate ad Divinitatem, aut ad animæ pulchritudinem, aut etiam ad pulchritudinem corporis post resurrectionem.

ARTICULUS II.

De defectibus animæ a Verbo Divino assumptis.

Nota. **D** Effectus animæ humanæ præcipui, sunt ignorantia, & peccatum: de ignorantia agemus dum de scientia Christi sermonem faciemus; de peccato ergo restat resolvendum. 1. Utrum aliquod in Christo fuerit. 2. Utrum, quatenus homo, peccare potuerit.

CONCLUSIO I.

Nullum prorsus in Christo fuit peccatum. Est de fide contra Calvinum, lib. 2. institut. cap. 16.

Prob. 1. Ex Scriptura, Hebr. 4. *Habemus Pontificem tentatum per omnia pro similitudine, absque peccato.* 1. Petri 2. *Christus . . .*
pecca-

peccatum non fecit, nec inventus est dolus in ore ejus. Quare Joann. 8. de seipso confidenter dicebat: Quis ex vobis arguet me de peccato?

Prob. 2. Ex Conc. Ephesino Can. 10. definiēte: Si quis dixerit Christum pro seipso sacrificium obtulisse, & non potius pro nobis (neque enim oblatione indigebat, qui peccatum omnino nescivit) anathema sit.

Objicies 1. Christus, Psalm. 21. ait: Longe a salute mea verba delictorum meorum; ergo fuerunt in Christo peccata.

Resp. dist. conseq. Fuerunt in Christo peccata, aliena, conc. propria, nego conseq. Christus itaque peccata nostra, vocat sua, quia debitum, satisfaciendi pro illis in se suscepit, Isaia 53. Iniquitates eorum ipse portavit.

Inst. 1. Apost. 2. Cor. 5. de Christo ait: Eum qui non novit peccatum, pro nobis peccatum fecit. Ergo fuerunt in Christo peccata propria.

Resp. nego conseq. Ibi enim peccatum sumitur pro hostia, seu victima pro peccato, quo sensu de Sacerdotibus Oseas 4. dicit: Peccata populi mei comedent, id est, hostias pro peccatis oblatas.

Inst. 2. cum Calvino: Christus desperatione & impatientia reus fuit, quando in cruce pendens, dixit Patri: Deus, Deus meus, ut quid dereliquisti me? Ergo.

Resp. nego ant. Neque enim illa verba sunt hominis impatientis & desperantis, sed hominis doloris sui acerbicatem indicantis, ac suae humanitatis veritatem demonstrantis, ut observat Sanctus Cyrillus, l. 1. ad Reginas: & certe quomodo desperasset Christus, qui intuitiva Dei visione fruebatur, qui de resurrectione certus erat, qui Deo Patri dicebat: In manus tuas commendo spiritum meum.

Inst. 3.

Inst. 3. Humana Christi voluntas rebellis fuit voluntati divinæ, cum dixit: *Pater, si fieri potest, transeat a me calix iste*; ergo, &c.

Resp. nego antec. Nam Christus præceptum moriendi libens accepit, *Oblatus est enim, quia voluit*, Isaia 53. Licet ergo humana Christi voluntas illis verbis voluerit significare affectum naturalem abhorrentem a cruciatibus, ut, nempe, se verum demonstraret hominem, subdita tamen & semper conformis divinæ voluntati fuit, quod testatur, cum addit: *Verumtamen non mea, sed tua voluntas fiat*.

Objicies 2. Christus peccavit in Adam; ergo.

Resp. nego antec. Nam, Luca 1. Angelus Mariæ dixit: *Quod ex te nascetur sanctum, vocabitur Filius Dei*. Qui locus excludit a Nativitate Christi peccatum originale.

Prob. ant. Christus etiam originaliter fuit in Adam; ergo in eo peccavit, in quo omnes peccaverunt, Rom. 5.

Resp. dist. antec. Fuit in Adam, materialiter, & secundum corpulentam substantiam, conced. active, & secundum seminalem rationem, *nego ant.* Licet ergo Christus sumpserit carnem de Virgine, filia Adam, tamen non descendit ab Adam per seminalem propagationem, neque enim ab ullo Adæ filio fuit genitus; ergo non contraxit peccatum originale.

CONCLUSIO II.

Christus, etiam prout homo, fuit omnino impeccabilis. Prop. secundum præsentem statum, in quo natura humana Christi est Verbo hypostatice unita, & visione beatifica donata; est de fide.

Prob. 1. Ex Scriptura, Lucæ 1. *Quod nasce-*
etur

tur ex te sanctum, vocabitur Filius Dei; atqui quod nascitur sanctum, nimirum sanctitate substantiali, non potest peccare; ergo.

Prob. 2. ex traditione Patrum. S. Hyppolitus martyr, apud Theodoretum, dialogo 1. ait: Dominus a peccato alienus erat.

S. August. lib. 2. de peccatorum meritis & remissione, cap. 11. de Christo dicit: In cuius non tantum divinitate, sed nec in anima, nec in carne ullum potuit esse peccatum. Et cap. 13. ex his Apostoli verbis: Talis enim decebat ut nobis esset Pontifex, sanctus, innocens, segregatus a peccatoribus, &c. Probat Christum, non tantum non peccasse, sed nec peccare potuisse, asserens omnes Sacerdotes, qui in Sacerdotio laudabiliter justeq. vixerunt, habuisse necessitatem sacrificium primitus pro suis offerre peccatis, solo Christo existente, qui hanc necessitatem Sacerdos incontaminabilis non haberet.

Prob. 3. ratione. Si Christus, etiam prout homo, peccare potuisset, idem de Verbo dici potuisset; atqui absurdum & impium consequ. ergo, &c. *Prob. seq. maj.* Quæcumque dicuntur de natura tanquam de principio quo, prædicantur de supposito tanquam de principio quod: sic dicitur: Deus mortuus est, quia mors naturæ, cui Verbum est substantialiter unitum, tribuitur tanquam principio quo: atqui suppositum naturæ humanæ in Christo, aliud non est quam verbum; ergo, &c.

Objicies 1. Christum potuisse peccare non repugnat; ergo.

Prob. ant. Christum potuisse mori non repugnat; ergo nec repugnat Christum potuisse peccare: non enim Deus minus est vivens per essentiam, quam sanctus per essentiam.

Resp. nego consequ. Disparitas est, quod mors sit

fit malum pœnæ, cujus Deus auctor esse potest, quare nihil impedit, quominus, per idiomatum communicationem, Deus, in natura creata subsistens, dicatur mortuus; econtra peccatum est malum culpæ, cujus Deus auctor esse non potest, cum sit essentialiter inordinatio, indecentiamque in Deum refunderet, si esset in natura creata, cum qua unam personam constituit: ac proinde peccatum magis repugnat sanctitati per essentiam, quam mors repugnet vitæ per essentiam in aliena natura subsistenti.

Objicies 2. Christus fuit liber; ergo potuit peccare.

Resp. dist. antec. Fuit liber libertate contradictionis, qua poterat bonum illud amplecti, vel non, *conc.* libertate contrarietatis, qua bonum posset amare vel odisse, vel etiam aliquid bono contrarium amplecti, *nego antec.* Neque ex eo ejus libertas fuit imminuta, cum peccandi potestas sit defectus libertatis, non perfectio, ut docet D. Thom. 1. part. quæst. 62. art. 8. ad 3.

Inst. Humanitas Christi, seclusa unione hypostatica, peccare posset; ergo & tali unione posita.

Prob. conseq. Persona Verbi nihil prorsus immutavit in operationibus naturæ humanæ; ergo si humanitas Christi potuerit peccare seclusa unione, ita & ea posita.

Resp. dist. antec. Nihil immutavit, physicum, *conc.* nihil immutavit, morale, *nego antec.* Illa porro immutatio moralis consistit in hoc, quod persona Verbi, quæ in omnibus humanitatem Christi regebat, effecit ne ejus voluntas aliquid admitteret inordinatum.

Quæres: Unde repeti debeat impeccabilitas Christi?

Notæ:

Nota: Durandus, in 3. dist. 12. qu. 2. Gabriel, distinct. 2. & 12. quæst. 1. & Scotus, quæst. 1. docent humanitatem Verbo unitam non habere præcise ratione unionis ut non posset peccare, sed ex adjunctis, nimirum visione beatifica, gratia sanctificante, singulari Dei protectione, &c. quæ si a Christo separata fuissent, ut separari absolute potuissent affirmant, peccare potuisset. Contra quos:

Respond. Impeccabilitas in Christo oritur præcise ex hypostatica natura humana cum Verbo unione.

Prob. 1. Ex Script. Lucæ 1. Spiritus sanctus superveniet in te, & virtus Altissimi obumbrabit tibi: ideoque & quod nascetur ex te sanctum, vocabitur Filius Dei. Ex quo sic argumentor: eadem ratione Christus est impeccabilis, qua est Sanctus, sanctitate non tantum adventitia & accidentali, sed naturali ac substantiali; atqui Christus, præcise vi unionis hypostaticæ, est Sanctus sanctitate substantiali & naturali; ergo præcise vi unionis hypostaticæ, est impeccabilis; quia, ut ait Tertullian. l. de carne Christi, Verbum assumendo humanitatem, illam fecit suam, & faciens suam, fecit non peccatricem.

Prob. 2. ex traditione PP. S. Athanas. serm. 2. contra Apollinarem; ut refertur in Synodo VI. Act. 8. dicit, quod Christus est Sanctus natura sua, & immutabilis ad malum; atqui natura Christi consistit in unione hypostatica humanitatis cum Verbo; ergo ex illa unione Christus habuit, ut nullatenus peccare potuerit.

D. Ambros. lib. de Incarnatione, c. 7. ait: Anima Christi est incapax peccati, quia per unionem facta est impeccabilis.

Divus Hilarius, lib. 16. de Trinit. ait: Homo Christus est & in veritate Nativitatis est, dum

idum homo est, & non est in proprietate peccati, dum Christus est, quia & qui homo est, non potuit non esse quod natus est, & qui Christus est, non potuit amisisse quod Christus est. Quibus verbis significat posse peccare æque Christo repugnare, ac ei repugnat non esse Christum; atqui impossibile est Christum non esse Christum; ergo.

Prob. 3. Si humanitas Verbo unita posset peccare in sensu composito unionis, ipsum Verbum posset peccare, non solum denominative per communicationem idiomatum, ut concedit Durandus, sed etiam formaliter & secundum se, ita ut in Christo distinguenda essent duo peccata, unum voluntatis humanæ, alterum divinæ; atqui voluntatem divinam posse peccare repugnat; ergo.

Resp. seq. maj. Quia quando plures naturæ in idem suppositum conveniunt, tenetur superior, saltem si commode possit, inferiorem regere, & impedire ne peccet, alioqui peccatum ipsi imputatur, ut patet in humana voluntate, quæ si permittat in appetitu sensitivo motus inordinatos, quamvis in se formaliter non peccaminosos defectu libertatis, eo ipso tamen contrahit peccatum; atqui naturæ divina & humana in idem Christi suppositum conveniunt; ergo superior, nempe divina, debet regere inferiorem, nempe humanam, &c.

Solvuntur Objectiones.

Objicies 1. Deus non tenetur impedire peccata hominum, suorum subditorum, & filiorum adoptivorum, si sint in gratia; ergo nec tenetur impedire peccata naturæ assumptæ.

Resp. nego conseq. Disparitas est, quod Deus, respectu hominum, solum se habeat ut causa uni-

universalis, juxta eorum exigentiam ad illorum actiones concurrens; e contra respectu actionum naturæ assumptæ, se habet ut causa particularis, illas ponens tanquam actiones sui proprii suppositi, & consequenter ut suo supposito (a quo solo, ut principio *quod* particulari, procedunt) specialiter imputabiles.

Inst. 1. Verbum potest efficaciter velle, ut actiones naturæ assumptæ ad se non pertineant alio titulo, quam causæ universalis; ergo potest efficere ut sibi non imputetur ad culpam.

Resp. nego antec. Quia sicut, posita unione hypostatica, Verbum non potest efficere, ut humanitas assumpta sibi non sit propria, ita non potest efficere, ut istius humanitatis actiones non sint sibi propriæ, ut principio *quod* particulari, & ideo tenetur illas, tanquam specialiter suas, regere & ordinare.

Inst. 2. Non magis imputari debet Verbo peccatum naturæ assumptæ, quam ejus mors; atqui mors naturæ assumptæ Verbo in se non imputatur; ergo.

Resp. nego maj. Disparitas est, quod mors sit malum physicum, quod Deus potest velle, & ut causa particularis inferre naturæ assumptæ; peccatum vero sit malum morale, quod Deus velle nequit absque inhonestate; nec ullo modo ad illud, tanquam causa particularis, concurrere, ita ut illi tanquam auctori tribui possit.

Inst. 3. Peccatum naturæ inferioris superiori non tribuitur, quando natura inferior propria gaudet libertate; atqui natura humana in Christo propria gaudet libertate; ergo.

Resp. nego maj. Cujus falsitas patet in patre obligato ad directionem filii, licet unum moraliter tantum cum eo faciat; ex quo a for-

tiori sequitur naturam superiorem ad id obligari, quando cum inferiori facit unum per se in ratione suppositi, cujus sunt actiones illius naturæ inferioris. In hac itaque suppositi unitate; & non in defectu libertatis partis inferioris, fundatur obligatio, quas pars superior in homine tenetur gubernare inferiorem, quam licet propria gauderet libertate, æque teneretur gubernare præcise qua superior & conveniens in unum suppositum, cum per hoc præcise inferior superiori subordinetur in operando, sicut in essendo, tanquam aliquid ad ipsam specialiter pertinens.

Inst. 4. Atqui nulla ratione natura divina in Christo tenetur gubernare naturam humanam; ergo.

Prob. ant. In Deum nulla cadit obligatio; ergo.

Resp. dist. ant. Nulla cadit obligatio ex aliqua lege superioris, *conc.* ex rectitudine divinæ voluntatis, *nego antec.* Sic Deus tenetur non mentiri, quia tenetur ad nihil faciendum suæ sapientiæ & sanctitati repugnans, ad idque ex suis intrinsecis determinatur ac necessitatur.

Inst. 5. Si ex rectitudine divinæ voluntatis oritur illa obligatio, tam Pater & Spiritus sanctus tenentur peccata naturæ assumptæ impedire, ac Verbum, quia communis est voluntas; atqui hoc dici non potest; ergo.

Resp. dist. maj. Tam Pater & Spiritus sanctus tenentur, indirecte & quasi per accidens, *conc.* directe & per se, *nego maj.* Solus equidem Filius per se ac directe tenetur ad impedienda naturæ assumptæ peccata, quia ista obligatio fundatur in unionem hypostatica, quam solus Filius per se immediate terminat, ratione cujus terminationis & naturam assumptam,
& na-

& naturæ assumptæ actiones fecit suas ; quia tamen ejus voluntas communis est aliis personis, ideo etiam Pater & Spiritus sanctus indirecte, & velut per accidens, id est, non ratione sui, sed ratione alterius personæ, etiam ad idem obligantur ad quam obligationem jam tunc consenserunt, cum humanam naturam unire Verbo decreverunt.

Obicies 2. Per actiones naturæ assumptæ honestas, Verbum secundum se, seu, ut est suppositum naturæ divinæ, non meruit ; ergo a pari non peccaret per ejusdem actiones inhonestas.

Resp. nego seq. Disparitas est ; quod Verbum secundum se, actiones honestas naturæ assumptæ non obtulit alteri a se, tanquam superiori, a quo possit præmium accipere, quod antecedenter non sit suum, quod tamen essentialiter requiritur ad rationem meriti ; verum permittendo actiones inhonestas fieri a naturæ sibi hypostatice unita, voluntate divina consentiret in actiones essentiali suæ bonitati ac sanctitati repugnantes, easque produceret ut suas, adeoque peccaret secundum se, quod omnino repugnat.

ARTICULUS III.

De defectibus animæ & corpori communibus a Verbo assumptis.

Nota 1. **S**UB hoc titulo comprehendimus fomes peccati, & passiones, utpote quæ a corporali appetitu eliciantur, & ab anima secundum vim sentiendi producantur, de quibus quæritur utrum fuerint in Christo.

Nota 2. Fomes peccati, est inclinatio appetitus

titus sensitivi, in id, quod est contra rectam rationem; sumitur, vel in actu primo, & est ipse appetitus sensitivus, prout proxime dispositus ad eliciendos motus inordinatos rationi repugnantes; vel in actu secundo, & sic est actualis motus appetitus sensitivi contra rectam rationem.

Nota 3. Passio, est motio appetitus sensitivi circa bonum aut malum sensibile, secundum rectam rationem. Undecim sunt passionēs, quarum sex pertinent ad appetitum concupiscibilem, nempe, *Amor*, & *odium*, *desiderium* & *fuga*, *gaudium* & *tristitia*: quinque vero pertinent ad appetitum irascibilem, nimirum, *Spes*, *desperatio*, *audacia*, *timor* & *ira*: His positis sit:

CONCLUSIO I.

Non fuit in Christo fomes peccati, neque in actu primo, neque in actu secundo.

Prob. 1. Ex V. Synodo, Collat. 8. can. 12. ubi anathematizantur, qui, cum Theodoro Mopsuesteno, dicebant Christum fuisse passionibus concupiscentiæ obnoxium.

Prob. 2. Ex PP. Div. Leo, Epistol. 11. expresse docet; *Non fuisse in Christo legem peccati*; & D. August. lib. 1. contra duas Epistol. Pelagianorum cap. 11. *Quam*, inquit, *Spiritus resistens non habere* (concupiscentiam) *in carne mortali*, *ille tantummodo homo habuit*, *qui non per ipsam ad homines venit*. Id est, Christus, qui non communi cæterorum hominum via natus est, sed ex Virgine, divino Spiritu specialiter operante.

Prob. 3. Ratione: Peccati fomes, sive in actu primo, sive in actu secundo, oritur a peccato originali: neque enim eum habuit Adamus
in sta-

in statu innocentia; atqui Christus non habuit originale peccatum, neque etiam illius contrahendi debitum, cum non descenderit ab Adamo via ordinaria; ergo, &c.

Dixi in prop. non fuisse in Christo fomitem peccati *in actu primo*, ex quo sequitur fomitem peccati in Christo non fuisse, ut in quibusdam Sanctis, ligatum, id est, per extrinsecam Dei protectionem remotum ab occasionibus, quibus excitari potuisset ad motus inordinatos; sed omnino extinctum, ita ut passionibus ejus naturales, per specialissimam Dei assistentiam, Christo, propter unionem hypostaticam, debitam, ita rationi fuerint subjectæ, ut nunquam, nisi ex ejus præscripto, in ullos motus erumpere potuerint.

Objicies: Hebr. 4. Christus dicitur: *Tentatus per omnia pro similitudine, absque peccato*. Ergo tentatus fuit a fomite peccati.

Resp. dist. antec. Christus fuit tentatus per omnia, tentatione extrinseca, v. gr. a diabolo, *conc.* tentatione intrinseca quæ est a fomite peccati, *nego antec.* fuit ergo tentatus, non a propria concupiscentia, (hæc enim, cum magnam importet indecentiam, non fuit in Christo) sed experientia malorum quibus obnoxii sumus, hocque *absque peccato*, & iis quæ sunt, vel effectus, vel causæ peccati.

Inst. 1. Christus assumpsit defectus totius naturæ communes; atqui fomes peccati communis est totius naturæ; ergo.

Resp. dist. maj. Assumpsit defectus, qui ad finem Incarnationis utiles erant, & nullam involvebant indecentiam, qualis erat passibilitas, *conc.* qui ad finem Incarnationis inutiles erant, ac insuper magnam involvebant indecentiam, *nego maj.* Porro fomes peccati inutilis erat ad

finem Incarnationis, magnamque indecentiam involvebat sanctitati Christi repugnantem.

Inst. 2. Fomes peccati in se, est appetitus, quo delectabilia concupiscuntur & adversa refugiantur; atqui talis appetitus fuit in Christo; ergo.

Resp. dist. maj. Quo delectabilia concupiscuntur, & adversa refugiantur contra rectam rationem, *conced.* secundum rectam rationem, *nego maj.* Fuit itaque in Christo appetitus sensitivus, quo escam, somnum, potum, secundum rationem appetebat, & quæ fugienda sunt tormenta refugiebat; sed in eo non fuit fomes.

CONCLUSIO II.

Revera fuerunt in Christo passiones, nostris quidem quoad substantiam similes, dissimiles vero quoad modum.

Prob. prima pars 1. Ex Scriptura, quæ Christo tribuit tristitiam, Matth. 26. *Tristis est anima mea usque ad mortem.* Amorem. Joann. 11. *forores Lazari dixerunt ad Jesum, Domine, ecce quem amas infirmatur.* Iram, Marci 3. *Circumspiciens eos (Pharisæos) cum ira.* Timor, Marci 14. *Cæpit pavere & tedere.* Gaudium, Joann. 11. *dixit Jesus, Gaudeo propter vos.* Atqui tristitia, amor, ira, &c. sunt passiones; ergo, &c.

Prob. 2. ratione: Quia passiones sunt contraturales appetitus sensitivi perfectiones, quæ nec dedecent naturam humanam Verbo hypostatice unitam, nec statui beatitudinis repugnant; ergo, in Christo fuerunt sicut & cetera quæ ad naturam hominis pertinent, ait D. Thom. 9. 15. *artic. 4.* rationem reddit Theophilactus in hunc Marci locum, *Cæpit pavere & tedere*, apud Sanct.

Sanct. Thom. in catena, *Quia*, inquit, *qui assumpsit hominem, assumpsit & naturales proprietates hominis, pavere, cadere, & contristari.*

Prob. secunda pars: Quia Christus fuit homo nobis consubstantialis; ergo habuit passiones nobis substantialiter similes; Neque enim, ait. Div. Augustin. lib. 14. de Civitate Dei, c. 9. in quo verum erat hominis corpus, & verus hominis animus, falsus erat humanus affectus.

Prob. tertia pars, ex D. Thom. citato, dicente: Quod huiusmodi passiones aliter fuerunt in Christo, quam in nobis, quantum ad tria: 1. Quantum ad objectum: quia in nobis plerumque huiusmodi passiones feruntur ad illicita, quod in Christo non fuit. 2. Quantum ad principium: quia frequenter in nobis praveniunt iudicium rationis: sed in Christo omnes motus sensitivi appetitus oriebantur secundum dispositionem rationis, sicut probant hæc verba Jo: 11. Turbavit seipsum. 3. Quantum ad effectum: quia in nobis quandoque huiusmodi motus non sistunt in appetitu sensitivo, sed trahunt, ac perturbant, rationem: quod in Christo non fuit, cum exercerentur solum quando, & quantum permittebat ratio. Hinc Div. Hieronym. (k) vocat illas, Propassiones, non passiones, quæ secundum Stoicos rationem debent turbare; ita sese explicat D. Doctor dicens: Dominus, ut veritatem probaret assumpti hominis, vere quidem contristatus est, sed ne passio in animo illius dominaretur, per propassionem cæpit contristari.

Obicies: SS. PP. excludunt a Christo passiones, nimirum, tristitiam, timorem, iram, &c. ergo in eo non fuerunt reipsa passiones; sed tantum apparenter.

Resp.

(k) In cap. 24. Matthæi.

Resp. dist. ant. Excludunt a Christo passionēs; quoad modum, *conc.* quoad substantiam & veritatem, *nego ant.* Itaque SS. PP. 1. Excludunt a Christo tristitiam sumptam pro inquietudine animi & vultus morositate, quo sensu intelligitur istud Isaia 42. *Non erit tristis, neque turbulentus.* Sed eam non excludunt quæ pro voluntatis & appetitus sensitivi vero dolore sumitur.

2. Excludunt timorem, secundum quod dicit incertitudinem mali futuri, & spem illud evadendi; non vero illum excludunt secundum quod dicit affectum appetitus sensitivi, per simplicem displicentiam refugientis malum futurum sine spe illud evadendi.

3. Excludunt iram, secundum quod vindictam quærit absque ordine rationis; sed non eam excludunt secundum quod appetit vindictam juxta ordinem justitiæ, sic enim est affectus laudabilis, & ad zelum pertinens, juxta illud, Psalm. 68. *Zelus domus tue comedit me.*

Inst. 1. In Christo propter visionem beatificam, fuit summum gaudium; ergo in eo non potuit esse vera tristitia.

Prob. consequ. Summum gaudium & tristitia, sunt actus vitales stricte contrarii, adeoque virtualiter contradictorii; ergo non possunt esse simul in eodem subiecto.

Resp. dist. ant. Sunt actus vitales stricte contrarii, si versentur circa idem objectum & motivum, *conc.* si versentur circa diversa objecta & motiva, *nego ant.* Porro gaudium in Christo habuit pro objecto & motivo summum bonum per claram visionem possessum; tristitia vero habuit pro motivo & objecto supplicium & ignominiam Crucis, ruinam Judæorum, Dei offensam, &c. ergo non fuerunt de eodem objecto & motivo.

Inst. 2. Licet gaudium & tristitia versentur circa ob-

ca objecta & motiva diversa, tamen repugnat ut sint simul in eodem subjecto; ergo nulla solutio.

Resp. dist. ant. Repugnat ut sint simul in eodem subjecto, repugnantia naturali, quæ in hoc consistit, quod motivum vehementissimi gaudii non relinquat naturaliter ullam efficaciam motivo tristitiæ, cum actus vehementis gaudii ita rapiat voluntatem, ut non det locum tristitiæ, etiam respectu diversi objecti, *conc.* repugnantia essentiali, *negō antec.* Porro in hoc differt repugnantia essentialis a naturali, quod essentialis nullo modo possit superari, naturalis vero possit virtute supernaturali superari, quomodo de facto superata fuit in Christo, ut posset actus utrique statui viatoris & comprehensoris connaturales simul elicere, &, ad maiorem satisfactionis perfectionem, tristitiam cum gaudio voluntarie asumere.

C A P U T III.

De unione hypostatica.

Nota 1. **Q**Uamvis unio hypostatica a PP. & Conciliis vocetur etiam *unitio*, tamen, stricte loquendo, ab ea differt; nam *unio*, est vinculum duorum extremorum: *unitio* vero stricte sumpta, est actio, per quam fit extremorum unio: unde si Incarnatio sumatur active & causaliter, idem est ac *unitio*; si vero sumatur passive & formaliter, idem est ac *unio*.

Nota 2. Hic agemus 1. De quidditate unionis hypostaticæ. 2. De modo quo facta est unio hypostatica. 3. De proprietatibus illius unionis. 4. Tandem de consequentibus unionem hypostaticam, totidem quæstionibus.

Q U Æ S T I O I.

De quidditate unionis hypostatica.

Nota. **I**N assignanda unionis hypostaticæ natura, varias in partes scinduntur Scholastici.

Nonnulli censent, unionem hypostaticam esse ipsammet actionem, per quam humana Christi natura fuit producta.

Alii docent, eam esse entitatem realem, extremis unitis superadditam, sed hi valde iterum discordes sunt in assignanda illa entitate reali superaddita Gabriel, *in 1. dist. 30. quest. 4. art. 1.* vult eam esse qualitatem quamdam supernaturalem absolutam, quam *gratiam unionis* vocat Scotus vult eam esse relationem realem, qua humanitas refertur ad Verbum divinum Suarez putat, eam esse entitatem modalem a Verbo & humanitate realiter distinctam.

Alii tandem sentiunt, unionem non esse quid ab extremis unitis distinctum, sed Verbum & humanitatem se ipsis formaliter absque ullo medio uniri, per hoc quod Verbum communicet humanitati suam esse divinum.

C O N C L U S I O I.

Unio hypostatica realiter distinguitur a productione humanitatis Christi.

Prob. 1. Quia productio humanitatis Christi, cum sit opus ad extra, est actio toti Trinitati communis, unio vero solius est Verbi divini; ergo illæ duæ actiones sunt distinctæ realiter 2. Quia actio unitiva pertinet ad ordinem supernaturalem & hypostaticum, actio vero

vero productiva humanitatis, est ordinis pure naturalis; ergo distinguuntur realiter: hinc B. V. Maria præbuit suum concursum ad generationem humanitatis, non vero ad actionem unitivam humanitatis cum Verbo divino.

Solvuntur Objectiones.

Objicies 1. Leo Magnus, *Epist. 11. ad Jul.* dicit; *Natura nostra non sic assumpta est, ut, prius creata, post assumeretur, sed ut ipsa assumptione crearetur.* Ergo unio hypostatica non distinguitur ab ipsa humanitatis creatione.

Resp. nego consequ. Solum quippe vult D. Doctor, humanam Christi naturam, non præcessisse tempore Incarnationem, sed eodem instanti reali, quo creata fuit, assumptam fuisse; docet ergo concomitantiam, non vero identitatem illius duplicis actionis, ut inde refelleret Nestorium, qui contendebat humanitatem Christi aliquo tempore realiter fuisse sine unione cum Verbo, ex quo concludebat B. V. Mariam esse quidem Christiparam, non autem Deiparam.

Inst. Maria Virgo est vere Mater Dei, atqui non est vere Mater Dei, nisi actio humanitatis productiva, sit eadem, ac actio unitiva ejusdem humanitatis cum Verbo; ergo.

Resp. nego min. Nam ut Beata Virgo Maria dicatur, & vere sit Mater Dei, sufficit ut ejus actio generativa, qua animam corpori univit, terminata fuerit ad humanitatem eodem instanti assumptam, licet forte in posteriori natura.

Objicies 2. Ea non distinguuntur realiter, quæ unum eundemque habent terminum; atqui unio hypostatica & actio humanitatis productiva, habent in Christo unum eundemque terminum; ergo.

Prob. min. Unio hypostatica habet pro termino subsistentiam humanitatis in Verbo; atqui actio humanitatis productiva, habet quoque pro termino eandem humanitatis subsistentiam; ergo, &c.

Respond. nego min. Siquidem adequatus creationis terminus, est substantia, non vero subsistentia creata, cum substantiæ indifferens sit, ut per se, vel per alium subsistat.

Prob. min. Creatio non terminatur nisi ad rem subsistentem; ergo.

Respond. nego antec. Nam creatio prorsus indifferens est ad subsistentiam propriam vel alienam; ergo præcise terminatur ad naturam, quæ, si non communicetur alteri, est sui juris, ac proinde in se subsistit, si vero communicetur alteri, est juris alterius, ac proinde in alio subsistit.

CONCLUSIO II

Unio hypostatica non est entitas realiter distincta a Verbo & humanitate unitis, siue illa entitas sit qualitas supernaturalis absoluta; siue sit relatio realis; siue sit modus substantialis, aut quodlibet aliud.

Prob. 1. Non potest admitti entitas copulans humanitatem cum Verbo divino, qua recipiatur tum in Verbo, tum in humanitate; atqui illa non potest recipi in Verbo, alias mutaretur; ergo illa non debet admitti.

Respond. sufficere ut illa entitas recipiatur in humanitate, cui inhaeret, cum tantum adhæreat Verbo; sed:

Contra est, Nam Verbum est intrinsece unitum humanitati; atqui non potest esse intrinsece unitum per unionem quæ est illi extrinseca, & quam non recipit; ergo non potest
intrin-

intrinsece uniri per aliquam entitatem a se & humanitate distinctam.

Prob. 2. Quia si unio hypostatica sit entitas realiter ab extremis distincta, debet admitti secunda entitas per quam prima uniatur, & tertia per quam uniatur secunda, & sic in infinitum; atqui in illud infinitum processus repugnat; ergo.

Respondent adversarii negando majorem. quia hæc prima entitas non est indifferens ut uniatur, cum ad unionem ex propria ratione sit determinata.

Sed quare eadem ratione dici non poterit naturam humanam Christi non esse indifferentem ad hoc ut uniatur Verbo divino, cum ad unionem determinetur ab ipso Deo, in quantum scilicet Deus illam creavit in Verbo, quod eam per seipsum immediate terminat, & complet, & perficit?

Solvuntur Objectiones.

Obijciat 1. Quod est indifferens, ut cum aliquo uniatur, ad id debet determinari per aliquid superadditum; atqui humanitas Christi ad unionem erat indifferens; ergo debuit per aliquid reale superadditum determinari.

Respond. 1. retorq. argumentum. Quod est indifferens, ut cum aliquo uniatur, ad id per aliquod superadditum debet determinari: atqui Verbum divinum ad unionem erat indifferens, non minus quam humanitas; ergo debuit per aliquid reale ipsi superadditum, ad unionem determinari; tamen illud non admittunt adversarii.

Resp. 2. nego maj. Quia indifferentia unibilibus tollitur per accessionem unius ad aliud, & ideo indifferentia humanitatis Christi ad suam
unio-

unionem cum Verbo, fuit sublata per actionem, qua Verbum illi suum esse Divinum communicavit.

Obicies 2. Omnis mutatio arguit aliquid de novo productum; atqui humanitas, per sui unionem cum Verbo, mutata est, nimirum de non unita, facta est unita; ergo in illa unionem aliquid fuit de novo productum.

Resp. dist. maj. Omnis mutatio entitativa, conced. mutatio duntaxat connotativa, licet intima & personalis, *nego major.* Porro dum humanitas Verbo divino copulata est, non est mutata entitative, cum semper eandem entitatem retinuerit; sed mutata est connotative, quatenus tunc habuit habitudinem ad Verbum, quam antea non habebat.

Inst. 1. Ergo unio hypostatica consistit in habitu, seu relatione humanitatis ad Verbum; atqui hoc est ipsa Scoti sententia; ergo.

Resp. nego illatum. Equidem habitudo humanitatis ad Verbum resultat ex unionem hypostatica, sed illa habitudo non est unio, cum unionem jam factam præsupponat.

Inst. 2. D. Thom. 3. p. qu. 2. art. 7. ait: *Unio est relatio quedam, qua consideratur inter divinam naturam & humanam, secundum quod conveniunt in una persona Filii Dei.* Ergo ipsa unio est relatio.

Resp. dist. consequ. Unio sumpta pro mutua habitu, quæ oritur ex conjunctione humanitatis & Verbi, *conced.* sumpta pro formali humanitatis & Verbi vinculo, *nego consequ.* Et ita Cajetanus D. Thomam interpretatur, dicens: *Super conjunctione substantiali persona Verbi & natura humana, fundatur in opinione D. Thomæ relatio unionis inter duas naturas, vel internaturam humanam & personam Verbi; talis autem*

dem relatio unionis, prae vocum inopia, vocatur unio.

Obicies 3. Omnis actio habet terminum de novo productum; atqui Incarnatio, seu unio, est actio; ergo habet terminum de novo productum; atqui ille terminus non est sola humanitas, nec sola Verbi subsistentia: nam utraque potest existere sine unione: ergo est entitativa quaedam ab utraque natura realiter distincta.

Resp. dist. maj. Omnis actio productiva, habet terminum de novo productum, *conc.* unitiva, *nego maj.* Porro, Incarnatio causalis eadem est actio, sed unitiva duntaxat, cujus proinde terminus non est entitas de novo producta, sed est totum compositum ex partibus unitis conflatum, quod nihil aliud est, quam partes simul conjunctae.

CONCLUSIO III.

Unio hypostatica nihil aliud est, quam communicatio Divini esse, a Verbo facta, humanitati, per illius translationem in suam propriam subsistentiam.

Prob. In eo consistit essentialiter unio hypostatica, quo posito, omnia Incarnationis Mysteria concipi & exponi possunt; atqui posita communicatione Divini esse a Verbo, facta humanitati, concipi & exponi possunt omnia Incarnationis Mysteria; ergo.

Prob. min. Posita communicatione Divini esse facta humanitati, concipitur & exponitur.

1. Quomodo natura humana in Christo, non sit persona humana, sed divina. Quia nimirum non est sui juris, sed alieni, nempe Divini; atqui natura humana, ut non sit sui juris, habet per communicationem Divini esse.

Gba

sibi a Verbo factam: quoties enim natura inferior accedit ad superiorem, tunc inferior desinit esse juris proprii, ac sub jure & dominio superioris constituitur; ergo.

2. Exponitur, quomodo natura humana sit persona divina. Quia nempe per divinæ substantiæ communicationem, persona Verbi Divini, eam assumendo, fecit suam, cum eam terminet, ac ultimo compleat.

3. Exponitur; cur inter Verbum & humanitatem non sit tantum unio moralis per gratiam & alia dona, ut docuit Nestorius, sed physica & substantialis. Quia nempe illa unio oritur ex intima ipsiusmet substantiæ divinæ communicatione facta humanitati.

4. Exponitur, cur inter Verbum & humanitatem sit communicatiq̃ idiomatum. Nempe quia ex communicatione Divini esse facta humanitati exurgit una persona, quæ est principium *quod*, & subjectum omnium Christi actionum & passionum; hinc recte dicitur, *Deus est mortalis: homo est immortalis Deus passus est*, &c.

5. Exponitur, cur actiones Christi valoris sunt infiniti. Quia nempe Verbum, quod humanitatem ad se transtulit per communicationem Divini esse, illas humanitatis actiones fecit suas, quatenus illarum est principium *quod*, & consequenter illarum veluti pars. Cætera omnia sic exponi possunt.

Q U Æ S T I O . II.

De modo, quo facta est unio hypostatica.

Nota: **C**irca modum, quo facta est unio hypostatica, duo extreme oppositi insurrexerunt errores.

1. Er-

1. *Error*, fuit *Nestorii*, Patriarchæ Constantinopolitani, contendentis unionem Verbi Divini cum humanitate non fuisse factam in persona, & ideo non fuisse physicam & hypostaticam, sed moralem tantum & accidentalem, qualis reperitur inter Deum & templum in quo habitat; ex qua doctrina:

Inferabat 1. Non unam, sed duas in Christo personas esse, humanam scilicet inhabitatam, & divinam inhabitantem.

Inferabat 2. Verbum assumpsisse hominem, tum natura, tum persona perfectum, qui primo in utero B. Mariæ Virginis formatus, postea ad unionem cum Verbo assumptus est; ex quo necessario sequebatur Christum non esse vere Deum, & B. V. Mariam non esse Dei, sed tantum Christi hominis, Matrem, non *Theotoccon*, ut blasphemabat, sed *Christotocon*.

Inferabat 3. Admitti non debere realem idiomatum communicationem, qua utriusque naturæ, divinæ & humanæ, proprietates in Christo de se invicem prædicarentur; proindeque has propositiones; *Deus est mortalis: homo est immortalis*, &c. Reiciebat, ut falsas, & blasphemias.

2. *Error* fuit *Eutychis*, qui, cum veritatem de unica in Christo persona contra Nestorium propugnasset, in oppositum errorem lapsus est, docens ante unionem hypostaticam duas fuisse in Christo naturas realiter distinctas, divinam scilicet & humanam: post unionem vero, unam remansisse in Christo naturam; sive quia natura divina conversa est in humanam: sive quia natura humana conversa est in divinam, a qua penitus fuit absorpta, quod probabilius est, ut constat ex his *Eranistis Eutychiani* verbis, apud Theodoretum dialogo 2. *Ego dico Divinitatem mansisse, humanitatem vero ab hac esse*

*esse absorptam, ut si in mare mellis gutta fundatur, nam illa gutta statim evanescit. Sive etiam, ut aliqui volunt, quia ex duabus naturis confusis & permixtis conflata est una tertia natura a duabus distincta, sicut mixtum ex elementis substantialiter transmutatis produci-
tur. Licet ergo non possit certo definiri quo sensu Eutyches voluerit unam tantum in Christo naturam fuisse post unionem, certum est tamen unicam admisisse: Confiteor, inquit coram Patribus Conc. Constantinop. I. ex duabus naturis fuisse Dominum nostrum ante unionem: post unionem vero unam naturam profiteor. Itaque:*

Resolvendum est 1. Utrum natura humana Christi prius tempore extiterit, quam uniretur cum Verbo. 2. Utrum unio Verbi facta sit in unitate personæ. 3. Utrum B. V. M. vere sit Mater Dei. 4. Utrum unio Verbi facta sit in unitate naturæ, sequentibus conclusio-
nibus.

CONCLUSIO I.

Humana Christi natura non extitit aliqua duratione temporis ante sui cum Verbo unionem. Est de fide contra Nestorium & Eutychem.

Prob. 1. Ex Symbolo, ubi dicitur, quod Christus conceptus est de Spiritu sancto: atqui esse conceptum de Spiritu sancto, est naturam Christi humanam non extitisse ante sui unionem cum Verbo, ut ostendunt hæc, Luca 1. verba: Spiritus sanctus superveniet in te, & virtus Altissimi obumbrabit tibi, ideoque & quod nascetur ex te Sanctum, vocabitur Filius Dei; ergo.

Prob. 2. Ex D. Leone, Epist. 10. dicente: Tam impie, duarum naturarum ante Incarnationem Dei Filius fuisse dicitur, quam nefarie, post-

postquam Verbum caro factum est, natura in eo singularis asseritur. Atqui impiam duarum in Christo naturarum conjunctionem ante Incarnationem dicit in sensu Eutychis, qui ideo tantum duas ponebat in Christo naturas, quia volebat naturam humanam aliqua temporis duratione præcessisse unionem; ergo, &c. Hinc idem Div. Leo Epist. 11. dicit: Natura nostra non sic assumpta est, ut prius creata, post assumeretur, sed ut ipsa assumptione crearetur.

Confirmatur. Quia B. V. M. Deipara dici non potest, nisi quatenus genuit humanam naturam divina personalitate subsistentem; atqui si natura humana aliqua temporis duratione existerit ante unionem, B. Virgo non genuit naturam humanam divina personalitate subsistentem; ergo non potest dici Deipara, quod est hæreticum, ut probabitur conclus. 3.

CONCLUSIO II.

Unio Verbi incarnati facta est in unitate persona, unde una tantum est in Christo persona. Est de fide contra Nestorium.

Prob. 1. Ex Scriptura, quæ aperte docet unum eundemque Christum, esse Deum & hominem, Rom. 9. Ex quibus (nempe Israelitis) est Christus secundum carnem, qui est super omnia Deus, benedictus in secula. Philipp. 2. Hoc sentite in vobis, quod & in Christo Jesu, qui cum in forma Dei esset, non rapinam arbitratus est esse se aequalem Deo, sed semetipsum exinaniuit formam servi accipiens, &c. Ex quibus sic argumentor: unus & idem Christus, qui natus est ex Abraham, est super omnia Deus: unus & idem, qui est in forma Dei, est in forma servi; ergo si unus & idem, non duæ, sed una est in

est in Christo persona; particula enim, *qui*, in his textibus designat personam.

Prob. 2. Jo: 1. dicitur: *Verbum caro factum est.* Atqui Verbum fieri carnem, est Verbum conjungi cum humanitate, non moraliter & per effectum: alioqui, in quolibet justo Deus dici posset incarnari; ergo realiter, substantialiter, & hypostatice; ergo una est in Christo persona; unde hæc veritas omnibus credenda proponitur in Symbolis, & præcipue Athanasiano, his verbis: *Qui licet Deus sit & homo, non duo tamen, sed unus est Christus, unus omnino non confusione substantia, sed unitate persona.*

Prob. 3. Ex Conc. œcumenicis: Ephesino contra Nestorium celebrato, in quo approbati fuerunt S. Cyrilli contra Nestorium anathematismi, quorum secundus sic habet: *Si quis non confiteatur Dei Verbum carni secundum hypostasim unitum, & unum tantum cum sua carne esse Christum, eundem nimirum Deum simul & hominem, anathema sit....* Tertius, *si quis in uno Christo post unionem, dividit hypostases, eaque duntaxat conjunctione easdem inter se nectit, qua est secundum dignitatem, vel auctoritatem, & potestatem; & non eo potius concursu, qui est secundum naturalem unionem, anathema sit.*

Concil. Constantinop. II. collat. 8. anathematismo 4. *Si quis dicit, secundum gratiam, vel secundum operationem, vel secundum dignitatem.... & non secundum compositionem, sive secundum substantiam, unionem Verbi ad carnem factam esse, anathema sit.*

Prob. 4. Ex traditione omnium Patrum dicentium cum D. Petro Alexandrino, lib. de Deitate: *Deus autem Verbum citra viri commercium, Dei voluntate, in utero Virginis incarnatum est. Quomodo vero, nisi quatenus Verbum humana natura*

tura in persona unitum est? Et Div. Ambrosius lib. de Incarnatione, cap. 5. *Cum Deus semper esset æternus, inquit, Incarnationis Sacramenta suscepit, non divisus, sed unus; quia utrumque unus, & unus in utroque, hoc est, vel divinitate, vel corpore; non enim alter ex Patre, alter ex Virgine, sed idem aliter ex Patre, aliter ex Virgine. In æternitate nimirum ex Patre, in tempore ex Virgine.*

Prob. 5. Variis rationibus ex Scriptura deductis.

Prima. Dux naturæ formaliter ab invicem distinctæ, de se invicem substantive, & in concreto prædicari non possunt, nisi uniantur in persona (ideo enim non dicitur substantive, *homo est vestis*, sed tantum adjective, *homo est vestitus*, quia non est unum idemque hominis & vestis suppositum) atqui natura divina & natura humana, formaliter ab invicem distinctæ, de se invicem substantive & in concreto prædicantur; dicitur enim, *Deus est homo*, &, *homo est Deus*. Ergo natura divina & natura humana in una persona uniuntur.

Secunda. Philipp. 2. de Christo dicitur: *exinanivit semetipsum, formam servi accipiens*. Atqui si in persona Verbi unio non sit facta, dici non potest Verbum semetipsum exinanivisse, cum ex ejus unione tantum morali, nulla resultet exinanitio, alias Pater & Spiritus sanctus, qui in Sanctis uniuntur moraliter per inhabitationem, exinaniti pariter dicerentur; ergo Verbum exinanivit semetipsum, quod cum in forma Dei esset, formam servi, id est, naturam, in unitatem suæ personæ, assumpsit.

Solvuntur Objectiones Nestorianorum.

Objicies 1. Persona Verbi & persona Christi hominis sunt diversæ; ergo.

Prob.

Prob. antec. Diversa est persona illius qui inhabitat, & illius qui inhabitatur; atqui humanitas Christi inhabitatur a Verbo humanitatem inhabitante, juxta illud Joann. 2. *Solvite templum hoc, &c.* Ergo diversa est persona Verbi & humanitatis.

Resp. dist. maj. Diversa est persona illius qui inhabitat, & illius qui inhabitatur, proprie, *conc.* metaphorice, *nego maj.* Atqui humanitas Christi inhabitatur, metaphorice, *conc.* proprie, *nego min.* Itaque Verbum dicitur inhabitare humanitatem metaphorice, eo scilicet modo, quo anima nostra dicitur inhabitare corpus nostrum, juxta illud 2. Cor. 5. *Si terrestris domus nostra hujus habitationis dissolvatur, &c.* Ergo sicut, ex eo quod anima est in corpore velut in habitatione, non licet colligere in eodem homine duas esse personas; ita etiam ex eo quod Christus suam humanitatem templum appellet, non licet inferre duas in illo esse personas.

Inst. 1. Atqui Deus habitat humanitatem Christi proprie; ergo.

Prob. ant. Colof. 2. dicitur: *In ipso, Christo, habitat omnis plenitudo Divinitatis corporaliter.* Ergo.

Resp. nego conseq. Sensus enim illius textus est, quod Divinitas habitet in Christo, sicut anima hominis in homine, scilicet per conjunctionem substantialem, non vero per conjunctionem tantum moralem & habitationis, ut volebat Nestorius.

Inst. 2. In Christo, se habet humanitas respectu Verbi, sicut vestimentum respectu vestiti, juxta illud, Philip. 2. *In similitudinem hominum factus, & habitu inventus ut homo;* ergo quemadmodum inter vestem & vestitum non est unio substantialis, ita nec inter Verbum & humanitatem.

Resp.

Resp. nego maj. Nam Apostolus loquitur de similitudine substantiali, nec per *habitum*, significat vestem, sed figuram exteriorem, secundum quam Christus visus est talis, quales sunt puri homines, verum figura exterior realitatem non excludit; Verbum ergo realiter fuit homo.

Objicies 2. SS. Patres passim asserunt Verbum divinum assumpsisse hominem, sic DD. Aug. & Ambrosius in Hymno, *Te Deum*, dicunt: *Tu ad liberandum suscepturus hominem*; atqui vox, *homo* suppositum connotat; ergo Verbum assumpsit suppositum, id est, personam hominis.

Resp. dist. maj. Dicunt Verbum assumpsisse hominem in abstracto *conc.* in concreto, *nego maj.* Itaque SS. Patres, dicendo Verbum assumpsisse hominem, locuti sunt improprie, sumendo hominem pro humanitate; tunc enim, cum nondum exorta esset hæresis Nestoriana, paulo liberius & securius loquebatur; mentem suam declarat D. Aug. *Enchiridii*, c. 36. dicens: *Filius Dei, non gratia sed natura suscepit hominem tanta unitate, ut idem esset Filius hominis.* Porro si assumpsisset hominem in concreto, non idem esset Filius hominis & Filius Dei.

Inst. 1. D. August. *Enchiridii*, cap. 36. dicit Christum esse *aliud propter hominem*, & *aliud propter Verbum*; atqui ubi est, *aliud*, & *aliud*, ibi sunt duæ personæ & duo supposita; ergo in Christo sunt duæ personæ.

Respond. nego min. Quamvis enim ubi est, *alius*, & *alius*, adjective, ibi sint diversa supposita, quia nomen adjectivum personam præsertim denotat, non tamen ubi est, *aliud*, & *aliud*, substantive, siquidem nomina substantive præsertim connotant naturam. Itaque ex verbis D. August. solummodo sequitur duas esse in

te in Christo naturas, quæ tamen in unica persona resident, ut declarat, Enchiridii, c. 35. *In unitatem persona accessit Verbo anima rationalis & caro.*

Inst. 2. Div. Damasc. lib. 3. de fide cap. 11. asserit Verbum assumpsisse naturam humanam in atomo, id est, in individuo; ergo assumpsit illam propria persona subsistentem.

Resp. dist. antec. Asserit assumpsisse naturam humanam in individuo, sumpto pro eo quod est singulare, & unum in unitate numerica, *conced.* sumpto pro eo quod per se subsistit, & est incommunicabile alteri, *nego antec.* Itaque hoc loquendi modo, solum voluit D. Doctor, Verbum assumpsisse humanitatem singularem, non universalem, & unam tantum, non omnes, nec singulas.

Objicies 3. Plurimos SS. Patres, quorum aliqui Christum vocant *hominem Deiferum*, ita D. Basil. teste Theodoreto. Alii *hominem Deificatum*, *Dominicum*, ita Athanas. in expositione fidei, & Aug. *lib. 83. q. 36.* Alii humanitatem vocant *Divinitatis templum*, ita Sanct. Cyrillus, *lib. 6. in Joann.* Alii *Divinitatis instrumentum*, ita D. Damasc. *lib. 3. de fide c. 15.* Atqui illæ omnes loquendi formulæ, indicant unionem duntaxat moralem inter utramque in Christo naturam; ergo.

Resp. nego min. Illi enim termini indifferentes sunt ad exprimendam unionem moralem tantum, vel physicam & substantialem; personarum ergo loquentium mens, scopus, & circumstantiæ accurate pensandæ sunt, ut genuinus verborum illorum sensus habeatur; *Non de vocibus nobis est disceptatio*, inquit Leontius Bizantinus huic objectioni respondens *lib. 3. contra Eutychianos & Nestorianos, Sed de ipsis rebus, & harum unionem, & naturali coha-*
ne 4

ne, quam Patres secundum substantiam factam esse senserunt: vos autem secundum habitudinem & voluntatem, eam introducitis. Itaque:

1. Christus rite potest vocari, *Deifer*, hoc vero sensu, quod Deum sibi hypostatice unitum ferret, licet Div. Basilii non ipsum hominem Christum, ut objiciebat Theodoretus tunc Nestorio favens, sed ejus carnem vocaverit, *Deiferam*.

2. Potest dici, *Homo Deificus*, &, *Dominicus*, hoc vero sensu, quod Christus propter unionem hypostaticam non sit purus homo, sed homo Deus, id enim PP. per illa verba significare voluerunt.

3. Humanitas potest dici, *Templum Divinitatis*, non quod in ipsa Divinitas habitaret moraliter, per meram scilicet assistentiam, & gratiæ subministrationem, ut volebat Nestorius, sed substantialiter & hypostatice, ad sensum Apostoli Coloss. 2. *In ipso inhabitat omnis plenitudo Divinitatis corporaliter*, id est, physice & realiter.

4. Humanitas potest dici, *Instrumentum Divinitatis*, non quidem separatum, sed conjunctum, pertinens ad unitatem personæ, ad opera satisfactoria exercenda, cujusmodi est corpus respectu animæ, ad operationes vitæ sensitivas exercendas.

Inst. D. Chrysost. *Hom.* 3. *ad cap.* 1. *Epist.* *ad Hebr.* aperte duas in Christo personas admittit; ergo, &c.

Prob. ant. D. Chrysost. exponens hæc verba: *Propterea unxit te Deus: Deus tuus*, ait. *Hic & Judæos & Pauli Samosatēni affectas, & Arianos, Marcellumque & Sabellium ferit & Marcionem. Quomodo? Judæos quidem ostendens eis esse duas personas & Deum & hominem.... Marcellum vero & ceteros, quoniam dua sunt.*

ista persona, secundum subsistentiam ab invicem separata. Ergo.

Resp. nego conseq. Nam hæc verba: *duas personas, &c, dua persona*, non dicuntur de Christo, cujus nomen nullo in codice legitur, sed de Patre & Filio: nam S. Doctor ibi probat Patrem & Filium duas esse personas realiter distinctas, quæ tamen sunt unus & idem Deus; impugnat enim Judæos, Pauli Samosatani assecclas, Sabellium, qui equidem negabant pluralitatem personarum in Deo, sed quorum nullus distincte admittebat duas in Christo personas. Ita D. Chrysostomum interpretatur Donæus Angelus: *Nequaquam, inquit, ibi Chrysostomus dicit, Deum & hominem esse duas personas, ut Nestorius; sed Patrem & Filium designatos in istis Scripturae verbis: propterea unxit te Deus, Deus tuus.* Hæc interpretatio est ad mentem ipsius Chrysostomi, qui *hom. 5. de incomprehensibili natura Dei*, illum Scripturæ textum interpretatur de duabus SS. Trinitatis personis, Patre nimirum & Filio: *Visne, inquit, discere ubi Patrem & Filium simul positos Deum & Deum vocet? audi Prophetam David & Apostolum Paulum hoc ipsum nobis declarantes: propterea unxit te Deus, Deus tuus.* Præterea D. Chrysostomus aperte docuit unicam in Christo esse personam: *Esse enim duplex (in Christo) natura, inquit Epist. ad Cæsarium, verumtamen indivisibilis & indissipabilis unio; in una filiationis consistenda persona, & una subsistentia; certe dilucidius nihil.*

Objicies 4. Persona in Deo non distinguitur a natura; atqui unio non est facta in natura; ergo nec in persona.

Resp. dist. maj. Non distinguitur realiter a natura, *conc.* virtualiter, *nego maj.* Porro distinctio illa virtualis sufficit, ut unio fiat immediate

diatē in personā, non in naturā, quæ mediāte tantum unitur.

CONCLUSIO III.

B. V. M. vere & propria est Mater Dei. Est de fide contra Nestorium.

Prob. 1. Ex Scriptura, Lucæ 1. Quod nascetur ex te Sanctum, vocabitur Filius Dei. Ad Galat. 4. Misit Deus Filium suum, factum ex muliere. Ex quo sic argumentor: quæ genuit Filium Dei, vere est Mater Dei; atquæ B. Virgo vere genuit Filium Dei; ergo, &c.

Prob. 2. Ex traditione PP. S. Cyrill. Alex. lib. de fide ad Reginas, ait: Vocem hanc, Deipara, veteribus Patribus per universum (ut ita dicam) orbem terrarum, familiarem esse, ostendendum esse existimaui. Deinde profert Patrum testimonia, inter quæ istud Theophilī Episcopi reperitur: Hoc unum non pratermiserim, optimos ac sapientissimos quosque Patres, quotquot ante nos extiterunt; omnes sacram Virginem Deiparam appellare.

S. Dionysius Alexand. Epist. ad Paulum Samosatenum, Una sola Virgo Filia vita, inquit, genuit vivens Verbum, subsistens quomodo ais tu hominem esse eximium Christum, & non revera Deam, incarnatum ex S. Virgine & Deipara Maria?

S. Greg. Nazianz. orat. 51. ait: Si quis S. M. Deiparam non credit, extra Divinitatem est.

Prob. 3. Ex Symbolis & Conciliis œcumenicis.

1. In Symbolo Apostolorum dicitur: Credo in Jesum Christum Filium ejus unicum, En æterna Filii a Patre generatio: Qui conceptus est de Spiritu Sancto, natus ex Maria Virgine. En temporalis ejusdem ex Maria Virgine generatio. Ergo.

I 2

2. In

2. In Symbolo Nicæno Christus dicitur : *Deus de Deo . . . incarnatus de Spiritu sancto ex Maria Virgine, &c.*

3. In Concilio Ephesino fuerunt approbati anathematismi S. Cyrilli, quorum primus sic habet : *Si quis non confitetur Emmanuelem vere Deum esse, & ob id sanctam Virginem Deiparam (genuit enim illi incarnatum Dei Patris Verbum secundum carnem) anathema sit.*

Prob. 4. ratione manifesta: B. Virgo est Mater Christi hominis; ergo est Mater Dei. *Prob. conseq.* Christus homo est nomen suppositi & personæ, cum sit nomen concretum; atqui in Christo alia non est persona, quam divina, quæ est formaliter Deus; ergo Mater Christi hominis, est etiam vere Mater Dei.

Solvuntur Objectiones.

Obijcies 1. B. V. M. non potest esse Mater Dei, nisi divinitatem genuerit; atqui non genuit divinitatem, cum sit improducibilis; ergo.

Resp. nego maj. Nam ut B. V. M. sit Mater Dei, non requiritur ut genuerit divinitatem, sed satis est, quod eum genuerit, qui non prius homo, quam Deus extitit, hoc est, cujus corpus, & anima, non prius in rerum natura fuerint, quam inter se conjuncta, ac cum Verbo hypostatice copulata, eodem fere modo, quo, ut mulier aliqua vere dicatur Mater hominis corpore & anima constantis, non opus est ut animam ipsam genuerit, sed sufficit ut eum genuerit qui anima præditus est; atqui B. V. M. eum genuit, qui non prius homo, quam Deus extitit; ergo.

Inst. 1. Terminus generationis, est suppositum; atqui B. V. non genuit suppositum Christi:

sti; utpote suppositum divinum; ergo non genuit Deum.

Resp. dist. maj. Terminus generationis emanativus, *conc.* terminus productus, *nego maj.* Neque enim hypostasis producitur revera formaliter, sed potius naturaliter resultat per emanationem simplicem ex unione corporis cum anima.

Inst. 2. Illa non potest dici Mater ejus, quo posterior est tempore; atqui B. V. M. Deo posterior est tempore; ergo.

Resp. dist. maj. Nam potest dici Mater ejus, quo posterior est tempore, secundum id, quo posterior est, *conc.* secus, *nego maj.* atqui B. V. posterior est Deo, prout includit divinitatem & personam divinam, *conc.* prout terminat naturam humanam *nego minor.* Itaque, ut B. V. sit Mater Dei, non est necesse, ut sit prior Verbo seorsim sumpto, sed sufficit, quod ipso toto, seu composito prior sit; at B. Virgo prior fuit Verbo, ut terminat humanitatem, & quatenus ex ejus personalitate & natura humana, constituta est una persona; ergo.

Objicies 2. Mater debet esse ejusdem naturæ cum Filio; atqui B. Virgo non est ejusdem naturæ cum Deo; ergo non est Mater Dei.

Resp. nego maj. Nam ut B. Virgo dicatur & sit Mater Dei, non est necesse ut sit ejusdem cum Deo substantiæ, sed satis est, ut ejus partus ad suppositum divinum terminatus sit; atqui B. Virginis partus terminatus est ad suppositum, quod vere & proprie Deus est; ergo vere & proprie Mater Dei est, ac dici debet.

Instab. D. Hilarius, lib. 10. de Trin. c. 16. dicit; Corpori Christi Mariam originem non dedisse, licet ad incrementa partumque corporis, omne quod sexus sui naturale est, contulerit. Ergo Dei Mater dici non potest.

Respond. nego consequ. Ex qua sequeretur Mariam nequidem Christi Matrem dici posse ; quandoquidem corpori Christi originem non dedisset . Sensus ergo Divi Hilarii est , Mariam non dedisse originem corpori Christi more cæterorum hominum , nempe ex commercio viri cum muliere , sed ex operatione Spiritus sancti carnem Christi ex purissimo B. Virginis sanguine efformantis , ut patet , tum ex his textus verbis : *Licet omne quod sexus sui naturale est , contulerit .* Tum ex textu præcedenti , *Virgo* , inquit ; *nonnisi ex Spiritu sancto genuit , quod genuit .*

CONCLUSIO IV.

Unio Verbi incarnati facta non est in unitate nature ; unde dua sunt in Christo , post unionem , natura distincta & impermixta , divina scilicet & humana . Est de fide contra Eutychem .

Prob. 1. Ex iis omnibus Scripturæ locis , in quibus Christus dicitur Deus verus , & homo verus ; illius divinitas aperte traditur , *Matth. 3.* ubi Pater æternus , de Christo loquens , ait : *Hic est filius meus dilectus .* *Matth. 16.* *Tu es Christus Filius Dei vivi .* Humanitas pariter asseritur , *Joann. 8.* *Quaritis me interficere hominem , qui vera locutus sum vobis ,* *Joann. 9.* *Ille homo , qui dicitur Christus .* Atqui Christus non potest esse Deus & homo , quin in eo sit utraque natura , divina & humana , non confusa & permixta , sed omnino distincta ; ergo .

Confirmatur , ex iis textibus , in quibus Christus nunc dicitur æqualis Patri , *Joann. 10.* *Ego & Pater unum sumus ;* nunc minor Patre , *Joann. 14.* *Pater major me est : atqui Christus secundum naturam humanam non potest esse æqualis Patri , & secundum naturam divinam non*

non potest esse minor Patre; ergo necesse est duas esse naturas in Christo. *Qui*, Philipp. 2. *cum in forma Dei*, id est, in natura divina, *esset*, non rapinam arbitratus est esse se aequalem Deo, sed semetipsum exinanivit, non quidem amittens naturam Dei, sed formam servi, id est, naturam humanam, accipiens, per quam est, in similitudinem hominum factus, & habitum inventus ut homo.

Prob. 2. Ex Concilio Chalcedonensi, quod in definitione fidei adversus Eutychem pronuntiat: *Confitemur Christum Dominum nostrum; eundem perfectum in deitate, & eundem perfectum in humanitate, Deum verum & hominem verum, consubstantialem Patri secundum deitatem, consubstantialem nobis secundum humanitatem: ante sacula quidem de Patre genitum secundum deitatem, in novissimis autem diebus eundem propter nos & propter nostram salutem ex M. V. Dei genitrice secundum humanitatem, unum eundemque Christum, Filium Dominum Unigenitum, in duabus naturis inconfuse, incommutabiliter, indivise, inseparabiliter agnoscendum, nusquam sublata differentia naturarum propter unionem, magisque salva proprietate utriusque natura, & in unam personam atque subsistentiam concurrente. Accurata illa definitione utrinque feriuntur Eutyches & Nestorius.*

Prob. 3. Ex omnibus PP. dicentibus cum D. Athanas. in Symbolo: *Est ergo fides recta, ut credamus & confiteamur, quia Dominus noster J. C. Dei Filius, Deus, & homo est. . . qui licet Deus sit & homo, non duo tamen, sed unus est Christus. Unus autem non conversione divinitatis in carnem, sed assumptione humanitatis in Deum. Unus omnino non confusione substantia; sed unitate persona.*

Prob. 4. Ratione evidentissima : si ambæ naturæ in Christo non mansissent integræ , sed una tertia ex illis fuisset conflata , hoc factum fuisset , vel per *conversionem unius in aliam* , ut gutta vini in mare coniecta ; vel per *mixturem* , & *confusionem ambarum* , ut mixtum ex elementis transmutatis confectum ; vel per *compositionem ex duabus naturis* , non quidem permixtis aut permutatis , sed imperfectis , sicut ex corpore & anima fit homo ; atqui nihil horum dici potest ; ergo .

Non primum , quia immutabilis est Deus ; atqui si divinitas converteretur in humanitatem , vel humanitas in divinitatem , mutaretur Deus , cui tam repugnat quidquam de novo in se recipere , quam in se destrui , & in aliud transire .

Non secundum , tum quia quæ infinite distant , misceri invicem non possunt , solvitur enim species debilioris eorum , altera manente , ut si quis guttam vini in mare conijciat ; atqui natura divina ab humana infinite distat ; ergo , &c. Tum quia mixtum cum nullo miscibilium est idem specie , & sic Christus non esset ejusdem cum Patre & Matre substantiæ , ac proinde nec verus Deus , nec verus homo .

Non Tertium , quia cum una natura ex duabus naturis imperfectis componitur ; necesse est ut illæ duæ naturæ se habeant per modum partis respectu tertiæ naturæ , quæ ex eis componitur , ut videre est in natura humana ; quæ ex corpore & anima componitur ; atqui natura divina non potest habere rationem partis , alias nec esset immutabilis , nec infinita , nec simplicissima ; ergo utraque natura distincta & impermixta permanfit in Christo .

Solvuntur Objectiones Eutychianorum.

Objicies 1. Unum fieri aliud, est unum converti in aliud, ut constat ex illo, Jo: 2. *Ut gustavit Architriclinus aquam vinum factam*, id est, in vinum conversam; atqui ex Jo: 1. *Verbum caro factum est*; ergo, &c.

Resp. dist. maj. Significat unum converti in aliud, aliquando, *conced. semper, nego maj.* Equidem aliquando particula, *factum*, significat substantialem mutationem unius rei in aliam, ut cum *aqua* dicitur *vinum facta*: sed interdum significat acquisitionem, vel assumptionem alicujus de novo, ut cum Adam, *Genes. 2.* dicitur, *factus in animam viventem*. Et Hebr. 7. *Christus factus est Pontifex*. Porro ex antecedentibus vel consequentibus, & ex ipsa rerum natura pensandum est, quando, *est factum*, alterutrum significat: sic hanc propositionem, *Verbum caro factum est*, significare assumptionem humanitatis de novo, probant, tum hæc verba consequentia, & *habitavit in nobis*, quomodo enim Verbum habitavit in nobis, nisi quia, idem manens, carnem assumpsit; tum ipsa Verbi natura quæ cum sit immutabilis, in aliud converti non potest.

Inst. 1. Eodem modo dicitur, *Verbum caro factum est*, ac, *aqua vinum facta est*. Atqui per hæc verba, *aqua vinum facta est*, vera significatur aquæ in vinum conversio; ergo.

Resp. dist. maj. Eodem modo, &c. quoad sonum verborum, *conced. quoad significationem verborum, nego maj.* Nam similiter eodem modo quoad sonum verborum dicitur, Gal. 3. *Christus factus pro nobis maledictum*, nec tamen Christus in maledictum conversus dici potest, *desinant*, ait D. Ambros. lib. de In-

carnat, adversus Apollinaristas, cap. 6. *Desinant dicere naturam Verbi in corporis naturam esse mutatam, ne pari interpretatione videatur natura Verbi in contagium mutata peccati.*

Inst. 2. Filius Dei, Philipp. 2. *Semetipsum exinanivit.* Atqui non potuit semetipsum exinanire, nisi per sui conversionem in carnem; ergo.

Resp. nego min. Nam semetipsum exinanivit, *formam servi accipiens*, id est, per carnis assumptionem, per quam, *factus est obediens usque ad mortem, mortem autem crucis*, cum antea nulli obedire potuerit, non vero semetipsum exinanivit per sui conversionem in carnem.

Inst. 3. S. Justinus, *Apologia secunda*, docet Verbum carnem esse factum, sicut in Eucharistia panis fit caro Christi; atqui panis fit caro Christi per conversionem; ergo Verbum caro factum est per sui conversionem in carnem.

Resp. dist. maj. Secundum aliquam similitudinem, *conc.* secundum omnimodam paritatem, *nego maj.* In eo valet allata ex Justino paritas, quod sicut Verbum fit *reqliter* caro, ita panis in Eucharistia fit *realiter* corpus Christi; non valet autem ea paritas, quoad modum quo panis fit corpus Christi.

Objicies 2. Mixtio confusionem parit, & distinctionem tollit; atqui duæ naturæ, divina & humana, secum invicem permixtæ sunt in Christo, ut cum pluribus PP. docet D. Aug. *Epist. 3. ad Volusianum*, dicens personam Christi *mixturam esse Dei & hominis*. Ergo.

Resp. dist. maj. Mixtio, proprie dicta, *conc.* improprie dicta, *nego maj.* Atqui naturæ, divina & humana, in Christo sunt mixtæ, mixtione improprie dicta, quæ solum dicit intimam ac substantialem naturarum unionem in
per-

persona conc. mixtione proprie dicta, qua unum mutatur in aliud, *nego minor*. Itaque Patres, quandiu nihil fuit periculi, nomine *mixtionis*, in hoc mysterio usi sunt ad exprimendam intimam unionem duarum naturarum in Christo, sed nunquam eo usi sunt ad significandam naturæ utriusque confusionem, quod patet ex eo quod plerumque Patres unionem animæ cum corpore protulerint ad explicandam naturarum permixtionem, quam asseriebant esse in Christo: *Sicut in unitate persona*, inquit D. August. cit. *anima unitur corpori ut homo sit, ita in unitate persona Deus unitur homini, ut Christus sit*. In illa ergo persona mixtura est anima & corporis; in hac persona mixtura est Dei & hominis. Et ne ab aliquo videatur admittere naturarum confusionem, addit: Si tamen recedat auditor a consuetudine corporum, qua solent duo liquores ita commisceri, ut neuter servet integritatem suam.

Objicies 3. Julius S. P. Epist. ad Dionysium, ait: *Necesse est eos, cum duas naturas dicunt, unam adorare, alteram non adorare*. Et D. Gregor. Thaumaturgus in exposit. fidei. *Non dua persona*, inquit, *neque dua natura, non enim quatuor nos adorare dicimus; ergo*.

Resp. *nego ant.* Illa enim scripta, falso ab Eutychianis adscribuntur illis Patribus, ut testatur Leontius (1) dicens: *Quidam ex haresi Apollinarii, vel Eutychis, vel Dioscori, cum vellent suam haresim confirmare, quasdam orationes Apollinarii Gregorio Thaumaturgo, aut Achanasio, aut Julio inscripserunt, ut simpliciores fallerent*.

Objicies 4. S. Cyrillus conceptis terminis asserit,

(1) Biblioth. PP. tom 9. pag. 707. G.

serit, non duas, sed unam tantum naturam esse in Christo post unionem; ergo.

Resp. nego ant. Clare enim exponit suam mentem in sua ad Nestorium Epist. a Conc. Ephes. approbata: *Quamvis natura sint diversa, inquit, vera tamen unione coeuntes, unum nobis Christum & Filium effecerunt: non quod naturarum differentia propter unionem sublata sit, verum quod divinitas & humanitas, secreta quadam ineffabilique conjunctione, in una persona unum nobis Jesum Christum & Filium constituerint.*

Prob. ant. S. Cyrill. Epist. 1. ad Successum, ait: *Post unionem, naturas alteram ab altera non dividimus, neque in duos filios unum illum impartibilemque fecimus, sed unum asserimus Filium, ut & SS. Patres dixerunt, unam naturam Dei Verbi incarnatam; ergo. unicam in Christo post unionem admisit naturam.*

Resp. nego conseq. Non enim dicit, esse unam naturam Christi, sed unam naturam Verbi incarnatam, quod verum est, quia sola natura divina incarnata est, hoc est, carni personaliter unita, ut explicat D. Thom. (m). *Natura divina dicitur incarnata, inquit, quia est unita carni personaliter: non quod sit in naturam carnis conversa. Similiter & caro dicitur deificata, ut dicit Damasc. lib. 3. de fide orthodoxa, cap. 6. non per conversionem, sed per unionem ad Verbum, salvis suis proprietatibus naturalibus, ut intelligatur caro deificata, quia facta est Verbi Dei caro, non quia facta sit Deus.* Et ipse Cyrillus, cum ob citatum in objectione locum, Apollinarista diceretur, ita mentem suam explicat, Epist. 2. ad Successum: *Sic dicen-*

dicentes unam Verbi naturam, inquit, tacuissimus, & minime adjunxissimus, INCARNATAM, excluso, propemodum dispensationis mysterio, esset illorum, (Nestorianorum) fortassis oratio non inepta sed ... dum dicimus, INCARNATAM, desinant baculo inniti arundineo. Ita etiam S. Cyrilli textum exponit Synodus V. can. 8.

Inst. 1. S. Cyrillus, eadem Epist. negat duarum naturarum distinctionem post unionem, Post unionem, inquit, naturas easdem a se mutuo non dividimus. Ergo, &c.

Resp. nego ant. Semper enim D. Cyrillus distinctionem naturarum professus est, sed negavit earundem divisionem & separationem post unionem, quia nimirum in unitate personæ adunantur.

Inst. 2. S. Cyrill., Epist. 2. ad Successum, docet duas naturas in Christo sola mentis consideratione distingui; ergo non sunt a se invicem distinctæ realiter.

Resp. nego consequ. Nam S. Cyrill. per verbum, *Distingui*, intelligit, *dividi*, &, *separari*, quod patet, quia Cyrillus in exemplum distinctionis, quam asserit sola fieri cogitatione, profert ejusdem hominis viventis corpus & animam, quæ quidem haud dubie non eo sensu sola cogitatione distinguuntur, quod realiter sint unum & idem a parte rei, sed tantum quod a se invicem separata ac per se subsistentia non sint.

Objicies 5. S. Athanasius, in Symbolo, ait: Sicut anima rationalis, & caro unus est homo, ita Deus & homo unus est Christus; atqui anima & corpus in unam hominis naturam coalescunt; ergo Deus & homo in unam Christi naturam coalescunt.

Resp. nego consequ. Comparatio enim a Div.
Atha.

Athanasio allata in eo stat, quod sicut ex unionē animæ & corporis, una resultat hominis persona, ita & in Christo ex utriusque naturæ unionē; verum in hoc deficit comparatio, quod in homine anima & corpus in unam naturam totalem coalescant, quia sunt entia incompleta & ad unam naturam essentialiter ordinata; e contra humanitas & divinitas in Christo, cum sint entia completa in ratione naturæ, in unam naturam totalem coalescere nequeunt, unde integræ & inconfusæ in una Verbi persona remanent.

Objicies 6. Concilium Ephesinum II. probavit doctrinam Eutychis; ergo.

Resp. nego consequ. Illud Concilium, quod non tam Episcoporum, quam Sicariorum & Prædonum Conciliabulum fuit, a S. Leone & Conc. Chalcedonensi, fuit penitus reprobatum. Vide illius historiam, Tractatu de Prolegomenis.

Objicies 7. si duæ essent in Christo naturæ, essent quoque duo Christi; falsum consequ. ergo & ant.

Prob. seq. maj. Ideo in Trinitate est unus Deus, quia est unica natura; ergo a contrario si duæ sint in Christo naturæ, duo sunt Christi.

Resp. nego consequ. Quia concreta substantiva non multiplicantur, nisi multiplicentur natura simul & persona; atqui *Deus* & *Christus* sunt concreta substantiva; ergo Deus non multiplicatur quia unicam habet naturam, & Christus non multiplicatur, quia habet unicam personam.

Inst. Nisi naturæ, divina & humana, confluant in unam naturam totalem, Christus non erit unum *per se*. Atqui absurdum consequ. Ergo.

Resp. nego seq. maj. Nam ad constituendum unum *per se*, sufficit unio duarum naturarum in una persona, siue naturæ in unum coeant, si sint incompletæ, ut materia & forma, siue
non

non sic in unum coeant, si sint completæ, ut est divinitas & humanitas in Christo.

Q U Æ S T I O III.

De proprietatibus unionis hypostatica.

Nota. **C**irca proprietates unionis hypostaticæ quæri potest, 1. An sit quid creatum; 2. An sit substantialis; 3. An sit supernaturalis; 4. An sit unionum maxima; 5. An sit indissolubilis, sequentibus quæstiunculis, itaque:

Quæres 1. *An unio hypostatica sit aliquid creatum?*

Resp. affirmativæ: Etenim id debet necessario creatum censeretur, quod aliquando cœpit in tempore, nec fuit ab æterno; atqui unio hypostatica est hujusmodi; & quamvis Verbum divinum semper fuerit, attamen non semper fuit conjunctum humanitati nostræ, sed illam assumpsit in tempore, ex quo per veram actionem factum est hoc compositum, *Christus*, quod antea non erat; ergo, &c. hinc, *Jerem. 31.* dicitur: *Creavit Dominus novum super terram: femina circumdabit virum.*

Dices: Creatio est productio rei ex nihilo; atqui hoc compositum, *Christus*, non fuit productum ex nihilo; ergo.

Resp. dist. maj. Creatio, stricte dicta, conced. late dicta, nego. *maj.* & sic distincto consequente, nego. *conseq.* Hic itaque creatum sumimus late, nimirum pro actione qua aliquid fit, quod ante non erat.

Inst. Verbum divinum est increatum; ergo compositum ex humanitate & Verbo, non potest simpliciter dici quid creatum.

Resp. nego. conseq. Ut enim hoc compositum,
Chri-

Christus, dicatur simpliciter quid creatum, sufficit, ut per veram actionem factum sit in tempore, nec requiritur ut quidquid complectitur sit creatum, sicut homo, constans ex anima & corpore, dicitur simpliciter genitus, licet ejus anima non sit genita, sed creata.

Quæres 2. *Utrum unio hypostatica sit substantialis?*

Resp. affirmative contra Nestorium: Quia, ubi duæ naturæ, formaliter a se invicem distinctæ, de se invicem in concreto substantive prædicantur, ibi necessario debet esse unio substantialis in supposito; atqui in Christo duæ sunt naturæ, formaliter a se invicem distinctæ, quæ de se invicem in concreto substantive prædicantur, recte enim dicitur: *Deus est homo: homo Deus*. Ergo illa unio est substantialis; *maj. est certa*, neque enim unio accidentalis potest præstare mutuam rerum unitarum prædicationem in concreto substantivo, sic homo, cum habet vestem sibi accidentaliter conjunctam, bene dicitur *vestitus* adjective, sed non dicitur *vestis* substantive, *minor est de fide*; ergo.

Objicies: Hoc axioma philosophicum: *Quod advenit enti completo, non facit ens per se, sed per accidens*; atqui humanitas advenit Verbo divino in suo esse completo; ergo unio hypostatica est accidentalis.

Resp. dist. axioma: Quod advenit enti completo, non facit ens per se, sed per accidens, si compositio sit naturalis, *conc.* si compositio sit supernaturalis, *nego axioma*. Ratio disparitatis est, quia, quod, in compositione naturali, advenit enti completo, non trahitur in communionem istius esse completi cui advenit; at in compositione supernaturali, qualis est unio hypostatica, natura humana, ex se incompleta

in ra-

in ratione suppositi, trahitur in unum & idem esse personale cum Verbo.

Inst. i. Quod rei accidit, est ipsi accidentale; atqui Verbo divino accidit, quod unitura fuerit cum humanitate, potuit enim non uniri; ergo illa unio est accidentalis.

Resp. dist. maj. Est ipsi accidentale, vel physice, vel logice, *conc.* semper physice, *nego maj.* ergo unio hypostatica est accidentalis, logice, *conc.* physice, *nego conseq.* &c. Itaque, *accidens Physicum*, est quidquid non est de rei substantia; quo sensu unio hypostatica non potest dici accidentalis, quia, ut jam dictum est, Verbi substantia trahit humanitatem in communionem sui esse, sicut corpus assumitur ad esse animæ, quia esse vitale habet per animam: *accidens Logicum*, est quidquid non est de essentia rei, nec ut genus, nec ut differentia, quo sensu unio hypostatica potest dici accidentalis, qualiter etiam unio animæ cum corpore potest dici accidentalis, quia nempe unio non est de ejus essentia.

Inst. 2. Quod non pertinet ad existentiam, aut naturam rei, est ejus accidens physicum; atqui humanitas non pertinet ad naturam aut existentiam Verbi; ergo.

Resp. nego maj. Quia, ut aliquid sit alicujus rei accidens physicum, non sufficit ut non pertineat ad ejus naturam aut existentiam; sed insuper requiritur, ut ab eo substantialiter non compleatur; atqui licet humanitas non pertineat ad naturam aut existentiam Verbi, tamen ab eo substantialiter compleatur; ergo.

Quæres 3. *Utrum unio hypostatica sit supernaturalis?*

Resp. Est & debet dici simpliciter supernaturalis.

Prob. Illud est simpliciter supernaturale, quod est na-

est naturæ indebitum, omnemque illius exigentiam superat; atqui ad esse personale cum Deo attolli, est naturæ creatæ prorsus indebitum, omnemque illius exigentiam longe superat; ergo unio hypostatica est supernaturalis.

Objicies: SS. Patres & Concilia, docent unionem hypostaticam esse naturalem: sic S. Cyrill. anathematismo 3. tradit Verbum esse connexum cum humanitate, *co concursu, qui est secundum naturalem unionem.* Ergo.

Resp. dist. ant. Docent unionem Verbi cum humanitate esse *naturalem*, quatenus naturale opponitur ficto & umbratili, *conced.* quatenus naturale dicit, quod debitum est naturæ, & opponitur gratuito beneficio, *nego antec.* Sic D. Cyrillus a Theodoro reprohenfus, quod unam naturam in Christo admisisset, eo quod illos improbasset, qui negabant Verbum divinum conjunctum esse cum humanitate, reposuit, (n) se per *naturalem unionem*, veram & realem unionem, non fictam & umbratilem, intellexisse.

Inst. 1. Quod est supernaturale, factum est per gratiam, atqui unio hypostatica non est facta per gratiam; ergo.

Resp. nego min. Nam unio & est gratia gratuito humanitati collata, & est facta per gratiam, id est, per voluntatem Dei gratuitam, ait D. Thom. hic, *Si gratia*, inquit, *accipiat* *ipsa Dei voluntas gratis aliquid faciens*, *vel gratum*, seu *acceptum aliquem faciens*, *unio Incarnationis facta est per gratiam.*

Inst. 2. Si unio hypostatica facta sit per gratiam, Christus est Deus per gratiam; atqui
Chri-

(n) In defensione tertii anathematismi.

Christus non est Deus per gratiam, ut definitum est contra Nestorium; ergo, &c.

Resp. dist. major. Christus est Deus per gratiam substantialem unionis ad Verbum, *conce-* per gratiam adoptionis, *negō major.* Itaque, Christus non est Deus per meram adoptionis gratiam, qua habeat divinitatem sibi assistentem & in eo tanquam in templo inhabitantem, ut volebat Nestorius; sed est Deus per gratiam substantialem unionis duarum naturarum in unitate personæ Verbi, ex quo sequitur, quod sit verus & substantialiter Deus.

Quæres 4. *An unio hypostatica sit unionum maxima & præstantissima?*

Respond. affirm. Nam magnitudo & dignitas unionis hypostaticæ spectari potest, vel ex parte extremorum, nempe naturæ divinæ & humanæ, quæ conjunguntur; vel ex parte Verbi in quo conjunguntur; atqui ex utraque parte unio hypostatica est omnium maxima & præstantissima; ergo.

Prob. prima pars min. Eo major ac præstantior æstimari debet unio extremorum, quo extrema longius a se distant; atqui extrema unionis hypostaticæ, natura nimirum divina & humana, a se infinite distant; ergo.

Probat. secunda pars. Illa unio eo major ac præstantior æstimari debet, ex parte illius in quo extrema conjunguntur, quo illud est magis simplex; atqui in unione hypostatica Verbi persona, in qua extrema uniuntur, est simplicissima; ergo, &c. Hinc D. Bernard. *lib. 5. de consideratione cap. 5.* ait: *Inter omnia quæ recte dicuntur unum, arcem tenet unitas. Trinitaris, quæ tres personæ sunt una substantia; secundo loco illa præcellit, quæ e converso, tres substantia (scilicet divinitas, anima & corpus) una in Christo persona sunt.* Quod verum

rum est de illa unitate, seu unione, qua tria ista tendunt ad aliquod tertium, puta personam.

Quæres 5. *An unio hypostatica sit indissolubilis?*

Resp. *Affirmativa est de fide*. Expresse enim dicitur, Joann. 12. *Christus manet in æternum*, Et Hebr. 13. *Iesus Christus heri & hodie, ipse & in sæcula*; ergo, cum Christus sit æternus, unio hypostatica, per quam Christus efficitur, est æterna & indissolubilis; hinc Conc. Chalcedonense definit in Christo utramque naturam cucurrisse in unitatem personæ indivise & inseparabiliter.

Quæres 6. *An in triduo mortis, Verbum manserit unitum cum corpore & anima separatis.*

Resp. *affirmi*. Nam, ex nostræ fidei Symbolis, Christus sepultus est quoad corpus, descendit ad inferos quoad animam; atqui Christus nihil aliud est quam Divinitas conjuncta cum humanitate, aut tota simul, aut cum ejus partibus; ergo.

Hanc veritatem nitide exponit D. Damasce-nus lib. 3. de fide orthod. c. 27. dicens: *Quamvis Christus, ut homo, mortem obierit, sanctaque ipsius anima ab immaculato corpore distracta sit, Divinitas tamen a neutro, hoc est, nec ab anima, nec a corpore, quomodo sejuncta est, neque propterea persona una in duas personas divisa fuit: siquidem & corpus & anima ab initio in Verbi persona existentiam habuerunt; ac licet in morte divulsa fuerint, utrumque tamen eorum Verbi personam, qua subsisteret, semper habuit. Ex quo textu profluit hoc effatum in scholis receptum: Quod semel Verbum assumpsit, nunquam dimisit.*

Quæres 7. *An Sanguis in passione effusus, toto triduo mortis, remanserit Verbo unitus?*

Resp.

Resp. Totus Sanguis, in resurrectione resumendus, Verbo unitus remansit toto triduo. Est communis & certa.

Probat. Quia caro & anima ideo in triduo mortis Verbo remanserunt unitæ, quia erant pars humanæ naturæ resumenda; atqui sanguis est pars naturæ humanæ integrans, cum ex Galeno, Aristotele, & D. Thoma, corpus sine sanguine non sit integrum & perfectum; ergo totus sanguis reassumendus remansit Verbo unitus.

Confirmatur. Quia si in triduo mortis calix fuisset consecratus, Verbum per concomitantiam fuisset sub speciebus vini, juxta illud Joannis 6. Qui bibit meum sanguinem in me manet, & ego in illo; ergo.

Dices: Si sanguis Christi Verbo mansisset unitus in triduo mortis, inter ipsum & Verbum fuisset communicatio idiomatum; atqui falsum consequens; neque enim potuit dici, Verbum est sanguis; ergo.

Resp. nego seq. maj. Quia communicatio idiomatum datur tantum inter Verbum & naturam humanam completam, non vero inter partes naturæ humanæ, sic non dicitur, Verbum est anima, est corpus, &c.

Quæres 8. Utrum totus sanguis in passione effusus, reassumptus fuerit a Verbo in resurrectione?

Respond. Reassumptus fuit totus moraliter, seu quoad maximam partem; probabilius autem est, quod non reassumptus fuerit totus physice.

Probat. prima pars: Quia in corpore Christi temperantissimo nihil sanguinis superfluebat; ergo, cum pertineat ad integritatem corporis humani, totus, aut fere totus, resumptus est.

Prob. secunda pars: Quia in lintheaminibus, lan-

lancea, corona spinea, &c. remanserunt maculae sanguineae, quae certe non fuerunt purus color, cum colores non sint activi, nec aliter communicentur, quam per adhærescentiam substantiae coloratae; ergo.

Confirmatur. Quia plures sanguinis Christi particulae in variis Ecclesiis asservantur, qualem vidi Viennae in Austria, in thesauro Reliquiarum Caesareo apud PP. Capucinos collocato, ad cujus authenticitatem extat Summi Pontificis Bulla aurea in eodem thesauro conservata; qualis etiam est illa quam *Longinus* secum detulit in *Italiam*, quamque, propter saevientem persecutionem, Mantuae in terra occultavit, ubi delituit, donec Deus, per miracula, quae ibi quotidie patrabantur, illam manifestavit tempore Caroli magni Imperatoris, & Leonis III. S. P. a quibus, effossa terra, reperta est hac munita inscriptione, quae, cum tota historia reperitur in archivo Monasterii *Vvingartensis* in Suevia: EGO LONGINUS, QUONDAM CENTURIO SUB PRÆSIDE PILATO, CREDENS IN JESUM, HUNC CRUOREM A LATERE CURRENTEM IPSIUS JESU, NOSTRORUM MILITUM MANIBUS CRUCIFIXI, RECEPI, ET HOC IN LOCO, PROPTER HOSTES FIDEI JESUMQUE BLASPHEMANTES, OCCULTAVI, DONEC DEUS VERIS SUIS CULTORIBUS DIGNETUR INDICARE. Quem sanguinem probatum, *Leo III.* reverenter collocavit Mantuae in Ecclesia Sancti Andreae Apostoli; cum autem denuo turbata fuerit Italia, & propterea ille sanguis in terra iterum fuerit occultatus ab *Josepho VII.* Episcopo Mantuano, repertus fuit a quodam *Adalberto*, qui, in hunc finem Deum deprecans, a cæcitate, qua laborabat, sanatus fuit in loco ubi delitescibat: quod

quod cum fuerit delatum S. P. Leoni IX. Illuc cum quinquaginta Cardinalibus, Episcopis & Archiepiscopis, cumque Henrico III. Imperatore & pluribus aliis Germaniæ & Italiæ Principibus, se contulit, pretiosum Sanguinem recognovit, ac in tres partes divisit, quarum unam reliquit Mantuæ, ubi adhuc hodie colitur in Ecclesia S. Andreæ. Alteram secum Romam asportavit, quam in Basilica S. Joannis Lateranensis vidi cum ingenti satisfactione. Tertiam concessit Henrico III. qui morti proximus eam Balduino Flandriæ Comiti dono dedit; Juditta hujus Comitis filia, sponsa Toſtici Angliæ Regis, illam per legatum reliquit Alroni Scotorum Principi, qui tam venerandum thesaurum secum detulit in Monasterium VVingartense, cujus fuit primus Abbas; hunc sanguinem inclusum in ampulla ex cryſtallo, in medio Crucis aureæ margaritis & lapidibus pretiosis ornata, collocata, in manibus tenui, reverenter deſcſulatus ſum, ac, attente conſiderans, eum perfecte rubeum, tota mente, toto corde, totis viſceribus, admiratus ſum.

Quæres 9. *Utrum Sanguis Chriſti, ſi aliqua ejus particula remanſerit in terris, ſit adhuc Verbo unitus?*

Reſp. negative: Quia cum iſte ſanguis non fuerit aſſumptus propter ſe, ſed propter totum, & jam neque actû, neque potentia remanet pars corporis Chriſti, non eſt ratio cur unionem cum Verbo retineat.

Nec obſtat hoc axiomata: *Quod Verbum ſemel aſſumpſit nunquam dimiſit*; cum illud non intelligatur de quibuslibet minutis corporis partibus, ſed de his tantummodo, quæ ad corporis integritatem requiruntur.

Q U Æ S T I O IV.

De consequentibus unionem hypostaticam.

Nota. **C**Um unio hypostatica nihil aliud sit, quam unio substantialis Verbi cum humanitate; quæritur 1. Utrum ex illa unionem sequatur Christum esse compositum. 2. Utrum sequatur idiomatum utriusque naturæ communicatio.

A R T I C U L U S I.

Utrum ex unionem substantiali Verbi cum humanitate sequatur Christum esse compositum.

Nota. **D**Uplex distingui potest compositio; prima vocatur, compositio *ex his*: secunda, compositio *cum his*.

Compositio *ex his*, est ea, quæ fit ex partibus proprie dictis, quæ inter se mutuam dicunt habitudinem actus, & potentiæ ad aliquod totum efficiendum: hujusmodi est compositio hominis ex anima & corpore: vulgo vocatur compositio *per modum partium*.

Compositio *cum his*, est ea, quæ fit ex rebus realiter distinctis, quæ inter se nullam habent habitudinem actus & potentiæ, ad aliquod totum constituendum: vulgo dicitur compositio, *per modum numeri*; numerus enim multitudinem importat unitatum. His positis.

C O N C L U S I O.

Christus non est compositus compositione, ex his, sed est vere ac proprie compositus compositione, cum his.

Prob.

Prob. prima pars : Quia omnis compositio, ex his, sit ex partibus proprie dictis; atqui natura divina in Christo non potest habere rationem partis propriæ dictæ: quia omnis pars proprie dicta, est ens imperfectum & incompletum, dicens ordinem ad suam compartem, ut ab ipsa compleatur; ergo, &c. Hinc Divus Augustinus, lib. 2. contra Maximinum; c. 10. ait: Porro autem Christus una persona est gemina substantia, quia & Deus & homo est, nec tamen Deus pars hujus persona dici potest.

Nec obstat, quod nonnulli e veteribus dixerint divinitatem & humanitatem esse partes Christi. Locuti sunt enim de partibus improprie dictis, quatenus nimirum duæ naturæ perfectæ & completæ conjunguntur in uno eodemque supposito.

Prob. secunda pars, 1. Ex Concil. Gener. V. collat. 8. Can. 4. ubi dicit anathema ei, qui non confitetur unam ejus (Christi) substantiam compositam. Et Can. 7. dicit simpliciter Christum esse compositum ex duobus naturis. Quæ doctrina confirmata est in Concil. VI. Act. 11. ubi expresse habetur, personam Christi ex duabus naturis esse compositam: atqui non est composita compositione, ex his; ergo.

Prob. 2. Ex PP. D. Damasc. lib. 3. de fide, cap. 7. ubi expresse dicit: Persona Verbi, quæ prius erat simplex, facta est composita ex duabus naturis.

D. August. Epist. 3. Persona hominis, inquit, mixtura est anima & corporis; persona autem Christi mixtura est Dei & hominis.

Prob. 3. ratione. Quia compositio, cum his, non est aliud, quam realis extremorum realiter distinctorum conjunctio ad constituendum unum per se; atqui in Christo talis est conjunctio; ergo.

Solvuntur Objectiones.

Obicies 1. Ex D. Thom. (o.) *Neque est possibile Deum aliquo modo in compositionem alicujus venire. Ergo, &c.*

Resp. dist. textum: Non est possibile Deum in alicujus compositionem *ex his* venire, *conc.* in compositionem *cum his* venire, *nego*; sese explicat Divus Doctor addens, *Nec sicut principium formale, nec sicut principium materiale.*

Obicies 2. Si Christus sit compositus, erit perfectior Verbo divino; falsum conseq. ergo.

Probat. seq. major. Ex axioma: *Compositum est perfectius suis partibus componentibus.* Atqui si Christus est compositus, partes componentes sunt Verbum divinum & humanitas; ergo si Christus est compositus, est perfectior Verbo divino.

Resp. dist. maj. Omne compositum ex partibus proprie dictis, *conc.* ex partibus improprie dictis, *nego maj.* Partes proprie dictæ habent rationem actus & potentiæ, proindeque important imperfectionem entis incompleti, perfectibilis, ac dependentis a sua comparte, & a toto, ut a causa finali; pars vero improprie dicta, est id omne quod intrinsece constituit aliquid unum, abstrahendo ab omni imperfectione actus aut potentiæ, partibus proprie dictis intrinseca.

Inst. 1. Omnis pars pendet a toto; atqui Verbum divinum non potest pendere a Christo; ergo.

Resp. dist. major. Omnis pars proprie dicta, quæ scilicet est aliquid incompletum & perfectibile,

(o) 1. p. q. 3. art. 8. in corp.

le, *conc.* omnis pars improprie dicta, quæ est aliquid completum & nullo modo perfectibile, *negō maj.* Porro ejusmodi est Verbum divinum.

Inst. 2. Omnis pars, etiam improprie dicta, est minor toto; atqui Verbum divinum non est minus Christo; ergo.

Resp. dist. maj. Omnis pars finita, *conc.* infinita, *negō maj.* Porro Verbum divinum est infinitum in omni genere, adeoque eminenter continet totam perfectionem alterius secum componentis, & sic compositum non est eo majus intensive, sed solum extensive, prout dici solet de aggregato ex mundo & Deo.

Objicies 2. Persona Verbi non est composita; atqui persona Christi, est persona Verbi; ergo.

Resp. dist. min. Persona Christi materialiter, est persona Verbi, *conc.* persona Christi formaliter sumpta, *negō min.* Ego persona Christi non est composita, materialiter, *conc.* formaliter sumpta, *negō conseq.* Itaque persona Christi materialiter sumpta, importat præcise suppositum Verbi, & sic est quid simplex; sed persona Christi reduplicative & formaliter ut Christi, sub qua ratione est constitutum ex humanitate & divinitate, eadem Verbi subsistentia terminatis, est vere ac proprie composita.

Instant. Persona Christi ante unionem non erat composita; ergo nec est composita post unionem.

Prob. conseq. Eadem res non potest simul esse simplex & composita; atqui si persona Christi fuerit simplex ante unionem, & composita post unionem, eadem persona erat simul simplex & composita; ergo, &c.

Resp. dist. maj. Eadem res, sub eadem ra-

tionem & acceptionem, non potest simul esse simplex & composita, *conc.* sub diversa ratione & acceptione, *nego maj.* Porro persona Christi ante unionem consideratur secundum se, prout est persona Verbi solius, post unionem vero consideratur prout terminat humanitatem, quam antea non terminabat, sub qua ratione distinguitur realiter inadæquate a se ipsa ante unionem considerata.

ARTICULUS II.

Utrum, ex unionem substantiali Verbi cum humanitate, sequatur idiomatum communicatio?

Nota 1. **I**dioma idem est, quod attributum & proprietas, unde stricte loquendo communicatio idiomatum, est communicatio proprietatum, tamen late & ex usu communi tribuitur adhuc communicationi naturarum; hinc duplex est communicatio idiomatum, nimirum secundum naturas, & secundum proprietates.

Communicatio idiomatum secundum naturas, est duarum naturarum de Christi persona ac de se invicem prædicatio, qua nimirum dicitur, *Homo est Deus; Deus est homo; Christus est Deus, &c.*

Communicatio idiomatum secundum proprietates, est mutua proprietatum utriusque naturæ de se invicem, ac de Christi persona, prædicatio. Sic recte dicitur, *mortalis est immortalis; immortalis est mortuus; Christus est mortalis, &c.*

Nota 2. Communicatio idiomatum fieri potest in concreto, vel in abstracto *fit in concreto*, quando fundatur in unitate personæ, in qua utraque natura, divina & humana, subsistit;

sistit ; ratio est, quia nomina concreta supponunt pro persona, ac pro ea accipiuntur, unde sensus hujus propositionis: *Deus est homo*, hic est, *persona habens divinitatem, est persona habens humanitatem*. Nestorius, negans unionem hypostaticam Verbi cum humanitate, negat consequenter communicationem idiomatum in concreto, ut videre est in ejus ad Cyril- lum Epistola.

Communicatio idiomatum fit in abstracto, quando fundatur in communicatione proprietatum Divinitatis propriarum facta humanitati; ita ut dici possit: *Humanitas Christi est ubique: est immensa: est omnipotens, &c.* Hanc admittunt aliqui Lutherani, qui propterea *Ubi- quista* dicti sunt.

Nota 3. Duo hic veniunt exponenda: 1. Utrum in Christo detur vera & realis communicatio idiomatum, & quomodo? 2. Quot & quænam sint regulæ observandæ, ut recte fiat idiomatum communicatio?

§. I. *Utrum in Christo detur vera & realis communicatio idiomatum, & quomodo?*

CONCLUSIO I.

Datur in Christo vera & realis communicatio idiomatum in concreto. Est de fide.

Prob. 1. Ex Scriptura, in qua plerumque humanitati tribuuntur in concreto ea quæ sunt Divinitatis propria, & vicissim Divinitati quæ solius humanitatis propria sunt: sic, Joann. 3. Christus ait: *Nemo ascendit in calum, nisi qui descendit de calo Filius hominis qui est in calo:* ubi Scriptura tribuit homini in Christo descen- sum de cælo, & existentiam in cælo, dum Christus in terra degeret; atqui illa soli Deo sunt propria; ergo, &c.

Sic Scriptura tribuit Deo mortem, Act. 3. *Auctorem vitæ interfecistis; & 1. Joann. 3. In hoc cognovimus charitatem Dei, quoniam ille animam suam pro nobis posuit; atqui mors solius humanitatis est propria; ergo, &c.*

Prob. 2. Ex Conciliis œcumenicis & fidei Symbolis, quæ prædicant Jesum Christum Filium Dei unigenitum, esse Deum verum de Deo vero, qui propter nos homines . . . incarnatus est de Spiritu sancto ex Maria Virgine . . . passus, mortuus, ac sepultus. Atqui nativitas ex Virgine, passio, mors, & sepultura, quæ solius humanitatis sunt propria, prædicantur ibi de Deo in concreto; ergo, &c.

Probat. 3. Ex omnibus PP. dicentibus cum D. Damasc. lib. 3. de fide, cap. 15. *Unus est Christus, & una ipsius persona sive hypostasis, duas tamen naturas obtinet, Divinitatis & humanitatis. Porro cum ex Divinitate naturaliter gloria procedat, utrique communis est, propter hypostasis identitatem. Ex carne vero humilia proficiuntur, & eadem ambobus communia; quippe unus est & idem, qui hoc & illud est, nempe Deus & homo, & ad eundem pertinent, tam qua sunt Divinitatis, quam qua humanitatis propria.*

Prob. 4. ratione: Quæ supponunt pro eodem in recto, vere ac proprie de se mutuo prædicari possunt in concreto: sic recte dicitur, *Socrates est homo*, quia idem est rectum prædicatæ & subjecti, nempe, suppositum, pro quo accipiuntur & supponunt; atqui nomina concreta tum naturarum, tum earundem proprietatum in Christo supponunt, seu accipiuntur, pro eodem in recto; ergo de se invicem possunt prædicari.

Solvuntur Objectiones .

Objicies 1. Si daretur communicatio idioma-
tum, hæc admittenda foret propositio, *Unus
de Trinitate passus est*. Atqui tamen Felix III.
S. P. eam damnavit in Petro Cnaphæo Epif-
copo Antiocheno; ergo.

Resp. concessa maj. dist. min. Eam damnavit
in sensu Petri Cnaphæi, *conc.* eam damnavit
in sensu obvio, *nego min.* Illa enim proposi-
tio in sensu obvio significat *unam personam de
Trinitate passam esse*, quod verum & catholi-
cum est, ut declarat Joannes II. *Epistola ad
Avienum*. Verum hæretica est & damnata in
sensu Petri Cnaphæi, & aliorum Eutychiano-
rum, qui, cum docerent Divinitatem solam,
humanitate penitus absorpta, remansisse in Chri-
sto, existimabant Divinitatem carni factam con-
substantiali, vere passam esse, quod est hæ-
reticum.

Inst. Monachi Scythiæ non erant Eutychiani;
atqui tamen Hormisdas S. P. in Epistola ad
Possessorem, eandem propositionem in illis
damnavit; ergo, &c.

Resp. transeat major. dist. min. Eam damna-
vit, propter illius novitatem, & illorum Mo-
nachorum superbam temeritatem, *conc.* in sen-
su obvio, *nego min.* Non itaque propter aliud
Hormisdas illam propositionem tunc damna-
vit, quam quod esset nova: & dissidiorum cau-
sa, ac quod esset nota temeritatis illorum Mo-
nachorum, qui asseriebant illam loquendi for-
mam definitioni Concilii Chalcedonensis ne-
cessario adjiciendam esse, quasi, absque tali ad-
ditione, manca illa & imperfecta foret; nec
ullam aliam notam illis inurit Hormisdas in

sua ad Possessorem Africanum Episcopum ;
Epistola.

Dixi, transeat maj. Quia nonnulli tenent,
illos Monachos revera hæresi Eutychiana fuisse
infectos.

Objicies 2. Tres personæ SS. Trinitatis con-
veniunt identice in eadem essentia, & tamen
non prædicantur de se invicem; nec enim di-
ci potest, *Pater est Filius*; ergo licet naturæ,
divina & humana Christi, conveniant in eo-
dem supposito, de se invicem in concreto
prædicari non possunt.

Respond. nego consequ. Disparitas est, quod in
hac proposit. *Pater est Filius*, sint duo sup-
posita; econtra in hac, *Deus est homo*, unicum
est suppositum, nempe persona Christi. Atqui
prædicatio in concreto supponit pro supposito;
ergo, si sint duo supposita, prædicatio,
si sit affirmativa, est falsa: enuntiat enim iden-
ticitatem suppositi, ubi sunt duo supposita.

Inst. Corpus & anima conveniunt in uno
hominis supposito, nec tamen de se invicem
prædicantur: falsa est enim hæc propositio,
corpus est anima; ergo licet homo & Deus
conveniunt in eodem supposito, non possunt
de se invicem prædicari in concreto.

Resp. nego consequ. Disparitas est, quod ista
vocabula, *corpus*, *anima*, non sunt nomina
suppositi, cum sint partes proprie, quæ non
existunt per se, sed in alio, nempe in toto,
adeoque non significant per modum habentis,
seu constituti, sed tantum per modum consti-
tuentis, & consequenter velut in abstracto;
econtra hæc vocabula, *Deus* & *homo*, sunt no-
mina suppositi, cum non sint partes proprie,
sed substantiæ completæ in una Verbi persona
conjunctæ, ideoque significant per modum ha-
bentis; hæc enim propos. *Deus est homo*, red-
dit

dit hunc sensum , *habens divinitatem* , est *habens humanitatem* , quod verum est propter unionem utriusque naturæ , divinæ & humanæ , in uno Verbi divini supposito , ex qua sequitur mutua & reciproca idiomatum communicatio .

CONCLUSIO II .

Non datur in Christo communicatio idiomatum in abstracto . Est de fide contra Eutychianos & Ubiquistas .

Prob. 1. generatim : Quæ realiter a se invicem distinguuntur , non possunt de se invicem prædicari , nisi in aliquo communi subjecto , seu supposito , uniantur , nam enuntiatio nihil aliud est , quam affirmatio aut negatio identitatis unius de alio ; atqui duæ naturæ in Christo , & earum proprietates realiter distinguuntur , nec in ullo communi subjecto uniantur , quando considerantur in abstracto ; ergo naturæ , humana & divina , in Christo & earum proprietates , in abstracto sumptæ , de se invicem prædicari non possunt .

Prob. 2. speciatim contra Ubiquistas : Ut communicatio idiomatum fieri posset in abstracto , necesse esset , ut attributa unius naturæ communicarentur attributis alterius naturæ ; atqui attributa unius naturæ in Christo , non communicantur attributis alterius naturæ ; ergo , &c. . .

Prob. min. Idem sit iudicium de aliis attributis divinitati propriis , ac de immensitate ; atqui immensitas divina non communicatur humanitati ; ergo .

Probat. min. Humanitas Christi non est ubique ; ergo immensitas ei non est intrinsece communicata .

Prob. antec. Joann. 11. Christus de se ipso loquens , ait : *Gaudeo propter vos , ut credatis ,*

quia non eram ibi. De quo etiam Matth. ult. dicitur: Non est hic, surrexit enim; ergo, &c. Unde S. Maximus in disputatione cum Pyrrho, ait: In sanctis Evangelis scriptum est: postmodum voluit ire Jesus in Galilaeam, ire nimirum voluit, quatenus ibi non erat, non erat autem humanitate, divinitate autem ubique est. Et D. Augustin. Epist. 187. ad Dardanum, de Christo dicit: Cui immortalitatem dedit, naturam (humanam) non abstulit; secundum hanc formam, (carnis) non est putandus ubique diffusus; cavendum enim est, ne ita divinitatem adstruamus hominis, ut veritatem corporis aufe-
ramus; non est autem consequens, ut quod in Deo est, ita sit ubique, ut Deus: nihil certe dilucidius.

Solvuntur Objectiones.

Objicies cum Ubiquistis, 1. Scriptura humanitati Christi saepe tribuit immensitatem, Christus enim de seipso, ut homo est, dicebat, Matth. 18. Ubi sunt duo vel tres congregati in nomine meo, ibi sum in medio eorum. Et, cap. 28. Ecce ego vobiscum sum usque ad consummationem saeculi. Ergo Christi humanitas est ubique.

Resp. nego antec. & conseq. Neque enim ex illis textibus evincitur praesentia localis, sed assistentia per auctoritatem, ut in primo textu, vel assistentia per auxilium gratiae, ut in secundo.

Inst. 1. Christus, Matth. 22. Sedet ad dexteram Dei; atqui dextera Dei ubique est; ergo Christi humanitas ubique est.

Resp. disti major. Christus sedet ad dexteram Dei, ratione suppositi, conc. ratione humanitatis, *nego maj.* Nam dextera hic metaphorice sumi debet pro honoris & dignitatis aequalitate.

tate cum Patre : atqui ratione suppositi est æqualis Patri, & idem Deus cum illo ; ergo, &c. Hinc Christus, Matth. 22. hunc textum Psalmistæ, *Dixit Dominus Domino meo, sedes a dextris meis*, adhibet ut suam Judæis divinitatem probet.

Inst. 2. Ephes. 4. Christus, ut homo, *Ascendit super omnes calos, ut impleret omnia*. Ergo est ubique.

Resp. nego consequ. Neque enim ille textus de locorum impletionem intelligendus est, sed, vel de oraculorum omnium completa adimptione, vel de impletionem bonorum spiritualium, quomodo *omnes repleti sunt de Spiritu sancto*.

Objicies 2. Quando duo sunt inseparabiliter unita, ubicumque unum illorum est, ibi debet esse & alterum ; atqui Verbum & humanitas inseparabiliter uniuntur, & Verbum est ubique ; ergo humanitas Christi est ubique.

Resp. dist. maj. Quando duo sunt inseparabiliter unita, tunc ubi reperitur unum, reperitur etiam & aliud, si hæc duo uniantur adæquate & totaliter, *conc.* inadæquate, *neg.* *maj.* sic quia manus, quæ est inseparabiliter unita animæ, non adæquat totam animæ extensionem, ubi est manus, est quidem anima ; sed non ubicumque est anima, ibi est etiam manus ; ita est de humanitate Christi, quæ cum non adæquet immensitatem Verbi, ideo ubi illa reperitur, etiam reperitur Verbum ; sed non ubicumque est Verbum, est etiam humanitas.

Inst. 1. Si humanitas Christi non sit ubicumque est Verbum, sequitur Verbum alicubi esse hominem, & alicubi non esse hominem ; absurdum consequ. ergo, &c.

Resp. nego sequel. maj. Ex eo enim quod humanitas Christi non sit ubicumque est Verbum,

bum, sequitur equidem, quod Verbum alicubi est, ubi non est humanitas Christi; sed non sequitur quod alicubi non sit homo, seu unitus intrinsece humanitati, quam semel assumptam, nunquam dimisit.

Inst. 2. Verbum divinum est ubique; sed Christus homo est Verbum divinum; ergo Christus homo est ubique.

Resp. 1. nego consequ. Hinc enim syllogismus est mera fallacia, *A dicto simpliciter ad dictum secundum quid*; in majori, Verbum divinum sumitur simpliciter & in se, quatenus supponit pro sola natura divina; in minori vero sumitur secundum quid, nimirum quatenus est unitum humanitati; porro a dicto simpliciter, ad dictum secundum quid, non valet argumentatio, in qua sunt quatuor termini.

Resp. dist. min. Christus homo, est Verbum divinum incarnatum, *conced.* non incarnatum, *nego min.* Porro Verbum incarnatum, duplici constat natura, divina nempe & humana; secundum divinam est ubique, non secundum humanam.

Inst. 3. Hæc propositio est vera: *Christus, seu, hic homo, qui est Christus, est ubique*; ergo & ista: *Christus, ut homo, est ubique*.

Resp. nego consequ. Disparitas est, quod in prima propositione *homo*, supponit pro supposito, quod est immensum & ubique; in secunda vero, *homo*, propter particulam reduplicativam, *quatenus*, supponit pro sola humanitate, quæ, cum sit finita, non potest esse ubique.

§. II. Quot, & quænam sint Regula observanda,
ut recte fiat idiomatum communicatio.

CONCLUSIO.

*Sex observanda sunt regula in communicatione
idiomatum.*

Prima regula, Quando duæ naturæ comple-
tæ existunt in eodem supposito, ipsæ naturæ,
& proprietates naturarum, possunt vere ac pro-
prie de se mutuo prædicari in concreto: mo-
do illa concreta non inferant suppositum crea-
tum, nec reduplicentur, nec faveant errori
vel hæresi; sic dicitur, *Deus est homo: homo
est Deus: Deus est mortalis: homo est immorta-
lis.* Ratio est, quia concreta significant subje-
ctum in recto, subjectum autem in recto est
persona, in quam duæ naturæ conveniunt.

Dixi 1. *Modo illa nomina concreta non infe-
rant suppositum creatum,* quia faveret hæresi
Nestorii, duas admittentis in Christo personas,
sic falsa est hæc propositio: *Homo factus est
Deus,* quia videtur supponere hominem fuisse
creatum antequam a Verbo divino assumeretur;
ista autem est vera, *Deus factus est homo.*

Nec dicas, Hæc propositio, *Homo factus est
Deus,* est convertens hujus, *Deus factus est
homo.* Ergo utraque vera est.

Resp. nego ant. Nam prædicatum hujus pro-
positionis convertendæ, *Deus factus est homo,*
non est. id homo, sed, *qui factus est homo.* Un-
de sic debet converti: *Qui factus est homo, est
Deus;* quod verum est.

Dixi: 2. *Modo concreta non reduplicentur:*
quia particula reduplicativa ipsam naturam affi-
cit, non personam: sic falsa est hæc propositio.
Christus, quatenus Deus, est homo; nam sensus
est,

est, *Christus*, ratione natura divina, est homo, quod est falsum.

Dixi: 3. *Modo non faveant errori aut haresi*; hinc ista propos. *Christus est creatura*, non est simpliciter enuntianda, quia errori Arianorum favet, qui, ex eo quod *Christus* diceretur creatura, docebant eum absolute minorem esse Patre: idem sit iudicium de hac propos. *Christus incepit esse*, quæ ideo non debet simpliciter enuntiari, sed cum hac restrictione, *Secundum humanitatem*.

Secunda regula, Concreta, quæ conveniunt soli humanæ naturæ in abstracto expressæ, non autem supposito ratione ipsius suppositi, non possunt prædicari de supposito, nec de natura divina, etiam in concreto; *Ratio est*, quia non supponunt pro supposito; sic non potest dici: *Christus est pura creatura: Deus est assumptus*.

Tertia regula, Concreta unius naturæ, aut ejus attributorum, non possunt prædicari de abstractis alterius naturæ, aut illius attributorum, saltem formaliter & proprie; *Ratio est*, quia habent alium significandi modum; nempe abstracta per modum formæ habitæ & constituentis, concreta vero per modum habentis & constituti; sic hæc propos. *Divinitas est homo*; est falsa in sensu formali, licet in sensu identico sit vera, quia hæc vox, *Homo*, importat suppositum in recto, quod identificatur divinitati.

Quarta regula, Concreta adjectiva, quæ substantiam designant, non possunt stricte prædicari de Christo; secus de iis quæ significant proprietates naturæ divinæ aut humanæ; sic non potest dici, *Christus est homo deificatus, dominicus, deifer, &c.* potest vero dici, *Christus est æternus & temporalis*.

Ratio

Ratio primi, Est, quia ejusmodi concreta adjectiva innuere videntur formam accidentali-
liter tantum & moraliter supposito esse uni-
tam, qui sensus est Nestorianus. Hinc quan-
do Patres has voces usurpant, improprie lo-
quuntur, adjectivum nempe sumendo pro sub-
stantivo.

Ratio secundi, Est, quia ejusmodi concreta adjectiva denominative, significant suppositum in recto, quod est subjectum illorum attribu-
torum.

Quinta regula, Abstracta naturarum & ea-
rum proprietatum, non possunt de se mutuo
prædicari; *Ratio est*, quia naturæ ipsæ, sicut
& earum proprietates, sunt distinctæ realiter,
unde non supponunt pro eodem in recto. Sic
dici non potest: *Humanitas est divinitas: di-
vinitas est humanitas: divinitas est passibilis:
humanitas est impassibilis*, &c.

Sexta regula, Abstracta naturæ divinæ, de
persona Christi identice prædicari possunt, non
autem abstracta naturæ humanæ. *Ratio est*;
quia persona Verbi, est quid idem identice
& realiter cum natura divina, non vero cum
natura humana. Sic dici potest, *Persona Verbi
est divinitas: est omnipotentia*, &c. sed non
potest dici, *Persona Verbi est humanitas: est
mortalitas*, &c.

DISSERTATIO VII.

*De termino totali Incarnationis, seu
de Christo.*

Nota: **H**anc dissertationem in octo distri-
buemus Capita. In 1. agemus de
scientia Christi. In 2. de ejus gratia, donis,

ac virtutibus. *In* 3. de ejus libertate. *In* 4. de ejus merito. *In* 5. de ejus satisfactione. *In* 6. de variis ejus titulis ac officiis. *In* 7. de illius adoratione, reliquiarum & imaginum cultu. *In* 8. tandem de Beata Virgine Matre Christi. Sit itaque.

C A P U T I.

De Scientia Christi.

Nota: **D**E Scientia Christi, quatenus Deus est, egimus, *Tom. II. pag. 172.* Hic ergo unice quaestio movetur de scientia creata, quæ triplex est, nempe, *Beatifica*, quæ in clara Dei visione posita est. *Infusa*, tum *per se*, quæ omnem naturæ exigentiam ita superat, ut sola divina infusione haberi possit. Tum *per accidens*, quæ licet propriis naturæ viribus comparari possit, a Deo tamen liberaliter infunditur absque ullo humanitatis actu. *Acquisita*, quæ propriis naturæ viribus, successu temporis, comparatur. His positis.

C O N C L U S I O I.

Christus aliquam habuit scientiam creatam. Est de fide.

Prob. 1. Ex VI. Synodo, quæ, *Act. 4. & 8.* approbavit Epistolam Agathonis Papæ, in qua dicitur: *Confitemur in Christo omnia duplicia: quæ ad naturas perveniunt: duas naturas ejus predicamus, & unamquamque proprietates habere confitemur: divinam, omnia quæ divina: humanam omnia quæ humana sunt, absque peccato.* Ergo si omnia in Christo sint duplicia, Christus habet duos intellectus, & duas operationes, nimirum intellectus divini & humani.

Prob. 2.

Prob. 2. Ratione D. Thomæ: Christus habuit animam rationalem; ergo & scientiam ipsi respondentem. *Prob. conseq.* Anima rationalis in Christo non fuit sine sua propria operatione, alias fuisset imperfecta, utpote frustrata sine propter quem est; atqui propria animæ rationalis operatio est cognitio & scientia; ergo Christus habuit cognitionem & scientiam creatam.

Solvuntur Objectiones.

Obicies 1. Christus omnia cognoscebat per scientiam divinam; ergo inutilis erat cognitio creata. *Resp. nego conseq.*

Prob. conseq. Frustra fit per plura, quod potest fieri per pauciora; ergo si Christus omnia cognoverit per scientiam divinam, scientia creata fuit inutilis.

Resp. dist. antec. Frustra fit per plura, &c. quando fit per eandem facultatem, *conc.* quando fit per diversas facultates, *nego ant.* Christus autem ratione diversarum facultatum, diversas habebat cognitiones, increatam nempe & creatam, nec frustra per unam facultatem fiebat, quod per alteram facultatem intellectivam non poterat præstari.

Inst. Majus lumen offuscat minus; atqui scientia divina est majus lumen, scientia creata est minus; ergo, &c.

Resp. dist. maj. Majus lumen offuscat minus, si sint ejusdem ordinis, *conc.* si sint diversi, *nego maj.* Porro scientia divina est in ordine illuminantis, scientia creata in ordine illuminati; ergo sicut aer a sole, sit creata scientia a divina non offuscatur, sed clarescit.

Obicies 2. Christus idcirco non habuit substantiam creatam, quia per increatam sufficientem

cienter subsistebat ; atqui sufficienter etiam omnia cognoscebat per scientiam increatam ; ergo .

Resp. 1. retorq. Sic ; atqui Christus sufficienter etiam omnia volebat per volitionem increatam ; ergo unica volitio fuit in Christo , quod est hæreticum .

Resp. 2. nego maj. & paritatem . Disparitas est . 1. Quia subsistentia Verbi se habebat per modum puri termini , dependentiam humanitatis hypostatice terminantis ; atqui dependentia humanitatis potest a propria vel aliena subsistentia terminari ; scientia vero se habebat per modum cujusdam formæ informantis in ratione facultatis intellectivæ , quæ nullo modo potest suppleri , nemo enim intelligit per intellectionem alterius . 2. Quia subsistentiæ multiplicatio , supposita realiter multiplicaret , quod repugnat Christo , multiplicatio vero operationum non multiplicat supposita , sed notat tantum multiplicationem facultatum .

CONCLUSIO II.

Christus , ut homo , a primo instanti conceptionis habuit scientiam beatificam perfectam , non tamen comprehensivam . Est de fide quoad tertiam partem , & ita certa quoad primam & secundam , ut contraria sit saltem , *Temeraria* , immo secundum aliquos est *Erronea* , utpote communi fidelium sensui repugnans .

Prob. prima pars. 1. Ex Scriptura , Joann. 6. Omnis qui audivit a Patre , venit ad me . Non quia Patrem vidit quisquam , nisi is qui est a Deo , hic vidit Patrem . Ibi Christus de se ipso loquitur ut homine : atqui testatur se vidisse Patrem , visione utique intuitiva , cum hanc visionem opponat abstractivæ visioni aliorum
via-

viatorum; ergo, &c. item, Joann. 8. Christus dicit: *Si dixero quoniam nescio eum (Patrem) ero similis vobis mendax; sed scio eum, & sermonem ejus seruo.* Christus eo loci loquitur de se ipso: ut homo est, ut probant hæc verba: *Sermonem ejus seruo*; atqui asserit se scire Patrem, scire autem, est rem clare & absque ænigmate cognoscere; qui enim clare & intuitive non videt, credit, non novit, nec scit; ergo, &c.

Prob. 2. ex PP. Eusebius Cæsariensis, lib. 3. *Evangelicarum demonst. cap. ult.* introducit Christum sic Deum alloquentem: *Cum adhuc intra cellam gestantis me in utero laterem, te Deum meum videbam.* Et Divus Fulgentius resp. ad quæst. 3. Ferdinandi Diaconi, dicit: *Sicut Christus singulariter habet, ut sit Deus verus, sic totam divinitatem suam singulariter novit, & plenam habet notitiam divinitatis suæ, scilicet secundum animam.* Unde Card. de Laurea d. 14. quæst. 2. ait: *Nusquam in scholis, vel aliqua particulari Ecclesia, privilegium hoc fuit negatum animæ Christi.*

Suffragatur ratio, quia natura humana per incarnationem sublimata est ad esse divinum; ergo pariter elevari debuit ad perfectissimam operationem; atqui perfectissima operatio, est visio beatifica; ergo, &c.

Prob. secunda pars: Quia visio beatifica debebatur animæ Christi vi suæ unionis hypostaticæ cum Verbo, ut innuitur Joann. 1. *Vidimus gloriam ejus, gloriam quasi unigeniti a Patre, plenum gratia & veritatis;* atqui a primo instanti conceptionis anima Christi fuit unita Verbo; ergo a primo instanti conceptionis habuit visionem beatificam.

Prob. tertia pars: Tum ex dictis, Tomo II. ubi probavimus divinam essentiam esse incomprehensibilem omni creata cognitione; tum ex
Con-

Concilio Basileensi, *sess.* 22. ubi damnata est hæc propos. Augustini de Roma: *Anima Christi videt Deum tam clare & intense, quam clare & intense videt seipsam.*

Solvuntur Objectiones.

Objicies contra primam partem: De Christo dicitur, Joann. 7. *Nondum erat Spiritus datus, quia Jesus nondum erat glorificatus.* Ergo Scriptura supponit Christum non fuisse glorificatum ante passionem; unde Christus, instante morte, sic orabat: *Clarifica me, Pater, apud remetipsum, &c.*

Resp. disting. conseq. Scriptura supponit Christum ante passionem non fuisse glorificatum, quoad corpus, vel quoad Ascensionem in cælum & exaltationem nominis sui, *conced.* quoad animam, *neg.* *conseq.* Primus enim locus intelligitur de glorificatione Christi in ipsa die Ascensionis, quando, *videntibus* Apostolis, *elevatus est, & nubes suscepit eum ab oculis eorum.* Actor. 1. Secundus locus intelligitur de gloria corporis & nominis exaltatione, de qua Apostolus, Philipp. 2. ait: *Propter quod & Deus exaltavit illum, & donavit illi nomen, quod est super omne nomen, &c.*

Inst. 1. Christus in terris erat viator; ergo non potitus est visione beatifica.

Respond. dist. ant. Christus erat viator, simul & comprehensor, *conced.* erat viator tantum, *neg.* *ant.* Christus enim respectu visionis beatificæ comprehensor, viator erat respectu impassibilitatis & immortalitatis sui corporis, quam mereri debuit; nam Lucæ 24. *Oportuit Christum pati, & ita intrare in gloriam suam, id est, sui corporis.*

Inst. 2. Visio beatifica cum maximo dolore,

re, maximaque tristitia, non potest compati; atqui Christus maximos dolores, maximamque expertus est tristitiam, ut ipse declarat, Matth. 26. *Tristis est anima mea usque ad mortem*. Ergo.

Respond. dist. maj. Visio beatifica non potest compati cum maxima tristitia, naturaliter, *conc.* supernaturaliter, seu per miraculum, *subdist.* circa idem objectum & ex eodem motivo, *conced.* circa objectum & motivum diversum, *neg. maj.* Porro Christus per miraculum cohibuit vim delectationis quam sua anima percipiebat ex Dei fruitione, ut ipsa posset tristitiæ affectionem percipere, tum ex ejus morte, tanquam malum naturæ, tum ex peccato discipulorum, eum abnegantium, & Judæorum eum occidentium, tanquam malum morale ipsi summe displicens.

Objicies contra secundam partem: Christus sibi meruit scientiam beatificam; ergo illam a primo instanti suæ conceptionis non habuit.

Resp. nego antec. Neque enim visio beatifica Christo fuit concessa titulo mercedis, sed jure filiationis naturalis: porro non prius fuit homo, quam Filius Dei naturalis; ergo.

Probat. antec. Christo tribui debet id quod perfectius est; atqui perfectius est aliquid habere ex merito, quam sine merito; ergo, &c.

Resp. dist. min. Perfectius est aliquid habere ex merito, quando illius rei assecutio non derogat dignitati naturali, *conc.* quando dignitati naturali derogat, *neg. min.* Itaque cum visio beatifica, ratione unionis hypostaticæ & filiationis naturalis, quasi nativo jure, Christo debeatur, fuisset quoddam illius dignitati præjudicium, si illam per studium & laborem debuisset promereri.

Quæ-

Quæres, Quanam Christus scientia beatifica cognovit in essentia divina?

Resp. Cognovit actualiter omnia præsentia, præterita, & futura, etiam secreta cordium; non tamen cognovit omnia possibilea actualiter.

Ratio prima partis, est; quia istarum omnium cognitio pertinet ad statum Christi, cum ut homo, sit Iudex omnium constitutus, caput Angelorum & hominum, & Dominus omnium; atqui ex D. Thoma hic, quilibet beatus videt in essentia divina omnia quæ ad ipsum spectant; ergo, &c. Unde, *Matth. 9.* de Christo dicitur: *Cum vidisset cogitationes eorum.* Et *Joann. 2.* *Ipse enim (Christus) sciebat quid esset in homine.*

Ratio secunda partis, est quia omnia possibilea simul actu cognosci non possunt, quin comprehendatur Dei omnipotentia; atqui nullus intellectus creatus potest comprehendere Dei omnipotentiam; ergo, &c.

CONCLUSIO III.

Christus, ut homo, a primo instanti sua conceptionis, præter scientiam beatificam, habuit scientiam, tum per se, tum per accidens, infusam.

Prob. 1. Christus, a primo conceptionis instanti, fuit vir perfectus, juxta illud *Jerem. 31.* *Novum creavit Dominus super terram, femina circumdabit virum.* Atqui non fuisset vir perfectus, si, more cæterorum hominum, ad plenam rerum omnium scientiam debuisset paulatim, & quasi per ætatis gradus, pervenire; ergo, &c. Unde Apostolus *Coloss. 2.* de Christo, ait: *In quo sunt omnes thesauri sapientia & scientia absconditi.*

Prob. 2.

Prob. 2. Omnis perfectio, quæ non habet oppositionem, vel cum visione beatifica, vel cum statu redemptoris, Christo est tribuenda, utpote ipsi, ratione unionis hypostaticæ, debita; atqui scientia, sive per se, sive per accidens, infusa, est perfectio, quæ nec habet oppositionem cum statu redemptoris, cum ejus carentia nihil conferre potuerit ad finem redemptionis; nec cum visione beatifica, cum res diversimode cognosci possint, nimirum in essentia divina per scientiam beatificam, & in se ipsis per scientiam infusam; ergo Christus, ut homo, habuit scientiam infusam, & quidem a primo instanti conceptionis, cum ipsi debita fuerit ratione unionis, nec ulla fuerit ratio ejus concessionem differendi.

Solvuntur Objectiones.

Objicies 1. Scientia infusa inutilis est ei, qui scientia gaudet beatifica; atqui Christus scientia beatifica gaudebat; ergo ei inutilis fuit scientia infusa.

Resp. nego maj. Nihil enim inutile est in beatis; atqui tamen reipsa in beatis, præter scientiam beatificam, quæ res videntur in essentia divina; & quæ ideo dicitur *cognitio matutina*, datur etiam scientia infusa, quæ eadem res videntur in se ipsis per species intelligibiles divinitus inditas, quæ ideo vocatur *cognitio vespertina*; ergo.

Probat. maj. Per scientiam beatificam cognoscuntur omnia, quæ cognosci possunt per infusam; ergo hæc inutilis est.

Resp. dist. ant. Cognoscuntur, diverso modo, *conc.* eodem modo, *nego antec.* Nam per scientiam beatificam res cognoscitur in essentia divina; per scientiam infusam cognoscitur in se, seu in propria specie; hic autem modus cognoscendi, Christum decebat; sicut & de-

cuit,

euit, ut videret oculis corporeis; quod mente per scientiam beatificam videbat.

Inst. 1. Scientia infusa est incompatibilis cum beatifica; ergo non possunt esse simul in eodem intellectu.

Prob. antec. Scientia perfecta & scientia imperfecta, non possunt simul stare in eodem intellectu de eadem re; atqui scientia beata est perfecta, scientia vero infusa est imperfecta; ergo.

Respond. nego min. Utraque enim scientia est perfecta in suo genere & ordine, licet comparative beatifica sit perfectior, hæc enim pertinet ad statum & ordinem gloriæ; illa ad statum & ordinem gratiæ.

Instab. 2. Ideo fides non remanet in beatis; quia cognitio per fidem est imperfecta comparative ad cognitionem intuitivam; atqui similiter cognitio infusa, est imperfecta comparative ad cognitionem intuitivam; ergo.

Respond. nego maj. Vera enim ratio, cur fides non remaneat cum scientia beata, est, quia fidei & scientiæ beatæ idem est immediatum objectum, scilicet Deus: & sic cum videatur clare & distincte per scientiam beatam, supervacaneum est, ut videatur obscure & abstractivè per fidem; at vero non est idem objectum scientiæ infusæ & scientiæ beatæ, hæc Deum habet pro objecto immediato, illa habet pro immediato objecto res a Deo distinctas, illasque videndas in propria specie.

Objicies 2. Scientia Christi beatifica, utpote perfectissima, absorbebat potentiam ejus intellectivam; ergo locum non relinquebat scientiæ infusæ.

Resp. dist. ant. Absorbebat potentiam intellectivam, secundum suum cognoscendi modum, *conc.* secundum omnem cognoscendi modum, *nego antec.* Itaque medium cognitionis scientiæ beatæ

beatificæ, est ipsa divina essentia, quatenus repræsentativa rerum, quas eminenter continet; medium vero scientiæ infusæ, sunt species intelligibiles divinitus inditæ, quæ res cognoscendas repræsentant, non secus ac si illæ species essent proprio labore comparatæ: porro operatio respondens uni cognitionis medio, non officit operationibus alteri cognitionis medio respondentibus.

CONCLUSIO IV.

Christus ut homo, præter scientiam beatificam & infusam, habuit etiam scientiam acquisitam.
Est D. Thomæ hic, & communis inter Theologos.

Probat. 1. Ex Scriptura, Luca 2. de Christo dicitur, Proficiebat ætate & sapientia. Atquæ non proficiebat sapientia infusa, ea enim in ipso fuit a primo conceptionis puncto; ergo proficiebat sapientia acquisita.

Hebr. 5. dicitur: *Cum esset Filius Dei, didicit, ex eis quæ passus est, obedientiam.* Quæ locus intelligitur de scientia experimentalis acquisita, quæ proprio experimento didicit, quam arduum esset exequi quæ Deus ab eo postulabat; licet enim hanc arduitatem jam antea novit per scientiam infusam, nondum tamen cognoscebat experientia propria, quæ certe non excluditur scientia infusa.

Prob. 2. ratione: Scientia acquisita, ea est, quæ quis per varias mentis vel sensuum exteriorum operationes, aliquid successive intelligit, vel in se experitur; atqui Christus usus est sua ratione, ex primis principiis conclusiones inferendo, ac suis sensibus, famem, sitim, aliasque corporis infirmitates patiando; ergo habuit scientiam acquisitam.

Charmes, Theol. Schol. Tom. III. L. Obje-

Objicies : Divus Damascenus, *lib. de fide*, c. 12. & alii Patres negant Christum in scientia profecisse; ergo in eo non fuit scientia acquisita.

Resp. dist. antec. Negant Christum in scientia profecisse, hoc sensu, quod nihil didicerit, quod antea penitus ignoraverit, *conc.* hoc sensu, quod non ceperit rem aliquam certo scientiæ modo cognoscere, quo eam ante non noverat *nego antec.* Porro ad perfectionem intellectus Christi spectat, non solum omnia objecta cognoscere, sed etiam secundum omnem modum quo cognoscibilia sunt; unde cum aliter res, maxime sensibiles, cognosci possint per phantasmata ab ipsis abstracta, quam per species a Deo infusas, idcirco hic cognoscendi modus in Christo est asserendus, utpote cum sit maxime connaturalis animæ Christi quatenus conjunctæ humano corpori.

Inst. Scientiæ naturales debebantur Christo ratione unionis hypostaticæ; ergo non potuit illas requirere.

Resp. dist. antec. Debeantur, quoad aliquem modum habendi, nempe per species a Deo infusas, *conc.* quoad omnem modum habendi, *nego antec.* Itaque Christus ratione unionis debuit habere omnem scientiam modo supernaturali per infusionem ab initio suæ conceptionis, verum hic modus habendæ rerum cognitionis, non excludit acquisitionem cognitionis earundem rerum modo connaturali; nempe per discursum & propriam experientiam.

C A P U T II.

De gratia, donis, ac virtutibus Christi.

Nota 1. **Q**uadruplex in Christo gratiarum genus communiter a Theologis distinguitur, nimirum:

Gratia unionis ad Verbum, per quam humanitas Christi substantialiter sanctificata, ac Deo acceptissima fuit.

Gratia habitualis, quæ est sanctitas adventitia, perficiens animam in ordine ad operationes supernaturales eliciendas.

Gratia actualis, quæ est influxus Dei ad actionem supernaturalem concurrentis.

Gratia gratis data, quæ sunt dona supernaturalia ad utilitatem aliorum gratuito concessa.

Nota 2. Virtutes, aliæ sunt Theologicæ, aliæ Morales, ad quas revocantur dona Spiritus sancti. Hic ergo resolvendum est, utrum Christus his omnibus gratiis & virtutibus fuerit ornatus. Ideo fit:

C O N C L U S I O I.

Fuit in Christo gratia unionis, per quam humanitas Christi sanctificata est sanctitate substantiali. Ita D. Thomas hic, & alii communiter contra Durandum.

Prob. 1. Ex Scriptura, Joann. 10. *Quem Pater sanctificavit, & misit in mundum, vos dicitis: quia blasphemas? quia dixi: Filius Dei sum.* Ibi Christus intendit probare se esse Filium Dei naturalem, quia sua missione in mundum, id est, unione humanitatis ad Verbum, fuit sanctificatus; atqui sanctificatio, quæ per unionem hypostaticam communicatur, est sub-

stantialis ; ergo Christus fuit sanctificatus sanctitate substantiali unionis.

Prob. 2. ex Patribus: Greg. Nazianz. orat. 2. de Paschate, ait : *Perfectus enim fuit (Christus) non modo propter divinitatem, qua nihil est perfectius, sed etiam propter humanitatem divinitate delibutam, idemque effectum quod id, quo peruncta est.* D. Damasc. l. 3. orthodoxæ fidei, c. 3. dicit : *Ipse enim (Christus) seipsum unxit : corpus videlicet divinitate sua ungens ut Deus ; unctus autem ut homo, quandoquidem ipse & hoc & illud est : unctio porro humanitatis est divinitas.* Ex quibus sic argumentor : qui ipsa divinitate ungitur, gratia substantiali sanctificatur ; atqui Christus, juxta Patres, divinitate ungitur ; ergo.

Prob. 3. ratione : Sanctificari substantialiter, est habere esse divinum sibi substantialiter unitum ; atqui Christi humanitas, per unionem hypostaticam, habet esse divinum sibi substantialiter unitum : nam Verbum divinum seipsum formaliter ac substantialiter communicavit humanitati suæ, hoc ipso, quod ei personaliter unitum est ; ergo humanitas Christi, per gratiam unionis hypostaticæ, substantialiter fuit sanctificata.

Solvuntur Objectiones.

Objicies 1. Ex Concil. Trid. sess. 6. cap. 7. Gratia habitualis est unica causa justificationis & sanctitatis ; ergo humanitas Christi non sanctificatur nisi per illam.

Respond. dist. ant. Gratia habitualis est unica causa sanctitatis accidentalis, quæ solum terminatur ad filiationem adoptivam, *conc.* sanctitatis substantialis, quæ terminatur ad filiationem naturalem, *nego ant.* Itaque sicut Deus est in se, for-

se formaliter sanctus per sanctitatem sibi identificatam, sic humanitas Christi est formaliter sanctificata per substantialem Verbi sanctitatem, non quidem sibi identificatam, sed sibi realiter hypostatice unitam.

Inst. 1. Verbum non communicat humanitati suam immensitatem æternitatem, &c. Ergo nec suam sanctitatem.

Resp. nego conseq. Disparitas est, quod humanitas sit capax recipiendæ sanctitatis substantialis, quæ nihil aliud est, quam sui unio hypostatica cum verbo; e contra immensitatis & æternitatis recipiendæ est incapax; cum enim humanitas illa sit finita & limitata, tum in entitate, tum in duratione, habet ex natura sua repugnantiam ut sit infinita, immensa, & æterna.

Instab. 2. Humanitas Christi, est tam capax divinæ scientiæ & potentiæ, quam sanctitatis; atqui ex sui cum Verbo unione, non recipit omnipotentiam & omniscientiam; ergo nec sanctitatem substantialem.

Resp. nego maj. Disparitas est, quod sanctitas se habeat per modum rei cuiusdam moralis, subjectum moraliter efficientis, ob quam illud subjectum dignum censeatur, quod diligatur a Deo, quod sit expers peccati, & jus habeat ad æternam beatitudinem, quæ omnia non præsupponunt aliquam formam intrinsece existentem; at vero omnipotentia & scientia se habent per modum rei physicæ, subjectum physice efficientis, quod præsupponit formam intrinsece inexistentem, sive per identitatem, sive per informationem; & ideo humanitas in Christo potest participare sanctitatem Verbi in se moraliter derivatam, non potest autem participare scientiam aut omnipotentiam, quæ ipsi, nec possunt identificari, nec inhærere.

Inst. 3. Ergo saltem sanctitas, quæ ex unionē hypostatica derivatur in humanitatem, non est intrinseca; ergo non est intrinsece sancta sanctitate substantiali.

Resp. dist. ant. Non est intrinseca, physice, id est, sanctitate, vel sibi identificata, vel a qua informetur, *conc.* non est intrinseca moraliter, *nego ant.* Certum est enim quod humanitas redatur sancta sanctitate Verbi in ipsam derivata intrinsece, moraliter & æquivalenter in ordine ad varios effectus sanctificationis.

Obicies 2. Si Divinitas humanitatem sanctificaret formaliter, etiam personalitates Patris & Spiritus sancti, Divinitati realiter identificatæ, eandem sanctificarent; falsum consequ. ergo, &c.

Resp. nego seq. maj. Quia effectus & denominationes Divinitatis, spectatæ non præcise secundum se, sed ut est in aliqua persona, v. g. *Uniri, sanctificare formaliter*, &c. non sunt communes toti Trinitati.

Inst. Divinitas non potest esse forma humanitatis; ergo non potest illam sanctificare formaliter.

Resp. dist. antec. Non potest esse forma proprie dicta quæ perficiatur & in subjecto recipiatur, *conc.* improprie dicta, *nego ant.* Equidem divinitas non potest esse forma humanitatis, sed se habet respectu illius instar formæ illam substantialiter sanctificantis, seclusa omnī imperfectione.

CONCLUSIO II.

Christus, ut homo, habuit gratiam habituatam. Est communis omnium Theologorum, unde sententia opposita, est temeraria.

Prob. 1. Ex Scriptura, Isaia 11. *Requiescet super*

super eum Spiritus Domini. Atqui per Spiritum Domini intelligitur gratia habitualis permanens, ut docet Tertull. (p) his verbis: *Requiescere habebat omnis operatio gratia spiritalis; ergo, &c.*

Lucæ 1. *Quod nascetur ex te Sanctum vocabitur Filius Dei*. Ubi designantur sanctificatio & per gratiam unionis, & per gratiam habitualement, juxta illud D. Bernardi (q) *singulariter sanctum fuit, quidquid Virgo concepit, & per Spiritus sanctificationem, & per Verbi assumptionem.*

Joann. 1. *Verbum caro factum est plenum gratia & veritatis*. Atqui illa plenitudo intelligitur, tum de gratia substantiali Christi, *In quo habitat omnis plenitudo Divinitatis corporaliter*. Tum de gratia habituali, quæ tanta fuit, ut major non potuerit dari de lege ordinaria; ergo, &c. Hinc D. August. lib. 15. de Trinit. cap. 26. ait: *Dominus ipse Jesus non solum Spiritum sanctum dedit ut Deus, sed etiam accepit ut homo: & propterea est plenus gratia, quia unxit eum Deus spiritu sancto, non utique oleo visibili, sed dono gratia, quod visibili significatur unguento, quo baptizatos ungit Ecclesia*. Hic D. Doctor manifeste loquitur de gratia adventitia habituali.

Prob. 2. *ratione*: Quia omnis perfectio supernaturalis, quæ nullam habet repugnantiam cum unionem hypostatica, & nullam imperfectionem includit, Christo denegari non debet; atqui gratia habitualis est magna perfectio, cum sit vel habitus charitatis infusus, vel inseparabiliter connexa cum habitu charitatis,

(p) Lib. 5. contra Marcion. cap. 4.

(q) Hom. 4. in missus est.

tatis, sitque principium radicale, & maxime connaturale operationum supernaturalium, nec ullam habet imperfectionem annexam, aut repugnantiam cum unione hypostatica; ergo Christo denegari non debet.

Solvuntur Objectiones.

Obicies 1. Qui incapax est filiationis adoptivæ, est etiam incapax gratiæ habitualis; atqui Christus est incapax filiationis adoptivæ, ut probabitur cap. 7. ergo, &c.

Prob. maj. Filiatio Dei adoptiva, est formalis effectus gratiæ habitualis, quam Apostolus Roman. 8. vocat *Spiritum adoptionis filiorum*; atqui forma non potest esse in subiecto sine suo effectu formali; ergo gratia habitualis non potest esse in Christo, nisi sit Filius Dei adoptivus.

Respond. dist. maj. Filiatio Dei adoptiva est formalis effectus secundarius gratiæ habitualis, conc. primarius, nego maj. & sic distincta minore, nego conseq. Porro quamvis effectus primarius alicujus formæ non possit separari a subiecto cui forma illa communicatur, tamen separari potest ab eo effectus secundarius: effectus itaque primarius & formalis gratiæ habitualis est reddere subiectum suum Deo gratum & sanctum sanctitate formali & inhærente, ad quem effectum divina filiatio adoptiva sequitur, ubi, & quando subiectum, quod hæc gratia afficit, est incapax filiationis adoptivæ: unde cum Christus, pro eo instanti, quo recepit gratiam habitualement, jam esset Filius Dei naturalis per gratiam unionis, hinc est quod gratia habitualis non potuit illi conferre filiationem adoptivam: naturalis enim filiatio opponitur filiationi adoptivæ, quam impedit.

Obji-

Objicies 2. Gratia habitualis conceditur maxime, ut anima fiat Deo grata; atqui anima Christi non potest esse magis grata cum gratia habituali, quam sine illa; ergo, &c.

Resp. dist. min. Non potest esse magis grata intensive, *conc.* extensive, *nego min.* Equidem Christus per gratiam unionis, fuit infinite Sanctus, & sic per gratiam habitualement non potuit esse magis gratus *intensivè*, quia infinito nihil est majus; sed potuit esse magis gratus *extensivè* per gratiam habitualement, quia est aliud genus sanctificationis, quod non excluditur per gratiam unionis.

Objicies 3. Gratia habitualis non erat Christo necessaria; ergo non debet illi tribui.

Resp. dist. ant. Non erat Christo necessaria absolute, *conc.* non erat necessaria Christo ut connaturaliter eliceret actus supernaturales & meritorios, *nego ant.* Itaque agens connaturaliter operari dicitur, quando habet proportionem ad actus quos elicit; sed anima Christi, cum sit entitas naturalis, non potest habere proportionem ad producendos actus supernaturales absque gratia habituali; ergo illa ad hoc fuit Christo necessaria.

Inst. 1. Gratia actualis potuit sufficienter elevare animam Christi ad actus supernaturales connaturaliter eliciendos; ergo ad hoc non fuit necessaria gratia habitualis.

Resp. nego antec. Equidem gratia actualis sufficit ut actus supernaturalis fiat, sed non sufficit ut fiat connaturaliter, saltem de potentia ordinaria: agens enim naturale non inclinatur ad suum effectum connaturalem, nisi per aliquam formam in se permanentem.

Inst. 2. Gratia habitualis non est ex se operativa, nec ordinatur ad operationem; ergo non fuit necessaria Christo ad actus supernaturales eliciendos connaturaliter.

Resp. dist. ant. Non ordinatur ad operationem primario & proxime, *conc.* radicaliter & secundario, *nego ant.* Gratia habitualis equidem primario & proxime ordinatur ad sanctificandam animam, & eam efficiendam Deo gratam; verum secundario & radicaliter ordinatur ad operationem, quatenus virtutem animæ confert ad producendos actus supernaturales.

Quarunt hic Theologi, utrum gratia Christi habitualis fuerit infinita?

Respond. Non fuit infinita physice & in genere entis, sed tantum moraliter, nempe juxta quamdam æstimationem moralem propter conjunctionem cum personalitate Verbi.

Probat. prima pars: Quia quidquid est creatum, est, secundum entitatem finitum, nam Sap. 11. *Deus fecit omnia in pondere, numero & mensura*; sed gratia habitualis est quid creatum; ergo.

Prob. secunda pars. Quia quidquid, unione hypostatica mediante, unitur Verbo, illud quamdam infinitatem moralem contrahit; atqui gratia habitualis mediante unione hypostatica Verbo unita est; ergo, &c. Illam infinitatem tangit D. Thomas, quæst. 7. art. 11. ad 2. dicens: *Gratia Christi habet infinitum effectum propter unitatem divina persona, cui anima Christi unita est.*

Objicies contra primam partem: Dicitur Joannis 3. *Non ad mensuram dat Deus Spiritum Filio*; ergo ejus gratia finita non est.

Resp. nego conseq. Ex textu enim non sequitur gratiam Christi habitualement esse entitative infinitam, sed sequitur tantum quod non sit limitata secundum propriam rationem gratia, inquit D. Thomas, eo quod secundum propositum Dei, cujus est gratiam mensurare, gratia confertur anima Christi, sicut cuidam universali.

prim-

principio gratificationis in humana natura, secundum illud Ephes. 1. Gratificavit nos in dilecto Filio suo.

Inst. Quod habet effectum infinitum, etiam in entitate infinitum est; atqui gratia habitualis habet effectum infinitum, juxta D. Thom. cit. ergo, &c.

Resp. dist. maj. Quod habet effectum infinitum physice, conc. moraliter, nego maj. hoc itaque solo sensu gratia Christi habet effectum infinitum, quod sicut causa meritoria omnium gratiarum, quas intuitu illius meritorum Deus hominibus & Angelis concedit.

CONCLUSIO III.

Christus habuit gratiam actualem, non quidem excitantem, sed cooperantem.

Probat. prima pars: Quia gratia ideo dicitur excitans, quia hominem quasi sopitum excitat ad bonum operandum; atqui Christus nunquam fuit sopitus, sed semper vigil, & ad optima quæque erectus; ergo, &c.

Prob. secunda pars: Christus in actibus suis naturalibus, non obstante unione ad Verbum, eodem concursu naturali indigebat, quo indigent cæteri homines, ob essentialem ac necessariam dependentiam creaturæ a creatore; ergo similiter, non obstante gratia unionis & habituali, egebat insuper gratiis actualibus adjuvantibus, quibus egere solent homines ad actus supernaturales eliciendos: unde D. Augustinus Epistola 7. ad Dardanum, ait: *Sicut in capite sunt omnes sensus, ita & in Christo sunt omnes gratia.*

Objicies: Verbum divinum per unionem hypostaticam sufficienter supplevit concursum Dei necessarium ad opera supernaturalia elicienda;

ergo ad id non fuit necessaria gratia actualis.

Resp. nego ant. Quia Verbum divinum per unionem hypostaticam sustentabat equidem & terminabat humanitatem, sed active nihil efficiebat, unde nil mirum si in Christo requisitus fuerit insuper aliquis concursus in genere causæ efficientis ad supernaturales & meritorias actiones peragendas, qui concursus nihil aliud est, quam gratia actualis.

CONCLUSIO IV.

Christus habuit omnes gratias gratis datas.
Est communis contra Abulensem.

Prob. Apostolus 1. Cor. 12. novem, enumerat gratias datas dicens: Alii per spiritum datur sermo sapientia: alii autem sermo scientia secundum eundem spiritum: alteri fides in eodem spiritu: alii gratia sanctorum: alii operatio virtutum: alii prophetia: alii discretio spirituum: alii genera linguarum: alii interpretatio sermonum. Atqui Christus omnes illas gratias habuit; ergo.

Prob. min. Percurrendo singulas gratias gratis datas, & quidem:

1. *De sapientia:* Est enim perfecta mysteriorum fidei cognitio, qua conclusiones e principiis fidei deducuntur; atqui hæc gratia fuit in Christo, unde Doctores, quos sedens docebat, *Stupebant super prudentia ejus.* Luca 2.

2. *De scientia:* Quia nihil aliud est, quam perfectissima rerum creatarum verb. gr. Virtutum & vitiorum cognitio, & peritia deducendi ex eis conclusiones, easque aliis proponendi; atqui fuit in Christo, qui varia præcepta moralia tradidit.

3. *De fide,* Quæ hic sumitur pro fide miraculorum, juxta illud Marci 16. *Habete fidem Dei:*

Dei : amen dico vobis, quia quicumque iusserit huic monti, tollere & mittere in Mare, & non hesitaverit in corde suo, sed crediderit, quia quodcumque dixerit, fiat, fiet ei; atqui fiducia fuit in Christo, qui de seipso dicit Joann. 11. Ego autem sciebam, quia semper me audis.

4. De gratia sanitatum, innotescit ex Luc. 6. Virtus de illo exibat & sanabat omnes.

5. De operatione virtutum: constat ex Luc. 24. ubi dicitur: De Jesu Nazareno, qui fuit vir Prophetæ, potens in opere & sermone coram Deo & omni populo.

6. De Prophetia, constat tum ex textu superiori, tum quia, Luca 7. de Christo dicitur: Prophetæ magnus surrexit in nobis.

7. De discretionem spirituum, pariter innotescit: nihil enim aliud est quam facultas penetrandi quo spiritu quis impellatur ad aliquid dicendum vel faciendum; atqui Christus hanc facultatem habuit, ut constat ex Matth. 22. ubi indicavit Phariseos proposuisse ei questionem de censu reddendo Cæsari, ut caperent eum in sermone: unde cognita nequitia eorum, ait: Quid me tentatis, hypocritæ?

8. De generibus linguarum: Clarum est enim, quod in Christo, qui erat Doctor universalis, fuerit facultas loquendi variis linguis & idiomatibus.

9. De interpretatione sermonum. Quia nihil aliud est quam peritia explicandi obscuros & reconditos sensus sacrae Scripturae; atqui hæc gratia fuit in Christo qui Lucæ 24. Incipiens a Moyse, & omnibus Prophetis, interpretabatur illis (discipulis qui ibant in Castellum, nomine Emmaus.) In omnibus Scripturis quæ de ipso erant. Ergo, &c.

Dices cum Abulensi, Fides Theologica non fuit in Christo; ergo nec gratia prophetiæ.

Probæ

Prob. conseq. Ideo fides non fuit in Christo, quia obscuritatem includit, quæ incompatibilis est cum visione intuitiva; atqui donum prophetiæ obscuritatem similiter importat; ergo.

Resp. dist. min. Donum prophetiæ importat obscuritatem per accidens, *conc.* per se & essentialiter, *neg. min.* & *conseq.* Dispar est ergo ratio inter fidem & prophetiam, quod fides essentialiter obscuritatem includat, & ideo non potest stare cum visione beatifica; at vero prophetia est tantum obscura per accidens, nimirum respectu Prophetarum, quibus quandoque res revelata non est nota nisi sub involucris & in ænigmate; at hoc fuit per accidens ad prophetiæ donum, ad quod præcise spectat percipere & annuntiare quæ naturalem hominum notitiam excedunt, sive sint præterita, sive præsentia, sive futura.

Instab. Quod est evacuandum, non fuit in Christo, nam quod est evacuandum dicit imperfectionem; atqui ex 1. ad Cor. 13. *Prophetia evacuabuntur*; ergo donum prophetiæ non fuit in Christo.

Resp. dist. maj. Quod est evacuandum quoad se, *conc.* quoad effectum, *neg. maj.* Atqui prophetiæ evacuabuntur, quoad effectum instructionis aliorum, *conc.* quoad se, & propter earum imperfectionem, *neg. minor.* Itaque prophetiæ evacuabuntur, sicut scientia destruetur, non quidem quoad habitum, sed quoad effectum instructionis aliorum, quia in altera vita nulli supererunt edocendi.

CONCLUSIO V.

Omnia dona Spiritus sancti fuerunt in Christo.

Prob. 1. Ex Scriptura, *Isaia II.* ubi Christo tribuuntur septem dona Spiritus sancti, his

verbis : *Egredietur virga de radice Jesse . . . & requiescet super eum Spiritus Domini : spiritus sapientia & intellectus ; spiritus consilii & fortitudinis ; spiritus scientia & pietatis , & replebit eum spiritus timoris Domini .* Quem locum exponens de Christo Theodoretus , ait : *In ipso habitavit tota plenitudo divinitatis corporaliter , & secundum humanitatem omnia Spiritus charismata .*

Prob. 2. ratione : Omnis perfectio a Deo collata hominibus , Christo debet tribui , si non adversetur unioni hypostaticæ , aut statui beatitudinis ; atqui dona Spiritus sancti sunt perfectiones , quibus homo prompte & expedite Deo moventi obsequitur , nec adversantur unioni hypostaticæ , aut statui beatitudinis ; ergo .

Obicies : Quædam ex donis Spiritus sancti important imperfectionem ; ergo in Christo non debent admitti .

Prob. antec. Consilium supponit ignorantiam & dubitationem circa agibilia ; atqui dubitatio & ignorantia est imperfectio ; ergo .

Respond. dist. major. Supponit ignorantiam , per accidens , & ratione subjecti , *conc.* per se , *neg. maj.* Licet ergo consilium , ut est in nobis , habeat ignorantiam & dubitationem sibi annexas ; id provenit ex nostra imperfectione ; non vero ex imperfectione consilii , quod formaliter importat duntaxat rectum & sanum de agendis iudicium .

Inst. Saltem donum timoris non fuit in Christo : nam ex 1. Joann. 4. *Timor non est in charitate , sed perfecta charitas foras mittit timorem ;* atqui in Christo fuit perfecta charitas ; ergo .

Resp. dist. maj. Timor servilis ex metu gehennæ conceptus non est in charitate , *conc.* timor filialis & reverentialis , *neg. maj.* Porro timor in Christo fuit pure filialis , & reveren-
tia-

tialis, quia nihil aliud est, quam affectus sum-
mæ reverentiæ erga infinitam Dei majestatem.

CONCLUSIO VI.

*Fuerunt in Christo, tum charitas, tum om-
nes virtutes morales, tam infusa quam acqui-
sita, absque imperfectionibus, quæ vel proprium
peccatum supponunt, vel statui beatitudinis ad-
versantur.*

Prob. 1. de charitate: Charitas, vel est quid
idem cum gratia habituali, ut volunt Scotistæ,
vel ejus individua comes, ut volunt Thomi-
stæ; atqui in Christo fuit gratia habitualis, ut
probavimus supra; ergo, &c.

Prob. 2. de virtutibus moralibus infusis: Quia
ex dictis, fuit in Christo gratia habitualis præ-
stantissima; atqui virtutes morales infusæ, gra-
tiam habitualement veluti connaturaliter sequun-
tur, simulque cum illa infunduntur, ut indi-
catur in his, Sap. 7. verbis: *Venerunt mihi om-
nia bona pariter cum illa; ergo, &c.*

Prob. 3. de virtutibus acquisitis: Quia non
sunt denegandæ Christo virtutes illæ, quæ ani-
mam perficere ac rite instituere poterant ad
opera legi naturæ consentanea, & intra limi-
tes ejusdem legis, exercenda; atqui tales sunt
virtutes morales; ergo.

Objicies: Habitus virtutum acquisitarum inu-
tiles sunt cum virtutibus infusis; ergo non fue-
runt in Christo.

Resp. nego antec. Diversum enim est illarum
munus; nam virtutes infusæ dant solum agere
in ordine ad finem supernaturalem; naturales
vero in ordine ad finem naturalem, quæ mu-
nia a se invicem distingui constat.

*Dixi, absque imperfectionibus, quæ, vel pec-
catum supponunt, vel statui beatitudinis adver-
santur.*

sanctur: quia nullum fuit, nec esse potuit peccatum in Christo, qui insuper, a primo conceptionis instanti, visione beatificæ fruitus est.

Hinc, 1. *Fides non fuit in Christo*, quia fidei obscuritas, per visionis beatificæ claritatem, excluditur. Unde, cum, *Isaia* 11. de Christo dicitur: *Et erit fides cinctorium renium ejus*. Per fidem, intelligitur fidelitas in promissis.

2. *Spes non fuit in Christo*. Fides ex Apost. Hebr. 11. est fundamentum spei, *est enim sperandarum substantia rerum*. Ergo ubi non est fides, ibi non est spes Theologica; atqui in Christo non fuit fides; ergo, &c.

Nec dicas 1. Fuit in Christo spes circa gloriam corporis, nominis exaltationem, & alia quæ promeruit; ergo.

Prob. ant. Gratia corporis, exaltatio nominis, erant bona Christo absentia, possibilis & ardua; ergo, &c.

Resp. nego consequ. Nam ad spem Theologicam non sufficit, ut ejus objectum sit arduum, possibile, & absens; sed insuper requiritur, ut ejus possessio futura, sit incerta & anceps; at Christus de illorum bonorum possessione futura; erat omnino securus & certus; ergo.

Nec dicas 2. Spes Theologica Christo tribuitur, Ps. 15. *Caro mea requiescet in spe*. Ergo.

** Resp. nego ant.* Neque enim spes ibi sumitur pro virtute Theologica, sed pro simplici desiderio, expectatione, & confidentia.

3. *Temperantia non fuit in Christo*, quatenus importat resistantiam pravis concupiscentiæ motibus, quia sic peccatum supponit, a quo ortum habuit concupiscentia; sed solum quatenus dicit abstinentioniam ab omni voluptate venerea.

4. *Pœnitentia non fuit in Christo*, quatenus dicit principium actus, quo dolemus de peccatis.

catis propriis, sed solum quatenus dicit principium actus, quo dolemus de peccatis alienis & offensa Dei.

Quæres: Quando nam Christus habuit virtutes acquisitas?

Respond. Eas habuit a primo instanti conceptionis, quia ei statim debitæ fuerunt ratione unionis hypostaticæ; unde illæ virtutes, quæ ideo dicuntur acquisitæ, quia per actus repetitos possunt acquiri, in Christo fuerunt infusæ per accidens.

C A P U T III.

De libertate Christi.

Nota 1. **E**X dicendis, *tomo 4.* libertas alia est a coactione, alia a simplici necessitate.

Libertas a coactione, est immunitas ab omni violentia ab extrinsecò, contra voluntatis inclinationem illata.

Libertas a necessitate simplici, est potentia activa, quæ positis omnibus ad agendum prærequisitis, potest agere vel non agere, vel hoc aut ejus contrarium agere; unde duplex quasi species libertatis distinguitur, nempe *contradictionis*, qua agens liberum, potest agere, vel non agere; & *contrarietatis*, qua potest aliquid agere, vel ejus contrarium, sed hæc ad essentiam libertatis non pertinet, juxta illud S. Anselmi, dialogo de lib. arb. c. 1. *nec libertas, nec pars libertatis est, potestas peccandi: immo est defectus libertatis*, ait D. Thom. ex quo certum est libertatem contrarietatis non fuisse in Christo, qui potentiam peccandi, nec assumpsit, nec assumere potuit. Itaque:

Quærendum superest 1. Utrum Christus circa

ca præcepta fuerit liber, & quomodo: 2. Quæ-
ratione conciliari possit ejus libertas cum ejus
impeccabilitate, duplici quæstione.

Q U Æ S T I O I.

*Utrum Christus circa præcepta fuerit liber,
& quomodo?*

Nota 1. **D**uplicis generis esse præcepta qui-
bus Christus fuit obligatus; nem-
pe naturalia, quæ a lege naturali dictantur,
v. g. præcepta de Deo amando, parentibus ho-
norandis, &c. & præcepta positiva, quæ lege
positiva imponuntur, v. g. præceptum de mor-
te subeunda, juxta illud Joann. 14. *sicut man-
datum dedit mihi Pater, sic facio.*

Nota 2. In quolibet præcepto duo distin-
guuntur, nimirum substantia præcepti, & cir-
cumstantiæ ipsi adjunctæ v. gr. in præcepto
charitatis, ipsa dilectio est substantia præce-
pti; hoc vel illud motivum ex quo elicitur,
hic vel ille finis ad quem ordinatur, actus in-
tensio vel remissio, &c. sunt præcepti circum-
stantiæ. His positis.

C O N C L U S I O I.

*Christus fuit liber circa præcepta legis natu-
ralis, non quidem quoad substantiam rei impera-
ta, sed solum quoad motivum & circumstantias.*

Prob. 1. pars: Libertas circa substantiam rei
præceptæ, aut prohibitæ, consistit in hoc quod
possit omitti res præcepta, aut poni res prohi-
bita; atqui Christus rem lege naturali præce-
ptam non potuit omittere, aut rem eadem le-
ge prohibitam ponere, alias peccato obnoxius
fuisset; ergo.

Prob.

Prob. secunda pars : quia , nec motivum actus præcepti determinatur , nec circumstantiæ imperantur lege naturali : v. gr. per præceptum honorandi parentes , neque motivum , vel charitatis , vel obedientiæ , ex quo id præstare debeamus , neque omnes actus circumstantiæ determinantur ; ergo Christus circa motivum & circumstantias illorum præceptorum fuit liber .

CONCLUSIO II.

Christus in subeunda morte a Patre præcepta , fuit liber , non solum quoad circumstantias , sed etiam quoad ipsam mortem in se consideratam .

Prob. 1. Ex Scriptura , Isaïæ 53. Oblatus est , quia ipse voluit : in quem locum Div. Hieron. ait : non enim necessitate crucem , sed voluntate sustinuit .

Joann. 10. Ego pono animam meam ... nemo tollit eam a me , sed ego pono eam a me ipso . Supra quæ verba D. Aug. tract. 47. in Jo: ait : non glorientur Judæi *sæviant quantum possunt , si ego noluerò animam meam ponere , quid saviendo facturi sunt ? & D. Chrysost. hom. 28. in Epist. ad Hebr. Erat ei promptum , si voluisset , non venire ad Crucem : potestatem , inquit , habeo ponendi animam meam .*

Prob. 2. ex PP. qui eandem doctrinam apertissime tradunt . D. Aug. tract. 37. in Joann. Dominus , inquit , quando voluit , carnem in utero virginali accepit ... quando voluit a carne discessit : hoc est potestatis , non necessitatis .

D. Greg. lib. 24. moral. cap. 2. Dominus , ait , Non pœnam ex necessitate suscepit mortem nostram , omni necessitate calcata , cum voluit , sponte suscepit .

Prob. 3. Ratione in Scriptura fundata : Christus ipsa sua morte meruit , juxta illud . Jo: 10.

Pro-

Propterea me diligit Pater, quia ego pono animam meam. Et illud Heb. 5. Consummatus, factus est omnibus obtemperantibus sibi causa salutis aeternae. Atqui ad merendum requiritur libertas a necessitate simplici, ut definivit Innocent. X. hanc prop. Jansenii, ut hæreticam damnando: Ad merendum & demerendum in statu naturæ lapsæ, non requiritur in homine libertas a necessitate, sed sufficit libertas a coactione. Ergo Christus in subeunda morte fuit liber.

Nec obstant hæc particulæ: In statu naturæ lapsæ: quia non sunt restrictivæ, sed ampliativæ, quasi diceretur, Etiam in statu naturæ lapsæ, quod patet ex scopo Pontificis Jansenium damnantis, qui docebat in statu naturæ innocentis, in quo fuit natura Christi, fuisse libertatem a necessitate, eamque per peccatum Adami periisse.

Objicies; Christus erat impeccabilis; atqui impeccabilitas stare non potest cum potestate non adimplendi præceptum; ergo.

Resp. nego min. Quia Christi libertas cum ipsius impeccabilitate recte conciliari potest. Quod ut manifestum fiat, sit:

Q U Æ S T I O II.

Qua ratione conciliari possit Christi libertas cum ejus impeccabilitate?

C O N C L U S I O.

Christi libertas circa mortem præceptam, rite cum ejus impeccabilitate conciliari potest, dicendo eam in hoc consistere, quod potuerit dispensationem a Patre petere & obtinere, si voluisset, quam tamen volens ac lubens non petivit.

Præb.

Prob. Ex Matth. 26. ubi Christus aperte significat se potuisse dispensationem præcepti de morte subeunda obtinere, his verbis: *An putas, quia non possum rogare Patrem meum, & exhibebit mihi modo plusquam duodecim legiones Angelorum?* Atqui qui dispensationem ab aliquo præcepto petere potest & obtinere, nec tamen eam vult petere, ad hujus præcepti observationem, vel non observationem, est maxime liber; ergo.

Solvuntur Objectiones.

Objicies 1. Præceptum de morte subeunda Christo impositum, fuit indispensabile, juxta illud Luc. 24. *Nonne hac oportuit pati Christum;* ergo Christus non potuit illius dispensationem obtinere.

Resp. dist. antec. Fuit indispensabile, postquam Christus sese determinavit ad non petendam dispensationem, *conc.* ante illam determinationem, *nego ant.* Porro Scripturæ locus loquitur de eo quod factum est, non de eo quod fieri potuit, Christus autem passus est, quia sese libere determinavit ad non petendam a mandato Patris dispensationem.

Inst. 1. Christus dispensationem petiit a Patre; Matth. 26. dicens, *Pater, si possibile est, transeat a me calix iste:* & tamen non obtinuit; ergo præceptum fuit indispensabile.

Respond. dist. ant. Dispensationem petiit inefficaciter & conditionate, *conc.* efficaciter & absolute, *nego ant.* Itaque Christus inefficaciter petiit dispensationem ut veritatem humanitatis suæ demonstraret, sed statim absolute mortem acceptavit, his verbis. *Verumtamen non sicut ego volo, sed sicut tu.* Ad quæ verba Div. August. *Serm. 5. de Passione Domini,* ait:

ait: *Prima petitio infirmitatis est, secunda virtutis, qua se passioni tradidit, illud optavit ex nostro, hoc elegit in proprio.*

Inst. 2. Voluntas Filii non potest esse contraria voluntati Patris; atqui, si Christus dispensationem hujus præcepti petiisset, ejus voluntas fuisset contraria voluntati Patris; ergo.

Prob. min. Pater determinate voluit mortem Filii; ergo.

Resp. dist. ant. Voluit determinate mortem Filii, & simul statuit Filium ab ea lege dispensare, si efficaciter dispensationem petiisset, *conc.* & simul statuit non dispensare, *nego ant.* Prudens enim superior, aliquid libere præcipiens, semper præcipit sub hac tacita conditione, *Nisi dispensavero.*

Inst. 3. Quando Christus dixit: *An putas quia non possum rogare Patrem meum, &c.* Jam acceptaverat legem moriendi; ergo inde non potest concludi, quod dispensationem ab illa lege potuerit obtinere.

Resp. dist. ant. Jam acceptaverat legem moriendi, & simul facultatem sibi reservaverat dispensationem petendi ab illa lege, si vellet, *conc.* secus, *nego ant.* Et hoc manifeste colligitur ex textu allato.

Inst. 4. Præceptum, quo quis sese liberare potest per dispensationem quam habet in sua potestate, non est verum & rigorosum præceptum; atqui Christo fuit impositum præceptum moriendi verum & rigorosum; ergo, &c.

Resp. dist. maj. Non est verum & rigorosum præceptum, si ab eo quis possit se se eximere auctoritate propria, *conc.* si sola auctoritate præcipientis, *nego maj.* Certe præceptum audiendi Missam die festo, est verum & rigorosum, etiam erga eum, qui certus est se ab eo di-

dispensationem obtenturum a superiore, si illam voluerit petere.

Inst. 5. Præceptum rigorosum semper obligat sub culpa; atqui præceptum, a quo quis potest dispensationem obtinere, non semper obligat; ergo.

Resp. dist. maj. Semper obligat sub culpa, vel ad rem præceptam exequendam, vel ad obtinendam dispensationem, *conc.* semper obligat sub culpa ad exequendam rem præceptam, *nego maj.* Ab omni enim præcepto positivo potest Legislator dispensare, nec potest subditus illi non obtemperare absque peccato, nisi dispensationem obtineat, qua posita, nulla remanet rei præceptæ exequendæ obligatio.

Objicies 2. Modus quo conciliamus libertatem Christi cum ejus impeccabilitate non solvit difficultatem; nam non est quæstio, utrum Christus liber fuerit in petenda dispensatione, sed quomodo, stantibus ejus impeccabilitate & præcepto divino, fuerit liber ad implendum illud præceptum, vel non implendum; ergo non satisfacit ille conciliandi modus.

Resp. nego ant. Ad probationem fateor hic quæstionem non esse, utrum Christus fuerit liber in petenda dispensatione, sed contendo, Christum eo ipso fuisse liberum in adimplendo præcepto, quo fuit liber in petenda dispensatione, quam sese obtenturum sciebat; hoc enim sufficit ad veram circa præceptum libertatem.

Inst. Ergo Christus non fuit liber ad præceptum non implendum, eo stante, sed tantum eo per dispensationem sublato; atqui de illa libertate non est hic quæstio; ergo.

Resp. nego illarum: Quia præceptum illud erat disjunctivum, de morte subeunda, vel de petenda

tenda dispensatione; atqui primum Christus eligit libere, quando se determinavit ad non petendam dispensationem; ergo fuit perfecte liber.

C A P U T IV.

De merito Christi.

Nota. **M**eritum, est operis valor in ordine ad præmium, & duplex est, nempe meritum de condigno & meritum de congruo.

Meritum de condigno, Est opus bonum cui, ex iustitia, præmium debetur *Meritum de congruo*, est opus bonum, cui, ex quidam duntaxat decentia, præmium est debitum de solo merito de condigno, quod solum verum & proprie dictum est meritum, hic est controversia, & quaeritur 1. An Christus vere & proprie meruerit. 2. Quandonam. 3. Per quos actus. 4. Tandem, quidnam & quibus personis, meruerit.

C O N C L U S I O I.

Christus vere ac proprie meruit. Est de fide.

Prob. 1. Ex Scriptura, quæ docet Christum morte sua meruisse sibi gloriam corporis & nominis exaltationem; hominibus vero salutem: Philipp. 2. *Factus est obediens usque ad mortem . . . propter quod & Deus exaltavit illum*, &c. Hebr. 5. *Consummatus, factus est omnibus obtemperantibus sibi, causa* (utique meritoria) *salutis aeterna.*

Prob. 2. Ex Conc. Trid. sess. 6. c. 7. de Christo dicente: *Sua Sanctissima Passione in ligno Crucis nobis justificationem meruit, & pro nobis Deo Patri satisfecit.*

Charmes, Theol. Schol. Tom. III. M. Prob.

Prob. 3. ratione : Quia omnes conditiones ad meritum de condigno reperiuntur in Christo; ad verum namque meritum de condigno requiritur 1. *Ex parte actus*, ut sit honestus, liber, & præmio proportionatus. 2. *Ex parte merentis*, ut sit Deo charus & viator. 3. *Ex parte præmiantis*, ut intervenerit pactum, seu promissio; atqui nulla hic deest conditio, ne postrema quidem, ut constat ex illo Isaïæ 53. *Si posuerit pro peccato animam suam, videbit semen longævum.* Ergo, &c.

CONCLUSIO II.

Christus meruit a primo Conceptionis instanti usque ad extremum vitæ suæ spiritum, & non ultra.

Prob. prima pars : Ex Hebr. 10. ubi de Christo dicitur : *Ingrediens mundum dicit : hostiam & oblationem noluisti : corpus autem aptasti mihi tunc dixi, ecce venio, ut faciam, Deus, voluntatem tuam.* Ergo, juxta Apostolum, ingrediens mundum, id est, in primo instanti suæ Conceptionis, obtulit se Deo Patri, ut morte sua impleret voluntatem ejus de Redemptione generis humani : hæc autem oblatio utique fuit meritoria, & ideo subdit Apostolus : *In qua voluntate sanctificati sumus per oblationem corporis Jesu Christi semel.*

Prob. secunda pars : Quia ad meritum necessario requiritur status vitæ; atqui Christus post mortem non fuit amplius viator; ergo, &c. Unde de seipso dicit, Joann. 9. *Me oportet operari opera ejus, qui misit me, donec dies est; venit nox quando nemo potest operari.* Ubi per diem, intelligitur tempus vitæ, & per noctem, tempus mortis.

Solvuntur Objectiones.

Objicies contra primam partem; Prius est esse, quam operari; ergo Christus non meruit primo suæ Conceptionis instanti.

Resp. dist. ant. Prius est, natura, *conced.* prius est, tempore, *negō antec.* Unde potuit eodem instanti reali incipere esse & operari libere, adeoque mereri.

Inst. 1. Id quod habetur primo instanti, tribuitur producenti; ergo.

Resp. dist. ant. Quod habetur, vi ipsius generationis, *conced.* quod habetur, per entis producti determinationem, *negō ant.* Primus autem Christi actus fuit a propria voluntate elicitus.

Inst. 2. Si Christus meruisset primo Conceptionis instanti, nihil postea mereri potuisset; falsum consequens; ergo.

Prob. seq. maj. Qui meritis est quodlibet præmium, non potest amplius mereri; atqui Christus per meritum primi instantis, meritis fuisset quodlibet præmium; illud enim meritum fuisset infiniti valoris; ergo.

Resp. dist. min. Meritis fuisset quodlibet præmium, si illud primum opus fuisset seorsim acceptatum ad præmium, *conced.* aliter, *negō min.* Itaque merita Christi non fuerunt singula seorsim acceptata a Deo ad præmium, sed omnia simul ut morte consummata.

Objicies contra secundam partem. SS. Patres asserunt ex latere Christi post mortem aperto fluxisse Sacramenta; atqui non fluxerunt realiter, sed meritorie; ergo Christus post mortem meritis est.

Resp. dist. maj. SS. Patres asserunt Sacramenta ex latere Christi profluxisse, figurative, *conced.* meritorie, *negō maj.* Itaque, ex dictis Patrum,

M 2

non

non sequitur, quod Christus per illius sanguinis & aquæ profluvium promeritus fuerit divinam Sacramentorum virtutem & efficaciam; sed tantum quod Sacramenta Baptismi & Eucharistiæ, in isto sanguinis & aquæ profluvio, adumbrata & expressa fuerint.

Inst. 1. Ex Apost. Rom. 4. Christus *resurrexit propter justificationem nostram*. Ergo per suam resurrectionem meritus est.

Resp. nego consequ. Nam particula, *Propter*, non significat ibi causam meritoriam, sed causam exemplarem nostræ justificationis, quia repræsentabat nostram resurrectionem ad vitam gratiæ.

Inst. 2. Christus in cælo adhuc nobis impetrat dona cælestia; ergo.

Resp. dist. ant. Impetrat dona cælestia, meritum in morte sua consummatum Deo offerendo, nobisque applicando, *conc.* de novo merendo, *nego ant.* Hoc sensu Apostolus, Hebr. 7. dicit: quod sit *semper vivens ad interpellandum pro nobis*,

CONCLUSIO III.

Christus meruit per omnes actus liberos humanitatis suæ, non vero per actus Divinitatis.

Prob. prima pars: Quia nulli earum actionum defuerunt conditiones ad meritum necessariae; fuerunt enim honestæ, liberæ, proportionatæ præmio, factæ a justo, a Deo acceptatæ cum promissione præmii, juxta illud Psalmi 2. *Postula a me, & dabo tibi gentes hereditatem tuam*. Ergo.

Prob. secunda pars: Quia ratio meriti dicit subjectionem præmiati ad præmiantem; atqui Christus in actibus suæ divinitatis non potest sub-

subjici, cum divinitas non habeat superiorem; ergo.

Quæres, utrum Christus meruerit per actus amoris Dei? Ante responsionem:

Nota. Duplex distinguitur amor Dei in Christo, nempe beatificus, qui elicited est ex directione visionis beatificæ, & alius supernaturalis ab amore beatifico distinctus, qui elicited est ex directione scientiæ infusæ. Unde:

Respond. Christus non meruit per actum amoris, quem ex visione beatifica eliciebat, sed solum per actum dilectionis, quem ex scientia infusa elicit.

Prob. prima pars: Quia ad meritum, requiritur ut actus sit liber & a viatore elicited; atqui actus amoris, ex visione beatifica profluens, nec fuit liber, nec a viatore, sed a comprehensore elicited; ergo.

Prob. secunda pars: Amor Christi, qui a scientia infusa oriebatur, erat liber & Christi ut viatoris, aliasque actus meritorii conditiones habebat; ergo Christus per eum meruit, ut asserit D. Thom. hic quæst. 19. art. 3. ad 1. Non tamen, inquit, per charitatem meruit, in quantum erat charitas comprehensoris, sed in quantum erat viatoris.

CONCLUSIO IV.

Christus meruit, sibi quidem corporis gloriam & exaltationem nominis, nobis autem omnia dona gratiæ & gloriæ; Angelis vero sanctis quasdam illustrationes, & gaudia, aliæque dona accidentalialia, non vero gratiam & gloriam essentialem.

Prob. prima pars, Quæ est de fide, Philipp. 2. Humiliavit semetipsum, factus obediens usque ad mortem, mortem autem Crucis. Propter

quod & Deus exaltavit illum, & donavit illi nomen, quod est super omne nomen, ut in nomine Jesu omne genuflectatur, &c. Atqui ibi verus causalitas significatur; ergo.

Ratio D. Thom. hic art. 3. est, quia nobilius est habere aliquid ex merito, quam sine merito, nisi aliquid obftet; atqui nihil obstat quominus Christus gloriam corporis & exaltationem nominis acciperet ex merito, cum illis aliquando caruerit; ergo.

Objicies: Gloria corporis & nominis exaltatio erant Christo debitæ ratione unionis hypostaticæ; ergo illas non meruit.

Resp. nego conseq. Nam debitum naturale, & meritum inter se non pugnant; ergo duplici illo titulo Christus recepit gloriam corporis & nominis exaltationem.

Instab. Christus non potest dici propter se mortuus; atqui si sibi meruit, pro se mortuus est; ergo.

Respond. dist. major. Non potest dici pro se mortuus, ex primaria intentione, conc. ex secundaria, *nego maj.* Christus siquidem ex primaria intentione venit & mortuus est propter peccata nostra tanquam principale motivum, quo cessante non venisset, cum quo tamen stat quod sibi etiam aliquid meruerit.

Prob. secunda pars, quæ est de fide. 1. Quoad dona gratia, Roman. 3. *Justificati gratis per gratiam ipsius, per redemptionem qua est in Christo Jesu.* Et 1. Joann. 2. *Sanguis ejus emundat nos ab omni peccato.* Quibus verbis significatur nostram justificationem esse gratuitam respectu nostri, & remuneratoriam respectu Christi. Idem definiit Conc. Trid. sess. 6. c. 5. *Declarat (S. Synodus) ipsius justificationis exordium in adultis a Dei per Christum Jesum præveniente gratia sumendum esse.*

Prob.

Prob. quoad dona gloria: Ex Apost. Rom. 5. Multo magis abundantiam gratia donationis & iustitia accipientes, in vita regnabunt per unum Jesum Christum. Quod etiam definitur in Concil. Trident. sess. 6. cap. 16. Bene operantibus usque in finem, & in Deo sperantibus proponenda est vita aeterna, & tanquam gratia filii Dei per Jesum Christum misericorditer promissa; & tanquam merces, &c.

Prob. tertia pars: Quia Coloss. 2. Christus est caput omnis principatus & potestatis, id est, Angelorum; ergo aliquid ipsis meruit; atqui ipsis non meruit gratiam & gloriam essentialem; ergo ipsis meruit aliquas illustrationes & gloriam accidentalem.

Prob. quarta pars: Christus iis tantum meruit gratiam & gloriam essentialem, pro quibus mortuus est; atqui Christus non est mortuus pro Angelis, nam ex Hebr. 2. Qui sanctificat & qui sanctificantur, ex uno omnes. . . nusquam enim Angelos apprehendit, sed semen Abrahae apprehendit.

Ratio est, quia gratia, & consequenter gloria, decreta est Angelis ante praevisam Incarnationem; ergo non ex meritis Christi.

Objicies: Ephes. 1. Apostolus dicit, Deum omnia instaurasse in Christo quae in caelis & in terra sunt. Ergo Christus Angelis meritus est gratiam & gloriam.

Resp. nego consequ. Textus enim exponi debet de ruina Angelorum in caelis instaurata per electos, qui loca rebellium Angelorum occupaturi sunt, & de reparatione hominum in terris, facta per redemptionem generis humani.

Inst. 1. Eccles. 1. dicitur: Complacuisse Deo per Christum reconciliare omnia in ipsum, pacificans per sanguinem crucis ejus, sive quae in terris, sive quae in caelis sunt. Ergo.

Resp. nego conseq. Sensus textus est, omnia per Christum reconciliata esse, eo quod homines & Angeli, qui per peccatum divisi erant, reconciliati sunt inter se, & in Christo, ut communi capite, moraliter uniti.

Inst. 2. D. Gregor. in lib. 2. Reg. c. 2. ait: *Angeli sanctificati creduntur in Filio*. Ergo sanctificantur per Gratiā Christi.

Resp. dist. conseq. Per gratiam Christi, ut Deus est, *conc.* ut homo Deus, *nego conseq.* ibi D. Doctor aperte loquitur de Christo ut Deo, unde non dicit, *in Christo*, sed dicit, *in Filio*.

Instab. 3. Divus Bernardus Serm. 1. de Circumcisione ait: *Idem quippe & Angeli Salvator & hominis*. Atqui loquitur de Christo, ut homo Deus; ergo.

Respond. nego minor. Loquitur enim de Christo ut Deo, ut clare se explicat, addens: *Sed hominis ab Incarnatione, Angeli ab initio creatura*; ergo loquitur de Christo, ut est creator.

C A P U T · V.

De satisfactione Christi.

Nota: **S**ociniani fatentur quidem Christum improprie ac metaphorice pro nobis satisfecisse, hoc nempe sensu, quod patientiæ & obedientiæ exemplum nobis præbuerit; sed negant ipsum vere ac proprie pro nobis satisfecisse, hoc catholico sensu, quod poenæ, quas passus est, essent pretium redemptionis nostræ, quo nimirum poenæ nobis debitæ compensarentur; unde inferunt Patrem æternum ex mera misericordia, & sine ullo ad Passionem Christi respectu, poenam peccato debitam iis remittere qui credunt in eum.

Econ-

Econtra Catholici omnes docent Christum pro nobis vere, proprie, ac perfecte satisfecisse; sed aliqui contendunt eum non satisfecisse ex vera iustitia; alii fatentur satisfecisse ex vera quidem iustitia, sed non stricta & rigorosa: quæ omnia triplici quæstione solvemus.

Q U Æ S T I O I.

Utrum Christus vere & proprie pro nobis satisfecerit?

C O N C L U S I O.

Christus vere, proprie, & perfecte, pro nobis satisfecit. Est de fide.

Prob. 1. Argumento ex Scriptura deducto: ille vere ac proprie pro nobis satisfecit, quem Pater poenis peccato debitis oneravit; qui illas poenas persolvendas in se suscepit, qui illas loco nostri, per veram in locum nostrum subrogationem, persolvit; atqui Christus. 1. Poenis peccato debitis oneratus fuit a Patre. 2. Illas poenas solvendas in se suscepit. 3. Eisdem poenas loco nostri, per veram subrogationem, persolvit; ergo.

Prob. prima pars min. Isaïæ 53. Posuit Dominus in eo iniquitatem omnium nostrum. Rom. 8. proprio Filio suo non pepercit, sed pro nobis omnibus tradidit illum. Unde S. Cyrill. Alexand. lib. 2. in Joann. ait: Quoniam in peccato eramus, atque idcirco morti & interitui debebamus; Filium suum Pater in redemptionis pretium dedit pro nobis; ergo.

Prob. secunda pars min. Ex Galat. 3. Christus nos redemit de maledicto legis, factus pro nobis maledictum: id est, punitionem nobis debitam in se transtulit. Unde D. August. lib. 14. contra Faustum cap. 4. ait; Suscepit Christus sine

reatu supplicium nostrum, ut inde solveret reatum nostrum.

Prob. tertia pars min. Ex Roman. 8. Cum adhuc peccatores essemus, secundum tempus, Christus pro nobis mortuus est. 2. Corinth. 5. dicitur: qui non noverat peccatum, pro nobis peccatum fecit. Ex quibus sic argumentor: pro aliquo agere aut pati, est illius vice & loco agere aut pati per veram in illius locum subrogationem: nam particula, pro, ex usu Scripturæ, aut rei, aut personæ, in alterius rei, aut personæ locum, subrogationem significat; sic 2. regum 18. David ait: Absalon fili mi, quis mihi tribuat ut ego moriar pro te? id est, utinam loco tuo mortuus essem. Atqui Christus pro nobis mortuus est, pro nobis pœnas peccati tulit; ergo non solum utiliter nobis, sed etiam vice & loco nostro, atque adeo vere & proprie pro nobis satisfecit.

Prob. 2. Tradit. Patrum, qui unanimi consensione docent, Christum nos redemisse per satisfactionem proprie dictam.

Origenes, Tract. 2. in cap. 16. Matth. hæc habet: Deus pro animabus omnium dedit commutationem, pretiosum sanguinem Filii sui.

Cyrill. Jerosolymit. Catechesi 13. Jesus seipsum in redemptionis pretium offerens, nonne illam adversus homines iram dissolvit?

D. Augustin. enarratione in Psalm. 95. Tenebantur homines captivi sub diabolo, & demonibus serviebant, sed redempti sunt a captivitate; vendere enim se potuerunt, sed redimere non potuerunt: venit redemptor & dedit pretium, sudavit sanguinem suum, & emit orbem terrarum Sanguis Christi pretium est. Ex his omnibus sic arguitur: illi censuerunt Christum vere ac proprie nos, per satisfactionem proprie dictam, redemisse, qui asseruerunt

Chri-

Christum seipsum dedisse in pretium redemptionis nostræ, sanguinem suum dedisse commutationem pro animabus nostris, fuisse sanguinem, & eo emisit orbem terrarum; atqui id asseruerunt Patres; ergo.

Solvuntur Objectiones.

Objicies 1. Scriptura nullibi docet Christum pro nobis satisfecisse, & loco nostro subrogatum fuisse; ergo.

Resp. dist. antec. Scriptura nullibi id docet, expresse, *conc.* implicate, æquivalenter, & necessaria consecutione, *nego ant.* In his enim & aliis Scripturæ verbis continetur: *Christus nos redemit de maledicto legis, factus pro nobis maledictum*, ex quibus utrumque certe colligitur, & Christum loco nostri fuisse subrogatum, ac, debita nostra solvendo, pro nobis satisfecisse; & ita, licet vox ipsa, *satisfactionis & subrogationis*, expresse in Scripturis non reperiatur, res tamen nomine significata in illis expresse continetur, quod sufficit ad dogma catholicum de satisfactione Christi stabilendum.

Objicies 2. Vera satisfactio pro peccatis repugnat ex parte Dei Patris; ergo.

Prob. ant. Deus Pater nobis peccata gratis omnino remittit; atqui nihil magis opponitur gratuitæ remissioni, quam proprie dicta satisfactio; ergo repugnat, ex parte Dei Patris, proprie dicta satisfactio.

Resp. dist. min. Nihil magis opponitur gratuitæ remissioni, quam proprie dicta satisfactio, repetita ab eo, cui fit gratuita remissio, *conc.* repetita ab alio, qui se vadem ac sponso-rem pro debitore constituit, *nego min.* Porro, in præsentī mysterio, Deus satisfactionem

a nobis non repetiit, sed a dilecto Filio suo, in quo summa misericordia respectu nostri, & summa iustitia respectu Christi satisfaciens, enituit, ut declarat Apostolus Roman. 3. *Justificati gratis per gratiam ipsius, per redemptionem qua est in Christo Jesu, quem proposuit Deus propitiationem per fidem in sanguine ipsius, ad ostensionem iustitiae suae propter remissionem praecedentium peccatorum.*

Inst. 1. Illi gratis non remittitur, qui sponso-rem habet, a quo omne debitum solvitur; atqui, ex responsione, homo peccator Christum habet sponso-rem, a quo omne debitum solvitur; ergo.

Respond. dist. maj. In debitis realibus, *conc.* personalibus, *nego maj.* Inter utrumque illud debitum, hoc discrimen est, quod in debitis realibus restituenda sit aequalitas rei ad rem, quod quilibet potest praestare pro alio; at in debitis personalibus, restituenda est aequalitas personae ad personam, quae ita exigit constitui a persona ipsa laedente, ut sit gratuita remissio respectu illius, si persona laesa satisfactionem ab alio oblatam acceptet, licet vera sit satisfactio iustitiae respectu illius qui loco personae laedentis punitur, ut in hoc mysterio factum est.

Inst. 2. Ut debitum gratis remitti dicatur, requiritur ut creditor nihil exigit; atqui Deus creditor gravissimas poenas a Christo sponso-rem solvendas exigit; ergo.

Resp. dist. majora. Requiritur ut creditor nihil exigit, a debitore, *conc.* a sponso-rem, qui poenas a debitore contractas in se suscepit, *nego maj.* Diversum ergo est subiectum gratuitae remissionis & satisfactionis: a Christo exigitur satisfactio, nobis vero gratuita remissio impenditur: quae duo non sunt sibi contra-

ria, 4

ria, sed rite conciliantur in diversis subjectis.

Instab. 3. Si Christus ut sponsor perfecte pro nobis solvit, commutatus quidem est debitor, sed debitum non est gratis remissum; atqui res ita se habet in hoc mysterio; ergo.

Resp. dist. maj. Non est gratis remissum, respectu sponsoris, qui pro debitore solvit, conc. respectu ipsius debitoris, cujus personale debitum in alium transfertur, nego major. Quod ergo Deus vadis & sponsoris solutionem personalem acceptaverit, fuit certe maxima benignitas, eaque censetur gratuita debiti remissio respectu hominis.

Instab. 4. Si Christus pro nobis vere ac proprie satisfecisset, inanes & frustraneæ essent nostræ privatæ satisfactiones; falsum consequ. Ergo.

Resp. nego seq. maj. Quia licet Christus omne pretium pro nobis solverit, ejus tamen merita nobis non applicantur, nisi per bonas nostras actiones per gratiam Christi elicitas; nam Deus satisfactiones Christi pro nobis non acceptavit quoad ejus effectus, nisi sub conditione applicationis ipsis faciendæ per bona gratiæ opera; & Christus ipse non aliter eas voluit a Patre acceptari, & hominibus prodesse.

Objicies 2. Scripturæ loca, in quibus dicitur quod Christus pro peccatis hominum satisfecerit, metaphorice, non ad litteram, sumenda sunt: ergo.

Prob. ant. Toties Scriptura metaphorice sumenda est, quoties sumpta in sensu litterali probare videtur factum, quod est contra æquitatem, vel repugnat; atqui Christum satisfecisse pro nobis, est contra æquitatem, & repugnat; ergo.

Prob. minor. Est contra æquitatem, ut innocens pro reo plectatur, ejusque loco substitua-

tur; atqui Christus est innocens; ergo: &c.
 2. Repugnat Deum sibi ipsi satisfacere: simul enim daret & acciperet solutionem; atqui Christus est Deus; ergo.

Resp. ad 1. dist. maj. Contra æquitatem est, ut innocens pro reo puniatur, si sponsor ejus fuerit, *nego*, peccata enim rei quoad poenam censentur translata in sponsores, si sponsor ejus non fuerit, *subdist.* contra æquitatem est, si ista substitutio fiat auctoritate humana, *conc.* hanc enim potestatem Deus non concessit iudicibus, quibus prohibuit ne unum pro alio puniant, *Exod. 24.* dicens: *Non occidentur patres pro filiis, nec filii pro patribus; sed unusquisque pro peccato suo morietur.* Si ista substitutio fiat auctoritate divina, *nego maj.* hujus enim substitutionis multa sunt exempla in Scripturis, v. g. ob factum Cham, execrationi subicitur Canaan: *Genes. 19.* ob factum Davidis, pereunt septuaginta hominum millia: & *Thren. 5.* dicitur: *Patres nostri peccaverunt, & non sunt: & nos iniquitates eorum portavimus.*

Resp. ad 2. dist. min. Christus est Deus, simul & homo, *conc.* est Deus tantum, *nego min.* Porro Christus, ut homo, sibi ipsi satisfecit ut Deo, in quo nulla est contradictio; adversarii ergo committunt fallaciam, a dicto secundum quid, ad dictum simpliciter, quando, ex eo quod Christus sibi satisfecerit ut Deo, concludunt simpliciter & absolute Christum sibi satisfecisse.

Instab. Scripturæ non alium assignant mortis Christi finem, quam ut nobis exemplum patientiæ præbeat: *Christus passus est pro nobis*, inquit Divus Petrus, *Epist. 1. cap. 2. vobis relinquens exemplum, ut sequamini vestigia ejus.* Ergo.

Resp. nego antec. Cujus falsitas constat ex testimoniis inter probationes adductis; equidem Chri-

Christus passus est, ut nobis esset patientiæ exemplum, sed ille finis partialis est & secundarius, non adæquatus nec primarius, cum primario & principaliter passus sit ad humani generis redemptionem.

Obijcies 3. Is pro nobis non satisfecit vere, qui non solvit id omne quod debebamus sustinere; atqui Christus non sustinuit id omne quod debebamus sustinere: debebamus enim mortem æternam sustinere, quam Christus non sustinuit; ergo.

Resp. nego min. Ad prob. *dist.* Christus non sustinuit mortem æternam quoad ejus durationem, *conc.* quoad valorem æquivalentem, *neg.* Equidem mors Christi, temporanea fuit physice, sed a persona infinita, a qua fuit tolerata, infinitatem quamdam moralem contraxit, quæ plusquam sufficiens est ad compensandas pœnas in duratione infinitas.

Q U Æ S T I O II.

Utrum Christus satisfecerit ex vera justitia?

C O N C L U S I O.

Satisfactio Christi fuit ex vera justitia.

Prob. Ex Scriptura; Rom. 3. Quem proposuit Deus propitiationem per fidem in sanguine ipsius; ad ostensionem justitiæ suæ. Et Coloss. 2. Delens quod adversum nos erat chirographum decreti, quod erat contrarium nobis, & ipsum tulit de medio, affigens illud Cruci. Atqui hæ voces, *ostensio justitiæ*, *delens chirographum*, sonant satisfactionem ex vera, & proprie dicta justitiâ factam; ergo.

Prob. 2. ex tradit. PP. Div. August. lib. 13.
de

de Trinit. ait : *Non autem diabolus potentia Dei, sed justitia superandus fuit.*

Sanct. Leo, serm. 12. de Passione Domini : *Ad dominationem diaboli destruendam, inquit, magis usus est justitia rationis, quam potestate virtutis.*

Proclus Cyzicensis, Hom. de Incarnatione relata in Conc. Ephes. parte 1. capit. 1. *Erat itaque, inquit, alterutrum duorum necessarium, aut ut omnes condemnati precipites abirent in mortem, aut certe ut tale redemptionis pretium daretur, quod omnibus justitia numeris sufficeret ad liberationem.*

Prob. 3. ratione : Justitia definitur, *constans ac perpetua voluntas unicuique quod suum est reddendi ad aequalitatem.* Atqui Christus omne debitum nostrum solvit, ut probavimus contra Socinianos ; solvitque non solum ad aequalitatem, sed superabundanter, propter infinitam suæ personæ dignitatem ; ergo.

Objicies 1. Inter Deum & hominem, non potest dari actus justitiæ proprie dictæ ; atqui Christus satisfecit Deo, quatenus homo fuit ; ergo.

Respond. dist. maj. inter Deum & hominem purum, *conc.* inter Deum & hominem Deum, *nego maj.* Porro Christus satisfecit, non ut homo purus, sed ut homo Deus, per actiones theandricas.

Instab. Inter Patrem & Filium, non potest dari actus justitiæ stricte dictæ ; atqui Christus, ut Deus homo, est Filius Patris æterni ; ergo.

Resp. dist. major. Si Filius non habeat bona propria, *conc.* si habeat, *nego maj.* Filius autem Dei habet bona propria, nempe humanitatem, cujus est dominus ; ergo ex propriis potuit satisfacere.

Obji-

Obijcies 2. Omne peccatum non est contra justitiam; ergo satisfactio non est ex vera justitia.

Resp. nego ant. Omne enim peccatum, est injuria Deo illata, qua læditur jus, quod Deus habet, ut ipsi obediatur.

Q U Æ S T I O III.

*Utrum Christus satisfecerit ex justitia
rigorosa.*

Nota: **U**T satisfactio sit ex rigore justitiæ, requiruntur juxta definitionem satisfactionis a nobis traditam, pag.... sex conditiones: *Prima*, ut sit redditio voluntaria honoris. *Secunda*, ut sit æquivalens. *Tertia*, ut sit ex propriis. *Quarta*, ut sit ex alias indebitis. *Quinta*, ut sit ad compensandam injuriam. *Sexta*, ut injuria sit alteri illata.

1. Constat apud omnes satisfactionem Christi fuisse voluntariam; nam ex Isaïæ 53. *Oblatus est, quia ipse voluit.*

2. Constat eam fuisse ad compensandam injuriam Deo per peccatum illatam, Roman. 5. *Cum inimici essemus, reconciliati sumus Deo per mortem Filii ejus.*

Restat ergo videndum 1. An satisfactio Christi fuerit æquivalens. 2. An ex propriis. 3. An ex alias indebitis. 4. Tandem: An fuerit ad alterum: sequentibus articulis.

ARTICULUS I.

An satisfactio Christi fuerit æquivalens; sive an Christus tantum reddiderit, quantum Deus exigere iuste poterat ad compensandam peccate injuriam sibi illatam.

Nota 1. **T**Riplex distingui potest valor satisfactionum Christi. *Primus, est essentialis, qui petitur ex parte actionum Christi physice spectatarum. Secundus, est accidentalis, qui petitur, ex parte gratiæ sanctificantis, quæ actiones Christi significabat. Tertius, est substantialis, qui petitur ex parte personæ satisfaciæntis, & hic duplex est, radicalis & derivatus.*

Valor radicalis, est ille, qui petitur ab ipsa Verbi divini personalitate, in quantum est veluti pars pretii oblatis, ex qua & ipsa actione, unum quoddam morale coalescit, quod Deo in satisfactionem offertur.

Valor derivatus, est ille, qui petitur ab ipsa Verbi divini personalitate, prout habet rationem circumstantiæ dignificantis actiones agentis.

Nota 2. Valor *essentialis, & accidentalis* satisfactionum Christi est finitus, sicut principia ex quibus oritur; valor vero *substantialis* sive radicalis, sive derivatus, est infinitus, sicut infinita est persona, ex qua oritur. His notatis :

CONCLUSIO.

Satisfactio Christi est æquivalens, immo & superabundans. Ita Div. Thom. & communiter Theologi contra Scotum & Scotistas.

Probat. 1. Ex Scriptura, quæ docet 1. nostram,

fram, per Christum, redemptionem fuisse superabundantem, Psalm. 129. *Copiosa apud eum redemptio*. 2. Eam superasse peccati gravitatem, Rom. 5. *Non sicut delictum, ita & donum: ubi abundavit delictum, superabundavit gratia*. 3. Illius virtutem fuisse sufficientem ad delenda omnium hominum peccata, 1. Jo: 2. *Ipse est propitiatio pro peccatis nostris, non pro nostris autem tantum, sed etiam pro totius mundi*.

Prob. 2. ex PP. Div. Chrysostr. in cap. 5. ad Rom. Hom. 10. ait: Christum non modo tantum juvisse, quantum laeserat Adam, sed & multo magis, & multo plenius multo enim plura, iis quæ debebamus, rependit Christus, atque adeo tanto plura, quanto mare immensum ad pusillam guttam collatum, majus esse possit. Et Clemens VI. Extravag. Unigenitus, de pœnit. & remis. Non guttam, inquit, sanguinis modicam, quæ tamen propter unionem ad Verbum pro redemptione generis humani suffecisset, sed copiose velut quoddam profluvium noscitur effudisse.

Prob. 3. ratione: Nam, satisfactio Christi in genere moris, est infiniti simpliciter valoris; ergo non solum est æquivalens peccato, cujus malitia non est simpliciter, sed tantum extrinsece infinita, sed est superabundans. Prob. ant. Valor satisfactionis petitur ex dignitate personæ satisfaciæntis, quæ est illius principium quod, immo, quæ est pars satisfactionis illius, Qui semetipsum humiliavit, factus obediens usque ad mortem. Atqui persona Christi est infinita simpliciter; ergo, &c.

Solvuntur Objectiones.

Objicies 1. Satisfactio Christi non fuit infinita; ergo, &c.

Prob.

Prob. antec. Christus satisfecit per actiones humanas ; atqui actiones humanæ Christi sunt finitæ ; ergo , &c.

Resp. esto maj. dist. min. Sunt finitæ , quoad entitatem physicam , *conced.* quoad valorem moralem substantialem , *nego min.* Nam si attendatur valor radicalis , est infinitus , utpote fluens a persona Verbi infinita , quæ & offerebat simul , & erat pars rei oblatæ , *Humiliavit enim semetipsum* . Si attendatur valor derivatus , est etiam infinitus , utpote fluens ex uniõne hypostatica Verbi cum humanitate .

Dixi: Esto maj. nam Christus non satisfecit per actiones solum humanas , sed per actiones Theandricas , id est , per actiones hominis Dei , utraque enim natura suo modo concurrit ad satisfactionem , humana materiam actionum & passionum subministrando , divina valorem infinitum impertiendo ; unde potest negari major .

Instab. 1. Ut valor *radicalis* actionum Christi sit infinitus , debuit persona Christi sese submittere & offerre ; atqui persona Christi , utpote divina , non potuit sese submittere & offerre ; ergo .

Respond. dist. minor. Persona Christi , seorsim & secundum se sumpta , *conc.* hypostatice unita cum humanitate , *nego min.* nam de eâ sic considerata scribit Apostolus Philippens. 2. *Humiliavit semetipsum* . Hæ fuerunt adinventiones Domini , ut , quod in cælis non poterat , in terris sese persona Verbi submitteret .

Inst. 2. Si valor infinitus sit ex eo quod persona infinita conjunctim cum humanitate offeratur & submittatur , Beata Virgo Maria , offerendo suum Filium , satisfecisset infinite , & nunc sacerdos in altari pro omnium peccatis satisfaceret : falsum consequens ; ergo .

Resp.

Resp. nego seq. maj. Quia in satisfactione, non solum spectari debet res oblata, sed etiam persona offerens, quæ se, vel per se, vel per rem suam submittit, sicque ad infinitam satisfactionem requiritur persona infinita offerens.

Instab. 2. Non potuerunt actiones Christi a divina persona habere infinitum valorem, nisi singula Christi opera fuerint æqualis valoris cum omnibus ejus operibus collective sumptis, absurdum consequ. ergo.

Resp. dist. seq. maj. Nisi singula opera fuerint æqualis valoris, quoad sufficientiam, *conc.* quoad effectum satisfaciendi, *nego seq.* Equidem singula opera Christi fuerunt æqualis valoris quoad sufficientiam, quia singulorum operum valor fuit infinitus; non fuerunt tamen æqualis valoris quoad effectum satisfaciendi, quia pendet effectus ille ab ordinatione Christi, qui noluit singula sua opera suum effectum habere, nisi dependenter a sua morte, nam Heb. 2. *Decebat auctorem salutis eorum per passionem consummare.*

Inst. 4. Si unica Christi actio sit infiniti valoris, superflue Christus moriendo totum effudit sanguinem; impium consequ. ergo.

Resp. nego seq. maj. Nam opus salutis ex intentione Christi debet considerari; atqui Christus propter suam erga nos ardentissimam charitatem, per mortem propriam voluit opus salutis consummare; ergo, &c. nam, ut ait Div. August. serm. 101. de tempore: *Mors, nisi a morte, separari non poterat; ideo mortem Christus sustinuit, &c.*

Instab. Valor operum Christi est quid creatum; ergo & quid finitum.

Resp. nego ant. Neque enim est aliquid creatum; neque aliquid increatum, cum non sit
ens

ens physicum, sed morale, scilicet fundamentum reale æstimationis Dei, & omnium prudentum.

Objicies 2. Cui aliquid deest, illud non est æquivalens; atqui satisfactioni Christi aliquid deest ex Apostol. Coloss. 1. *Adimpleo ea quæ desunt passionum Christi in carne mea; ergo.*

Resp. dist. min. Aliquid deest, quoad illius applicationem nobis factam, *conc.* quoad valorem solutionis, *nego min.* Id ergo quod deest satisfactioni Christi, sunt bona nostra opera, sine quibus satisfactio Christi nobis applicari non potest.

Instab. Necesse fuit ad valorem satisfactionis Christi, ut a Deo acceptaretur; ergo ex sese aliquid ipsi defuit, nec fuit æquivalens.

Resp. dist. ant. Necesse fuit ut a Deo acceptaretur, nec potuit non acceptari, *conc.* & potuit non acceptari, *nego antec.* unde satisfactio Christi, non ex Dei acceptantis liberalitate vim obtinuit, sed ex sola sui ipsius condignitate, qua factum est ut Deus nihil habuerit gratuito remittendum, nec potuerit non acceptare satisfactionem ex se valoris simpliciter infiniti.

Objicies 3. Si Christus non solum æquivalenter, & superabundanter satisfecit, jam sunt inutilia sacramenta, jam nos non tenemur amplius ullam ex parte nostra exhibere satisfactionem; falsum consequ. ergo.

Resp. nego seq. maj. Quia Deus noluit satisfactiones Christi, licet valoris sint infiniti, nobis applicari, nisi dependenter a cooperatione nostra per opera virtutum, & specialiter per receptionem Sacramentorum, quæ sunt publica instrumenta, quibus Deus utitur, ut, quam sanguine suo promeruit, gratiam nobis communicet: *Sumus, quidem, cohæredes Christi, sed tamen*

tamen compatimur, ut & conglorificemur, ait
Apost. Rom. 8.

ARTICULUS II.

An satisfactio Christi fuerit ex propriis.

CONCLUSIO.

Christus satisfecit ex propriis. Est contra Vasquez.

Prob. Ille satisfecit ex propriis, qui satisfecit ex bonis sub speciali suo dominio constitutis; atqui Christus satisfecit ex bonis sub speciali suo dominio constitutis; ergo, &c. *Prob. min.* Christus satisfecit per actiones *theandricas*, secundum suum valorem substantialem consideratas; atqui actiones *theandricæ*, erant sub speciali Christi dominio constitutæ: ergo, &c. *Prob. min.* Actiones *theandricæ* spectari possunt, vel ut personam Verbi se se submittentem, intrinsece includebant tanquam sui partem, a qua hauriebant valorem radicalem; vel ut connotabant extrinsece eandem personam, a qua valorem derivatum habebant; atqui actiones *theandricæ*, utroque modo illo spectatæ, erant sub speciali & absoluto Christi dominio: persona enim Verbi, utpote divina, sub nullius dominio jacet, sive spectetur ut est pars satisfactionis, sive ut dignificat actiones satisfactorias; ergo.

Solvuntur Objectiones.

Obijcies 1. Actiones, per quas satisfecit Christus, erant sub dominio Dei; ergo.

Respond. dist. antec. Actiones secundum entitatem, & valorem finitum spectatæ, conc.
secun-

secundum valorem substantialem & infinitum, *nego antec.* solutio patet ex dictis.

Inst. 1. Christus satisfecit in quantum erat homo; atqui omnia, quæ Christus habuit ut homo, erant sub dominio Dei; ergo id, per quod satisfecit, erat sub dominio Dei.

Resp. dist. maj. Christus satisfecit in quantum erat homo & Deus simul, *conc.* in quantum homo tantum, *nego maj.* suppositum enim Verbi & fuit pars satisfactionis, & actiones satisfactorias dignificavit.

Inst. 2. Christus passus & mortuus est in quantum homo tantum; ergo & satisfecit in quantum homo tantum.

Resp. nego conseq. Nam triplicis generis sunt attributa Christi; alia ipsi competunt in quantum Deus est, v. gr. comprehendere Deum; alia illi conveniunt in quantum homo est, non vero conveniunt ei, ut Deus est, nisi per communicationem idiomatum, v. g. pati, mori, &c. alia ei conveniunt in quantum est Deus homo, talia sunt quæ submissionem significant, v. g. offerre se, satisfacere, &c.

Inst. 3. Humanitas Christi fuit principium actionum illius satisfactoriarum; ergo Christus satisfecit ut homo tantum.

Resp. dist. antec. Fuit principium partiale, *conc.* totale, *nego antec.* Itaque humanitas fuit principium quo, actionum Christi satisfactoriarum, sed persona Verbi, quæ sustentabat humanitatem, fuit earundem principium quod, ac proinde Christus, nec ut homo seorsim, nec ut Deus seorsim, sed ut homo Deus satisfecit.

Objicies 2. Ea satisfactio non fit ex propriis, quæ fit ex gratia creditoris; atqui satisfactio Christi facta est ex gratia creditoris, nempe ex gratia unionis hypostaticæ; ergo.

Resp. dist. min. Satisfactio Christi facta est ex gra-

gratia unionis hypostaticæ, præsuppositive, *conc.* formaliter, *nego minor.* neque enim per gratiam unionis formaliter Christus satisfecit, sed per actiones proprias, quibus, supposita unctione hypostatica, contulit valorem infinitum.

ARTICULUS III.

An. satisfactio Christi fuerit ex alias indebitis.

CONCLUSIO.

Satisfactio Christi fuit ex alias indebitis. Est contra Vasquez.

Prob. Quia, Christus satisfecit per opera secundum valorem substantialem considerata; atqui opera Christi, secundum illum valorem spectata, sunt indebita: nam sunt actiones Verbi divini se submittentis & dignificantis actiones satisfactorias; atqui actiones Verbi alteri sunt indebitæ, sicut & ipsum Verbum; ergo.

Confirmatur ex dictis superiori conclusione: illud quippe est alteri indebitum, quod est sub singulari & absoluto Christi dominio; atqui actiones Christi satisfactoriæ, secundum valorem substantialem spectatæ, sunt tales, ut probavimus; ergo.

Solvuntur Objectiones.

Obicies 1. Quidquid creatum est, Deo debetur titulo gratitudinis, religionis, &c. atqui omnes Christi actiones satisfactoriæ, erant creatæ; ergo.

Resp. dist. min. Erant creatæ, quoad entitatem, *conc.* quoad valorem substantialem, *nego min.* Valor enim ille oritur ab ipsa Verbi per-

Charmes, Theol. Schol. Tom. III. N so-

sona, quæ, sicut nulli subjacet, sic nulli quidquam debet; immo ille valor est ipsamet Verbi persona humanitati conjuncta, quæ simul cum ea humanitate se *exinanivit*.

Inst. 1. Christus illum valorem infinitum in suis actionibus accepit a Deo: ergo illum Deo debebat.

Resp. nego ant. Equidem actiones Christi istum valorem acceperunt, sed non Christus ipse, qui a se, supposita humanitatis a Verbo sustentatione, valorem istum effundebat.

Inst. 2. Christus accepit a Deo unionem hypostaticam; ergo & valorem substantialem suarum actionum accepit a Deo.

Resp. dist. ant. Accepit a Deo unionem hypostaticam, quæ est conditio necessario prærequisita ad eliciendas actiones satisfactorias, *conc.* quæ sit principium activum actionum satisfactoriarum, *nego ant. & conseq.* Equidem Christus accepit a Deo unionem hypostaticam, qua supposita, dignitas quædam infinita effluxit in humanitatem; at sola Verbi persona dignitatem illam per se proxime & directe contulit; ergo ab ea sola emanavit uterque valor, radicalis scilicet & derivatus, actionum Christi.

Obicies 2. Omnes actiones Christi theandricæ, a Deo reposci poterant; ergo ipsi erant debita.

Prob. ant. Ab eo, qui concessit beneficium infinitum, reposci potest infinita gratitudo; atqui Deus Christo concessit beneficium infinitum, nempe unionem hypostaticam; ergo.

Respond. dist. min. Unio hypostatica est beneficium infinitum, ratione Verbi uniti, *conc.* ratione modi unionis, *nego minor.* Beneficium enim, quod humanitas accepit per unionem hypostaticam, erat quidem rei infinitæ secundum se, sed non secundum participandi modum;

dum; nam humanitas finite solum a Verbo terminata est; unde illud beneficium non repositabat gratitudinem infinitam simpliciter, sed solum gratitudinem finitam.

ARTICULUS IV.

An satisfactio Christi fuerit ad alterum.

CONCLUSIO.

Satisfactio Christi fuit ad alterum.

Prob. Satisfactio ab eo facta, qui habet distinctam naturam, distinctum dominium, & distinctum saltem virtualiter suppositum, est ad alterum; atqui talis fuit satisfactio Christi; ergo, &c. *Prob. min.* quia satisfactio fuit ab ipsa Verbi divini personalitate ut terminante naturam humanam; atqui personalitas Verbi, prout terminat humanitatem, habet naturam & voluntatem distinctam a natura & voluntate divina, habet distinctum dominium, personam quoque saltem virtualiter a persona, cui facta est satisfactio, distinctam, ob diversitatem dominiorum; ergo.

Obicies: Satisfactio Filii respectu Patris, non est proprie ad alterum; atqui Christus, etiam prout est homo, est Dei Patris Filius & quidem naturalis; ergo, &c.

Prob. maj. Pater & Filius unam tantum personam moralem constituunt; ergo.

Resp. dist. ant. Unam tantum moralem personam constituunt, si non habeant diversa dominia, *conc.* si habeant, *nego ant.* Porro Christus, prout est homo, dominium habet omnino distinctum a dominio Patris, ratione cuius, personam virtualiter a Deo Patre distinctam habet.

Inst. Unius ad seipsum satisfactio, non est ad alterum; atqui satisfactio Christi fuit sui ipsius ad se ipsum; ergo.

Resp. dist. maj. Unius ad se ipsum, si non sit virtualiter duplex, *conc.* si sit virtualiter duplex, *neg. maj.* Itaque persona Verbi, propter distinctas naturas, ex quibus constat, habet diversa dominia, & est virtualiter duplex; nam Verbum in se ipso subsistens, virtualiter a seipso, prout in humanitate subsistit, distinguitur; proindeque illius ad seipsum satisfactio, vere ac proprie fuit ad alterum.

C A P U T VI.

De Variis Christi titulis & officiis.

Nota: **N**ostri non est instituti hic omnes Christi dignitates, & omnia recensere officia, magis præcipuis contenti, agemus. 1. De prædestinatione Christi. 2. De ejus filiatione. 3. De ejus servitute. 4. De dignitate capitis in Christo. 5. De ejus regia & judiciaria dignitate. 6. De ejus sacerdotio. 7. De ejus patrocinio. 8. De ejus mediatione, totidem quæstionibus.

Q U Æ S T I O I.

De prædestinatione Christi.

C O N C L U S I O.

Christus, ut homo, vere est, & dicitur prædestinatus, tum ad filiationem divinam, tum ad visionem beatificam.

Prob. prima pars: Prædestinatio, est rerum, qua sunt in tempore, præordinatio in mente divina;

vina; atqui decretum fuit ab æterno, ut Christus, quatenus homo, esset in tempore Filius Dei, juxta illud Apostoli, Rom. i. *Qui prædestinatus est Filius Dei in virtute*, ergo Christus est, & vere dicitur prædestinatus ad divinam filiationem.

Prob. secunda pars: Ille prædestinatus est ad visionem beatificam, qui prædestinatus est ad id, cui debetur, & ex quo sequitur visio beatifica; atqui Christus prædestinatus est ad divinam filiationem, cui debetur, & ex qua sequitur visio beatifica; ergo.

Objicies contra primam partem: Prædestinatio refertur ad personam; atqui persona Christi non potest dici prædestinata ad divinam filiationem; ergo Christus non potest dici prædestinatus.

Respond. dist. min. Persona Christi, prout in seipsa subsistens, non potest dici prædestinata ad divinam filiationem, *conced.* prout subsistens in natura humana, *nego minor.* Licet ergo personæ Verbi semper fuerit Filius Dei simpliciter, non tamen fuit semper Filius Dei, quatenus subsistens in humanitate assumpta, sed hoc acquisivit in tempore ex mera Dei liberalitate.

Instab. 1. Christus non potest dici Filius Dei adoptivus, nequidem hoc sensu, quod adoptio referatur ad personam, prout subsistentem in natura humana; ergo a pari, &c.

Resp. nego consequ. Disparitas est, quod filia- tio adoptiva excludat filiationem naturalem, ut dicemus quæst. sequenti; at in prædestina- tione hæc exclusio locum non habet.

Inst. 2. Prædestinatio est gratia; atqui Chri- stus prout supponit pro personâ, nihil potest recipere titulo gratiæ; ergo.

Resp. dist. min. Christus, prout supponit pro
N ; per-

persona in se subsistente, *conc.* subsistente in natura humana, *neg.* *min.*

Inst. 3. Terminus prædestinationis debet esse distinctus a re quæ prædestinatur; atqui divina filiatio, quæ est terminus prædestinationis, non est distincta a Christo Filio Dei, qui est res prædestinata; ergo.

Resp. dist. min. Divina filiatio non est distincta a Christo, si spectetur ut suppositum, quod terminat naturam divinam, *conc.* si spectetur ut suppositum, quod terminat naturam humanam, *neg.* *min.* Porro diversus ille respectus sufficit, ut eadem res & sit prædestinata, & terminus prædestinationis.

Q U Æ S T I O . II.

De filiatione Christi.

Nota 1. **D**uplex est filiatio, naturalis nempe, & adoptiva.

Filius naturalis, est ille, cui, jure nativitatis, paterna hæreditas debetur . . . *Filius adoptivus*, est extraneus, qui, per gratiam, ad hæreditatem assumitur. Unde adoptio a Jurisconsultis definitur: *Persona extranea assumptio gratuita ad hæreditatem.*

Nota 2. In VIII. Sæculo *Felix Urgelitanus* & *Elipandus Toletanus*, docuerunt Christum esse Filium Dei adoptivum. Dammati sunt ab Hadriano S. P. & a Conc. Francofordiensi.

C O N C L U S I O .

Christus, etiam quatenus homo, nec est, nec dici potest Filius Dei adoptivus.

Prob. 1. Ex Scriptura, Rom. 8. *Qui etiam proprio Filio suo non pepercit; sed pro nobis omnibus,*

nibus tradidit illum. Ex quo sic argumentor : ille , cui non pepercit Deus , est Filius Dei proprius & naturalis ; atqui ille , est Christus quatenus homo , cum , ut arguit *Hadrianus I.* ad Episcopos Hispaniæ , non potuerit tradi in mortem , nisi quatenus homo ; ergo Christus , quatenus homo , & Filius naturalis non potest esse Filius adoptivus ; illa enim duo opponuntur ; ergo .

Prob. 2. ex PP. Divus Hilarius , lib. 6. de Trinit. super hæc verba : *Hic est Filius meus , ait : Filium Dei Dominum nostrum Jesum Christum ab Apostolis creditum , non ex nuncupatione , sed ex natura , neque ex adoptione , sed ex nativitate .*

Div. Augustin. tract. 82. in Joann. *Nos filii gratia , inquit , non natura : unigenitus autem natura , non gratia .* Ut autem significet se etiam loqui de Christo ut homine , subjungit : *An hoc etiam in ipso Filio ad hominem referendum est ? ita sane .*

In lib. qui inscribitur , *Sacrofyllabus* , approbato in Concilio Francofordiensi , dicitur : *Proprius Filius factus est ex muliere , non adoptivus .* Atqui factus est ex muliere , prout homo est ; ergo .

Prob. 3. Ratione peremptoria , desumpta ex libro *sacrofyllabo* : Filius adoptivus debet esse persona extranea , ut constat ex definitione adoptionis ; atqui Christus , *Etiam ut homo ,* non est persona extranea respectu Dei , cum non sit persona alia a persona Verbi divini , quæ est vere & proprie Filius Dei ; ergo Christus , nec est , nec potest dici Filius Dei adoptivus .

Solvuntur Objectiones.

Objicies 1. D. Irenæus, lib. 3. *Adversus hæreses* cap. 21. sic habet: *propter hoc enim, Verbum Dei homo, & qui Filius Dei est, Filius hominis factus est, immixtus Verbo Dei, ut adoptionem percipiens fiat Filius Dei.* Ergo Christus adoptionem percepit.

Resp. nego confesse Nam hæc verba, *Ut adoptionem percipiens*, non referuntur ad Christum, sed ad quemlibet hominem, qui justificationis gratiam adeptus est, ita ut sensus verborum D. Irenæi hic sit: Filius Dei factus est Filius hominis, ut quilibet alius homo per ejus merita justificatus, per adoptionem fiat Filius Dei; addit enim post citata verba; *Non poteramus aliter immortalitatem accipere, nisi prius immortalitas fieret quod & nos, ut adoptionem filiorum perciperemus.*

Objicies 1. Div. Hilar. lib. 2. de Trinit. de Christi nativitate loquens, ait: *Ita potestatis dignitas non amittitur, dum carnis humilitas adoptatur.* Ergo Christus, ut homo, fuit adoptatus.

Respond. In textu Hilarii mendum irrepsisse in aliquibus exemplaribus, positumque, *adoptatur*, pro, *adoratur*, quod verbum requiritur, ut constet ex antecedentibus, sic enim exemplar quod habeo præ manibus, Basileæ ann. 1523. Prælo mandatum, habet: *Parit Virgo, partus a Deo est, panni sordent, Deus adoratur; ita potestatis dignitas non amittitur, dum carnis humilitas adoratur.*

Objicies 3. Qui habet formam adoptionis, est Filius adoptivus: forma enim necessario producit suum effectum; atqui Christus habet for-

formam adoptionis, nempe gratiam habitua-
lem; ergo.

Resp. dist. maj. Si sit capax effectus illius for-
mæ, *conc.* si non sit capax, *nego maj.* Itaque,
ut quis sit capax adoptionis, debet esse perso-
na extranea; atqui Christus etiam ut homo,
non est persona extranea, ejus enim humani-
tas subsistit subsistentia divina; ergo, &c. *Ra-
tio est*, quia effectus gratiæ, non est constitui-
re Filium adoptivum reipsa præcise, sed cum
connotato extraneitatis, quam extraneitatem
gratia in Christo non connotat, cum sit Filius
naturalis.

Inst. 1. Filius naturalis, est productus in si-
militudinem naturæ; atqui Christus ut homo,
non est productus a Deo in similitudinem na-
turæ; ergo.

Resp. dist. major. Filius naturalis, qui pro-
ducitur per viam generationis, est in similitu-
dinem naturæ, *conced.* qui producitur per viam
unionis substantialis cum Verbo, *nego major.*
Christus itaque, ut homo, non est Filius Dei
naturalis per generationem, sed est Filius Dei
naturalis per unionem substantialem, quia in
primo suæ conceptionis instanti fuit hypostati-
ce unitus cum Verbo, cujus unionis virtute
fit, ut una sit cum Deo persona; & conse-
quenter Filius naturalis.

Instab. 2. Hæc propositio: *Christus, ut ho-
mo, est Deus*, falsa est; ergo & ista: *Christus,
ut homo, est Filius Dei naturalis*.

Respond. nego conseq. Disparitas est, quod in
prima propositione, particula, *Ut*, sumitur *re-
duplicative*: unde sensus est: *Christus ratione
humanitatis est Deus* quod est falsum; in se-
cunda vero, particula, *Ut*, sumitur *specificative*,
& sensus est: *Verbum in humanitate subsistens,
est Filius Dei naturalis*, quod verissimum est.

Instab. 3. Verbum, quatenus Deus, ex ratione suæ naturæ divinæ, habet ut sit Filius Dei naturalis; ergo ex ratione naturæ humanæ, habet ut sit Filius Dei adoptivus.

Resp. nego conseq. Disparitas est, quod Verbum, ut Deus, sit persona divina, econtra, ut homo, non est persona humana; & ideo cum adoptio non respiciat naturam, sed personam, sequitur quod Verbum, quatenus Deus, sit Filius Dei naturalis, sed non sequitur quod Verbum, quatenus homo, sit Filius Dei adoptivus.

Q U Æ S T I O I I I.

De servitute Christi.

Nota 1. **D**uplici modo, quis potest alterius esse servus, stricte, nimirum, & late.

Servus stricte, Est ille, qui non est sui juris, sed Domini, ad cuius hæreditatem & bona nullum habet jus.

Servus late, est ille, qui habet naturam ab alio dependentem, cui obedire tenetur ut subditus.

Nota 2. Felix & Elipandus contenderunt, ideo Christum, quatenus hominem, esse, & dici debere Filium Dei adoptivum, quod esset & dici deberet proprie servus Dei, contra quos, sit:

C O N C L U S I O.

Christus, etiam quatenus homo, nec est, nec dici potest proprie servus Dei.

Prob. 1. Auctoritate Concilii Francofordien-
sis in Epist. Synodica, ubi dicitur: *Si Deus*
verus

verus est, qui de Virgine natus est, quomodo potest tunc dici servus, vel adoptivus? Deum enim nequaquam audetis confiteri servum, vel adoptivum.

Prob. 2. Ex PP. D. Damasc. lib. 3. de fide cap. 21. Sciendum est, inquit, cum ne servum quidem dicere nobis licere, cujus sententiæ rationem dans, ait: Siquidem servitutis & dominationis vocabula, non natura sunt indicia, sed ex eorum genere, quæ sunt ad aliud, quemadmodum paternitatis & filiationis nomina; id est, non in naturam cadunt, sed in solam personam; persona autem Christi, cum sit divina, nequaquam serva dici potest.

Prob. 3. ratione: Christus, etiam ut homo, est Filius Dei naturalis, ut supra probavimus; ergo Christus, etiam ut homo, nec est, nec potest dici servus Dei stricte. Conseq. patet, quia Filius naturalis, est sui juris, atque vi suæ originis habet jus ad bona & hæreditatem Patris, quod cum servitute stricte sumpta stare non potest.

Objicies: Christus, in Scriptura, sæpissime appellatur servus, sic Isaïæ 42. dicitur: Ecce servus meus, suscipiam enim complacuit sibi in illo anima mea judicium gentibus preferet. Quæ verba Christo applicantur, Matth. 12. Ergo.

Resp. dist. conseq. Dicitur servus, improprie & late, conc. proprie & stricte, nego conseq. Christus itaque dicitur servus improprie & late, quatenus naturam humanam habebat, per quam servitutis officia exercebat, sed non dicitur servus proprie, quatenus conditionis servilis, ut docent Patres Francofordienses, In Epist. ad Episcopos Hispania, his verbis: Et si cum Propheta servum nominasset, non tamen ex conditione servitutis, sed ex humilitatis obedi-

ria, qua factus est Patri obediens usque ad mortem.

Inst. 1. Omnis creatura est Dei serva; atqui Christus est, &, secluso Arianæ hæresis periculo, potest dici creatura; ergo.

Resp. dist. maj. Omnis creatura, pura, conc. creatura, in Verbo divino subsistens, *nego maj.* Christus autem est creatura a Verbo divino personalizata & terminata.

Instab. 2. Christus, Philipp. 2. *Formam servi accepit*; ergo est servus proprie.

Resp. dist. antec. Formam servi accepit, improprie; & quoad officia tantum, conc. quoad conditionem servilem, *nego ant.* Equidem ad officia servi sese Christus demisit, sed servi conditionem nunquam suscepit, immo nec suscipere potuit, utpote Filius Dei naturalis.

Inst. 3. Conditio servilis nil aliud est, quam natura creata ac dependens; atqui Christus suscepit naturam creatam ac dependentem; ergo.

Resp. nego maj. Nam conditio servilis non cadit in naturam, sed in personam, quæ nec sui juris est, sed alieni, nec habet jus ad hæreditatem paternam; proindeque cum persona Christi & sit sui juris, & habeat jus ad hæreditatem paternam, Christus non potest dici stricte servus, etiam prout est homo. Ita respondent Patres Francofordienses, suamque responsionem confirmant ex S. Leone, qui *hæmil. 2. de Nativitate Christi*, ait: *creata est forma servi sine conditione servili.*

Inst. 4. Qui fuit Patri obediens usque ad mortem Crucis, ille potest dici servus Patris; atqui talis fuit Christus; ergo.

Resp. dist. major. Qui fuit obediens ex necessitate & timore, *conced.* qui fuit obediens libere & ex charitate, *nego major.* Sic autem
Chri-

Christus fuit obediens Patri, ut Felici & Elipando respondet Alcuinus, lib. 5. nomine PP. Francofordiensium: *Non conditione debita servitutis, sed implenda paternæ voluntatis in saluto humana, voluntaria obedientia: nam in Christo quidquid gestum est, totum voluntatis fuit, non necessitatis.*

Q U Æ S T I O . IV.

De dignitate capitis in Christo.

Nota. **A**D rationem capitis mystici & moralis requiritur, ut præset in membra, ea omnia, quæ caput naturale obit in corpore physico, & specialiter hæc tria. 1. Ut habeat præminentiam supra singula & omnia membra. 2. Ut habeat plenitudinem bonorum, quæ per partes duntaxat reperiuntur in membris. 3. Ut habeat vim in membra influendi dona vitæ supernaturalis per gratiam & gloriam. Quæritur hic, utrum Christus sit caput Ecclesiæ, hominum, & Angelorum. Ideo..

C O N C L U S I O.

Christus, ut homo, est caput Ecclesiæ. Est de fide.

Prob. 1. Ex Scriptura, Ephes. 1. Ipsum dedit caput super omnem Ecclesiam, quæ est corpus ipsius. Et Coloss. 1. Ipse est caput corporis Ecclesiæ.

Prob. 2. Quia Christus, ut homo specificative, habet omnes conditiones veri capitis respectu Ecclesiæ; namque:

1. Habet præminentiam in totam Ecclesiam, Coloss. 1. *Ipse est caput corporis Ecclesiæ, qui est principium, primogenitus ex mortuis.*
ut sit

ut sit in omnibus primatum tenens . Unde Christus de seipso dicit , Joann. 12. *Vocatis me, Magister & Domine, & bene dicitis, sum etenim.*

2. Habet plenitudinem omnium gratiarum , Joann. 1. *Vidimus eum plenum gratia & veritatis.*

3. In omnia Ecclesiæ membra gratiam & dona spiritualia influit , Ephes. 4. *Crescimus in illo, qui est caput Christus, ex quo totum corpus compactum & connexum, nempe per influxum gratiarum, nam Joann. 1. De plenitudine ejus omnes accepimus.*

Objicies 1. Si Christus esset caput Ecclesiæ, esset etiam membrum Ecclesiæ: nam caput est membrum corporis naturalis; atqui id dici non potest; ergo.

Respond. nego seq. major. Quia, Caput, est vox analogia respectu capitis naturalis & mystici; in hoc autem caput mysticum convenit cum naturali, 1. Quod sicut caput naturale, est suprema pars corporis, ita caput mysticum dignitate præcellat iis; respectu quorum est caput. 2. Quod quemadmodum in capite naturali omnes sensus vigent, ita in mystico est plenitudo omnium gratiarum donorum. 3. Quod sicut in capite naturali est virtus influendi in cætera membra vitam & motum, ita in morali sit vis influendi vitam supernaturalem gratiæ & gloriæ; sed in hoc disconvenit, quod caput morale non importet rationem partis, nec consequenter dependentiam ab aliis partibus; Christus ergo, qui est fundator gregis, non est de grege.

Inst. Apost. 1. Cor. 12. Vos estis corpus Christi membra de membris, ergo Christus est membrum hujus corporis.

or Resp. nego consequ. Quia Apostolus per, membra,

bra, intelligit quemcumque fidelem, & per vo-
cem, *de membro*, intelligit, non Christum,
sed Ecclesiam Corinthiam, unde sensus est:
vos estis membra Ecclesiæ Corinthiæ, quæ est
pars Ecclesiæ universalis, unde in Græco di-
citur: *Estis membra ex parte*. Et in Syriaco:
Estis corpus meschino, (id est, Christi), & mem-
bra in loco vestro.

Objicies 2. Christus, ut homo, seu, per
humanitatem: non influit dona gratiæ in mem-
bra corporis Ecclesiæ; ergo, ut homo, non
est caput Ecclesiæ.

Resp. dist. ant. Si per *id homo*, intelligatur
sola humanitas, conced. si intelligatur homo
subsistens in natura Verbi, nego: *antec.* atqui
per, *id homo*, intelligitur homo subsistens in
natura Verbi, quia merita, quæ Christus,
prout caput, membris suis communicat, pre-
mium habent ex conjunctione humanitatis cum
Verbo; unde particula, *ut homo*, non est re-
duplicativa *adequate*, ita ut indicet rationem
adequatam meriti, sed *inadequate*, & *quasi*
specificative.

Resolves, Christum esse caput morale. 1.
Beatorum, quibus communicat gloriam. 2. *Ju-*
storum, quibus communicat gratiam. 3. *Fide-*
lium peccatorum, qui uniuntur illi per fidem,
quæ, licet sit mortua, est tamen gratia per
Christum. Sola difficultas est de infidelibus &
damnatis, pro qua solvenda:

C O N C L U S I O. II.

Christus est caput infidelium, non quidem actu,
sed potentia; nulla vero ratione est caput dam-
natorum.

Prob. prima pars: Illi non sunt actu membra
Christi, quibus nullam vitam communicat
ne

neque perfectam per charitatem, neque imperfectam per fidem; atqui tamen sunt infideles; ergo.

Prob. secunda pars: Infideles a Christo gratias actuales accipiunt, quibus si cooperarentur, ulterioribus auxiliis instruerentur, quibus possent ad fidem pervenire, baptizari, & salvari; ergo sunt membra Christi potentia, ait D. Thom. *Quaest. 8. art. 3. in corp.*

Dices: Infideles non baptizati, non sunt membra Ecclesiae; ergo nec sunt membra Christi.

Resp. dist. antec. Non sunt membra Ecclesiae actu, conc. potentia, nego ant. Sunt ergo membra Ecclesiae potentia, hoc sensu, quod Christus det illis media sufficientia quibus bene uti possunt, & justificari, si voluerint. Ita Div. Thom. hic.

Probat. tertia pars: Qui sunt a Christo in æternum separati, nec jam ullum ab eo accipiunt influxum, non sunt membra Christi; atqui damnati tales sunt; ergo, &c. Ita Div. Thom. hic.

CONCLUSIO III.

Christus, ut homo, est caput bonorum Angelorum?

Prob. 1. Ex Scriptura, Coloss. 2. *Estis in illo repleti, qui est caput omnis principatus & potestatis.* Et 1. Petr. 3. *Profectus in calum, subiectis sibi Angelis, & potestatibus, & virtutibus.* Unde D. Aug. *serm. 3. in Ps. 36.* ait: *Corpus capitis illius sumus. Nunquid soli nos? omnes qui ab initio fuerunt iusti, adjunctis etiam legionibus & exercitibus Angelorum.*

Prob. 2. Quia Christus, etiam respectu Angelorum, habet tres conditiones ad rationem capi-

capitis necessarias, & sufficientes, cum eis præcellat dignitate, gratiarum plenitudine, & in eos influat varias illuminationes, variaque dona gloriæ, & gaudiorum accidentalium.

Q U Æ S T I O V.

De regia & judiciaria Christi dignitate.

QUÆRES I. *An Christus, ut homo, fueris Rex?*

Resp. affirm. Ut manifeste declarat Scriptura, Matth. 27. *Hic est Jesus Rex Judæorum.* Et ipse Jesus sciscitanti Pilato utrum esset Rex, Matth. 28. respondit: *Tu dicis, quia Rex sum ego.* Unde D. August. in Psalm. 147. de Christo dicit: *Unctus est & Rex & Sacerdos: Rex pugnavit pro nobis; Sacerdos obtulit se pro nobis.*

QUÆRES I. *Quale fuerit regnum Christi, an temporale, vel spirituale tantum?*

Resp. Non fuit temporale, ut declarat ipsemet Jo: 18. *Regnum meum non est de hoc mundo: si ex hoc mundo esset regnum meum, ministri mei utique decertarent ut non traderer Judæis; nunc autem regnum meum non est hinc.* Ergo fuit spirituale, positum in institutione, administratione, dispensatione rerum omnium quæ ad hominum salutem ordinantur. Unde Christus potuit 1. Sacramenta instituere. 2. Creare Magistratus Ecclesiasticos. 3. Condere leges. 4. Omnes homines ad suarum legum observationem adstringere.

Dices: Christo concedi debet omnis dignitas, quæ ipsum non dedecet, atqui Christum non dedecuit regia potestas temporalis; ergo.

Resp. dist. ant. Quæ Christum non dedecet, nec est contraria officio redemptoris, *conc.* si
fit

fit contraria officio redemptoris, *nego antec.* Porro regia dignitas in Christo, erat maxime contraria officio redemptoris, quod debuit exequi factus obediens usque ad mortem, mortem autem Crucis.

Quæres 3. *An Christus, ut homo, sit Judex vivorum & mortuorum?*

Resp. affirmat. Id enim expresse tradit Scriptura, Actor. 10. *Ipse est constitutus a Deo Judex vivorum & mortuorum.* Idem habetur Joannis 5. *Necque enim Pater judicat quemquam, sed omne judicium dedit Filio.* Atqui non est constitutus Judex ut Deus: habet enim hanc potestatem a se; ergo est constitutus Judex ut homo: sic enim declaratur Joann. 5. *Potestatem dedit ei judicium facere, quia Filius hominis est.* Hinc D. Augustinus lib. 1. de Trinit. cap. 13. *Filius hominis, inquit, judicaturus est, nec tamen ex humana potestate, sed ex ea qua Filius Dei est: & rursus Filius Dei judicaturus est, nec tamen in ea forma apparens, in qua Deus est aqualis Patri, sed in ea qua Filius hominis est.*

Quæres 4. *Ad quos se extendat judiciaria Christi potestas?*

Resp. Se extendit ad omnes omnino homines, nullo dempto; juxta illud, 2. Corinth. 5. *Omnes nos manifestari oportet ante tribunal Christi, ut referat unusquisque propria corporis prout gessit, sive bonum, sive malum.*

Ratio est, quia Christus per passionem meruit ut sit & dicatur omnium Dominus, ex Roman. 14. *In hoc Christus mortuus est & resurrexit, ut vivorum & mortuorum dominetur.*

Obijcies 1. Christus non judicabit homines qui jam credunt; ergo, &c.

Prob. antec. Ex Joann. 5. ubi dicitur: *Qui credit ei qui misit me, habet vitam æternam,*
& in

Et in iudicium non venit, sed. transit de morte ad vitam; ergo, &c.

Resp. nego conseq. Quia ibi, iudicium non sumitur pro actu iudicandi, sed pro condemnatione; unde sensus est: qui credit, non condemnabitur in extremo iudicio; quo. etiam sensu dicitur ibidem: *Procedent qui bona fecerunt, in resurrectionem vite; qui vero mala egerunt, in resurrectionem iudicii*; id est, condemnabuntur.

Obicies 2. Joann. 5. Qui non credit, jam iudicatus est; ergo hic non stabit in iudicio Christi.

Resp. dist. ant. Jam iudicatus est per legem, ob illius transgressionem, conced. aliter, *nego antecedi.* Illa porro condemnatio propter legis transgressionem, non impedit quominus. etiam iudicetur per Iudicem, ad quem pertinet ferre sententiam mortis. quoad executionem, in eam qui jam per legem morti addictus est quantum ad reatum & obligationem; nam Matth. 25. *Tunc dicet his qui a sinistris erunt: Discedite a me, maledicti, in ignem aeternum.*

Q U A E S T I O. VI.

De Christi Sacerdotio.

Nota: **S**acerdotium duobus. modis sumitur, nimirum, 1. *Late & improprie*, pro facultate bonum opus. exercendi, quo sensu, 1. *Petri 2.* omnibus fidelibus dicitur, *Vos estis genus electum, regale sacerdotium*. 2. *Proprie & stricte*, pro auctoritate, singulari titulo alicui collata, ad sacrificium proprie dictum Deo offerendum.

Hic sacerdotii nomen *proprie* sumitur, ac queritur, 1. Utrum Christus fuerit vere ac
pro-

proprie Sacerdos. 2. An fuerit Sacerdos pro-
ut homo. 3. An Sacerdos in æternum secun-
dum ordinem Melchisedech.

CONCLUSIO I.

Christus vere ac proprie fuit Sacerdos. Est de fide.

Prob. 1. Ex Scriptura, Hebr. 5. ubi Christo attribuuntur hæc verba Psalm. 109. Tu es Sacerdos in æternum secundum ordinem Melchisedech. Et Hebræor. 4. dicitur: Habentes ergo Pontificem magnam, qui penetravit calos, Jesum Filium Dei.

Prob. secunda ratione: Sacerdos proprie, est ille qui publica auctoritate constituitur, ad offerenda Deo dona & sacrificia pro hominibus; atqui Christus 1. auctoritate publica, nempe divina, fuit constitutus Sacerdos, Hebr. 5. Christus non semetipsum clarificavit ut Pontifex fieret, sed qui locutus est ad eum, Filius meus es tu. 2. Fuit constitutus ad offerenda pro hominibus dona & sacrificia; ibidem, Pro hominibus constituitur . . . ut offerat dona & sacrificia pro peccatis; ergo.

Objicies: Christus non immolavit hostiam; ergo non fuit proprie Sacerdos.

R.sp. nego consequ. Quia ad verum sacrificium satis est, quod hostia ab eo offeratur, qui ad id constitutus est; atqui Christus, ex Ephes. 5. tradidit semetipsum pro nobis oblationem & hostiam Deo in odorem suavitatis: ergo.

Inst. Martyres vitam propriam pro Deo offerentes, non dicuntur, nec sunt Sacerdotes; ergo.

Resp. nego consequ. Disparitas est, quod Christus ad offerendam hostiam corporis sui a Deo constitutus est, non autem Martyres.

CON-

CONCLUSIO II.

Christus non fuit Sacerdos prout Deus ; sed prout homo hypostatice unitus Deo.

Prob. 1. Ex Apost. Hebr. 5. Omnis Pontifex ex hominibus assumptus ; sed qui assumitur ex hominibus, homo est ; ergo.

Prob. 2. Ex PP. dicentibus cum D. Ambr. lib. 3. de fide , cap. 5. Idem Sacerdos , idem & hostia ; atqui Christus fuit hostia prout homo Verbo substantialiter conjunctus ; ergo.

Prob. 3. ratione : Quia Sacerdos debet esse medius inter Deum & homines, debetque habere superiorem cui sacrificet ; atqui Christus non ut Deus, sed ut homo, est medius inter Deum & homines, & Deo inferior ; ergo.

CONCLUSIO III.

Christus est Sacerdos in aeternum secundum ordinem Melchisedech.

Prob. Ex Script. Hebr. 7. Tu es Sacerdos in aeternum secundum ordinem Melchisedech. Et ex Concilio Trident. sess. 22. cap. 1. Sacerdotem secundum ordinem Melchisedech. se in aeternum declarans (Christus) corpus & sanguinem suum, sub speciebus panis & vini, Deo Patri obtulit, &c.

Quæres 1. Quare Christus dicitur Sacerdos secundum ordinem Melchisedech ?

Resp. Ratio est, quia sacrificium Christi ex parte rei oblatae, expressius fuit representatum per sacerdotium Melchisedech, quam per sacerdotium Aaron ; nam Christus in ultima coena suum corpus, & suum sanguinem incruento modo obtulit sub panis & vini speciebus, quibus olim Melchisedech, in suo sa-
cri-

sacrificio, tanquam Sacerdos, usus fuerat, Genes. 14. *Melchisedech proferens panem & vinum, (erat enim Sacerdos Dei altissimi) benedixit ei.*

Quæres 2. Quare Christus dicitur Sacerdos in æternum?

Resp. dicitur in æternum, & quoad se, & quoad effectum. 1. *Quoad se*, quia Christus in suo munere sacerdotali non habuit successorem, sed eo adhuc fungitur, seipsum quotidie sacrificans Sacerdotum ministerio, quod sacrificium duraturum est usque in finem mundi: porro quæ diu durant, dici solent æterna. 2. *Quoad effectum*, qui est consummatio Sanctorum in gloria, quæ in æternum duratura est; & sic causa dicitur æterna ab æternitate effectus.

Q U Æ S T I O VII.

De Christi patrocinio.

Nota: **P**atroni nomine intelligitur is, qui unum pro alio rogat & interpellat: unde hic quæritur, utrum Christus, ut homo, oraverit in terra, & nunc etiam in cælis oret pro nobis.

C O N C L U S I O I.

Christus, ut homo, in hac vita vere ac proprie oravit pro nobis.

Prob. 1. Ex Scriptura: Lucæ 6. Exiit in montem orare, & erat pernoctans in oratione Dei. Ergo.

Prob. 2. ratione: Ut Christus in terris degens oraverit proprie dicta oratione, satis fuit, ut per voluntatem humanam, ex qua orabat, non po-

potuerit implere omne quod volebat, sed tantum dependenter a Deo; atqui Christus per voluntatem humanam, ex qua orabat, non potuit adimplere omne quod per illam volebat; ergo potuit, ac debuit ad divinam virtutem recurrere, ut, quæ volebat, obtineret.

Obijcies: Christus præsciebat quid futurum esset; ergo non debuit orare.

Resp. nego consequ. Nam ad orandum satis fuit Christo, ut sciverit, id quod petebat, non futurum, secundum Dei decretum, nisi dependenter a sua oratione.

Quæres: *An omnis oratio Christi fuerit semper exaudita?*

Nota: Duplex fuit oratio Christi, una absoluta, per quam aliquid postulabat ex absoluto obtinendi desiderio, altera conditionata, per quam aliquid ex affectu duntaxat conditionata exoptabat.

Resp. Oratio Christi absoluta, semper fuit exaudita; non vero conditionata.

Prob. prima pars: Ex Joann. 11. ubi Christus dixit Patri: *ego autem sciebam, quia semper me audis.* Quod non potest intelligi, nisi de oratione absoluta.

Ratio est, quia oratio Christi absoluta, fuit semper divinæ voluntati conformis: nihil enim per eam voluit, nisi quod sciret Deum absolute velle, posita sua oratione; ergo, cum Dei voluntas absoluta suum effectum semper obtineat, oratio Christi absoluta, semper fuit exaudita.

Prob. secunda pars: Quia Christus *Matth. 26.* oravit Patrem oratione conditionata, *Pater, inquit, si fieri potest, transeat a me calix iste;* atqui non fuit exauditus; ergo.

CONCLUSIO II.

Christus, ut homo, etiam nunc in cælis orat pro nobis.

Prob. 1. Ex Scriptura, Roman. 8. Christus, qui est ad dexteram Dei, qui etiam interpellat pro nobis. Ad quæ verba D. August. Epist. 59. ait: Nunquid interpellat, & non etiam postulat? immo vero quia postulat, pro eo positum est, interpellat. Et D. Greg. in Psalm. 5. pœnitentialem: Quotidie Christus orat pro Ecclesia de qua testatur Apostolus, quia sedens ad dexteram Patris, interpellat pro nobis.

Prob. 2. ratione: Oratio, est expressio sui desiderii facta illi, qui juvare potest; atqui tale desiderium merito admittitur in Christo; ergo, &c. Oratur in forma Dei, ait D. August. in Psalm. 85. Orat in forma servi.

Obijcies 1. Christus nunc non meretur; ergo nec orat.

Resp. nego consequ. Disparitas est, quod status viæ requiratur ad merendum, non autem ad orandum; atqui Christus non est in viâ; ergo.

Inst. 1. Qui orat, impetrat; sed qui impetrat, meretur; ergo qui orat, meretur.

Resp. dist. min. Qui impetrat, propter dignitatem actualem suæ orationis, meretur, conc. propter merita præterita, nego min. Cum itaque Christus, & Sancti in cælis, nobis aliquid impetrant, id eis conceditur, non propter meritum actuale, sed propter merita, quæ, cum in terris viverent, compararunt.

Inst. 2. Christus in hac vita sufficienter oravit; ergo nunc non orat.

Resp. dist. consequ. Non orat, ex indigentia, conc. ex abundantia, nego consequ. Christus itaque

que orat ex abundantia, eo modo quo amicus, qui ab amico gratiam sibi concedendam impetrasset, eandem gratiam tempore ipsius concessionis postulare non desineret.

Objicies 2. Si Christus adhuc hodie oret pro nobis, possemus illum rogare, ut oret pro nobis; atqui hoc est contra praxim Ecclesiæ, quæ in suis Litaniis nunquam dicit: *Christe, ora pro nobis; sed, miserere nobis.* Ergo.

Resp. dist. major. Possemus absolute, conc. si sit periculum erroris aut periculi, *nego major.* Illa ergo orandi formula non est usurpanda, 1. Ne connivere videamur cum Arianis, quando enim simpliciter rogatur aliquis, ut oret, tunc significatur ipsum habere superiorem quem possit orare, & quia, simpliciter loquendo, Christus non est inferior Deo, immo Deus ipse, non debet rogari, ut oret; sed potius, ut misereatur nostri. 2. Quia Christum debemus invocare secundum titulum ipsi magis honorificum; standum ergo est praxi Ecclesiæ, quæ errorum Arii & Nestorii vitandorum causa, renuvit hunc orandi modum usurpare.

Q U Æ S T I O VIII.

De mediatione Christi.

Nota 1. **M**ediator, est is, qui medius est inter partes dissidentes; ut eas reconciliet. Porro mediator, alius est talis *simpliciter*, alius *secundum quid*.

Mediator *simpliciter*, est is, qui reconciliat partes dissidentes, non tantum orando & supplicando, sed etiam solvendo & satisfaciendo uni parti pro altera.

Mediator *secundum quid*, est is, qui reconciliat

ciliat partes dissidentes, orando solum & supplicando uni parti pro altera, & quidem mediate; sic Sancti & Sacerdotes sunt mediatores Dei & hominum, quia interpellant Deum pro hominibus *mediate* tantum, nempe per Christum qui nos redemit.

Certum est apud omnes, Christum esse mediatorem Dei & hominum simpliciter, juxta illud Apostoli 1. ad Timoth. 2. *Unus est mediator Dei & hominum, homo Christus Jesus, qui dedit redemptionem semetipsum pro omnibus: quod de solo mediatore simpliciter intelligi potest.*

Nota 2. Circa mediationem Christi, duplex est error. *Primus*, est Calvini, qui, *In duabus Epistolis ad Polonos contra Stancarum*, contendit Christum secundum utramque naturam divinam & humanam, tanquam principium quo, mediatoris officio perfunctum fuisse; cum econtra Catholici omnes doceant Christum esse mediatorem, prout est homo cum persona Verbi unitus, ita ut natura humana Christi fuerit principium quo operationum, quibus mediatoris opera agebat: Verbum vero fuerit eorundem operum principium quod, a quo suum valorem substantialem desumebant.

Secundus error, est ejusdem Calvini & Lutheri, qui contendunt invocationem Sanctorum in cælis regnantium, (quos dicimus mediatores secundum quid) oppositam esse mediationi Christi, eique detrahere; quos errores duobus articulis confutabimus.

ARTICULUS I.

*Utrum Christus sit mediator Dei & hominum
secundum humanitatem, vel divinitatem?*

CONCLUSIO.

Christus non est mediator Dei & hominum
secundum divinitatem; sed secundum hu-
manitatem in Verbo subsistentem. Est contra Cal-
vinum.

Prob. 1. Ex Apost. ad Tim. 2. Unus Deus,
unus & mediator Dei & hominum, homo Chri-
stus Jesus. Cur, quæso, addit, homo, nisi ad
exprimendam naturam, secundum quam Chri-
stus est mediator? Hoc notat August. *serm. 11.*
de verbis Apostoli: Non ait; Christus Jesus,
inquit, ne tu putares secundum Verbum dictum,
sed addidit, homo, mediator Dei & hominum
homo Christus Jesus. Et lib. 2. de peccato orig.
cap. 28. Non per hoc mediator est; quod aequalis
Patri, per hoc enim, quantum Pater, tantum
& ipse a nobis distat: & quomodo erit medie-
tas, ubi eadem distantia est? ideo Apostolus non
ait: Christus Jesus: sed, homo Christus Jesus.
Per hoc ergo mediator, per quod homo, inferior
Patre, quia in forma servi; superior nobis, quia
sine labe peccati.

Prob. 2. Traditione PR. S. Cyrill. (1) ait:
Audiens quod dictus est Sacerdos propter huma-
nitatem; erubescisne? deinde quomodo non admi-
ratus es quod non secundum sacerdotum morem
alteri fecerit sacrificii modum, sed sibi ipsi &
Patri?

(1) Apologia 12. cap. contra Orientales.

Patri ? Ubi non solum aperte dicit, Christum esse Sacerdotem propter humanitatem, sed etiam innuit non esse talem propter divinitatem, dicens, obtulisse sacrificium *sibi ipse & Patri*. Non enim potest unus & idem, ut idem, sacrificium offerre & accipere, accipit ergo ut Deus, offert ut homo.

Divus Augustinus, lib. 10. confess. cap. 43. *In quantum homo, in tantum mediator, in quantum autem Verbum, non medius, quia equalis Deo.*

Prob. 3. ratione : Mediator debet esse medius, id est, aliquo modo distans ab utraque parte dissidente; atqui Christus, ut Deus, non potest esse medius inter Deum & homines, cum sit ipse Deus; ergo est medius, ut homo unitus Verbo; sic enim distat a Deo in natura, & ab hominibus in dignitate infinita gratiæ unionis.

Objicies : Sub ea ratione Christus est mediator, sub qua nos reconciliavit & pacificavit; atqui Christus, non reconciliavit, prout Deus ab humanitate præcisus; juxta illud 2. Cor. 5. *omnia autem ex Deo, qui nos reconciliavit per Christum*. Et illud Coloss. 1. *pacificans per sanguinem crucis ejus, sive qua in terris, sive qua in calis sunt*. Ergo.

Resp. dist. major. Sub ea ratione Christus est mediator, sub qua nos reconciliavit & pacificavit, supplicando & satisfaciendo pro nobis, *conc.* exaudiendo & acceptando satisfactionem præstitam, *nego major*. Atqui Christus nos reconciliavit prout Deus, &c. exaudiendo & satisfactionem acceptando, *conc.* supplicando & satisfaciendo, *nego minor*. Sic enim non fuit mediator, nisi qua homo unitus divinitati. Ex hac responsione patet, quod omnis mediator reconciliat & pacificat, sed non omnis, qui

qui reconciliat & pacificat , continuo est mediator.

Inst. 1. SS. PP. asserunt necesse fuisse Christum esse Deum , ut esset mediator , *Neque enim liberaremur per unum mediatorem Dei & hominum ;* inquit Augustinus Enchiridii capit. 18. *Nisi esset Deus .* Ergo Deus qua Deus , est mediator.

Resp. nego conseq. Equidem , ut Christus fuerit mediator , necesse fuit esset Deus , non quod debuerit opera mediatoris elicere per naturam divinam ; sed ut illa mediatoris opera haberent ex persona divina dignitatem moralem infinitam , necessariam ad satisfaciendum Deo ; itaque , cum is tantum sit mediator , qui opera elicit , per quæ impetrat reconciliationem ; Christus formaliter fuit mediator per solam humanitatem , licet , præter formam humanitatis , debuerit habere divinum suppositum , quod pretium , & dignitatem operibus humanitatis conferret. Unde Divus Augustinus , *lib. 9. de Civitate Dei , cap. 15.* postquam dixit : *Quarendus est mediator , qui non solum , homo , sed etiam Deus sit ,* addit : *Nec tamen ob hoc mediator est , quia Verbum , & maxime quippe immortale , & maxime beatum Verbum longe est a mortalibus miseris , sed mediator per quod homo .*

Inst. 2. Renovare corda & dari Spiritum sanctum sunt opera mediatoris ; atqui illa opera soli Deo , ut Deus est , conveniunt ; ergo .

Respond. dist. major. Renovare corda & dare Spiritum sanctum meritorie , sunt opera mediatoris , *conc.* efficienter , *nego maj.* Sic enim non est opus mediatoris , sed ejus apud quem mediator intercedit , id est totius Trinitatis ,

ARTICULUS II

*Utrum invocatio sanctorum opposita sit
mediationi Christi?*

Nota: **H**ic non quaritur 1. Utrum liceat a Sanctis petere, ut nobis concedantur beneficia spiritualia; certum est enim quod, *Omne donum perfectum desursum est descendens à Patre luminum. Jac. 1.* Ergo nihil debemus a Sanctis petere, quam ut nobis impetrent a Deo illa gratiæ & gloriæ dona, quibus indigemus.

2. *Non quaritur*, Utrum Sancti sint mediatores nostri apud Deum simpliciter & immediate; certum est enim, quod Christus solus sit mediator noster simpliciter, Sancti sunt tantum mediatores secundum quid & mediate, quia quicquid a Deo nobis impetrant, per Christum impetrant, unde Ecclesia in suis orationibus, quæ de Sanctis sunt, hanc semper formam adhibet: *Concede nobis, Deus, intercessione hujus Sancti tale beneficium, per Christum Dominum nostrum.*

3. *Nec quaritur*, Utrum fideles aliquo præcepto teneantur Sanctos invocare; certum est enim, nullum, aut in Scriptura, aut in traditione, aut in Ecclesiæ decretis extare tale præceptum.

Quaritur ergo unice 1. Utrum Sancti unacum Christo regnantes, orent pro nobis. 2. Utrum bonum atque utile sit invocare Sanctos. Unde:

CON-

CONCLUSIO I.

Sancti, una cum Christo regnantes, orant pro nobis. Est de fide.

Prob. 1. Ex Scriptura Jerem. 15. Dixit Dominus ad me, si steterint Moyses & Samuel coram me, non est anima mea ad populum istum. Ergo Moyses & Samuel jam mortui solebant orare pro populo Israel: neque enim dicitur: si starent: sed si steterint, proindeque illa verba non sunt de conditione impossibili.

2. Machab. 15. legitur, Judam in visu vidisse, Oniam, qui fuerat Summus Sacerdos, orare pro omni populo Judaorum. Et postea apparuisse alium virum acate & gloria mirabilem, de quo dixit Onias: Hic est fratrum amator & populi Israel, hic est, qui multum orat pro populo, & universa sancta civitate, Jeremias Propheta Dei. Ad hunc locum nihil habet quod respondeat Calvinus, nisi hunc librum non esse canonicum, sed esse canonicum probavimus alio loco.

Tobiae 12. Angelus Raphael sic Tobiam alloquitur; Quando orabas cum lacrymis ego oculi orationem tuam Domino. Atqui non obtulit ut eam Deo omniscio manifestaret; ergo ut pro Tobia intercederet.

Prob. 2. Traditione S. Cyprian. lib. 1. Epist. 1. ait: Si quis hinc nostrum prior praeceperit, perseveret apud Deum nostra dilectio, pro fratribus & sororibus nostris, apud misericordiam Patris non cesset oratio.

D. Greg. Nazianz. orat. 14. de obitu Patris sui, dicit: Nunc magis proficit nobis precibus, quam antea doctrina.

D. Hieron. Epist. ad Paulam, de obitu Blefillae: Pro te, inquit, Dominum rogat, mihi que veniam impetrat peccatorum.

D. August. lib. 7. de Bapt. contra Donatistas cap. 1. ait: *Adjuvet nos Cyprianus orationibus suis . . . ut, donante Domino, quantum possumus, bona ejus imitemur.* Eodem modo omnes alii Patres laudant orationes sanctorum defunctorum pro vivis.

CONCLUSIO II.

Pium est & utile Sanctos invocare. Est de fide, definita in Concil. Trid. sess. 25. his verbis: *Mandat Sancta Synodus omnibus Episcopis, &c. ut juxta Catholica & Apostolica Ecclesia usum a primisvis christiana religionis temporibus receptum . . . fideles diligenter instruant, docentes eos, Sanctos una cum Christo regnantes, orationes suas pro hominibus Deo offerre; bonum atque utile esse suppliciter eos invocare, & ob beneficia impetranda a Deo per Filium ejus J. C. D. N. qui solus noster Redemptor & Salvator est, ad eorum orationes, opem, auxiliumque confugere.*

*Prob. 1. Ex Scriptura: Pium & utile est invocare Angelos, Genes. 19. Angelus alloquitur Loth sic: Ecce suscepi preces tuas, ut non subvertam urbem pro qua locutus es. Et Osee 2. de Jacob dicitur: Invaluit ad Angelum, & confortatus est, fleuit & rogavit eum. Ergo pium quoque, & utile est invocare sanctos homines qui cum Christo regnant in cælis, de quibus dicitur Lucæ 20. *Æquales enim Angelis sunt, & Filii sunt Dei.**

Prob. 2. Pium & utile est invocare Sanctos viventes, lib. 1. Regum, cap. 7. Dicunt filii Israel ad Samuelem: Ne cesses pro nobis clamare ad Dominum, ut salvet nos. Et Roman. 5. Apostolus ait: Obsecro vos, fratres, ut adjungetis me in orationibus pro me ad Deum. Ergo simili-

similiter pium ac utile est invocare homines sanctos, qui cum Christo regnant in cælis.

Prob. conseq. Quia si nunc non sit pium ac utile Sanctos invocare, vel quia nolunt nobis succurrere; vel quia non possunt; vel quia quod oramus ignorant; vel quia ipsos invocando fit injuria Deo & Christo; atqui nihil horum dici potest; ergo, &c.

Non primum, cum nunc majori charitate sint præditi, quam cum in terris degerent, nam de sua immortalitate securi, de nostra incolumitate solliciti sunt, ait D. Cypr. serm. de immortalitate.

Non secundum, quia si poterant nobis succurrere, cum hic erant peregrini, quanto magis nunc poterunt in patria.

Non tertium, quia unde sciunt Angeli conversionem peccatorum, pro qua tantopere gaudent in cælis, *Luc. 15.* inde sciunt Sancti nostras preces.

Non quartum, quia similiter fieret injuria Christo, viventes Sanctos invocare. Hoc argumentum Calvinistæ nunquam solvere potuerunt.

Prob. 3. Traditione PP. S. Cyrillus Catechesi, 5. mystag. Cum hoc sacrificium offerimus, inquit, facimus mentionem etiam eorum, qui ante nos obdormierunt, primum Patriarcharum, Prophetarum, Apostolorum, &c. ut Deus orationibus illorum, suscipiat preces nostras, &c.

S. August. serm. 17. de verbis Apostoli, ait: Injuria est enim pro Martyre orare, cujus nos debemus orationibus commendari.

S. Gregor. Turonensis, lib. 1. de gloria Martyrum, cap. 49. dicit: Cyprianus beatiss. Antistes & Martyr, salutem sapius infirmis supplicantiis præstat.

Ven. Beda, lib. 4. in Cantica, ait: Sancti

nium vel Angelorum, vel hominum crebras pro nobis intercessionibus quaramus: hac sunt etenim firmissima ac tutissima S. Ecclesiæ præsidia.

Prob. 4. Ex Conc. Generali Act. II. Concil. Chalcedonensis Patres dixerunt: Flavianus post mortem vivit; Martyr pro nobis oret.

In Symbolo VI. cap. 7. dicitur: Solo Deo Creatore adorato, invocet Christianus Sanctos, ut pro se intercedere apud majestatem divinam dignentur.

In Synodo VII. Act. 6. legitur: Cum timore omnia agamus postulantes intercessionibus incontaminata Deipara, item SS. Angelorum, omniumque Sanctorum. His omnibus auctoritatibus accedit praxis Ecclesiæ nunquam interrupta.

Solvuntur Objectiones.

Objicies. 1. Impium est invocare eum, qui Deus non fit; ergo.

Resp. nego ant. Alias esset impium invocare Sanctos qui adhuc in terris militant, quod aperte repugnat Scripturis.

Prob. antec. Impium est invocare eum, in quem non credimus, juxta illud, Roman. 10. *Quomodo invocabunt in quem non crediderunt?* Atqui non credimus in Sanctos; ergo.

Resp. dist. maj. Eum in quem non credimus impium est invocare, tanquam supremum bonorum auctorem, *conc.* tanquam Dei amicum, & intercessorem nostrum apud Deum, *nego maj.* Nec enim Sanctos invocamus, ut ipsi nobis dona conferant, sed ut ea pro nobis a Deo impetrent.

Instab. 1. Impia est praxis, quæ Christo est injuriosa; atqui praxis Sanctos invocandi, Christo est injuriosa; ergo.

Resp. nego min. Neque enim invocamus Sanctos, ut Christum adjuvent, ad impetrandum, sed

sed ut nos adjuvent, quo facilius per merita Christi impetremus. Deinde si valeret argumentum, etiam concluderet invocationem fidelium in terris degentium esse injuriosam Christo, quod tamen contrarium esse Scripturis fatentur Hæretici.

Inst. 2. Injuriosum est Christo, mediatorem apud Deum adjungere; atqui praxis invocandi Sanctos adjungit Christo mediatorem; ergo.

Resp. dist. maj. Injuriosum est Christo mediatorem adjungere, *primarium & simpliciter, conc. secundarium & secundum quid, nego maj.* Porro, juxta dicta superius, mediator secundarius & secundum quid, non est ille, qui pro nobis solvit ac satisfacit; sed est ille tantum, qui pro nobis orat per merita primarii mediatoris, & virtute gratiarum ab illo acceptarum, quod tantum abest, ut sit Christo injuriosum, quin potius ejus merita maxime commendet.

Instab. 3. Christus, ut mediator primarius, interpellat pro nobis; ergo si Sancti interpellant pro nobis, sunt etiam mediatores primarii.

Resp. dist. ant. Interpellat, simul, & satisfacit pro nobis, *conc. interpellat tantum, quomodo Sancti pro nobis orant, nego ant.* Ratio est; quia oratio Christi nititur propriis meritis oratio vero Sanctorum nititur meritis Christi.

Inst. 4. Christus, *Matth. 6.* docet solum Deum esse orandum, dicens: *Sic ergo vos orabitur: Pater noster, qui es in calis, &c.* Ergo Sancti non possunt orari.

Resp. nego ant. Aliis, nec Christus, ut homo, posset orati, & Apostolus peccasset commendando se fidelium precibus. Itaque his verbis Christus docuit quid & quomodo orandum esse, non vero quis sit orandus; sciebant enim

Apostoli Deum esse orandum ut omnium bonorum auctorem; sed nesciebant quid petendum esset & quo ordine, & ideo Christus utrumque eos docet.

Inst. 5. Concil. Laodicenum, Can. 35. damnat cultum Angelis exhibitum: Non oportet Christianos, relicta Dei Ecclesia, abire, & Angelos nominare . . . quod est prohibitum. Ergo.

Resp. dist. antec. Damnatur cultus latræ Angelis exhibitum, conc. cultus dulciæ, nego ant. Itaque illud Concilium damnatur hæresim Simonis Magi, qui docebat Angelos cultu latræ adorandos, eosque sacrificiis placandos, quasi minores Deos, qui mundum condiderint; addit enim: *Si quis inventus fuerit huic occultæ idololatricæ vacare, sit anathema*; quod de solo cultu latræ ipsis exhibitum, potest intelligi. Ita Bellarminus, *lib. 1. de beatitudine Sanctorum, cap. 20.*

Objicies 2. Prorsus inutilis est invocatio Sanctorum; ergo frustra a fidelibus adhibetur.

Prob. ant. Oratio, quæ ad Sanctos mortuos dirigitur, ab illis ignoratur; ergo inutilis prorsus est.

Resp. nego ant. Quod est contra Scripturam, nam Lucæ 16. Abraham Epuloni diviti dixit: Fili, recordare quia recipisti bona in vita tua, & Lazarus similiter mala. Ergo hoc Abrahamo non erat ignotum. Item, Lucæ 15. Beati gaudent de poenitentia cujuslibet peccatoris; ergo cognoscunt actus liberos hominum viventium.

Inst. 1. Solus Deus scit hominis cogitationes, 3. Reg. 8. Tu nosti solus cor omnium filiorum hominum; ergo Sancti non eas cognoscunt.

Resp. dist. conseq. Non eas cognoscunt naturaliter & propria virtute, conc. supernaturaliter

liter & virtute divina, *nego* *conseq.* Preces ergo nostras cognoscunt quæ ipsis a Deo manifestantur, sive a principio suæ beatitudinis per intuitivam Dei visionem, ut docet Greg. magnus, *lib. 12. Moral. cap. 14.* Sive quando preces funduntur, per novam revelationem, ut vult D. August. (*s*) *Possunt spiritus mortuorum aliqua qua hic aguntur, qua necessarium est eos nosse . . . Spiritu Dei revelante, cognoscere, sicut Propheta, dum hic viverent cognoscebant qua illis revelanda Dei providentia indicabat.*

Inst. 2. Eccl. 19. dicitur: *Mortui nihil novērunt amplius; ergo.*

Resp. dist. ant. Nihil novērunt amplius, naturaliter, *conc.* supernaturaliter, *nego ant.* Omnia enim, quæ ad eos pertinent, vident in Deo.

Inst. 3. Sancti in cælo nihil sibi mereri, vel impetrare possunt; ergo multo minus aliis.

Resp. nego secundam partem ant. Licet enim nihil sibi, nec aliis possint mereri, quia non sunt amplius in statu meriti; tamen ex meritis præcedentibus possunt & sibi & aliis impetrare id quod orando petunt: nimirum sibi gloriam corporis, nobis autem omnia quibus indigemus.

Inst. 4. Sancti jam præmium meritorum suorum acceperunt; ergo nihil amplius eis debetur.

Resp. dist. ant. Jam acceperunt præmium essentialiale, *conc.* accidentale, *nego ant.* Porro ad præmium accidentale pertinet gloria eorum corporis, & potestas impetrandi a Deo quicquid ab eo, tanquam ejus amici, petunt.

Instab. 5. Deus paratissimus est nos audire, ma-

magisque nos diligit, quam ullus Sanctorum; ergo frustra invocantur Sancti.

Resp. nego consequ. Licet enim Deus nos audire sit paratissimus, nosque magis diligat quam ullus Sanctorum, adhuc tamen magis est paratus nos audire cum Sancti nobiscum orant; quia Sanctos magis amat, quam nos, cum ei sint magis grati: unde Job ult. dicit Deus: *Ite ad servum meum Job, ut oret pro vobis.* Sunt ergo aliqua beneficia quæ Deus decrevit nobis non aliter concedere, quam per intercessionem Sanctorum.

C A P U T VII.

De adoratione, sive cultu Christi, ejus Matris, Sanctorum, Imaginum & Reliquiarum.

Nota 1. **A** Doratio generatim sumpta, est *re-*
stificatio excellentia alterius, & pro-
pter illam, nostra erga eum submissionis. Quare in adoratione tria requiruntur; 1. Actus intellectus, excellentiam alienam apprehendens. 2. Actus voluntatis eandem approbantis, sequæ ei subjicientis. 3. Actus protestativus excellentiæ alienæ, & submissionis propriæ ad illam: qui actus vel est externus, ut in hominibus capitis inclinatio, genuflexio, &c. vel est internus tantum, qualis est adoratio in Angelis, & anima rationali.

Nota 2. Adoratio dividitur 1. in civilem & sacram.

Adoratio *civilis*, ea est, quæ alicui exhibetur propter aliquam excellentiam naturalem & politicam; sic *Genes.* 23. Abraham filios Heth adoravit, sic adorantur Reges, Superiores, &c.

Adoratio *sacra*, seu *religiosa*, est ea, quæ alicui exhibetur propter aliquam supernaturalem

lem excellentiam. Hac, propter excellentiæ diversitatem, triplex est, nempe *latria*, *dulia*, & *hyperdulia*; quæ voces non tam spectantur secundum sensum grammaticalem, quam secundum usum, secundum quem:

Latria, est adoratio quæ soli Deo exhibetur propter infinitam ejus excellentiam, qua supremum in res omnes creatas habet dominium. Cultus latriæ secundum communem usum exprimitur per nomen, *adoratio*.

Dulia, est adoratio quæ Sanctis exhibetur propter eorum gratiæ & gloriæ supernaturalem perfectionem & excellentiam.

Hyperdulia, est adoratio quæ soli B. M. V. exhibetur propter eximiam ejus supra omnes alias creaturas præminentiam; unde hic cultus mediat inter latriam & duliā.

Dividitur 2. in absolutam & relativam.

Adoratio *absoluta*, est ea, quæ exhibetur alicui propter excellentiam sibi inexistentem, in qua sistit, nec ulterius tendit.

Adoratio *respectiva*, est ea, quæ exhibetur alicui propter excellentiam, non propriam, sed alterius quem repræsentat, vel ad quem relationem habet: talis est illa quæ redditur imaginibus; refertur enim ad exemplar cujus imagines sunt. His præsuppositis.

Queritur 1. Utrum Christus, B. Virgo & Sancti colendi sint, & quo cultu. 2. Utrum imagines Christi, B. M. V. & Sanctorum sint colendæ, & quo cultu. 3. Utrum vera Crux & Reliquiæ Sanctorum sint colendæ, & quo cultu: triplici quæstione.

Q U Æ S T I O I

*Utrum Christus, Beata Virgo, & Sancti,
sint colendi, & quo cultu?*

Nota: **C**Ertum est, apud omnes, Christum, quatenus est hic homo, adorandum esse adoratione absoluta patriæ, quia sic sumptus, est verus Deus; difficultas ergo solum remanet utrum humanitas Christi, prout est unita Verbo, & velut unum totum cum illo constituens, sit colenda cultu patriæ.

C O N C L U S I O I.

Christus, ut homo, sive humanitas Christi, prout conjuncta Verbo divino, adorari debet cultu patriæ absoluto.

Prob. 1. Ex Scriptura, Philipp. 2. Christus factus est pro nobis obediens usque ad mortem... propter quod & Deus exaltavit illum, & donavit illi nomen, quod est super omne nomen, ut in nomine Jesu omne genuflectatur, caelestium, terrestrium, & infernorum. Ex quo sic argumentor: Apostolus ibi loquitur de eo, quem Deus exaltavit in meritorum mercedem; atqui is non est Christus prout est Verbum, sed tantum prout est homo, nec enim meruit, nec exaltari potuit ut Deus; ergo Christo prout homini, seu humanitati Christi, Deus exhiberi voluit ab omni creatura absolutam patriæ adorationem, per genuflexionem, significatam,

Prob. 2. Ex PP. D. Athanas. Epist. ad Adelpium loquens de adoratione Christi, ait: etsi enim ipsa caro seorsim spectata, pars sit rerum creaturarum, attamen Dei facta est corpus: neque vero hujusmodi corpus a Verbo dividentes

ada-

adoramus, neque cum Verbum volumus adorare, ipsum a carne removemus. Ergo si humanitas a Verbo dividi non debet, eadem ipsi debetur species adorationis, quæ Verbo divino exhibetur.

D. Damascen. lib. 3. de fide, expresse asserit carnem & Verbum in Christo unica adoratione coli, unus igitur Christus, inquit, Deus perfectus & homo perfectus, quem adoramus cum Patre & Spiritu, unica adoratione cum ejus immaculata carne; neque tamen, hoc agentes, creatura servimus: non enim velut nudam carnem adoramus, sed ut divinitati conjunctam. Ergo objectum adorationis, est, tum Verbum, tum humanitas Verbo conjuncta; adoro utrumque, addit, quod est Christi propter divinitatem carni copulatam. Quæ est adorationis motivum.

D. Ambros. lib. 3. de Spiritu sancto cap. xi. explicans hæc verba Pl. 98. Adorate scabellum pedum ejus, quia sanctum est, ait: per scabellum terra intelligitur: per terram autem caro Christi, quam hodie quoque in mysteriis adoramus, & quam Apostoli in Domino Jesu adorant.

Prob. 3. Ex definitionibus Concil. Generalium. Concil. V. Si quis, inquit, duas adorationes introducit, & non una adoratione Verbum incarnatum cum propria ejus carne adorât, anathema sit. Eodem modo loquuntur alia Concilia.

Prob. 4. ratione. Tota Christi persona supremo patriæ cultu adoratur; atqui tota persona Christi non est solum personalitas Verbi, sed etiam omnis natura quæ in illa subsistit; ergo cum adoratur persona Christi, eadem adoratione adoratur humanitas Christi subsistens subsistentiæ Verbi.

Solvuntur Objectiones.

Obicies 1. Soli Deo cultus patriæ debetur : atqui humanitas Christi non est Deus ; ergo.

Resp. dist. min. Humanitas Christi, a Verbo separata, *conc.* cum Verbo hypostatice unita, *nego minor.* Porro hic spectamus humanitatem Christi, prout est conjuncta cum Verbo in unitate personæ Verbi, cujus est natura ; ergo simul cum Verbo adoratur eodem patriæ cultu, non quidem propter suam propriam excellentiam, sed propter insitam Verbi excellentiam.

Inst. Si humanitas Christi adoretur tantum propter excellentiam Verbi cum quo unitur, adoratur cultu patriæ relativo ; atqui ex nobis humanitas Christi adoratur tantum propter excellentiam Verbi ; ergo.

Resp. nego seq. maj. Nam cultus relativus, est is, quo unum suppositum adoratur propter excellentiam alterius suppositi ; quando autem humanitas adoratur propter excellentiam Verbi, adoratur propter excellentiam sui proprii suppositi.

Obicies 2. Natura, quæ excellentiam habet distinctam ab excellentia sui suppositi, potest coli cultu distincto ab eo qui exhibetur suo supposito ; atqui humanitas Christi habet excellentiam gratiæ & gloriæ, distinctam ab excellentiâ increata Verbi ; ergo.

Respondi. dist. major. Si illa excellentia non sit conjuncta cum excellentia, quæ majorem cultum exigat, *conc.* si sit conjuncta, *nego maj.* Porro excellentia humanitatis Christi est conjuncta cum infinita Verbi excellentia, & ideo debet eodem patriæ cultu coli, ac Verbum. *Ratio est,* quia in publico cultu præcipuus personæ

fontis titulus spectari debet; neque enim probaretur qui Benedictum XIV. ut Archiepiscopum Provinciæ Romanæ, non ut Summum totius orbis Pontificem, salutaret; talis enim salutatio esset injuriosa potius, quam honorifica, ut patet.

Inst. D. Damasc. Orat. 1. de Imaginibus, ait: *Non materiam, sed materia auctorem adoro, qui propter me materia factus est. . . materiam vero, per quam mihi salus parata est, colere non desinam, non tamen ut Deum, absit. Ergo humanitas Christi adorari debet cultu inferiori, nempe hyperdulæ.*

Resp. dist. antec. Humanitas Christi non debet adorari ut Deus, propter suam excellentiam, *conc.* propter excellentiam Dei, cujus est aliqua natura, *nego ant.* Sese explicat Div. Damasc. lib. 4. orthodoxæ fidei, cap. 3. *Ipsius caro, inquit, sumpsit quidem naturam . . . haudquamquam adoranda est, utpote condita: at cum Deo Verbo copulata sit, ob ipsum, & in ipso adoratur.*

CONCLUSIO II.

B. Virgo, ceterique Sancti, colendi sunt aliquo cultu religioso absoluto. Est de fide contra Lutheranos, & Calvinistas, definita in Concilio Trid. Sess. 25. de invocatione Sanctorum.

Prob. 1. Ex Scriptura, quæ docet Patriarchas Spiritu Dei motos, Angelis religiosum cultum exhibuisse; sic Genes. 1. *Abraham cucurrit in occursum eorum (Angelorum) de ostio tabernaculi sui, & adoravit in terram.* Et Josue 5. dicitur, quod cum Angelus ipsi apparuisset & dixisset: *Sum Princeps exercitus Domini, & nunc venio.* Cecidit Josue pronus in terram, & adorans, ait: atqui eadem est ratio de hominibus beatis, ac de Angelis; ergo sicut Angeliculi

li cultu religioso, in eorum eximia sanctitate fundato, coluntur, ita & Sancti cum Christo regnantes coli possunt.

Prob. 2. ex tradit. PP. D. Hieronym. Epist. ad Riparium contra errores Vigilantii, qui primus cultum Sanctorum abiecit, ait: Honoramus servos, ut honor servorum redundet ad Dominum, qui ait, qui vos spernit, me spernit.

S. Damasc. lib. 4. de fide, cap. 16. Honorare decet Sanctos, ut amicos Christi, ut filios, & heredes Dei.

D. Ambros. ferm. 6. Quisquis honorat Martyres, inquit, honorat & Christum: & qui spernit Sanctos, spernit & Dominum.

Probat. 3. Ex praxi Ecclesiæ, quæ Sanctos semper venerata est, dies festos in eorum honorem instituit, templa Deo in memoriam eorum dicavit, &c. ergo, &c.

Probat. 4. ratione: Tam licet Sanctos cultu religioso colere ob eorum supernaturales doctes, quam licet cultu civili & politico honorare Principes, Nobiles, &c. atqui.

CONCLUSIO III.

Sancti colendi sunt cultu dulia, sed beatissima Virgo cultu hyperdulia.

Prob. prima pars: Quia cultus dulia, est is qui exhibetur multis ob eorum excellentiam creatam & supernaturalem, nec alicui est singularis; atqui cultus Sanctis, & quidem omnibus, exhibetur ob eorum excellentiam creatam & supernaturalem, nimirum propter dona gratiæ & gloriæ quibus cumulantur; ergo.

Prob. secunda pars: Quia cultus hyperdulia, est is qui exhibetur uni singulari personæ creatæ propter eximiam & singularem excellentiam supernaturalem; atqui beatissima Virgo, ex
ma-

maternitate Dei contraxit eximiam ac singularem aliquam excellentiam, qua ceteros omnes Sanctos transcendit; ergo debet coli cultu aliquo speciali, ac majori, eo quo ceteri Sancti coluntur, qui cultus vocatur, *hyperdulia*.

*Solvuntur objectiones contra cultum
Sanctorum.*

Objicies 1. Apostolus, 1. ad Tim. 1. dicit : *Soli Deo honor & gloria* ; ergo solus Deus est cultu religioso colendus.

Resp. dist. conseq. Solus Deus est colendus cultu latriæ, *conc.* cultu inferiori, *nego conseq.* Nam ibidem Apostolus ait : *Gloria & honor omni operanti bonum*.

Inst. 1. Servitus & submissio soli Deo debetur; atqui in omni cultu est servitus & submissio; ergo.

Resp. dist. major. Servitus & submissio suprema, *conced.* servitus inferior, *nego major.* Cultus porro, qui exhibetur propter excellentiam creatam, inferior est eo, qui soli Deo exhibetur propter excellentiam increatam & infinitam.

Inst. 2. S. Petrus, Act. 17. cultum, qui sibi exhibebatur a Cornelio recusavit, *Dicens, surge, nam & ego homo sum*. Ergo D. Petrus inquit solum Deum esse colendum.

Resp. nego conseq. Nam D. Petrus ex humilitate & modestia ita se gessit, non autem ex eo quod putaret hoc esse illicitum: *Hoc faciens*, inquit D. Chrysost. Homil. 23. in acta Apostol. *humilitatem suam ostendit, & alios docuit*.

Inst. 3. Apocal. 19. Angelus Joanni volenti ipsum adorare, dixit: *Vide ne feceris, conservus enim*

enim tuus sum Deum adora: Ergo Sancti non sunt colendi.

Resp. nego conseq. Non enim Angelus hunc cultum recusavit, quod sit illicitus, nam constat ex locis a nobis citatis Angelos bonos adorationem ab hominibus oblatam non semper recusasse, sed hunc honorem recusavit Angelus propter duas rationes: *Prima*, est Divi Augustini, quia scilicet Angelus sic apparuit, ut potuerit existimari Christus, quare monendus fuit Divus Joannes, ne cultum latriæ exhiberet.

Secunda, est Gregor. Magni, quia nempe postquam Deus factus est homo, Angeli apparentes facile non permiserunt se coli ab hominibus, præcipue ab Apostolis ad procurandam Dei gloriam destinatis. Porro Angelum non rejecisse adorationem, quia erat illicita, patet ex *Apoc. 22.* ubi D. Joann. iterum voluit Angelum adorare, quod certe nunquam tentasset, si credidisset hanc adorationem sibi prohiberi ut illicitam.

Inst. 4. Apostolus *Coloss. 2.* ait: *Nemo vos seducat in humilitate & religione Angelorum.* Atqui ibi reprehendit quosdam, qui Angelis cultum exhibebant; ergo, &c.

Resp. dist. min. Reprehendit quosdam, qui Angelis exhibebant cultum latriæ, *conc.* cultum dulciæ, *nego min.* Hic ergo Apostolus damnat cultum, quem aliqui, hausto a Platoniciis errore, exhibebant Angelis, per quos mundum fuisse conditum & nos reconciliatos Deo dicebant, non autem per Christum, quem Angelis inferiorem esse contendebant, ut interpretatur D. Chrysost. *Hom. 7.* in hunc locum: *Sunt nonnulli, inquit, qui dicunt non oportere per Christum reconciliari, & ad Patrem accedere*

re, sed per Angelos. Quos arguit Apostolus his verbis sequentibus: *Et non tenens caput*, (id est, Christum) *ex quo totum corpus . . . crescit in augmentum Dei.*

Instab. 5. Idem significant *dulia* ac *latria*, utrumque enim servitutem significant; atqui Sancti non possunt adorari cultu *latriæ*; ergo nec cultu *duliæ*.

Resp. dist. maj. Idem significant *dulia* & *latria*, secundum vim nominis, *conc.* secundum usum Ecclesiæ, *nego major.* Nam secundum usum Ecclesiæ, *latria*, significat servitutem supremam, quæ soli Deo exhibetur; *dulia* vero significat servitutem imperfectam & honorariam, quæ exhibetur Sanctis qui cum Christo regnant.

Objicies 2. Multi PP. damnant cultum Sanctis hominibus & Angelis exhibitum; ergo.

Resp. dist. ant. Damnant cultum *latriæ* Sanctis exhibitum, *conc.* cultum *duliæ*, *nego ant.* sic D. Epiphanius *hæresi 79.* reprehendit Collyridianos, qui B. Virginem cultu supremo colebant, atque mulieres constituebant quæ ei offerrent sacrificia.

Inst. D. Augustin. lib. de moribus Ecclesiæ, eos reprehendit, qui sepulchra Martyrum colunt; ergo.

Resp. dist. ant. Reprehendit eos, qui sepulchra Martyrum colunt, perverse, & inordinate, *conc.* religiose, *nego antec.* Sese exponit, *ibidem*, D. Augustin. dicens: *Novi multos esse, qui luxuriosissime super mortuos bibant. Qui cultus erat perversus & gentilitatem sapiens. Aperte vero D. August. laudat cultum duliæ Sanctis exhibitum, ait enim l. 20. contra Faustum c. 21. Populus Christianus memorias Martyrum religiosa solemnitate concelebrat . . . colimus Martyres, &c.*

QUÆ-

Q U Æ S T I O II.

*Utrum imagines Christi, B. Maria Virginis,
& aliorum Sanctorum, sint colenda,
& quo cultu.*

Nota 1. **D**iffert imago ab idolo, quod *Imago* sit similitudo rei veræ, seu repræsentet id quod est; econtra *idolum* sit similitudo rei falsæ, seu repræsentet id quod non est, sic repræsentatio dei Jovis est idolum, quia Jupiter repræsentatur tanquam deus, cum talis non sit.

Nota 2. Sæculo Ecclesiæ VIII. omnem imaginum cultum, ut illicitum & impium, damnarunt *Iconoclastæ*, quorum Princeps fuit *Leo Isaurus* Orientis Imperator, qui publico edicto omnes Imagines e templis tolli jussit, atque multos Christianos, Imaginum defensores, martyrio delevit. Hujus Filius, *Constantinus Copronymus*, Imperii & impietatis paternæ hæres, convocavit conciliabulum Constantinopoli, cui interfuerunt 333. Episcopi, in quo cultus imaginum proscriptus fuit; quod conciliabulum, cum *Iconoclastarum* hæresi, fuit damnatum in Concilio Nicæno II. œcumenico VII.

Hæresim *Iconoclastarum* ubique proscriptam, ex inferis fuscitarunt *Sæculo XII.* Albigeneses, *Sæculo XIV.* VViclefitæ, & *Sæculo XVI.* Lutherani & Calvinistæ, contra quos sit:

C O N C L U S I O I.

Cultus Imaginum Christi, & Sanctorum, licitus est, pius ac religiosus. Est de fide.

Prob. 1. Ex Scriptura, Exodi 25. duo Cherubi-

rubini ad Arcæ latera positi, Imagines erant Angelorum: atqui Cherubinis illis cultus religiosus exhibebatur a Judæis; ergo, &c. idem dici debet de serpente aneo, quem Moyſes jussu Dei erexit in deserto, qui erat Christi in Cruce pendentis figura; & de Arca fœderis, quæ cum Dei Majestatem exhiberet, tanto honore fuit venerata ab Israelitis, ut coram illa adorantes procumberent, Josue 7. Josue pronus cecidit super terram coram Arca Domini usque ad Vesperam, tam ipse, quam omnes senes Israel.

Prob. 2. Traditione PP. D. Basil. Epistola ad Julianum Apostaram, ait: Characteres Imaginum ipsorum (Apostolorum & Martyrum) honoro, & palam adoro, hoc enim nobis a Sanctis Apostolis traditum, non est prohibendum.

D. Chrysost. in liturgia, dicit: Sacerdos, ad Imaginem Christi, caput inclinet.

D. Damasc. lib. 4. de fide, cap. 17. cultum Crucis & Imaginum, asserit esse traditionem Apostolicam.

Prob. 3. Ex Concil. generalibus, Nicæno II. in quo damnati fuerunt Iconoclastæ, quod sic pronuntiat: Definimus . . . sicut figuram pretiosa ac vivifica Crucis, ita venerabiles & Sanctas imagines proponendas . . . congruenter in sanctis Dei Ecclesiis, &c. quanto enim frequentius per imaginalem formationem videntur, tanto, qui eas contemplantur, alacrius eriguntur ad primitivorum earum memoriam & desiderium & ad osculum, & ad honorariam his adorationem tribuendam; non tamen ad veram latriam, quæ secundum fidem est, quaque solam naturam divinam decet, impertiendam . . . sic enim robur obtinet SS. PP. nostrorum doctrina, id est, traditio sancta Catholica Ecclesia, quæ a finibus usque ad fines terra suscepit Evangelium

Charmes, Theol. Schol. Tom. III. P. Concil.

Concil. Trid. in quo damnati sunt Lutherani & Calvinistæ, docet; Sess. 25. *Imagines Christi, Deiparæ Virginis, & aliorum Sanctorum, in templis præsertim habendas ac retinendas: eisque debitum honorem & venerationem impertiendam, non quod credatur inesse aliqua in eis divinitas, vel virtus, propter quam sint colenda; vel quod ab eis sit aliquid petendum; vel quod fiducia in Imaginibus sit figenda, veluti olim fiebat a gentibus, quæ in idolis spem suam collocabant; sed quoniam honos, qui eis exhibetur, refertur ad prototypa, quæ illa representant; ita ut per Imagines quas osculamur, & coram quibus caput aperimus, & procumbimus, Christum adoremus; & Sanctos, quorum illa similitudinem gerunt, veneremur.*

Prob. 4. ratione: Quando res aliqua digna est honore, ejus quoque imago digna est illo honore, sic quia Rex cultu civili dignus est, ejus imagines cultu civili honoramus, quia *qui adorat imaginem, in ipsa adorat imperatorem*, ait D. Athanas. *serm. 4. contra Arianos*; atqui Christus, & Sancti, aliquo cultu religioso digni sunt, ut supra probatum est; ergo & eorum imagines.

Confirmatur, quia sanctas imagines in templis honorifice collocatas, atque fidelium venerationi expositas fuisse testantur veteres PP. pene omnes & Historiographi. Religiosum & pium referre putavi antiquissimum monumentum, quod propriis oculis vidi Neapoli in Catacumbis, in quibus adhuc hodie Christi sub pastoris habitu ovem deperditam reportantis; Virginis Deiparæ filium ablactantis; Petri & Pauli, extant imagines supra rupem variis coloribus auro mixtis, depictæ, quarum conservationem, nonnisi singulari Dei providentiæ adscribere, non dubitavi.

CON-

CONCLUSIO II.

Imagines Christi, & ejus Crucis, cultu latriæ respectivo: imagines B. M. V. cultu hyperdulæ respectivo; & imagines Sanctorum, cultu dulæ respectivo, sunt colenda.

Prob. 1. Ex Conciliis œcumenicis, Concil. Nicænum II. rationem reddens cultus, quem SS. Imaginibus decernit, ait: Imaginis enim honor ad primitivum transit, & qui adorat imaginem, adorat in ea depicti substantiam. Idem habet Conc. Trid. supra citatum.

Prob. 2. ratione: Quia ex dictis, Christus colitur cultu latriæ absoluto; B. V. M. cultu hyperdulæ absoluto; & Sancti cultu dulæ item absoluto; atqui imagines coluntur per relationes ad prototypa; ergo imagines Christi cultu latriæ relativo; imagines B. V. cultu hyperdulæ relativo; & imagines Sanctorum cultu dulæ respectivo, sunt colenda.

Solvuntur objectiones contra cultum imaginum.

Obijcies 1. Scriptura vetat cultum imaginum; Exodi 20. Non facies tibi sculptile, neque omnem similitudinem. Ergo.

Respond. nego antec. Ibi enim sola prohibetur idololatria, seu cultus imaginum & simulacrorum quæ a Paganis proponebantur adoranda cultu latriæ instar Deorum; quod constat, tum ex his verbis antecedentibus: Non habebis deos alienos coram me, non facies tibi sculptile, &c. tum ex his consequentibus: Non facietis deos argenteos, nec deos aureos facietis vobis. Tum ex eo quod dicitur Levit. 26. Non facietis vobis idolum & sculptile . . . ut adoretis eum;

P 2

vide-

videlicet cultu latriæ, ut faciebant cæteræ nationes.

Obijcies 2. Concil. Eliberitanum, *can.* 36. statuit, *Picturas in Ecclesia esse non debere, ne quod colitur & adoratur in parietibus depingatur; ergo.*

Respond. disting. anteced. Statuit picturas in Ecclesia esse non debere, quia locus & tempus id postulabant, *cont.* quia illicitus est earum cultus, *nego antec.* prohibuit ergo Concilium ne imagines in parietibus Ecclesiarum depingantur. 1. Propter metum, ne, imminente persecutione, Christiani eas secum auferre, aut occultare non possent, & ita Paganis & Judæis ludibrio essent. 2. Propter periculum idololatriæ, quod tunc temporis probabiliter imminebat, nam in omnibus fere actis illius Concilii agitur de iis, qui labuntur in idololatriam.

Inst. 1. Duo Concilia Constantinopoli habita, *Primum*, sub Leone Isauro, *Secundum*, sub Constantino Copronymo, definierunt illicitum esse cultum imaginum; ergo.

Resp. nego consequ. Illa enim duo Concilia, non fuere legitima, sed Conciliabula a seditiosis Episcopis, sub Imperatoribus Iconoclastis, contra voluntatem Romani Pontificis, coacta, quæ a Concilio Nicæno II. fuerunt damnata, & semper ab Ecclesia rejecta.

Inst. 2. Concil. Francofordiense, præsentibus Legatis Hadriani I. damnavit VII. Synodum, Nicænum II. ob probatum in illo Concilio cultum imaginum; ergo, &c.

Resp. nego ant. Neque enim Concilium Francofordiense ideo damnavit Concil. Nicænum II. quia probavit cultum legitimum sacrarum Imaginum; sed quia, errore facti, credidit hoc Concilium definiisse imagines Sanctorum cultu latriæ

latriæ absoluto adorandas esse, itemque tale decretum a Græcis, sine consensu Summ. Pontificis, latum fuisse. Huic errori occasionem dedit confessio fidei Constantini, Constantiæ Cypri Episcopi, a Concilio Nicæno approbata & recepta, sed e Græco in Latinum male reddita, his verbis: *Suscipio & amplector sanctas & venerabiles imagines secundum servitium adorationis, quod consubstantiali Trinitati emitto.* Cum sic in Græco habeatur: *His consentio & concors sum, suscipiens & cum honore amplectens sanctas & venerandas imagines: ac latriæ adorationem soli supersubstantiali ac vivifica Trinitati deferō.* Ex quo patet Patres Francofordienses, neque rejecisse definitionem Nicænam, neque damnasse cultum imaginum, sed tantum cultum latriæ illis deferendum, sicut defertur vivificæ Trinitati, (quem etiam cultum damnat VII. Synodus) damnasse, his verbis: *Alata est in medium quaestio de Græcorum Synodo, quam de adorandis imaginibus Constantinopoli fecerunt, in qua scriptum habebatur, ut qui imaginibus Sanctorum, ita ut deifica Trinitati servitium aut adorationem non impenderent, anathema judicarentur; hoc autem Patres nostri, adorationem renuentes, contempserunt, atque consentientes damnaverunt.* Nec parit difficultatem, quod Canon Francofordiensis, Synodum appellet Constantinopolitanam, non Nicænam; id enim ex hoc provenit, quod Synodus Nicæna II. fuit primum Constantinopoli congregata, deinde Nicæam translata.

Instab. 3. Libri quatuor Carolini dicti, quos Carolus magnus aut exaravit, aut exarari jussit contra definitionem Concilii Nicæni II. cultum imaginum in Concilio Nicæno II. definitum damnant; ergo.

1. *Aliqui respondent ad hoc argumentum*, auctorem librorum Carolinorum damnaſſe cultum imaginibus a Concilio Nicæno decretum, quia, errore facti, cultum patriæ ipsis a PP. Nicænis decretum fuiſſe exiſtimabat, eo quod infida actorum illius Concilii translatione uſus fuerit: hocque probant, 1. *Ex libro primo Carolino, cap. ſecundo*, ubi dicitur: *Non mediocris eſt error, cum aliud adoratur religionis cultu, quam is qui dixit: Dominum tuum adorabis, & illi ſoli ſervies*. Loquitur ergo de cultu ſoli Deo debito, alias non ſibi conſtaret auctor, qui admittit cultum Sanctorum. 2. *Ex titulo, cap. 17. libri 3. qui ſic habet: Inſpicienter Conſtantine Conſtantia Cypri Episcopus dixit: ſuſcipio imagines ſecundum ſervitium adorationis, quod conſubſtantiali Trinitati emitto*. Ubi certe damnatur cultus patriæ imaginibus exhibitus. 3. *Et tit. cap. 18. qui eſt: Quod Euthymius Sardeniſis a præſati Conſtantini errore non multum diſſentit in eo quod ait: ex toto corde ſuſcipio venerandas imagines cum condecienti honore & amplectibili adoratione*. Ergo licet per hanc vocem, *amplectibili*, nomen *adoratio*, referatur ad cultum dulciæ, tamen auctor Carolinorum ex errore illud de cultu patriæ interpretatus eſt, cum dicat, confeſſionem *Euthymii* non multum diſſerre ab infida translatione confeſſionis *Conſtantini* in Cipro Episcopi.

2. *Alii respondent*, auctorem lib. Carolinorum, alioſque Episcopos Gallos, cultum, quem Græci imaginibus deferebant, non rejeciſſe quoad ſubſtantiam, ſed tantum quoad varios modos, quibus illas honorabant, v. g. luminibus, thurificatione, genuflexione, corporis proſtratione, & aliis ſimilibus modis, qui cum non eſſent in uſu apud Gallos, ac ſuperſtitionis

nis aliquid redolere videri potuissent cum imperitorum scandalo, ab auctore Carolinorum improbatum fuerunt, salva remanente cultus substantia: Nam etsi, ait præfatus auctor, a doctis quibusque vitari possit, hoc, quod illi in adorandis imaginibus exercent, qui videlicet, non quid sint, sed quid innuant, venerantur; indoctis tamen quibusque scandalum generant, qui nihil aliud in his, præter id quod vident, venerantur & adorant.

Inst. 4. Conventus Parisiensis, ann. 824. iussu Ludovici Pii convocatus, damnat iterum, & Conc. Nicænum, & cultum imaginum; ergo.

Resp. disting. ant. similiter: Damnatur cultum imaginum superstitiosum, quem errore veteri PP. Parisienses Græcis imputabant ob male redditam confessionem Constantini, conc. cultum legitimum, nego ant. sese explicant illustrissimi Præsules in Epistola Ad Ludovicum Pium, his verbis: *Imagines SS. stulta presumptione non sunt confringenda, & ad injuriam Sanctorum abolenda; sed potius, hujusmodi superstitione remota, juxta veram religionem, memoria & amoris causa, ob recordationem eorum, quorum imagines sunt habenda, sicut a B. Gregorio, satis catholice, perspicueque dictum declaratur.* Non ergo rejicit cultum dulciæ, qui in eo potissimum positus est, ut imagines in templis honorifice collocentur, ad memoriam & honorem eorum, quorum imagines sunt.

Objicies 3. Multi Patres aperte damnant cultores imaginum; namque. 1. S. Irenæus, lib. 1. cap. 24. ponit inter alios Carpocratis & Gnosticorum errores, quod colerent imaginem Christi.

2. D. Ambrosius orat. de obitu Theodosii, ait: *Helena Crucem invenit, Regem adoravit, non lignum utique, qui est error Gentilium.*

3. D. Hieronym. in cap. 3. Danielis, dicit:
Cultores Dei, imagines adorare non debent.

4. D. Aug. lib. de moribus Ecclesiæ, c. 34.
Novi multos esse sepulchrorum & picturarum adoratores.

5. D. Epiphani. Epistola ad Theodosium Imperatorem: *Habete, inquit, in memoria, ne imagines inducat, sed per memoriam habete Deum in cordibus vestris.*

Resp. dist. ant. Multi Patres aperte damnant imaginum cultum, perversum, & superstitiosum, conced. cultum legitimum, nego antec. Id evidenter patet, nam:

1. Divus Irenæus Carpocratem arguit, quod imaginem Christi eo modo coleret, quo gentiles idola colunt, nimirum sacrificiis, cum quibus idolis, inquit, etiam alias imagines Jesu collocant, collatasque adorant, & gentium misteria perficiunt.

2. D. Ambr. solum vult Helenam ante Crucem Christi prostratam, non adorasse lignum cultu latræ absoluto, sed ipsum Christum, quod & nos vere docemus.

3. D. Hieronymus loquitur de simulacris gentium, arguit enim eos qui deos gentium adorant, quod tres pueri facere recusarunt in Babylone.

4. D. August. de iis loquitur, qui ad quorumcumque hominum sive tumulos, sive picturas, festa convivii celebrabant: *Nolite consecretari turbas imperitorum, inquit, qui, vel in ipsa vera religione superstitiosi sunt, vel ita libidinibus dediti, ut obliti sint quid promiserint Deo. Novi multos esse sepulchrorum & picturarum adoratores.*

5. Epistola D. Epiphani est supposititia, ut variis argumentis probant Patres Nicæni, quibus hæc verba addunt: *Deinde, in historia Harefano*

resum ab ipso facta, venerationem imaginum non recensuit. Denique libri S. Epiphanii notissimi sunt, quæ autem obijciuntur penitus ignota.

Objicies 4. Pictura, lignum, &c. non sunt digna cultu; ergo.

Resp. dist. ant. Si spectentur in se, conc. si spectentur ratione repræsentationis, nego ant. & ideo cultu tantum relativo coluntur, qui cultus fertur quidem ad imaginem, sed terminatur ad imaginis prototypum.

Inst. 1. Ethnici, præsertim doctiores, non crediderunt lignum, & lapides esse deos, sed in statuis coluerunt Deum verum per illas repræsentatum; ergo Catholici adorando imagines Dei, æque sunt idololatræ, ac illi.

Resp. nego antec. Constat enim, ex Historiis sacris & Prophanis, plerosque idololatræ, sua idola pro diis habuisse, Sap. 13. *Appellaverunt deos opera manuum hominum, aurum & argentum, artis inventionem, & similitudines animalium, &c.* Quod si aliqui, argumentis Christianorum convicti, non crediderint illas statuas esse deos, tamen circa illas varie errabant. 1. Quia per illas statuas repræsentabant falsos deos. 2. Quia sentiebant in eis aliquod numen habitare, & ideo eas absoluto cultu adorabant. 3. Quia credebant nihil a diis posse impetrari nisi per simulacra: porro ab iis erroribus longe absunt Catholici, qui cum Conc. Trid. profitentur nullam inesse imaginibus virtutem intrinsecam, neque ab eis quidquam petendum & sperandum, sed a Deo & Christo per invocationem Sanctorum, quos illæ imagines repræsentant.

Inst. 2. Homo est imago Dei; atqui tamen, qua talis, non est aliquo cultu religioso colendus; ergo.

Resp. dist. major. Homo est imago Dei pro-

pter suas perfectiones naturales, conc. super-
 naturales, nego major. Porro cultus religiosus,
 qui Sanctis exhibetur, fundatur in donis su-
 pernaturalibus quæ possident.

Q U Æ S T I O I I I

*Utrum vera Crux, & Reliquia Sanctorum,
 sint colenda, & quo cultu.*

Nota 1. **P**er veram crucem intelligi eam, in
 qua Christus fuit crucifixus, quæ
 sacro ejus cruore fuit purpurata, & ab Hele-
 na inventa.

Nota 2. Per Reliquias Sanctorum, non so-
 lum intelliguntur corpora mortuorum, eorum
 ossa, sed etiam vestes, & quævis alia, quæ
 ipsis inservierunt, dum in terris viverent.

Nota 3. Cultus veræ Crucis & Reliquiarum
 Sanctorum, eisdem passus est hostes, quos cul-
 tus imaginum, contra quos:

C O N C L U S I O I.

*Vera Crux Christi adorari debet; & quidem
 cultu latria relativo.* Prima pars est de fide,
 definita in Concil. Trid. sess. 25. tit. de Reli-
 quiis Sanctorum.

Prob. prima pars: Auctoritate Ecclesiæ, quæ
 veræ Crucis inventionem, & ejusdem exalta-
 tionem, solemniter festo honorari voluit, in qui-
 bus solemnitatibus canit: O Crux: ave spes uni-
 ca. Et, tuam Crucem adoramus, &c. Ergo.

Prob. 2. Ex PP. D. Ambros. orat. in Theodo-
 sium, ait: sapienter Helena egit, quæ Crucem
 in capite Regum levavit, ut Crux Christi in
 Regibus adoretur.

D. Hieronym. Epist. 17. ad Marcellam, dicit:
 ergone erit illa dies, quando nobis liceat spelun-
 cam

cam saluatoris intrare, Crucis deinde lambere lignum. Eodem modo loquuntur cæteri Patres.

Probat. 3. ratione: Primum Victoriæ Christi & nostræ salutis instrumentum, quod Sanguine pretioso fuit consecratum, atque Christum in Cruce extensum repræsentat, maxima certe veneratione est dignum; atqui talis est Crux vera; ergo.

Probat. secundæ pars, Quia Christus, etiam ut homo, adoratur cultu patriæ absoluto; atqui vera Crux adoratur per ordinem ad Christum; ergo adoratur cultu patriæ relativo.

Confirmatur: ex D. Thom. 3. part. quæst. 25. art. 4. ubi ait: Si loquamur de ipsa Cruce, in qua Christus crucifixus est, utroque modo est a nobis veneranda: uno scilicet modo, in quantum repræsentat nobis figuram Christi, & extensi in ea: alio modo ex contactu ad membra Christi, & ex hoc quod ejus sanguine est perfusa. Unde utroque modo adoratur eadem adoratione cum Christo, scilicet adoratione patriæ, quæ sane est absoluta erga Christum, & respectiva erga Crucem.

Objicies: Vera Crux, & alia passionis instrumenta, Christo ignominiam attulerunt; ergo potius execranda sunt, quam honoranda.

Resp. dist. antec. Christo ignominiam attulerunt, & simul sunt signum victoriæ Christi & nostræ salutis, *conc.* & tale signum non sunt, *negq. antec.* Infideles primo modo considerant Crucem Christi, Christiani vero secundo modo, quo sensu est adoranda; quare Apostolus, 1. Cor. 1. ait; *verbum Crucis pereuntibus quidem stultitia est; his autem, qui salvi fiunt, id est, nobis, virtus Dei est.*

Instab. 1. Ideo humanitas Christi adoratione patriæ colitur, quia unita est Verbo in persona; atqui Crux sic non est Verbo unita, ergo.

Resp. nego conseq. Argumentum enim suppo-

nit illud tantum posse adorari cultu latriæ ; quod Verbo fuit personaliter unitum , quod est falsum ; nam , ex D. Thom. ad 2. potest etiam cultu latriæ adorari , quidquid Christo fuit unitum per repræsentationem & contactum ; atqui *Crux vera fuit unita Christo per repræsentationem & contactum ; & hac sola ratione ei exhibetur reverentia* , ait D. Thom. ergo .

Inst. 2. Ergo etiam labia Judæ , quibus Christum osculatus est , Asinus quo vectus est , &c. colenda sunt cultu latriæ propter contactum corporis Christi ; absurdum conseq. ergo , &c.

Resp. nego illatum . Disparitas est inter res inanimatas & animatas , quod hæ non honorantur , nisi propter intrinsecam suam excellentiam ; illæ econtra possint coli , propter habitudinem , quam possunt habere ad rem veneratione dignam .

CONCLUSIO II.

Pie ac religiose Sanctorum Reliquia coluntur ; est de fide , contra Vigilantium , Lutheranos & Calvinistas .

Prob. 1. Ex Scriptura , *Exodi 13.* ossa Joseph a Moyse honorantur , dum ea transfert ex Ægypto . 4. *Reg. 13.* corpus Elisei contactum , suscitavit mortuum , & sic divinitus veneratio illi conciliatur , *Act. 19.* Fideles venerabundi tangunt sudaria Pauli , & curantur ; ergo .

Prob. 2. Ex PP. dicentibus cum D. Hieron. Epistola ad Riparium : *Si non sunt adoranda Reliquia Martyrum , quomodo legimus , pretiosa in conspectu Domini mors Sanctorum ejus ? Si ossa mortuorum polluant contingentes , quomodo Eliseus mortuus , mortuum suscitavit , & dedit vitam corpus , quod juxta Vigilantium , jacebat immandum .*

Hinc ,

Hinc, Concil. Trid. sess. 25. definit : *Affirmantes, Sanctorum Reliquiis venerationem atque honorem non deberi . . . omnino damnandos, prout jam pridem eos damnavit, & nunc etiam damnat Ecclesia.*

Probat. 3. ratione: Quia corpora Sanctorum fuerunt templa Spiritus sancti, organa sanctarum animarum, instrumenta virtutum; ergo pium est illa aliquo cultu religioso colere, cum honor illis exhibitus redundet in ipsos Sanctos, quorum sunt pretiosæ exuviae.

Objicies: Deus, *Deuter. ult.* abscondit corpus Moysis, ne Judæi illud adorarent; ergo improbat adorationem Reliquiarum.

Resp. dist. ant. Ne Judæi illud adorarent, cultu latræ, *conc.* cultu dulæ, *nego antec.* Itaque Deus corpus Moysi abscondi voluit Judæis, quia, cum essent valde propensi in idolatriam, facile eum, ut Deum, honorassent ob miracula ab eo, tum in Ægypto, tum in Deserto, patrata, ipsique ut Deo sacrificassent.

Instab. Christus, *Lucæ 11.* maledicit Judæis, quod magnifica sepulchra Prophetis ædificarent; ergo.

Resp. nego ant. Non enim eis maledicit Christus, quod ornarent monumenta Prophetarum, sed quod cum sub pietatis specie ornarent monumenta Prophetarum a majoribus suis occisorum, suos majores imitarentur, meditando occisionem Christi Prophetarum Domini; unde addit: *Profecto testificamini quod consentitis operibus Patrum vestrorum.*

CAPUT VIII.

De B. V. Maria Matre Christi.

Nota: **I**mmaculatam Virginis Mariæ conceptionem probabimus in tractatu de Peccatis; ejus divinam maternitatem probavimus pag. 415. hujus Tomi. Restat ergo agendum. 1. De ejus perpetua virginitate. 2. De ejus impeccabilitate: duplici articulo.

ARTICULUS I.

De virginitate perpetua B. M. Matris Christi.

Nota. **P**erpetua B. Mariæ virginitas, varios habuit hostes:

1. *Cerinthus & Ebion*, docuerunt Christum ex Josephi cum B. Maria congressu genitum fuisse; ex quo sequitur B. Mariam non fuisse Virginem ante partum. 2. *Jovinianus*, docuit B. Mariam in partu integritatem amisisse. 3. *Helvidius*, asseruit B. Mariam post Christi partum ex S. Josepho liberos suscepisse, contra quos sit:

CONCLUSIO.

Maria Mater Christi semper fuit Virgo, ante partum, in partu, & post partum: Est de fide.

Prob. Tota propositio. 1. Ex Script. *Isaia 7.* statuitur virginitas B. Mariæ ante partum & in partu, his verbis: *Ecce Virgo concipiet & pariet Filium, & vocabitur nomen ejus Emmanuel, hoc est, nobiscum Deus.* Quod vaticinium, non solum veteres Patres, sed etiam Matthæus, c. 1. de Maria fuisse prædictum testantur... *Ezechielis 41.* statuitur virginitas B. Mariæ post partum,

tum, his verbis: *Porta hac clausa erit, & non aperietur, & vir non transibit per eam, quoniam Dominus Deus Israel ingressus est per eam.* Quem locum SS. PP. de B. Mariæ Virginis utero interpretantur cum D. Ambrosio, *Epistola 7. ad Syricium Papam: Hac porta, inquit, est B. Maria, de qua scriptum est, quia Dominus pertransibit per eam, & erit clausa post partum, quia Virgo concepit, & genuit.*

Probat. 2. Ex PP. Inter quos unum refero D. August. serm. 23. Videte, inquit, miraculum Matris Dominica, Virgo concepit, Virgo parturit, Virgo post partum permansit.

Probat. 3. Ex definitione Conciliorum œcumenicorum: in V. Synodo in confessione fidei actione 3. dicitur: B. Maria semper Virgo. Et in Concil. Lateranensi sub Martino V. Can. 3. generatim definitur: Si quis secundum SS. PP. non constitetur proprie & secundum veritatem, Dei genitricem sanctam, semperque Virginem, & immaculatam Mariam . . . in ultimis sæculorum absque semine concepisse ex Spiritu sancto, & incorruptibiliter eam genuisse, indissolubili permanente, & post partum, ejusdem virginitate, condemnatus sit.

Solvuntur Objectiones.

Objicies 1. Cum Ebion, ad Galat. 4. dicitur: Misit Deus Filium suum, factum ex muliere. Atqui, mulier, est nomen feminæ corruptæ; ergo.

Resp. nego min. Nam vox, mulier, significat sexum, non qualitatem sexus, unde tam de Virgine dicitur, quam de corrupta, ut docet Tertull. lib. de velandis Virginibus; qui id probat ex eo quod Eva statim a sua creatione, mulier, appellata sit.

Obji-

Objicies 2. Maria indiguit Purificatione; ergo non fuit Virgo in partu.

Resp. nego ant. Quod continet proposit. 14. damnatam ab Alexandro VIII. ratio est, quia lex Purificationis eas solummodo mulieres obligabat, quæ ex coitu impregnatæ erant, Lev. 12. *Mulier si, suscepto semine, peperit masculum, &c.* Itaque legem Purificationis, qua non tenebatur, implevit ad præbendum aliis obedientiæ exemplum, & scandalum vitandum; non secus ac Christus voluit legi Circumcisionis & tributi obtemperare, licet eis legibus non teneretur.

Objicies 3. Matth. 1. de Maria & Joseph dicitur: *Antequam convenirent, inventa est in utero habens de Spiritu sancto.* Atqui particula, *antequam*, denotat Mariam postea convenisse cum Joseph; ergo non fuit Virgo post partum.

Resp. nego min. Nam ut notat D. Hieronym. contra Helvidium, per particulam, *Antequam*, *Scriptura quid factum non sit, ostendit: non vero ostendit quid postea factum sit; unde addit D. Hieron. Quod dicitur antequam convenirent, non sequitur, ut postea convenerint.*

Inst. 1. Ibidem, de Joseph dicitur: *Et non cognoscebat eam, donec peperit Filium suum primogenitum.* Atqui particula, *donec*, significat terminum continentiae Joseph; ergo.

Resp. nego minor. Nam particula, *donec*, non semper definitum tempus designat, sed indefinitum; nec ita tempus præcedens connotat, ut futurum etiam non respiciat, v. g. *Pf. 109. Deus dicit Filio: Sede a dextris meis, donec ponam inimicos tuos scabellum pedum tuorum.* Quis inde inferat Christum non amplius futurum a dextris Dei, postquam inimicos ejus posuerit scabellum pedum illius? ergo particula, *donec*, quid ante factum non sit, duntaxat ostendit.

Inst. 2.

Inst. 2. Christus habuit fratres, Matth. 12. *Ecce mater tua & fratres tui; ergo Maria plures habuit filios.*

Resp. nego conseq. Nam Scriptura appellat fratres, non solum eos qui ex iisdem patre & matre nati sunt, sed etiam eos qui consanguinei sunt, sic Abraham dicebat Loth nepoti suo, Genes. 13. *Nos fratres sumus.*

Inst. 3. Ille est vere frater ex eisdem patre & matre, qui dicitur primogenitus; atqui Christus dicitur primogenitus Mariæ, Matth. 1. *Peperit Filium suum primogenitum; ergo.*

Resp. nego major. Nam primogenitus dicitur ille ante quem nullus genitus est, sive alter post ipsum genitus fuerit, sive non; nam, ut argumentatur D. Hieronym. *Contra Helvid. n. 8.* Si primogenitus is tantum est quem sequuntur alii fratres, tandiu Sacerdotibus primogenitus hominis non debebatur, quamdiu alius frater non fuisset procreatus, quod *ex num. 18. v. 15.* aperte falsum est.

ARTICULUS II.

De impeccabilitate B. M. Virginis.

CONCLUSIO.

Beatissima Virgo immunis fuit ab omni prorsus peccato actuali, sive mortali, sive veniali. Propos. est Catholica contra Lutheranos & Calvinistas.

Prob. 1. Ex Conc. Trid. *Sess. 6. Can. 23.* deficiente: *Si quis hominem semel justificatum dixerit amplius peccare non posse, neque gratiam amittere, atque ideo eum qui labitur, & peccat, nunquam vere justificatum fuisse, aut contra posse in tota vita peccata omnia, etiam venialia vitare,*

re, nisi ex speciali Dei privilegio, quemadmodum de B. Virgine tenet Ecclesia, anathema sit.

Prob. 2. Ex PP. D. Augustin. lib. de natura & gratia cap. 36. ait: Excepta Sancta Virgine Maria, de qua, propter honorem Domini, nullam prorsus, cum de peccatis agitur, habere volo quaestionem; unde enim scimus, quod ei plus gratia collatum fuerit ad vincendum omni ex parte peccatum, qua concipere ac parere meruit eum, quem constat nullum habuisse peccatum. Et D. Bernard. Epist. 174. de B. Virgine loquens, dicit; Copiosorem sanctificationis benedictionem in eam descendisse, qua & ipse non solum sanctificaret ortum, sed & vitam ab omni deinceps peccato custodiret immunem, quod nemini alteri in natis quidem mulierum creditur esse donatum.

Prob. 3. Ratione D. Thom. Opusc. 60. art. 30.
 „ Maria non fuisset idonea Mater Christi, si
 „ aliquando peccasset, tum quia honor paren-
 „ tum redundat in prolem, secundum illud
 „ Prov. 18. *Gloria filiorum parentes eorum*: un-
 „ de per oppositum ignominia matris in fi-
 „ lium redundasset; tum etiam quia singularem
 „ affinitatem habuit ad Christum, qui ab ea
 „ carnem accepit, dicitur autem 1. Corinth. 5.
 „ *Qua conventio Christi ad Belial?* tum etiam
 „ quia Christus, qui est sapientia Patris, sin-
 „ gulari modo habitavit, non solum in ejus
 „ anima, sed etiam in ejus utero; dicitur au-
 „ tem Sap. 1. *In malevolam animam non in-*
 „ *troibit sapientia, nec habitabit in corpore sub-*
 „ *dito peccatis*. Et ideo simpliciter fatendum
 „ est, quod B. Virgo nullum peccatum actua-
 „ le commisit; nec mortale, nec veniale, ut
 „ sic impleatur quod dicitur Cantic. 4. *Tota*
 „ *pulchra es amica mea*. “

Objicit Lutherus: Maria Angelo Incarnatio-
nem

nem annuntianti, dixit: *Quomodo fiet istud?*
ergo peccatum actuale infidelitatis commisit.

Resp. nego conseq. Nam, ut ait D. Bernard.
Super missus est, Hom. 4. Non dubitat de fa-
cto, sed modum requirit & ordinem: neque enim
quærit, an fiet istud, sed quomodo?

Inst. 1. Maria peccavit peccato impatientiæ,
cum Filium objurgavit, his verbis: *Fili, quid
fecisti nobis sic?* ergo.

Resp. nego ant. Præfata enim B. Mariæ ver-
ba non sunt impatientiæ & reprehensionis in-
dicia, sed doloris de absentia amantissimi fi-
lii sui.

Instat 2. Maria videtur peccasse peccato am-
bitionis, dum in nuptiis a Filio requisivit mi-
raculum, dicendo: *Vinum non habent.* Unde
ejus petitio a Christo fuit improbata, ut ni-
mis importuna, his verbis: *Quid mihi & tibi
mulier?* Ergo.

Resp. nego ant. Et dico cum D. Aug. *Tract. 8.
in Joann.* Illa verba non fuisse indicium am-
bitionis & inanis gloriæ, sed eximæ fidei B.
Virginis circa omnipotentiam Filii sui, necnon
& signum ardentissimæ charitatis erga paupe-
res, quos nolebat pudore affici propter defe-
ctum vini; nec Christus petitionem matris,
ut nimis importunam, reprobavit, sed sapien-
tiæ & potestatis plenitudinem pro libitu sese
communicantem ostendit, juxta illud D. Aug.
lib. 4. de consensu Evangelistarum capit. 10.
*Non repellens de qua suscepit carnem, sed suam
tunc maxime insinuans divinitatem: qua divini-
tas illam etiam feminam fecerat, non in illa
facta erat.*

Quæres, quomodo B. Virgo fuerit impeccabilis,
an physice, an moraliter?

Resp. Non fuit impeccabilis physice, sed tan-
tum moraliter.

Prob. prima pars: Quia impeccabilitas physica, qua nimirum tollitur omnis potentia peccandi etiam venialiter, convenit soli comprehensori, cum oriatur ex amore Dei necessario, & ejusdem visione intuitiva; atqui B. Virgo fuit viatrix in hac vita; ergo, &c.

Prob. secunda pars: Quia impeccabilitas moralis, qua nimirum per confirmationem in gratia, tollitur actu & de facto peccare, convenit omni, qui actum peccaminosum non potest committere, propter specialem Dei assistentiam, protectionem, & specialia auxilia, quæ ita contemperantur libero arbitrio, ut infallibiliter omnem peccaminosum actum removeant; atqui talis fuit B. Virginis impeccabilitas; ergo.

Hæc itaque de ineffabili Incarnationis mysterio dicta sufficiant: superest ut theoriæ proximæ jungamus; atque amantissimum Redemptorem nostrum Jesum Christum ita intime & jugiter diligamus, veneremur, & adoremus in terris, ut dilectioni, venerationi, & adorationi nullus sit unquam finis imponendus in cælis. Amen.





TRACTATUS

D E

GRATIA CHRISTI.

P R O O E M I U M;



Gratia, secundum vim nominis; significat donum gratis collatum: *Si autem gratia, inquit Apostolus, Rom. II. jam non ex operibus: alioquin gratia jam non est gratia.*

Juxta hanc generalissimam gratiæ acceptionem, omnia Dei beneficia creaturis concessa, v. g. creatio, conservatio, &c. nomine gratiæ venire possunt; at strictius a Theologis usurpatur, ut designentur omnia dona quæ intuitu meritorum Christi hominibus conferuntur ad vitam æternam obtinendam, & definitur:

Da

Donum supernaturale gratis a Deo collatum, quod de se tendit ad actum & finem supernaturalem. Gratia sic sumpta dividitur in externam & internam.

Gratia *externa*, est donum, quod hominem exterius tantum afficit, ut sunt prædicatio Evangelii, lex, miracula, bona exempla, &c.

Gratia *interna*, est donum, quod hominem interius afficit, sive ipsi insit per modum habitus, sive per modum actus transeuntis. Hæc dividitur in gratiam gratis datam, & gratiam gratum facientem.

Gratia *gratis data*, est donum, quod alicui conceditur primario & per se propter aliorum salutem, talia sunt dona prophetiæ, miraculorum, linguarum, & alia quæ Apostolus, *Rom. 11.* commemorat. Dicitur *gratis data*, non quod sola gratis detur, omnis enim gratia gratis datur, sed quod eo præcipue nomine gratia est respectu illius cui confertur.

Gratia *gratum faciens*, est donum, quod ad propriam salutem illius, cui confertur, primario & per se ordinatur. Dicitur *gratum faciens*, quia eum, cui datur, Deo gratum reddit, aut reddere apta est. Hæc vel est actualis, vel
habi-

habitualis. Gratia *actualis*, est auxilium quoddam internum, intellectui aut voluntati a Deo transeunter impressum, quo potentia illæ, de se insufficientes, adjuvantur ad eliciendos actus supernaturales, quibus iustitia, vel iustitiæ incrementum obtinetur. Hinc hominem Deo gratum reddit efficienter.

Gratia *habitualis*, est qualitas homini permanenter inhærens, quæ ipsum formaliter reddit Deo gratum & sanctum. Est enim forma, qua inexistente, sumus Deo grati.

Cum igitur ab hac utraque gratia; actuali quæ efficienter, & habituali quæ formaliter sanctificat, tota hominis salus & æterna felicitas pendeat, hunc Tractatum in duas Dissertationes dividemus; in *prima*, agemus de gratia actuali, in *secunda*, de gratia habituali.

DISSERTATIO I.

De gratia actuali.

Nota. **U**T omnia, quæ spectant gratiam actualem interiorem, dilucide pertractemus, hanc Dissertationem in tria Capita distribuemus; *Primum*, erit de necessitate gratiæ. *Secundum*, de ejusdem natura & divisione. *Tertium*, de ejus dispensatione ac distributione.

C A.

CAPUT PRIMUM.

*De necessitate gratiæ actualis interioris in statu
natura lapsa.*

Nota. **C**irca necessitatem & existentiam gratiæ actualis interioris varie erraverunt:

1. *Pelagius*, qui in tantum gratiæ fuit inimicus, ut docuerit hominem lapsum per solas naturæ vires, absque ullo gratiæ inferioris auxilio, posse quodlibet opus salutare peragere, omnia Dei mandata observare, tentationes quascumque superare, pravas cupiditates convellere, ac tandem beatitudinem æternam consequi. Quod si ad effugiendam damnationem Concilii Diospolitani, aliquam dari gratiam confessus fuerit, per gratiam intellexit liberum arbitrium, eo quod gratis a Deo in creatione concederetur. Cum autem a Catholicis objurgaretur, quod nullam, præter liberum arbitrium, admitteret gratiam, novum gratiæ externæ genus adinvenit, legem, nempe, doctrinam, & exempla Christi. Cum vero de novo urgeretur ut gratiam internam admitteret, aliquam visus est admisisse, non quidem qua moveretur voluntas ad bonum, sed tantum qua illustraretur intellectus ad mandata divina, non simpliciter, sed facilius adimplenda; hancque illustrationis gratiam dicebat *secundum merita nostra dari*. Hæc omnia constant ex D. Aug. l. de hæresibus, hæresi 88. & pluribus aliis locis maxime libri de gratia Christi.

Itaque errores Pelagianorum circa gratiam, in hoc consistebant, quod negarent tum necessitatem, tum gratuitatem gratiæ actualis interioris; quos errores Pelagius, tum per se, tum

tum per discipulos suos; maxime per Caelestium, & Julianum Capuanum, aut Eclanensem, Episcopum disseminavit.

II. *Semipelagiani*, Massilienses communiter dicti, (quorum principes fuerunt *Joannes Cassianus*, Collator dictus, & *Gennadius*, Presbyteri Massilienses, *Fausus* Regiensis Episcopus, &c. quibus praeiverat *Vitalis* Carthaginensis) cum convenissent Massiliæ ad conciliandam libertatem cum gratiæ necessitate & gratuitate, in varios prolapsi sunt errores, qui ad tria Capita revocari possunt circa præsentem materiam, scilicet:

1. Quod docuerint initium fidei & salutis esse a nobis, nosque solis liberi arbitrii viribus posse conari, velle ordiri opus salutis, ut referunt DD. Prosperus & Hilarius Arelatensis, *Epist. ad Aug.*

2. Quod asseruerint hominem per nisum & conatum naturalem mereri gratiam ad opus salutare ulterius perficiendum, & salutem æternam consequendam, si non de condigno, saltem de congruo: ex quo sequebatur gratiam secundum merita humana dari; ipsamque non prævenire voluntatem, a qua econtra præveniri debebat. Ita asserit idem Hilarius, *Epist. ad August.*

3. Quod voluerint, (saltem aliqui) perseverantiam usque in finem a nostro libero arbitrio pendere, nec esse donum Dei speciale, ut innuit D. August. lib. de dono perseverantiæ, cap. 17. *Hac dicentes, inquit, nolunt hominibus predicari dona Dei esse, ut veniatur ad fidem, & permaneat in fide.*

III. *Lutherus & Calvinus*, liberi arbitrii vires ita extenuant ac deprimunt, ut nihil omnino boni morales, per solas naturæ vires fieri posse contendunt. Immo volunt omnia ope-

ra quæ fiunt, non tantum sine speciali gratiæ auxilio, sed etiam sine fide justificante, esse peccata; ex quo sequitur, etiam ea opera, quæ ex speciali gratiæ auxilio ab infidelibus fiunt, vitiosa esse & peccaminosa.

IV. *Bajus & Jansenius*, cum novatoribus pariter docent, 1. Gratiâ habitualement ita necessariam esse ad quodlibet opus bonum morale, ut omnia peccatorum opera sint peccata, ut patet ex hac propos. 35. *Baji*, *Omne quod agit peccator, vel servus peccati, peccatum est*. Docent 2. omnes infidelium virtutes vera esse vitia; & omnia eorum opera vera esse peccata. Sic docet *Bajus*, prop. 25. & 27. *Omnia infidelium opera sunt peccata, & Philosophorum virtutes sunt vitia: Liberum arbitrium sine gratia Dei adjutorio, non nisi ad peccandum valet*. Et *Jansenius*, l. 4. de statu naturæ lapsæ, c. 17. in tit. ait: *Insania, error, impietas, contraria Christianorum sensui, Scripturis, & fidei; quod infidelium sit ulla vera virtus, vel opera sine peccato, juxta Augustinum & Concilium Arausicanum*. Idem censuit *Quenellus* in suis reflexionibus moralibus.

Ut hos omnes gratiæ Christi hostes debellemus, videndum est, 1. Utrum gratia Christi actualis & interior, necessaria sit in statu naturæ lapsæ ad operis salutaris effectiōem, aut inchoationem. 2. Utrum sit necessaria ad perseverandum in accepta justitia usque in finem vitæ. 3. Utrum gratia interior sit necessaria ad boni moralis naturalis effectiōem. 4. Ad quodnam bonum morale naturæ efficiendum gratia interior necessaria sit, vel non: quæ omnia solventur sequentibus quæstionibus.

Q U Æ S T I O I.

Utrum gratia Christi actualis interior necessaria sit, in presenti statu, ad operis salutaris effectiōnem, aut saltem inchoationem?

C O N C L U S I O I.

Nullus homo lapsus, siue justus, siue injustus, in presenti statu, potest sine gratia interiori præueniente efficere aliquod opus salutare, id est, opus conducens ad vitam æternam. Est de fide contra Pelagianos.

Prob. Ex Scriptura, Joann. 6. Nemo potest venire ad me, nisi Pater, qui misit me, traxerit eum. Quomodo autem trahit? per fidem; ergo fides, quæ est donum salutare, est a solo Deo; unde ibidem dicitur: Hoc est opus Dei, ut credatis in eum quem misit ille.

Joann. 15. Sine me nihil potestis facere, nempe quod conducat ad vitam æternam.

2. Ad Corinth. 3. Fiduciam talem habemus per Christum ad Deum, non quod sufficientes sumus cogitare aliquid a nobis, quasi ex nobis, sed sufficientia nostra ex Deo est. Et 1. Corinth. 4. Quis te discernit? quid autem habes quod non accepisti? Ex quibus omnibus locis sic argumentor: Qui non potest venire ad Deum per fidem, nisi trahatur ab ipso Deo; nec quidquam facere potest in negotio salutis, nisi adjuvetur a Christo; nec aliquid salutare potest cogitare, nisi ad id sufficientiam recipiat a Deo per Christum, nec ullum habet meritum, quod non receperit a Deo, ille non potest quidquam boni salutaris facere absque præueniente interiori gratia Christi; atqui, ex omnibus locis supra allatis, & infinitis aliis, homo lapsus talis est; ergo.

Probat. 2. ex PP. inter quos unus sufficiat

August. qui, *lib. de gratia Christi, cap. 26.* ait: *Gratiam sic confiteatur, qui vult veraciter confiteri, ut omnino nihil boni sine illa, quod ad pietatem pertinet, veramque justitiam, fieri posse non dubitet. Non quomodo ille (Pelagius) qui cum dicit, propterea dari gratiam, ut quod a Deo præcipitur, facilius impleatur, quid de illa sentiat, satis ostendit, scilicet quod etiam sine illa, etsi minus facile, fieri tamen, quod divinitus præcipitur, potest. Porro Div. Doctor, cap. 29. Pelagium increpans, ait: Tolle, facilius, & non solum plenus, verum etiam sanus est sensus, si ita dicatur, ut quod per liberum facere jubentur homines arbitrium, possint implere per gratiam. Cum autem, facilius, additur, adimpletio boni operis etiam sine Dei gratia posse fieri, tradita significatione suggeritur; quem sensum redarguit, qui dicit: Sine me nihil potestis facere.*

Prob. 3. ex Conciliis: Diospolitano, in quo omnes Pelagii errores fuerunt damnati, cui interfuit Pelagius ipse, qui abutendo gratiæ nomine, damnationem effugit.

Carthaginensi III. cap. 4. Quisquis dixerit gratiam Dei per Jesum Christum propter hoc tantum nos adjuvare ad non peccandum, quia per ipsam nobis revelatur & aperitur intelligentia mandatorum, ut sciamus quid appetere, quid vitare debeamus: non autem per illam nobis præstari, ut quod faciendum cognoverimus, etiam facere diligamus, atque valeamus, anathema sit. De hoc Concilio loquens Sanct. Prosper in resp. ad objectionem 8. Gallorum, ait: Cum 214. Sacerdotibus, quorum constitutionem contra inimicos gratia Dei totus mundus amplexus est, dicamus gratiam Dei per J. C. Dominum ad faciendam justitiam nos per actus singulos adjuvare: ita ut sine illa nihil vera
- san-

sanctaque pietatis habere, cogitare, dicere, agere, valeamus.

Arausicanum II. can. 7. definit: Si quis per naturam vigorem bonum aliquod, quod ad salutem pertinet vita aeterna, cogitare aut eligere posse confirmet, absque illuminatione & inspiratione Spiritus sancti, haeretico fallitur spiritu.

Prob. 4. ratione: Quia media debent esse proportionata fini, & ejusdem cum illo ordinis; atqui opera salutaria sunt media ad salutem aeternam, quae est supernaturalis; ergo debent esse supernaturalia; atqui non possunt esse supernaturalia, nisi praeveniantur & excitentur gratiae supernaturalis auxilio; ergo.

Solvuntur Objectiones.

Objicies 1. Fides est opus salutare; atqui fides haberi potest sine praevenientis gratiae interioris auxilio; ergo.

Resp. nego min. Quae repugnat Apost. (u) dicenti: Gratia salvati estis per fidem, & hoc non ex vobis, Dei enim donum est. Unde de se ipso, 1. Cor. 7. vers. 25. dicit: Misericordiam consecutus a Domino, ut sim fidelis. Ubi Apostolus non ait, quia fidelis eram, observat D. August. (x) fideli ergo datur quidem, sed data est etiam ut esset fidelis.

Inst. 1. Mysterio credibiliter proposito, potest homo ratione utens assentiri & credere, absque gratiae interioris auxilio; ergo.

Respond. dist. ant. Potest sine gratiae interioris auxilio assentiri & credere, fide humana & sterili, conced. fide supernaturali & salutari, nego antec. quod est contrarium huic Tridenten-

(u) Ephes. 2. vers. 8.

(x) Lib. de praedestin. Sanctior. cap. 3.

dentina definitioni: Si quis dixerit, sine praeveniente Spiritus sancti inspiratione, atque ejus adjutorio hominem credere, sperare, diligere aut poenitere posse, sicut oportet, ut ei gratia justificationis conferatur, anathema sit.

Inst. 2. Fides data mysterio revelato propter Dei revelantis auctoritatem, eo ipso supernaturalis est; ergo est salutaris, etiam absque gratiae interioris auxilio.

Prob. ant. Actus suam desumit speciem ab objecto; atqui objectum illius fidei est supernaturale; ergo fides illa supernaturalis est.

Respond. dist. maj. Actus suam speciem desumit ab objecto, simul & principio operandi, conced. ab objecto tantum, nego majer. Ut enim actus sit intrinsece supernaturalis, non sufficit ut circa objectum supernaturale versetur, sed insuper requiritur ut procedat a principio supernaturali, facultas enim non potest ultra vires proprias tendere, nisi per formam aliquam superadditam vegetetur & corroboretur.

Inst. 3. Potest quis, propter motiva credibilitatis propius inspecta, per lumen naturale, tanta cum certitudine assentiri veritatibus revelatis, quanta alter assentiretur per gratiam interiorem; ergo ejus fides ei erit aequae salutaris.

Respond. 1. nego antec. Cum Bellarm. (y), *Argumenta enim*, inquit, quae articulos fidei nostra credibiles faciunt, non talia sunt, ut fidem omnino indubitatam cedant, nisi mens divinitus adjuvetur; unde res credibiles sine alia gratia, credi possunt, sed humana fide, non divina.

Ref.

(y) Lib. 6. de gratia & lib. arbitrio, cap. 3.

Respond. 2. nego conseq. Quia naturalis ejusmodi fides proportionem non haberet cum supernaturali beatitudine; ergo non esset medium ad illam perducere aptum.

Inst. 4. Hæretici suis falsis figmentis firmissime, & ad mortem usque adhæserunt absque ullo gratiæ adjutorio; ergo pariter citra gratiam poterit homo veritatibus revelatis & credibiliter propositis, cum summa certitudine, adhærere.

Respond. nego conseq. „ Non est enim eadem „ ratio veri & falsi, sicut nec est eadem ratio „ boni & mali; ait *Bellarmin. cit.* potest „ enim homo peccator ex animo, ac toto „ corde blasphemare Deum, non tamen potest „ ex animo ac toto corde laudare Deum, „ sine speciali gratia: ita poterit sua figmenta, „ quamvis aliis incredibilia, ipse facile „ credere propter affectum erga res suas, nec „ tamen poterit sine speciali gratia Dei res „ divinas credere. Addo præterea ejusmodi „ homines, sicut temere credunt falsa, & diabolica, ita etiam temere credere vera & divina, non autem, sicut diximus, *Ut oportet*, „ id est, pio affectu, ut res a Deo revelatas, „ & quibus falsum subesse nulla ratione „ possit. “

Obijcies 2. Div. August. in exposit. Epistolæ ad Roman. ait: Quod credimus nostrum est; quod autem bonum subsequens operamur, illius est, qui credentibus dat Spiritum sanctum. Ergo credere, etiam fructuose, non est ex gratia.

Respond. D. August. hanc prop. ut erroneam revocavit, lib. 1. retract. cap. 23. his verbis: Quod dixi: quod credimus nostrum est, &c. Profecto non dicerem, si jam scirem etiam ipsam fidem inter Dei munera reperiri, qua dantur in eodem spiritu. Utrumque ergo nostrum est pro-

per arbitrium voluntatis, & utrumque tamen datum est per spiritum fidei & charitatis.

Objicies 3. Saltem homo justus, habituali gratia donatus, & bonis habitibus instructus, potest absque gratia actuali voluntatem præveniente, facere aliquod opus conducens ad vitam æternam. Ergo.

Resp. nego antec. Tum quia, Joann. 13. de justis dicitur: Ego sum vitis, vos palmites: qui manet in me & ego in eo, hic fert fructum multum, quia sine me nihil potestis facere. Quæ comparatione vitis & palmitum utitur Concil. Trident. sess. 6. cap. 16. dicens: Cum enim ille ipse C. J. tanquam caput in membra, & tanquam vitis in palmites, in ipsos justificatos jugiter virtutem influat; quæ virtus bona eorum opera semper antecedit, & comitatur & subsequitur, & sine quo, nullo pacto, Deo gratia & meritoria esse possent, præverat Conc. Arausicanum II. can. 9. dicens: Quoties bona agimus, Deus in nobis, atque nobiscum, ut operemur, operatur. Nequidem justus hic excipitur; cujus rei ratio est, quia per peccatum originale adeo vitiata & infirma facta est nostra voluntas, atque ita torpet circa bonum, ut excitari debeat gratia præveniente, ad volendum bonum, ad salutem conducens.

CONCLUSIO II.

Nullus homo lapsus, sine gratia interiori præveniente, potest incipere aliquod opus salutare. Est de fide contra Semipelagianos.

Prob. 1. Ex Scriptura & PP. 2. Corinth. 3. Non quod sufficientes, simus cogitare aliquid a nobis, quasi ex nobis, sed sufficientia nostra ex Deo est. Ad quæ verba Div. Augustin. lib. de prædest. SS. cap. 2. ait: Attendunt hic, & ver-
ba

ba ista perpendant, qui putant ex nobis esse fidei cœptum, & ex Deo esse fidei supplementum quod ergo pertinet ad religionem & pietatem, de qua loquebatur Apostolus, si non sumus idonei cogitare aliquid quasi ex nobismetipsis: Profecto non sumus idonei credere aliquid, quasi ex nobismetipsis, quod sine cogitatione non possumus, sed sufficientia nostra, qua credere incipiamus, ex Deo est. Quocirca sicut nemo sibi sufficit ad incipiendum vel perficiendum quodcumque opus bonum ita nemo sibi sufficit, vel ad incipiendam, vel ad perficiendam fidem, sed sufficientia nostra ex Deo est, quoniam fides, nisi cogitetur, nulla est.

Divus Fulgentius, l. de incarnatione & gratia Christi, exponens hunc Apost. textum. *Iustus ex fide vivit*, ait: *Vita nostra a fide sumit initium. Quam fidem non ex nostra voluntate nasci, sed per Spiritum sanctum unicuique dari; Beatus Paulus ostendit. Et infra: In hominis corde, nec concipi fides poterit, nec augeri, nisi eam Spiritus sanctus effundat & nutriat. Ergo a nemine unquam Deus potest proveniri.*

Prob. 2. Ex Conciliis. Arausicano II. can. 5. *Si quis, sicut augmentum, ita etiam initium fidei, ipsumque credulitatis affectum non per gratia donum, idest, per inspirationem Spiritus sancti sed naturaliter nobis inesse dicit, apostolicis dogmatibus adversarius approbatur. Et Can. 7. Si quis per natura vigorem, bonum aliquod, quod ad salutem pertinet vita aterna, cogitare ut expedit, aut eligere, si-ve salutari, id est, Evangelica predicationi consentire posse confirmat, absque illuminatione & inspiratione Spiritus sancti haretico fallitur spiritu.*

Prob. 3. ratione Theologica: Ideo Semipelagi-

giani assererebant hominem, sine gratia præveniente, posse incipere aliquod opus salutare, ut per illud mereretur gratiam divinam vires, ultiores suppeditaturam ad perficiendum & complendum opus salutare, a voluntate naturaliter expetitur: Nam, ait D. Hilarius, Epist. ad August. *Quod dicitur: crede & salvus eris: Unum horum, exigi asserunt, aliud offeri, ut propter id, quod exigitur, si redditum fuerit, id quod offertur, deinceps tribuatur.* Atqui consequens repugnat: 1. naturæ gratiæ, quæ omnino gratuita est, nec meritis humanis rependitur. 2. humilitati Christianæ, quæ cum Apostolo, 1. Cor. 4. clamat. *Quid habes quod non accepisti? si autem accepisti, quid gloriaris, quasi non acceperis?* ergo.

Prob. min. prima pars: Ex D. August. l. de prædest. SS: cap. 2. dicente: Si non pertinet ad Dei gratiam, quod credere cœpimus.... ac per hæc initium fidei nostra priores, damus Deo, ut retribuat nobis. & supplementum ejus, & si quid aliud fideliter poscimus; sed contra hæc, cur non potius audimus: quis prior dedit illi, & retribuetur ei? quoniam ex ipso, & per ipsum, & in ipso sunt omnia: Et ipsum igitur initium fidei nostra, ex quo, nisi ex ipso est? neque enim, hoc excepto, ex ipso sunt cætera, sed, ex ipso, & per ipsum, & in ipso sunt omnia; ergo gratia nullo modo rependitur meritis humanis. Sed ut Semipelagianismus, funditus evellatur.

Quæres: An saltem homo, per solas naturæ vires, possit se præparare ac disponere ad gratiam?

Resp. negative: Nam omnis dispositio, quandam habere debet proportionem cum forma ad quam disponit; atqui actus morales naturales, nullam habent proportionem cum gratia, quam.

quam non exigunt; ergo non possunt ad gratiam disponere. Hinc D. August. l. 1. ad Simplicianum quæst. 2. ait: *Nonne videmus quosdam homines utriusque sexus in conjugali castitate viuentes sine querela, & tamen vel hæreticos, vel paganos, vel etiam in vera fide & vera Ecclesia sic tepidos, ut eos miremur meretricum & histrionum subito conversorum, non solum patientia & temperantia, sed etiam fide, spe & charitate superari? restat ergo ut voluntates eligantur: sed voluntas ipsa, nisi aliquid occurrerit quod delectet atque invitet animum, moveri nullo modo potest: hoc autem ut occurrat, non est in hominis potestate.*

Confirmatur, quia si homo posset se disponere ad gratiam per solas naturæ vires, hoc fieret, vel per aliquem actum, saltem de congruo, meritorium: vel per desiderium recuperandæ salutis: vel tandem per pactum quo Deus decrevit homini, quod in se est facienti, dare gratiam; atqui nihil horum dici potest, ergo &c. *Non primum*, quod continet totum Pelagianismi virus, evertitque totam rationem gratiæ quæ omnino debet esse gratuita. *Non secundum*, quia hoc desiderium est a gratia, ut de fide est definitum in Conc. Arausicano; cujus canones retulimus supra. *Non tertium*, quia huius fictitii pacti nullum, vel levissimum, vestigium reperitur in Scripturis; unde Clerus Gallic. ann. 1700. in censura propositionis contrariæ, dicit: *Pactum autem quod inter Deum & Christum asseritur, commentum est temerarium, erroneum, nec solum tacente, sed etiam adversante Scriptura. & SS. Patrum traditione prolatum.*

Solvuntur Objectiones Semipelagianorum.

Objectiones. 1. Proverb. 16. dicitur: *Hominis est præparare animam & Domini gubernare linguam. cor hominis disponit viam suam, sed Domini est dirigere gressus ejus.* Ergo hominis est incipere opus salutare, cujus intuitu Deus præparat & confert gratiam.

Resp. dist. consequ. Hominis est incipere opus salutare, ope gratiæ prævenientis, *conced.* per solas naturæ vires, *nego consequ.* Sensus ergo textus allati est, hominis esse animam, ope gratiæ prævenientis præparare ad ulteriorem gratiam specialiore, quæ necessaria est, ut pie cogitata, recte & fructuose eloquatur.

Inst. 1. Psalmo 87. dicitur: *Mane oratio mea præveniet te.* Ergo in negotio salutis voluntas hominis prævenit gratiam Dei.

Resp. nego consequ. In textu enim verbum, *Præveniet te:* sumitur pro verbo, maturabit ad te tendere, quod non fit sine gratia præveniente & inspirante, quia, ut ait Apost. Roman. 8. *Spiritus enim adjuvat infirmitatem nostram, nam quid oremus, sicut oportet, nescimus, sed ipse Spiritus postulat pro nobis gemitibus inenarrabilibus.*

Instab. 2. Zachariæ 1. Deus dicit: *Convertimini ad me, & convertar ad vos.* Ergo homo debet incipere negotium salutis.

Respond. dist. consequ. Homo debet incipere negotium salutis, præventus & excitatus a gratia divina, *conced.* per vires naturales, *nego consequ.* Conversio enim hominis ad Deum, est fructus gratiæ prævenientis, & conversio Dei ad hominem designat gratiæ subsequenter, aut etiam justificantis collationem; atque ita consentit Zacharias Jeremiæ dicenti, c. 31. *Con-*

ver.

verte me & convertar, cum hoc, ex diversis loquendi modis, emolumento, quod Zacharias hominis libertatem, Jeremias vero præviam gratiæ motionem astringat; ut observat Concil. Trident. Sess. 6. cap. 5. his verbis: *Cum dicitur, convertimini ad me, & ego convertar ad vos, libertatis nostræ admonemur. Cum respondemus: converte nos, Domine, ad te, & convertemur; Dei gratia nos præveniri confitemur.*

Inst. 3. Apost. Rom. 7. v. 18. ait; Velle adjacet mihi; perficere autem bonum non inuenio. Ergo desiderium salutis est a nobis.

Respond. dist. consequ. Est a nobis, a gratia ex-
eitis, conc. a nobis solis, nego ant. Id constat ex ipso Apostolo, qui *Philipp. 2. ait: Deus est qui operatur in nobis velle, & perficere pro bona voluntate.* Bona ergo Apostoli voluntas, erat ex gratia præveniente, quæ ipsum movebat ad volendum bonum, quod, propter contrarios concupiscentiæ motus, non poterat tam prompte ac facile perficere, ex quo necessaria erat gratia ulterior adjuvans, quæ daret & ipsum agere.

Objectiones. In Scripturis multa leguntur exempla eorum, qui, absque gratia, salutis suæ initium posuerunt; ergo.

Respond. nego ant. Cujus contrarium fuit definitum in Concilio Arausicano II. Can. 3. his verbis: *Si quis invocatione humana gratiam Dei dicit posse conferri; non autem ipsam gratiam facere ut invocetur a nobis, contradicit. Isaiæ Propheta & Apostolo idem dicenti: inventus sum a non quærentibus me: palam apparui his qui me non interrogabant.*

Prob. ant. Cornelius Centurio, Act. 10. per bonam voluntatem & eleemosynas obtinuit fidem in Christum; atqui hanc bonam voluntatem

tem habuit, & eleemosynas fecit absque gratia; ergo.

Resp. nego min. Nam Cornelius, antequam instructus esset a Divo Petro, supernaturalem gratiam actualem habuit, quæ fuit principium bonæ illius voluntatis & eleemosynarum, ut definiit Concilium Arausicanum, Canon. 25. Unde manifestissime credendum est, quod & illius latronis, quem Dominus ad Paradisi patriam revocavit, & Cornelii Centurionis, ad quem Angelus Domini missus est, & Zachari, qui ipsum Dominum suscipere meruit, illa tam admirabilis fides non fuit de natura, sed divina largitatis donum, &c.

Obicies 3. Multi PP. antiquiores docuisse videntur gratiam Dei bona hominis voluntate præveniri; ergo, &c.

Prob. antec. Ex Sancto Irenæo, qui, lib. 4. cap. 37. docet, Prophetas hortari homines ad iustitiam, & ad bonum opus, quia hoc in nobis est. Ergo.

Respond. dist. antec. Quia hoc in nobis est, per liberum arbitrium gratia motum & excitatum, conced. sine gratia, nego antec. Agit itaque contra Simonianos & Marcionitas, qui docebant voluntates nostras ineluctabili necessitate ad bonum aut malum propelli, contra quos demonstrat ex exhortationibus, quibus ad virtutem incitatur, esse in nobis liberum arbitrium, quod verum est. Ad bonum autem salutare inchoandum & perficiendum necessariam esse gratiam agnovit Divus Irenæus, qui, lib. 3. cap. 17. ait: Sicut arida terra, si non percipiat humorem, non fructificat: sic & nos fructum aridum existentes primum, nunquam fructificavimus ad vitam sine superna voluntaria pluvia.

Ist. 1. D. August. lib. de predest. SS. ait: Salus solius

solius religionis hujus, per quam solam veram, salus vera veraciter promittitur, nulli unquam defuit, qui dignus fuit, & cui defuit, dignus non fuit. Ergo.

Resp. dist. antec. Nulli unquam defuit, qui dignus fuit, per auxilium gratiæ, *conced.* per solas naturæ vires, *nego antec.* Sese explicat. D. August. lib. 2. retract. cap. 31. dicens: *Non ita dixi, tanquam ex meritis suis, quisque dignus fuerit, sed quemadmodum ait Apostolus, non ex operibus, sed ex vocante Deo.*

Inst. 2. D. Chrysostomus, variis locis, docet hominem seipsum ad gratiam per solas naturæ vires posse præparare. Sic, Hom. 12. in Epist. ad Hebræos, ait: *Oportet nos primum bona eligere, & tunc affert quæ sua sunt. Non prævenit nostras voluntates, ne perdat nostrum liberum arbitrium: cum autem nos elegerimus, multam tunc affert auxiliationem..... nam nostrum quidem est praeligere & velle, Dei autem est perficere & ad finem deducere.*

Resp. nego ant. Totus, equidem ibi est Div. Chrysostom. in defendendo contra Manichæos lib. arbitrio, & excutienda hominum negligentia, ne scilicet putent se in omnibus a Deo sic præveniri per gratiam, ut nihil sibi agendum relinquatur, verum non rejicit D. Doctor necessitatem gratiæ ad actus salutes, quam variis locis astruit, v. g. Hom. 13. in Joann. Gratia Dei semper in beneficiis priores sibi partes vindicat. Et Hom. 12. in Epist. ad Hebræos astruit, tum liberum arbitrium, tum necessitatem gratiæ, dicens: *Etiam si curras, etiam si studium ponas, ne tuum esse existimes quod recte gestum est. Nam nisi a superis opem adipiscaris, frustra erunt omnia..... frustra curramus, si totum esse nostrum existimamus, si non plus Deo tribuimus. Non enim suum esse totum*
voluntæ

voluit Deus, ne videretur nos temere coronare. Neque rursus nostrum, ne incidamus in arrogantiam. Ex quo evidenter patet, mentem Div. Chrysostomi esse, quod Deus non praeveniat nostras voluntates, totum faciendo, & nihil nobis agendum relinquendo; sed cum parati fuerimus per bonum usum gratiae praevenientis acceptae, puta gratiae orationis & boni desiderii, tunc Deus multas ultiores & potentiores gratias nobis suppeditet, quibus homo, & justificationem, & praesertim perseverantiam usque in finem, possit obtinere.

Inst. D. Hieron. dial. 3. contra Pelagianos, ait: Nostrum est incipere, illius perficere; nostrum offerre quod possumus, illius perficere quod non possumus. Ergo.

Resp. dist. antec. Nostrum est incipere cum gratia excitante, conc. sine gratia, nego antec. Sese explicat D. Doctor. Epist. ad Demetriadem, Velle & nolle nostrum est, inquit, ipsumque, quod nostrum est, sine Dei misericordia nostrum non est.

Objicies 4. Stare non potest libertas cum necessitate gratiae ad opera salutaria inchoanda & perficienda; ergo &c.

Respond. nego ant. Quia per gratiae collationem, confirmatur potius libertas, quam tollitur, ut docet Div. August. (2) his verbis: Liberum arbitrium per gratiam non evacuatur, sed stabilitur. Rationem reddit ibidem D. Doctor, quia nempe gratia sanat voluntatem, qua justitia libere diligitur. Non ergo per gratiam liberum arbitrium extinguitur, quandoquidem ejus motioni & excitationi potest consentire vel dissentire, prout definivit Conc. Trident.

Inst. Si gratia nos, pro Dei beneplacito, pra-

(2) Lib. de Spiritu & littera, cap. 40.

prævenit, sequitur 1. Quod Deus sit personarum acceptor, cum uni det, alteri denegat gratiam. 2. Quod oratio fiat frustra. 3. Quod nullus exhortationi aut correptioni locus relinquatur. 4. Quod negligentia aut desperationi locus detur; atqui omnia illa sunt absurda; Ergo.

Respond. nego sequel. 1. Etenim Deus, ex eo, quod, pro beneplacito suo, nos præveniat, non est personarum acceptor, tum quia personarum acceptio non est, nisi cum ea, quæ debentur ex iustitia, secundum iustitiæ leges non distribuuntur, quod in distributione gratiæ, quæ nemini ex iustitia debetur, locum non habet; tum quia gratia præveniens nemini deest, ut infra probabitur, quamvis illam Deus secundum mensuram diversam, pro beneplacito suo, elargiatur.

2. Oratio non fit frustra, quia dum fit ex gratia præveniente, valet ad consequendam gratiam subsequenter; unde D. Aug. (a) ait: *in oratione cognosce, unde accipias, quod vis habere.*

3. Locus est exhortationi & correptioni, tum quia in ipsa exhortatione & correptione Deus cordis aures sæpe aperit interius, ut homines audiant & obediant, *Corripitur*, ait Div. August. ibid. cap. 6. *ut strepitum concionis forinsecus insonante atque flagellante, Deus in illa intrinsecus occulta inspiratione, operetur & vellet.* Tum quia, dolor illo, quo sibi displicet homo, ait D. August. ibid. cap. 5. *quando sentit correptionis aculeum, excitat eum in majoris orationis affectum, ut Deo miserante, incremen-*

ro

(a) Lib. de correptione & gratia, cap. 2.

to charitatis adjutus, desinat agere pudentia & dolenda, & agat laudanda atque gratanda.

4. Non datur locus negligentiae aut desperationi, sed potius acuitur diligentia, dum significatur gratiam a nobis non pendere, & periculum esse, ne, si dissentiendo reddatur inutilis, subtrahatur; spes autem firmatur, dum auxilium divinum, quo nostra juvetur infirmitas, promittitur.

Objicies 5. Axioma theologicum, facienti quod in se est, Deus non denegat gratiam. Ergo homo potest per vires naturales sese ad gratiam præparare.

Resp. dist. axioma: Facienti quod in se est, ex gratiae viribus, conc. ex naturae viribus, nego. Axioma enim, hoc ultimo sensu intellectum, damnatum est a Clero Gallicano, an. 1700. Tanquam instaurans Semipelagianismum, mutatis tantum vocibus.

Inst. 1. Illud axioma est D. Thomae & aliorum Theologorum plurimorum, asserentium gratiam a Deo non denegandam homini per naturae vires quod in se est facienti; ergo temerarie fuit a Clero Gallicano censura notatum.

Respond. dist. ant. Asserunt gratiam non denegandam homini, per naturae vires a Deo motas & excitatas, quod in se est facienti, conc. per naturae vires solas, nego *ant.* Clare hoc asserit Div. Thom. in capit. 10. Epist. ad Rom. lectione 3. dicens: Quod aliqui faciunt quod in se est, convertendo se scilicet ad Deum, ex Deo est movente corda ipsorum ad bonum, secundum illud Thren. 5. Convertite nos, Domine, ad te, & convertemur.

Instab. 2. D. Thom. de veritate, quest. 14. artic. 11. ad 1. dicit: Ad divinam providentiam

etiam pertinere, ut cuilibet provideat de necessariis ad salutem, dummodo ex parte ejus non impediatur. Si enim aliquis in sylvis, vel inter bruta animalia nutritus, ductum rationis naturalis sequeretur in appetitu boni & fuga mali, certissima est tenendum, quod ei Deus, vel per internam inspirationem revelaret ea quæ sunt ad credendum necessaria, vel aliquem fidei prædicationem ad eum dirigeret, sicut misit Petrum ad Cornelium. Ergo mens ejus est hominem, per solas naturæ vires, posse se ad gratiam disponere.

Respond. nego. consequ. Mens enim, & vera Divi Thomæ sententia, quærenda est specialiter in ejus Summa, quæ postremum ipsius opus est: porro in ea (b) dicit, Quod nihil homo potest facere, nisi a Deo moveatur, secundum illud Joann. 15. Sine me nihil potestis facere. Et ideo cum dicitur homo facere quod in se est, dicitur hoc esse in potestate hominis secundum quod est motus a Deo.

Q U Æ S T I O. II.

Utrum gratia Christi actualis interior, sit necessaria ad perseverandum in accepta justitia usque ad finem vite?

Nota. 1. Perseverantia, ex Divo Augustino. lib. de bono perseverantia, cap. 1. sumi potest secundum quid, vel simpliciter.

Per-

(b) 1. 2. q. quæst. 109. art. 6. ad 2.

Perseverantia *secundum quid*, est ea, qua homo justus, per aliquod tempus, sed non usque ad mortem, perseverat in accepta justitia; per prosecutionem boni & fugam mali.

Perseverantia *simpliciter*, definitur ab Aug. *donum Dei quo usque in finem perseveratur in Christo*; id est, usque in finem vitæ; *finem autem dico*, inquit, *quo vita ista finitur, in qua tantummodo periculum est ne cadatur*. De hac sola hic loquimur.

Nota 2. Dupliciter contingere potest, ut aliquis in gratia justificante perseveret usque ad mortem. 1. Cum post acceptam gratiam justificantem quis moritur antequam ullum actum liberum possit exercere, v. g. cum infans baptizatus moritur ante adeptum usum rationis; vel adultus statim post acceptam justitiam. 2. Cum justus adultus aliquandiu vivit post acceptam gratiam sanctificantem, & in observantia mandatorum Dei, tentationum victoria, ac virtutum exercitio ad mortem usque jugiter perseverat.

Nota 3. Quæstionem hic non esse de infantibus, qui post Baptisma ante usum rationis adeptum moriuntur; nec de adultis justis, qui e vita excedunt statim post acceptam gratiam justificantem: *constat enim erga istos, tam infantes, quam adultos, elucere specialem Dei protectionem & singularem providentiam, qua fit ut tunc, & in talibus circumstantiis, morantur, juxta illud Sap. 4. Raptus est, ne malitia mutaret intellectum ejus; placita enim erat Deo anima illius. Propter hoc properavit illum educere de medio iniquitatum.* Constat similiter in istis non necessariam esse gratiam perseverantiæ internam, illustrationis nimirum & inspirationis, qua nec sunt capaces infantes, nec indi-

indigent adulti statim post acceptam justificationem decedentes.

Quæstio igitur de adultis, qui post justificationem aliquandiu vivunt, & pugnandum habent contra dæmonem, mundum, & carnem. Itaque:

C O N C L U S I O.

Homo justus in presenti statu, sine speciali divina gratia auxilio, non potest in accepta justitia perseverare usque ad finem vite.

Probat. 1. Ex Scripturæ textibus, quibus D. August. lib. de dono perseverantia, probat perseverantiam esse speciale donum Dei.

Cap. 2. ait: Si perseverantia non sit donum Dei, quomodo verum est, quod Apost. Philipp. 1. ait: Vobis datum est pro Christo, non solum ut credatis in eum, verum etiam ut patiamini pro eo: Horum quippe unum pertinet ad initium, alterum ad finem: utrumque tamen est Dei donum, quia utrumque dictum est esse donatum.

Cap. 7. in hæc, Psalm. 79. verba, Fiat manus tua super virum dextera tua, & super filium hominis quem confirmasti tibi, & non discedimus a te, ait: Manus igitur Dei est ista, non nostra, ut non discedamus a Deo. Manus, inquam, ejus est ista, qui dixit Jerem. 32. Timorem meum dabo in cor eorum, ut a me non recedant. Propter quod & posci a se voluit, ne inferamur in tentationem: quia si non inferamur, nulla ab eo ratione discedimus: quod poterat nobis, etiam non orantibus, dari, sed oratione nostra nos voluit admoneri, a quo recipiamus hac beneficia.

Cap. 5. In hæc verba orationis Dominicæ: Et ne nos inferas in tentationem, sed libera

Vera nos a malo : ait : Cum dicunt Sancti , & ne nos inferas in tentationem , &c. quid aliud , quam ut in sanctitate perseverent , precantur ? Additque perseverantiam esse Dei donum , cum ab illo poscitur , satis aperteque monstratur . Nam , ut ait , cap. 2. Irrisoria petitio est , cum id ab eo petitur , quod scitur ipsum non dare .

Probat. 2. ex Conciliis : Arausicano II. Can. 10. Adjutorium Dei , etiam renatis ac sanctis , semper est implorandum , ut ad finem bonum pervenire , vel in bono possint opere perdurare . Trid. sess. 6. Can. 22. Si quis dixerit justificatum , vel sine speciali auxilio Dei , in accepta justitia perseverare posse , vel cum eo non posse , anathema sit .

Idem definiit Cælestinus S. P. In Epist. ad Episcopos Gallia , dicens : Neminem etiam Baptismatis gratia renovatum , idoneum esse ad superandas diaboli insidias , & ad vincendas carnis concupiscentias , nisi , per quotidianum adjutorium Dei , perseverantiam bona conversationis acceperit .

Probat. 3. ratione : Quia gratia perseverantiæ hominem reddit in bono ita immobilem , ut finem , nempe mortem in Christo , indeclinabiliter assequatur ; atqui homo justus cum gratia justificante & donis eam comitantibus , ac etiam cum auxiliis gratiæ ordinariis , non est ita immobilis in bono , ut finem indeclinabiliter assequatur , ob illius voluntatis mobilitatem ; ergo gratia perseverantiæ est donum speciale ab illis auxiliis distinctum , quod ideo a Conc. Trident. Can. 16. vocatur , Magnum perseverantiæ donum .

Solvuntur Objectiones.

Objicies 1. Omni justo debetur gratia, cum qua perseverare possit; ergo perseverantia non est speciale donum.

Respond. dist. ant. Omni justo debetur gratia communis & sufficiens, cum qua perseverare possit, saltem mediate, *conc.* gratia specialis, cum qua actu perseveret, *nego ant.* Itaque omnes justii donum habent sufficiens, cum quo possunt usque ad finem perseverare, saltem mediate, quia habent gratiam, qua, per orationes & bona opera, possunt impetrare perseverantiæ donum; sed omnes non habent donum speciale & efficax perseverantiæ, quo fiat ut actu perseverent, neque tale auxilium eis debitum est; immo neque illud mereri possunt de condigno, sed tantum de congruo, juxta illud D. August. lib. de dono perseverantiæ cap. 6. *Hoc ergo Dei donum suppliciter emereri potest.*

Inst. 1. Homo justus habet jus ad gloriam, quæ in gratia habituali, velut fructus in semine, virtualiter continetur, juxta illud 1. Joann. 3. *Semen Dei est in illo.* Ergo perseverantia, quæ conjungit gratiam cum gloria, non est speciale donum a gratia habituali distinctum.

Resp. dist. ant. Habet jus ad gloriam, mobile, *conc.* immobile, *nego ant.* Equidem justus habet jus ad gloriam, quandiu gratia habituali illustratur; verum non habet jus, ut usque ad mortem in gratia perseveret, quippe, qui, ratione liberi arbitrii ad bonum & malum, quandiu vivit, deflectere possit, unde, quando quis a Deo ita protegitur, ut non amittat gratiam instante morte, maximum est & specialia-

etiam altissimum misericordiae divinae beneficium ; de quo D. Aug. lib. de dono persever. capit. 9. ait : *Ex duobus justis , cur huic donetur perseverantia usque ad finem , illi autem non donetur , inscrutabiliora sunt judicia Dei.* Est enim beneficium , quod Deus , ex mero suo beneplacito , quibus voluerit , largitur .

Inst. 2. Gratia habitualis est excellens quaedam divinae naturae participatio , quae cum concursu Dei generali sufficiens est ad omnia praecepta adimplenda , omnia peccata vitanda , &c. Ergo cum gratia habituali , & generali Dei concursu gratiae debito , potest quis perseverare absque speciali auxilio .

Respond. dist. ant. Gratia habitualis sufficiens est , absolute , & secundum propriam virtutem , *conc.* relative ad infirmitatem hominis lapsi , *nego ant.* Licet enim gratia habitualis ex se sufficientem virtutem habeat ad quodlibet peccatum vitandum , & ejus occasiones expellendas ; tamen ad id , in homine lapsio , non est sufficiens , nisi speciali auxilio fulciatur ac roboretur ; etenim , etiamsi gratia sanet animam , diluendo culpam , non tamen eam sanat , auferendo infirmitatem , quae ex parte concupiscentiae suboritur .

Inst. 3. Conc. Milevitanum Can. 8. definit : *Si quis dixerit gratiam ; per quam justificamur per Christum , valere ad solam remissionem peccatorum , quae commissa sunt , & non in adjutorium , ne iterum committantur , anathema sit.* Ergo gratia habitualis sufficit , cum concursu Dei generali , ad vitanda omnia peccata .

Respond. nego consequ. Equidem gratia , qua justificamur , valet in adjutorium , ne peccata committantur , ubi graves non urgent tentationes & occasiones peccati ; ubi vero urgent tales ad peccandum illecebrae , praeter gratiam habitua-

bitualem, necessaria sunt auxilia specialia, quibus anima in aversione mali & boni prosecutione roboretur, ac immobiliter ad finem usque perseveret.

Inst. 4. Ex Conc. Trid. Sess. 6. c. 11. Deus sua gratia semel justificatos non deserit, nisi ab eis prius deseratur. Atqui si perseverantia finalis specialis est gratia, quam Deus cui voluerit concedat, vel deneget, justificatos, quibus gratia illa denegaretur, Deus desereret priusquam ab eis desereretur; ergo perseverantia non est gratia specialis, sed communis est omnibus iustis.

Resp. nego min. Etsi enim perseverantia sit gratia specialis, non sequitur quod Deus iustum, cui non conceditur, primus deserat, cum omni iusto conferat auxilium vere ac relative sufficiens, ut perseverantiæ donum, (quod ex August. suppliciter omereri potest) impetrare possit; quod si non impetret necesse est præcesserit aliqua ex parte iusti culpa, siye sit negligentia & tepor in oratione, siye sit præsumptio quædam, ac occulta superbia, propter quam perseverantia a Deo denegatur; ex quo sequitur Deum prius a iusto deserere, quam iustus a Deo, iudicio occulto, sed iusto, deseratur, juxta illud D. August. lib. de corrept. & gratia, c. 13. *Gratiam Dei suscipiunt (qui non sunt perseveraturi) sed temporales sunt, nec perseverant, deserunt & deseruntur. Dimissi enim sunt libero arbitrio, non accepto perseverantia dono, iudicio Dei iusto & occulto.*

Obiicies 2. Ut quis in accepta iustitia usque in finem perseveret, sufficit ut ultimum impleat præceptum; atqui illud implere potest cum auxilio ordinario; ergo ad perseverantiam non requiritur donum speciale.

Resp. dist. min. Potest cum auxilio ordinario implere ultimum præceptum, quatenus præcise
Charmes, Theol. Schol. Tom. III. R præ-

præceptum est, *conc.* quatenus est ultimum, *nego min.* Ultimum siquidem non est, nisi quatenus mors contingit post ejus fidelem adimplerionem, quod singulari Dei beneficio tribui necesse est, cum in statu gratiæ justificantis ex hac vita eripi, speciale sit donum Dei.

Quæres 1. In quo præcise situm sit magnum perseverantiæ donum?

Respond. Situm est in duobus, 1. In interno gratiæ actualis auxilio, quo homo justus, vel a peccando retrahitur, vel a suis peccatis, propter quæ a Deo deferri merebatur, cito resipiscit, ac tandem in accepta justitia finaliter perseverat, ut docet D. August. *lib. de corrept. & gratia cap. 12.* Dicens justis, in præsentī statu naturæ lapsæ, dari tale auxilium. *Non solum ut sine isto dono perseverantes esse non possint, verum etiam ut per hoc donum nonnisi perseverantes sint* 2. Situm est in singulari Dei protectione externa, qua Deus ab homine justo, qui per preces & alia pietatis opera perseverantiā impetravit, graves tentationes, peccandi occasiones, & alia salutis obstacula, removet, ac tandem mortem ejus cum gratia sanctificante conjungit.

Quæres 2. An, & qualiter donum perseverantiæ finalis distinguatur a confirmatione in gratia?

Respond. Probabilius est utrumque illud donum non essentialiter differre, 1. Quia Scriptura sacra hoc utrumque donum pro uno eodemque dono indiscriminatim usurpat, *Pl. 36. Confirmat autem justos Dominus, 2. ad Thess. 3. fidelis autem Dominus est, qui confirmet & custodiat a malo.* Hoc autem Deus præstat iis quibus donum perseverantiæ concessit. 2. Quia D. August. *lib. de corrept. & gratia capit. 12.* Utrumque donum pro uno eodemque usurpat, dum

dum ait, Deum Apostolis dedisse non solum justiciam, verum etiam in illa perseverantiam, quos tamen certum est fuisse in gratia confirmatos.

Differunt tamen accidentaliter, 1. *Quia*, confirmatio in gratia datur paucis, iisque singulariter privilegiatis; donum vero perseverantiæ datur omnibus qui cum gratia habituali ex hac vita rapiuntur, ex quo privilegium dici non potest. 2. *Quia*, confirmatio in gratia supra perseverantiam addit majorem quamdam gratiæ habitualis intensiorem, majoremque copiam auxiliorum actualium, ex quo fit, ut, etsi graviores occurrant tentationes, facilius tamen ac suavior sit victoria in confirmatis, quam in perseverantibus.

Quæres 3. *Utrum homo in statu innocentia indigeret auxilio ad reipsa perseverandum usque in finem?*

Resp. Affirmativa est probabilior.

Probat. 1. Ex SS. PP. Div. August. l. de cor-
rept. & gratia cap. 11. de primo homine di-
cit: *Ut reciperet bonum, gratia non egebat, quia
nondum perdididerat, ut autem in eo permaneret,
egebat adjutorio gratia, sine quo id omnino non
posset: & acceperat posse si vellet, sed non ha-
buit velle quod posset, nam si habuisset, perse-
verasset.*

2. Divus Fulgentius, l. 2. ad Trasimundum
cap. 2. ait: *Profecto cognoscitur uniformi cunctos
(Angelos) opprimi potuisse ruinæ consortio, nisi
quos vellet a casu pravitatis virtus illa (gra-
tiæ) defenderet, quæ sola naturaliter mutari de-
pravarique non posset. Ubi pensanda sunt hæc
verba, nisi quos vellet, quæ peculiarem favo-
rem indicant.*

Div. Anselmus l. de casu diaboli cap. 2. ait:
Constat ergo, quod ille Angelus qui stetit in ve-

ritate, sicut ideo perseveravit, quia perseverantiam habuit, ita ideo perseverantiam habuit, quia accepit; & ideo accepit, quia Deus dedit.

Prob. 2. Ratione Divi Thomæ, qui *libr. 3. contra gentes*, necessitatem auxilii ad perseverandum repetit a mobilitate voluntatis; atqui in statu innocentiae voluntas fuisset mobilis ad bonum & malum; ergo licet homo in illo statu majorem ad perseverandum facilitatem habuerit, quam homo lapsus, tamen speciali divinæ Providentiæ cura indiguit, ut in bono immobiliter ad finem usque permaneret.

Dixi, *Probabilior*, quia negare non possumus oppositam sententiam probabilem esse, quæ si cui arrideat, illam amplecti poterit & tueri.

Q U Æ S T I O III.

Utrum gratia Christi interior sit necessaria ad boni moralis ordinis naturalis effectum.

Nota 1. **I**N omni opere morali bono, duo sunt distinguenda, nempe objectum seu officium, & finis, qui duplex est, *proximus*, nimirum, qui primo & per se ab agente intenditur, estque actionis motivum; & *ultimus*, ad quem actu, vel virtute, omnia referuntur, ipse vero ad nihil prorsus ordinari potest, v. gr. In eleemosyna; *objectum*, est ipsum opus eleemosynæ; *finis proximus*, est sublevatio pauperis; *finis ultimus*, est Deus, ad quem opus eleemosynæ refertur, *vel actualiter* & *formaliter*, cum quis expresse & reflexe statuit dare eleemosynam propter Deum; *vel virtualiter*, cum quis, licet actu de referenda sua actione ad Deum non cogitet, facit tamen actionem moralem rectam, tum ex obje-

objecto, tum ex fine proximo; illa enim actio, quando nullo alio particulari fine perverso ex parte operantis vitiatur, ex se, & innato quasi motu, ad finem ultimum, Deum scilicet, refertur, eamque agens, generali quadam ac implicita intentione, ad illum referre dicitur.

Nota 2. Hic controvertitur de opere morali bono, tum ex objecto, tum ex fine & aliis circumstantiis; nam ultro quilibet admiserit bonum opus ex objecto & officio, absque gratia elici posse.

Nota 3. Licet quæstio procedat, tum de infideli, tum de fidei peccatore, tamen satis erit de infideli agere; eo enim ipso quo probabitur infidelem posse absque gratia aliquod opus morale bonum agere, multo clarius fidelem peccatorem hoc posse demonstrabitur. Itaque sit:

CONCLUSIO.

Infidelis potest absque gratia aliquod bonum opus morale naturalis ordinis velle, ac facere. Est certissima contra Bajum & Jansenium.

Probat. 1. Ex Script. Rom. 2. dicitur: Gentēs, quæ legem non habent, naturaliter ea quæ legis sunt faciunt; ejusmodi legem non habentes, ipsi sibi sunt lex: qui ostendunt opus legis scriptum in cordibus suis. Ergo gentiles aliquod opus bonum naturalis ordinis possunt facere naturaliter; idest, sine gratia, sine fide, ut interpretantur Patres: Origenes in hunc locum, Gentilis, inquit, qui cum legem non habeat, ipse sibi est lex, ostendens opus legis in corde suo; & ratione naturali motus, vel justitiam teneat, vel castitatem, vel temperantiam, &c. custodiat: iste licet a vita alienus videatur

eterna, quia non credit in Christo videtur quod per ea qua dicuntur ab Apostolo, bonorum, operum gloriam, & honorem & pacem perdere penitus non posset. Et D. Hieron. in c. 29. Ezech. ait: Perspicuum est condemnari nos, comparatione gentilium, si illi lege faciant naturali, qua nos etiam scripta negligimus, de quo plenissime Paulus ad Romanos disputat.

Frustra reponunt adversarii 1. D. Augustinum, lib. de spiritu & littera, cap. 27. hunc Apostoli textum interpretari de gentibus ad fidem conversis; ergo male intelligitur de infidelibus.

Resp. enim nego consequ. Equidem D. August. ut refelleret hæreticam Pelagianorum interpretationem, qui Apostoli testimonio abutebantur, ut dicerent nonnullos gentiles, sine fide & gratia Christi, universam legem observasse, veramque justitiam adeptos esse, textum Apostoli interpretatus est de gentibus ad fidem conversis; sed nostram interpretationem non excludit, immo eam approbat ibidem, dicens. Si autem hi, qui naturaliter qua legis sunt faciunt, nondum sunt habendi in numero eorum quos Christi justificat gratia . . . quadam tamen facta vel legimus, vel novimus, vel audimus, qua secundum justitiæ regulam, non solum vituperare non possumus, verum etiam merito reeque laudamus. Et ne quis dicat D. Doctorem loqui de operibus bonis ex officio & objecto tantum, non autem ex fine, subdit: Quanquam si discutiatur quo fine sunt, vix inveniuntur, qua justitia debitum, laudem, defensionemque, mereantur. Quod autem, vix, invenitur, revera tamen invenitur. Postea rationem reddit, dicens: Quia non usque adeo in anima humana imago Dei terrenorum affectuum labe detrita est, ut nulla in ea velut lineamenta, extrema remanserint, unde merito dici pos-

cū possit, etiam in ipsa impietate vita sua, facere aliqua legis vel sapere. Et infra, post citatum textum Apostoli de infidelibus dicit: Illi potius, qui cum verum Deum vera pietate non colant, habent tamen quadam opera bona in vita impia. Hæc de mente D. Aug. nullum relinquunt dubium.

Frustra reponunt 2. D. Fulgentium, lib. de incarn. & gratia cap. 25. dicere, eos Dei gratiæ contradicere, qui præfatum Apostoli textum gentibus incredulis assignant; ergo Apostolus loquitur duntaxat de gentibus ad fidem conversis.

Resp. dist. ant. D. Fulgentius dicit, &c. juxta sensum Pelagianorum, hoc Apostoli textu abutentium, tum ut ostenderent gentes ex solis naturæ viribus posse totam legem implere, tum ut probarent gentes justificari posse sine Christi fide; conc. juxta sensum PP. eo loco utentium, ut probarent, posse in infidelibus aliqua opera moraliter bona absque gratia, nego ant. quod satis ostendit D. Doctor; cap. sequenti, dicens: Hominibus illis, quorum mentio facta est ab Apostolo, aliqua quidem bona opera, qua ad societatis humana pertinent acquiritur, inesse posse: sed quia non charitate Dei sunt, prodesse non posse, ad salutem videlicet æternam.

Hinc SS. Pontifices damnarunt hanc Baji prop. 22. Cum Pelagio sentiunt, qui textum Apostoli ad Roman. 2. gentes quæ legem non habent, &c. intelligunt de gentibus fidei gratiam non habentibus.

Probat. 2. ex SS. PP. Pio V. Greg. XIII. & Urbano VIII. qui hanc Baji prop. Omnia opera infidelium sunt peccata, & Philosophorum virtutes sunt vitia, damnarunt, immo & alias plures quæ istius sunt principia; talis est 37. Cum Pelagio sentit, qui homini aliquid naturalis,

ralis, hoc est, quod ex natura viribus ortum ducit, agnoscit.

Item ex Clem. XI. qui has Quesnelli propositiones similiter damnavit 39. *Voluntas, quam gratia non praevenit est capax cuiusvis mali, & incapax ad omne bonum.* 40. *Sine gratia nihil amare possumus, nisi ad nostram condemnationem.*

Prob. 3. ratione: Quia, ut docet Conc. Trid. sess. 6. cap. 1. per peccatum Adami, liberum arbitrium minime extinctum est: viribus licet attenuatum & inclinatum. Ergo potest homo, solis liberi arbitrii viribus, aliqua opera moraliter bona propter finem honestum elicere; v. g. potest gentilis naturali pietate honorare parentes, naturali commiseratione sublevare proximi miseriam, quia id honestum est, & rationi naturali conforme; tales autem actiones sunt bonae, tum ex objecto, tum ex fine & circumstantiis; ergo.

Confirmatur, quia sola actio bona & honesta laudari potest & remunerari a Deo; atqui misericordia obstetricum Aegyptiarum infidelium erga masculos Hebraeorum, quos contra edictum Pharaonis servaverunt, fuit a Deo laudata & remunerata. Exodi 1. *Benefecit Deus obstetricibus, & quia timuerunt Deum, adificavit eis domos*, id est, prolem copiosam eis concessit; ergo.

Solvantur Objectiones.

Obiectio 1. Rom. 14. dicitur: *Omne quod non est ex fide, peccatum est.* Atqui nulla opera infidelium sunt ex fide; ergo.

Respond. dist. antec. Juxta proprium Apostoli sensum, quod non est ex fide agendorum, id est, ex bona conscientia, peccatum est, *cenc.*

conc. quod non est ex fide credendorum, *nego ant.* Itaque Apostolus ibi de iis agit, qui cibos quosdam manducabant, quos tamen sibi illicitos existimabant, docetque eos peccare, quia agebant contra bonam fidem, seu, contra conscientiam, *quod autem non est ex fide*, id est, quod fit reclamante conscientia, *peccatum est.*

Inst. 1. D. August. lib. 4. contra Julian. capit. 3. præfatum Apostoli textum interpretatur de fide credendi in Christum; ergo quod non est ex fide Theologica peccatum est.

Respond. 1. Fateor Div. Augustinum intellexisse præfatum textum de fide credendi, sed sine exclusione nostræ interpretationis; nam Juliano objicienti hunc textum accipiendum de bona conscientia, respondet: *Sed ut hoc tibi de cibis tantum intelligendum esse concedam, quid de alio dicturus es testimonio, quod ad Hebræos scriptum est, sine fide impossibile est placere Deo?* sed posito quod hic textus intelligatur de fide credendi.

Resp. 2. *dist. conseq.* Quod non est ex fide contrarie, id est quod fit animo infidelitatis, ut eleemosyna data in honorem Jovis, est peccatum, *conc.* quod non est ex fide negative, id est, absente fide, peccatum est, *subdist.* si aliquo fine pravo vitietur, *conc.* per se & præcise quia fit a non habente fidem, *nego conseq.* sensum suum sic ibidem explicat D. Doctor: *Quod si & ipsa per seipsam naturalis compassio opus est bonum; etiam isto bono male utitur, qui infideliter utitur, & hoc bonum male facit, qui infideliter facit: qui autem male facit aliquid, profecto peccat.* Postea rationem reddens cur infideles bona opera male faciant, ait: *Quia ea non fideli, sed infideli, hoc est, stulta & noxia faciunt voluntate.*

Inst. 2. Atqui, ex Apostolo, quæ non sunt ex fide, nedum contrarie, sed etiam negative sunt peccata; ergo, &c.

Prob. ant. Hebr. 11. dicitur: *Sine fide impossibile est placere Deo.* Ergo.

Resp. dist. ant. Sine fide impossibile est placere Deo in ordine ad vitam æternam, *conc.* in ordine ad honestatem moralem ordinis naturalis, *subdist.* ratione operantis, *conced.* ratione operis, *neg. ant.* Fateor equidem infidelem, quandiu in infidelitate permanet, non posse Deo placere ratione sui, etsi placeat interdum ratione operis moralis ab illo bene exerciti, non quidem complacentia, quæ proveniat ex iustitia & sanctitate supernaturali, per quam Deo placuerunt in ordine ad vitam æternam sancti fide supernaturali imbuti, sed complacentia, quæ provenit ex virtute moraliter bona.

Instab. 3. Atqui etiam ratione operis omnia infidelium opera sunt peccata & Deo ingrata; ergo.

Probat. ant. Ex Apost. ad Tit. 1. *Omnia munda mundis, coinquinatis autem & infidelibus nihil est mundum;* ergo infideles nihil mundum & rectum operantur.

Resp. dist. ant. Coinquinatis & infidelibus, qui per immunditiam cordis, aut per infidelitatem abutuntur Dei creaturis, vel, quasi forent impuræ, eis non utuntur, nihil est mundum, *conc.* infidelibus, præcisè ratione eorum infidelitatis, *neg. ant.* alias pariter concludendum esset, omnia opera mundorum esse munda, quod tamen absolute falsum est; alioquin nusquam quis peccare posset post adeptam iustitiam: ita Div. August. lib. 6. contra *Manistum*, explicat hunc textum, dicens: *Omnia, quippe, quæ naturaliter sunt, in ordine suo*

suo bona sunt, & nemo in eis peccat, nisi qui ordinem suum in Dei obedientia non custodiens, eorum quoque ordinem male utendo perturbat.

Ist. 1. Matth. 7. dicitur: Non potest . . . arbor mala bonos fructus facere; atqui infidelis est arbor mala; ergo, &c.

Resp. dist. maj. Quando arbor agit ex sua malitia, non potest fructus bonos facere, *conc.* quando non agit ex sua malitia, *neg. maj.* Porro infidelis non semper ex sua malitia & infidelitate agit, sed quandoque ex dictamine rectæ rationis; unde D. Aug. lib. 4. contra Julian. cap. 3. ipsum arguens quod dixerit voluntatem infidelis infideliter agentem esse bonam, ait: *Non in quantum homo est, quod est opus Dei, sed in quantum mala voluntatis est, quisque arbor mala est, & bonos fructus facere non potest. Vide itaque utrum infidelem voluntatem, id est, ex infidelitate agentem, audeas bonam dicere voluntatem.*

Objicies 2. Ex Conc. Arausicano, can. 22. Nemo habet de suo, nisi mendacium & peccatum; ergo sine gratia nullum bonum opus morale fieri potest.

Respond. dist. ant. Nemo habet de suo, &c. hoc sensu quod quidquid habet homo, præter mendacium & peccatum, illud sit a Deo, vel ut auctore naturæ, vel ut auctore gratiæ, *conc.* ut auctore gratiæ semper, *neg. ant.* Sensus ergo Canonis est, hominem sibi soli sufficere ad peccandum, eum vero, ad bonum operandum, indigere auxilio Dei, naturali quidem ad bonum morale, & supernaturali ad bonum salutare, ut docet præfatus Canon, cum addit: *Si quid autem habet homo veritatis, atque justitiæ, ab illo fonte est, quem debemus sitire in hac eremo, &c.*

Ist. Idem Concilium, can. 9. ait: Quoties

bona agimus, Deus in nobis, atque nobiscum, ut operemur, operatur. Ergo sine gratia supernaturali homo opus bonum non potest facere.

Resp. dist. consequ. Non potest opus bonum salutare facere, *conced.* bonum opus morale, *neg.* *consequ.* Ita declarat, can. 7. *Si quis per naturæ vigorem bonum aliquod, quod ad salutem pertinet vitæ æternæ, cogitare aut eligere asserit absque illuminatione Spiritus sancti . . . hæretico fallitur spiritu.*

Obijcies 3. D. August. lib. de spiritu & littera, cap. 3. ait: Neque liberum arbitrium quidquam, nisi ad peccandum, valet, si latent veritatis viæ. Ergo.

Respond. *dist. ant.* Id dicit, eo sensu, quod parum valeat, eo modo quo dicimus ægum de se tantum labi posse, quod per se vix stare possit, *conced.* eo sensu quod nihil omnino valeat, *neg.* *ant.* Hanc D. Doctor interpretationem nobis exhibet, lib. de corrept. & gratia cap. 11. dicens: Arbitrium ad malum sufficit, ad bonum autem parum est, nisi adjuvetur ab omnipotenti bono.

Inst. D. Aug. l. 2. ad Bonifac. c. 5. ait: Liberum arbitrium ad peccandum valere in hominibus subditis diabolo; ad bene autem pieque vivendum non valere, nisi ipsa voluntas hominis Dei gratia fuerit liberata, & ad omne bonum actionis, sermonis, cogitationis adjuta. Ergo.

Resp. dist. consequ. Liberum arbitrium ad nullum opus bonum salutare valet, nisi gratia Dei fuerit liberatum & adjutum, *conced.* quod significat per ista verba: ad pie vivendum: ad nullum opus bonum morale, *neg.* *consequ.* Etsi enim, per peccatum, liberum arbitrium infirmatum fuerit ac vulneratum, non tamen est penitus extinctum, & ideo potest aliquod bonum morale sectari.

Obji-

Objicies 4. D. Aug. l. de spiritu & litt. c. 14. ait: *Non est fructus bonus, qui de charitatis radice non surgit*; atqui nullum opus hominis infidelis de charitatis radice surgit; ergo.

Resp. dist. major. Non est fructus bonus sine charitate, qui sufficiens sit ad salutem consequendam, *conc.* qui sit moraliter bonus, *nego maj.* Itaque quoties D. August. dicit charitatem desiderari ad actum bonum, toties loquitur de bono opere quod conducat ad vitam æternam, ut sese explicat lib. 4. contra Julian. cap. 9. *Scito, inquit, nos illud bonum hominum dicere, &c. per quod solum homo potest ad æternum Dei donum regnumque perduc.* Unde ejus testimonia nihil habent commune cum præsentis nostra questione.

Inst. 1. Ibi non potest esse ullum opus bonum, ubi vera virtus reperiri nequit; atqui ex S. August. in infidelibus nulla vera virtus reperitur, sic, lib. de nuptiis & concup. capit. 3. ait: *Vera pudicitia dicenda non est, nisi qua vera fidei mancipatur*; ergo.

Resp. dist. min. Ex S. August. in infidelibus nulla vera virtus reperitur conducens ad vitam æternam, *conc.* conducens ad honestatem moralem, *nego min.* Itaque D. Augustin. eam solam virtutem appellat veram, quæ hominem ordinat ad vitam æternam, ut constat ex eodem cap. 3. in quo ait: *Si ergo ad consequendam veram beatitudinem, quam nobis immortalis fides vena, qua in Christo est, promittit, nihil prosunt homini virtutes; nullo modo vera possunt esse virtutes.*

Inst. 2. Si in infidelibus inessent aliquæ virtutes, moraliter duntaxat bonæ, dici possent steriles in ordine ad beatitudinem; atqui Div. August. aperte negat aliquas virtutes esse steriles: *Nullo modo igitur, inquit libr. contra Jul.*

Jul. c. 3. homines sunt steriliter boni; sed qui boni non sunt, possunt esse alii minus, alii magis mali. Ergo.

Resp. dist. minor. Negat aliquas virtutes esse steriles, respectu boni naturalis aut supernaturalis consequendi, *conc.* semper respectu boni supernaturalis, *nego minor.* Itaque etiam si virtutes steriles sint respectu felicitatis æternæ, possunt tamen revera esse secundæ respectu boni temporalis; quod in mercedem Deus infidelibus retribuit, ut docet D. August. (c) de Romanis, quibus Deus terrenam excellentissimi Imperii gloriam concessit, ut redderetur merces bonis artibus eorum, id est, virtutibus.

Inst. 3. Eodem loco D. August. ait: *Voluntas sterilis, non est bona; ergo opus sterile, non est bonum.*

Respond. dist. ant. Non est bona, omnimode, *conc.* secundum quid, *nego ant.* Voluntas itaque sterilis non est bona in ordine ad salutem æternam consequendam, quæ est supremum hominis bonum; sed est bona in ordine ad honestatem moralem, & ad rectam hominis institutionem, quod est, esse bonum secundum quid.

Obicies 5. Nullum potest esse opus perfectum sine recta intentione; atqui in infidelibus nulla potest esse recta intentio, juxta illud Div. Augustin. super Psalmum 31. *Bonum opus intentio facit, intentionem fides dirigit.* Ergo, &c.

Respond. dist. min. In infidelibus non potest esse recta intentio, directiva operis in finem ultimum supernaturalem, *conc.* in finem honestum

(c) Lib. 5. de Civit. Dei cap. 15.

sum naturalem, *nego min.* Sicut enim fides hominis intentionem dirigit in ordine ad vitam æternam, sic rationis lumen dirigere potest intentionem in ordine ad honestatem homini connaturalem.

Instab. 1. Quidquid non refertur ad Deum tanquam ad finem, non est bonum, sed verum peccatum; atqui infideles, in quibus non est vera Dei fides, & cognitio, non possunt opera sua ad Deum, tanquam ad finem, referre; ergo.

Resp. dist. maj. Quod non refertur ad Deum, vel explicite, vel implicite, peccatum est, *conced.* explicite semper, *nego maj.* Itaque ad hoc, ut opus sit bonum, necesse non est ut referatur ad Deum explicite, sed sufficit quod ad eum referatur implicite, quomodo ad Deum, quasi nativo pondere, refertur omne opus quod sit propter finem etiam naturaliter honestum; hoc autem modo actiones infidelium moraliter bonæ ad Deum referuntur, etiamsi infideles illi, inter operandum, de Deo nihil cogitent.

Instab. 2. Ergo licet agere propter honestatem virtutis; atqui falsum consequ. ex D. Aug. lib. 19, de civit. Dei, dicente: *Licet enim a quibusdam tunc vera & honesta putentur virtutes, cum ad se ipsas referuntur, etiam tunc inflata, aut superba sunt: & ideo non virtutes, sed vitia judicanda sunt.* Ergo.

Respond. dist. min. Non licet agere propter honestatem virtutis, tanquam propter finem ultimum, *conc.* tanquam propter finem proximum ad finem ultimum ordinabilem, vel per se, vel per intentionem agentis, *nego minor.* Priori autem sensu D. Doctor dicit virtutes, cum ad se ipsas referuntur, esse inflatas & superbas, quales erant virtutes plurimum gentium.

lium, qui, propter vanam gloriam capeffendam, varios actus virtutum moralium eliciebant. Unde D. Aug. lib. 1. operis imperfecti contra Julian. ait: *Fortitudinem gentilium mandana cupiditas: fortitudinem autem Christianorum Dei charitas facit.*

Q U Æ S T I O IV.

Ad quodnam bonum morale naturale efficiendum gratia interior necessaria sit, vel non?

Nota: **P**elagiani, vires liberi arbitrii nimium extollentes, docuerunt hominem absque ullo gratiæ auxilio universam legem observare, Deum super omnia diligere, omnesque tentationes superare posse absque gratia; econtra *Bajus*, & omnes ejus discipuli, liberum arbitrium penitus jugulantes, docuerunt nullum legis naturalis præceptum observari, nullamque omnino tentationem vinci posse absque gratia. Videndum ergo est, utrum homo in præfenti statu possit absque gratia 1. Universam legem naturalem observare. 2. Deum super omnia diligere. 3. Omnes superare tentationes: tribus articulis.

A R T I C U L U S I.

Utrum homo, in præfenti statu, possit absque gratia universam legem naturalem observare?

Nota 1. **P**ræcepta legis naturalis dupliciter impleri possunt. 1. *Secundum substantiam*, si, nempe, actus præceptus suam habeat

beat bonitatem moralem. 2. *Quoad modum*, si nimirum, actus ex charitate fiat, & referatur ad finem supernaturalem: *Primo modo* lex non attenditur servari meritorie, sed præcise vitando peccatum quod est contra illam: *Secundo modo* attenditur servari meritorie, ita ut ad vitam perducatur æternam: hanc distinctionem redarguit Bajus propositione 61. *Celebris illa Doctorum distinctio divina legis mandata bifariam impleri*, altero modo quantum ad præceptorum operum substantiam tantum; altero quantum ad certum quemdam modum, videlicet secundum quem valeant operantem perducere ad regnum æternum (hoc est ad modum meritorum) commensurata est & explodenda.

Constat, ex supra dictis, aliqua legis naturalis præcepta posse observari absque gratia; probavimus enim sine ea bonum aliquod opus morale naturalis ordinis elici posse; illud autem bonum, quodcumque sit, est præceptum legis naturalis; ergo, &c. agitur itaque de observatione omnium: circa quod

Nota 2. Potentia duplex est, physica nempe & moralis.

Potentia *physica*, est vis activa, relative proportionata operi faciendo; hic qui habet omnia principia necessario ad agendum requisita, habet potentiam agendi physicam.

Potentia *moralis*, est vis activa, relative proportionata operi faciendo cum adjuncta facilitate. Hinc potentia, quæ nullo impedimento retardatur, non solum physica, sed moralis est potentia. His diligenter notatis

CONCLUSIO.

Homo lapsus, absque gratia divina auxilio, non potest potentia morali, omnia legis naturalis

lis præcepta, etiam quoad substantiam operis, servare, ita ut omnia vitet peccata, quæ contra legem naturalem committi possunt. Proposit. est certissima.

Prob. 1. Ex Scriptura, Roman. 7. vers. 23. Apostolus ait: *Video aliam legem in membris meis, repugnantem legi mentis meæ, (id est legi naturali) & captivantem me sub lege peccati, quæ est in membris meis.* Hinc exclamat: *Infelix homo, quis me liberabit de corpore mortis hujus?* respondet: *Gratia Dei per Jesum Christum;* ergo natura humanæ, ita per peccatum infirmata est, ut hoc præceptum, *Non concupisces*, non possit implere absque gratia Dei; unde Sapiens (d) dicit: *Sci vi quoniam aliter non possum esse continens, nisi Deus det.*

Prob. 2. Ex Conciliis, tum Carthaginensi II. in Epistola Synodica ad Innocentium I. ubi PP. testantur damnatos ideo fuisse Pelagianos, quod assererent, Deum, talem hominis instituisse atque creavisse naturam, quæ per propriam voluntatem, legem Dei possit implere *sive naturaliter in corde conscriptam, sive in litteris datam:* ubi per hæc verba: *Naturaliter in corde conscriptam:* significatur lex naturalis. Tum ex Concil. Carthaginensi III. can. 5. ubi definitur: *Placuit, ut quicumque dixerit ideo nobis gratiam justificationis dari, ut quod facere per liberum jubemur arbitrium, facilius possimus implere per gratiam, tanquam, etsi gratia non daretur, non quidem facile, sed tamen possemus, etiam sine illa divina implere mandata, anathema sit.* Ergo.

Prob. 3. Ex PP. D. Augustin. lib. de spiritu & lit.

(d) Sap. 8. vers. 21.

Et littera, qui totus scriptus est ad ostendendum quod lex absque gratia servari non possit, cap. 10. aperte profitetur, quod justus credat nullo modo posse sua infirmitati, ad implenda ea qua lex jubet, nisi divina gratia, subveniri.

D. Prosper lib. contra collatorem cap. 7. ait : *Potest (lex) ne quid mali fiat jubere : a malo autem non potest liberare . Notum facit mandatum , sed obediendi non præstat affectum , nisi quod est occidens per imperium littera , fiat vivificans per spiritum gratia .* Ex quo concludit D. Thom. 1. 2. quæst. 109. art. 4. *In statu natura corrupta , non potest homo implere mandata divina , sine gratia sanante .*

Ratio conclusionis est, quia natura per peccatum ita vulnerata fuit ac infirmata, ut vehementissime feratur in delectabilia legi divinæ repugnantia, & aversetur bona per legem præcepta ; ergo non potest, potentia morali, omnia legis naturalis mandata observare nisi per gratiam, qua vulnus inflicturn sanetur.

Dixi : *Potentia morali* : quia homo lapsus non habet impotentiam physicam, sed tantum moralem, ad observanda omnia legis naturalis præcepta ; *Ratio est*, quia præcepta legis naturalis, etiam collective sumpta, secundum substantiam considerata, non superant vim humanæ voluntatis in præsentis statu, cum illa vis per peccatum non fuerit sublata, sed duntaxat labefactata ; ergo ejus impotentia est tantum moralis, fundata 1. in rebellionem appetitus ; 2. in gravitate collectionis omnium præceptorum supposita mobilitate & inconstantia voluntatis ; ratione cujus totas vires ad agendum adhibitura non sit.

Solvantur Objectiones.

Obijcies 1. Rom. 2. dicitur : *Gentes qua legem non habent, naturaliter, id est, naturæ viribus, ea quæ legis sunt, faciunt*. Ergo homo lapsus, absque gratia potest observare omnia legis naturæ præcepta.

Resp. nego consequ. Textus enim non de omnibus præceptis est intelligendus, sed tantum de aliquibus, iisque facilioribus, quæ quandoque & aliquandiu a gentibus naturaliter possunt observari, quando nimirum graves non adsunt occasiones ab illa observatione remotæ.

Inst. 1. Deuter. 30. dicitur : *Mandatum, quod ego precipio tibi hodie, non est supra te*. Atqui hic locus intelligitur de præceptis collectivè; ergo omnium præceptorum observantia vires naturales non excedit.

Respond. dist. minor. Intelligitur de omnibus collectivè præceptis, cum gratia implendis, conc. sine gratia implendis, *nego minor.* citato enim capite dicitur : *Circumcider Dominus Deus tuus cor tuum, & cor seminis tui, ut diligas Dominum Deum tuum ex toto corde tuo*. Porro cordis circumcisio gratiæ collationem importat.

Inst. 2. Eccl. 15. dicitur : *Si volueris mandata servare, conservabunt te*. Ergo si volumus, possumus omnia mandata servare absque gratia.

Resp. nego consequ. Illo equidem textu demonstratur liberum arbitrium, per quod præcepta impleri possunt; at non excluditur gratia, sine qua impleri non possunt; ut docet D. August. lib. de gratia & lib. arb. cap. 16. dicens; *Corum est nos mandata servare, si volumus, sed quia preparatur voluntas a Domino, ab illo pe-*
ten-

rendum est, ut tantum velimus, quantum sufficit ut volendo faciamus.

Objicies 2. D. Chrysost. homil. 5. in Epistola ad Roman. de gentibus ait : *Admiratione digni sunt, quod nec lege illis opus fuit, & omnia qua legis erant præstiterunt.* Ergo, &c.

Resp. dist. ant. Gentes collective sumptæ omnia quæ legis erant præstiterunt, *transcat*, gentes distributive sumptæ, *nego ant.* sensus ergo D. Chrysostomi est, varia præcepta legis naturalis a tota gentilium collectione observata fuisse, non quidem omnia a singulis, sed a singulis aliqua, cum nempe nulla, vel levis, erat difficultas, vel ex parte operis, vel ex parte tentationis, quare dixi, *transcat antec.*

Inst. Cyrus, a gratia fidei alienus, totam legem naturalem implevit : ei siquidem dixit Deus, Isaïæ 44. *Pastor meus es, & omnem voluntatem meam implebis.* Ergo universa lex potest impleri absque gratia.

Resp. nego antec. Neque enim Cyrus dicitur omnem voluntatem Dei implevisse, quod omnia legis naturæ præcepta impleverit, erat enim idololatra, & aliorum regnorum invasor ; sed quod, populum Israeliticum a captivitate solvendo, templumque ac civitatem Jerusalem ex integro restaurari curando, fecerit quidquid Deus per ipsum fieri erga populum suum, ab æterno decreverat ; quo sensu dæmones, damnatorum hominum tortores, dici possunt voluntatem Dei implere.

Objicies 3. Nemo tenetur ad impossibile, nam, ut ait D. August. *Deus impossibilia non jubet.* Atqui homo quilibet, etiam gentilis obligatur ad universam legem implendam ; ergo eam servare potest.

Resp. dist. maj. Nemo tenetur ad impossibile, simpliciter & absolute, *conc.* ad impossibile secundum

secundum quid, *nego maj.* Itaque universa lex, spectatis solis naturæ viribus, est observatu impossibile, sed fit possibilis per gratiam; sic D. August. *lib. de perfectione justitia c. 2.* Cælestio respondet: Respondemus, inquit, vitari posse peccatum, si natura vitata sanetur gratia Dei per Jesum Christum D. N. in tantum enim sana non est, in quantum, id quod faciendum est, aut cecitate non videt, aut infirmitate non implet. Ex quo, *lib. de nat. & grat. cap. 43.* ait: Deus impossibilia non jubet, sed jubendo monet & facere quod possis, & petere quod non possis, & adjuvat ut possis.

Objicies 4. Homo lapsus habet potentiam moralem ad omnia præcepta legis naturalis distributive; ergo ad omnia collective.

Resp. 1. dist. maj. Habet potentiam moralem ad omnia distributive præcepta, quæ sunt facilia, qualia sunt cultum parentibus exhibere, depositum reddere, jus litigantibus dicere, &c. *conc.* quæ sunt ardua, sive ex objecto, sive ex tentatione, & aliis circumstantiis, *nego major.* Dicit enim D. Jacobus *c. 3. de præcepto cohibendæ linguæ, Linguam nullus hominum domare potest.* Et Sapiens de præcepto continentiz: *Scrivi quoniam aliter non possem esse continens, nisi Deus det.*

Resp. 2. nego conseq. Collectio enim difficultatem habet, quam non habent singula; cum enim dicitur; quod singula præcepta possunt servari distributive, non est sensus quod hæc & illa, & sic deinceps, possint impleri, sed sensus est tantum, quod hoc seorsim, & illud seorsim possit impleri, ex quo non sequitur impleri posse collectionem, ut patet de eo qui movet lapides, potest nempe hunc seorsim lapidem, & illum etiam seorsim movere, non tamen omnes collective lapides potest movere.

ARTI-

ARTICULUS II.

Utrum homo, in presenti statu absque gratia possit Deum, ut auctorem naturæ, diligere.

Nota. **A**mor Dei duplex est, *Benevolentia*, nimirum, quo Deus diligitur, quia in se bonus est, & *amor concupiscentiæ*, quo Deus diligitur quia nobis bonus est, hoc est, quia est finis noster ultimus. Uterque ille amor, vel est perfectus, vel imperfectus.

Amor Dei perfectus, est ille, quo Deus sic diligitur, ut omnibus omnino rebus anteponatur, cum proposito placendi ei in omnibus, etiam cum omnium aliorum bonorum jactura, & dicitur, *Amor Dei super omnia*.

Amor Dei imperfectus, est ille, quo Deus sic diligitur, ut nondum rebus creatis anteponatur: vocatur, *Amor Dei cum omnibus*. His notatis.

CONCLUSIO I.

Homo in statu naturæ lapsæ, absque gratia, Deum ut auctorem naturæ potest amare, amore, tum benevolentia, tum laudabilis concupiscentiæ imperfectæ. Est communis contra Bajum & Jansenium.

Prob. 1. Ex Apostol. Rom. 1. asserente quod gentes sint inexcusabiles, quia cum cognovissent Deum, non sicut Deum glorificaverunt, aut gratias egerunt, &c. Ergo Deum, qui ex Augustino Epistola 120. Non colitur, nisi amando, amare potuerunt; alias gentiles immerito inexcusabiles dicerentur, quod veri Dei cultum deseruerint; atqui amor ille fuisset naturalis, utpo-

utpote ex notione Dei naturali ortum habens ; ergo , &c.

Probat. 2. Ex definitione Sanctorum Patrum , qui has Baji propositiones damnarunt : 34. *Distinctio illa duplicis amoris , naturalis videlicet , quo Deus diligitur ut auctor natura ; & gratuiti , quo Deus amatur ut beatificator , vana est & commentitia .* Et 37. *amor naturalis , qui ex viribus nature exoritur , ex sola Philosophia per elationem presumptionis humana cum injuria Crucis Christi defenditur a nonnullis auctoribus .* Ergo constat admittendum esse amorem Dei naturalem & solis liberi arbitrii viribus conceptum .

Prob. 3. Auctoritate Conciliorum , quæ dum definiunt gratiam necessariam esse ad diligendum Deum , semper adjungunt has particulas , *Sicut oportet ad salutem , aut , ut justificationis gratia conferatur ;* ergo supponunt possibilem esse Dei dilectionem , quæ non conferat ad salutem , quæque pure sit naturalis , & fiat absque ullo gratiæ auxilio .

Probat. 4. Ratione Theologica : illud voluntas amare potest naturaliter , quod intellectus naturaliter potest cognoscere , juxta illud D. Damasceni (e) *homo , qua rationis particeps est , rationem ducem in appetendo sequitur .* Atqui intellectus potest naturaliter cognoscere Deum esse , tum summum bonum propter se amabile , tum summum nostrum bonum ; ergo voluntas potest solis nature viribus illum amare , tum amore benevolentiae , tum amore castæ & laudabilis concupiscentiæ .

Sol-

(e) Lib. de duabus voluntatibus Christi.

Solvuntur Objectiones.

Objicies 1. Concil. Arausicanum II. Can. 25. ait: Prorsus donum Dei est diligere Deum, ipse ut diligeretur dedit qui non dilectus diligit. Ergo Deus solis naturæ viribus diligi non potest.

Respond. dist. conseq. Amore supernaturali & ad salutem æternam conducente, conc. amore naturali & ad solam honestatem moralem conducente, nego conseq. Concilium autem loquitur de amore supernaturali & conducente ad salutem, quo Deus, ut auctor gratiæ & gloriæ, diligitur, ut constat ex his ejusdem Canonis verbis: Prædicare debemus & credere, quod per peccatum primi hominis ita attenuatum fuerit liberum arbitrium, ut nullus postea potuerit diligere Deum, sicut oportuit. . . nisi gratia eum præveniret. Et Can. 7. loco harum particularum, Sicut oportuit, posuit: Bonum quod ad salutem pertinet vita æterna.

Objicies 2. D. August. lib. de grat. & lib. arb. cap. 18. dicit: Unde est in hominibus charitas Dei & proximi, nisi ex ipso Deo? nam si non est ex Deo, sed ex hominibus, vicerunt Pelagiani; si autem ex Deo, vicimus Pelagianos, ergo sine gratia Deus diligi non potest.

Resp. dist. conseq. Diligi non potest, amore quo tenditur aut pervenitur ad Deum, conc. amore naturali, nego conseq. De priore solum amore loquitur D. Doctor arguens Pelagianos, qui actus virtutum salutes & meritorios viæ æternæ solis naturæ viribus tribuebant; ita enim se explicat, lib. 4. contra Julianum c. 3. dicens: Amor, quo pervenitur ad Deum, non est nisi a Deo Patre per Jesum Christum cum Spiritu sancto.

Inst. D. Augustinus, lib. de natura & gratia Charmes, Theol. Schol. Tom. III. S cap. 2.

cap. 2. De gentibus, quibus nondum annuntiatum est Evangelium, dicit, quod non possint, recte vivendo, Dei implere voluntatem; additque. *Quod si fieri potuit, aut potest, hoc & ego dico quod de lege dixit Apostolus: ergo Christus gratis mortuus est.* Atqui qui amat Deum, recte vivendo, adimplet ejus voluntatem; ergo, &c.

Respond. dist. min. Qui amat Deum perfecto amore, recte vivendo adimplet ejus voluntatem, *conc.* amore imperfecto, *nego min.* Divus enim Augustinus per eum qui, bene vivendo, Dei implet voluntatem, intelligit eum qui totam legem implet, quod fieri non posse sine gratia docet contra Pelagianum errorem; sed qui unum aut alterum amoris actum elicit, non continuo legem implet, aut justitiam perficit; ergo.

Objicies 3. Non datur duplex fides divina, naturalis una, altera supernaturalis; ergo nec duplex amor Dei.

Resp. nego consequ. Disparitas est, quod divina veracitas, quæ est motivum fidei, non potest per effectum naturalem conjungi cum intellectu creato; at per effectus naturales ascendimus ad cognoscendam Dei bonitatem, ex cujus cognitione voluntas naturaliter excitatur ad illius amorem.

Instab. Si daretur amor naturalis, posset reperiri in infideli & peccatore; atqui falsum consequ. Ergo.

Prob. min. Si in infideli & peccatore esset amor Dei benevolentiae, etiam naturalis, hi essent amici Dei: nam amor benevolentiae hominem reddit Deo amicum; atqui infidelis & peccator non possunt esse amici Dei, alias essent justi absque gratia; ergo, &c.

Resp. dist. maj. Essent amici Dei imperfecte, & ra-

& ratione operis, *conc.* perfecte, & ratione sui, *nego major.* Equidem Deus amat bonum opus naturale ab infideli, vel peccatore elicatum, sed non amat ipsum infidelem, aut peccatorem, proindeque amor non est reciprocus, nec per hunc amorem justificatur homo, quia non quivis amor, sed amor supernaturalis benevolentiae justificat hominem.

CONCLUSIO II.

Homo lapsus non potest absque gratia Deum, ut auctorem naturae, amare amore perfecto & super omnia.

Prob. 1. Ex D. Thom. (f) dicente: Homo in statu naturae integræ non indigebat dono gratiæ superadditæ naturalibus bonis ad diligendum Deum naturaliter super omnia, licet indigeret auxilio Dei ad hoc eum moventis; sed in statu naturæ corruptæ indiget homo, etiam ad hoc, auxilio gratiæ naturam sanantis. Ergo.

Prob. 2. Quia amor Dei super omnia perfectus & efficax, omnium Dei præceptorum executionem importat, ita ut voluntas parata sit absolute & efficaciter, Deo in omnibus placere, omniaque ei displicentia vitare; atqui homo lapsus, ut supra probatum est, non potest sine gratia omnia Dei præcepta, etiam naturalia, exequi: tanta enim perfectio superat naturæ corruptæ fragilitatem & propensionem ad bona sensibilia, a quibus non potest, sine auxilio gratiæ, suum affectum remove; ergo.

Obijcies 1. D. Thom. cit. ad 1, ait: natura dili-

(f) 1. 2. quæst. 109. art. 3.

diligit Deum super omnia, prout est principium & finis naturalis boni; charitas autem secundum quod est objectum beatitudinis. Ergo.

Resp. dist. antec. Natura sana diligit Deum super omnia, &c. *conc.* natura corrupta, *nego antec.* Hanc esse D. Thomæ mentem patet ex textu supra allato.

Objicies 2. Amor Dei super omnia perfectus, lege naturali præcipitur; ergo solis naturæ viribus potest elici.

Resp. dist. conseq. Naturæ viribus potest elici a natura sana, *conced.* a natura per peccatum vitata, *nego conseq.* Licet enim præceptum naturale amoris Dei super omnia non superet vires naturæ integræ, superat tamen vires naturæ vitatæ; ergo non potest impleri absque auxilio gratia naturam sanantis, ut ait D. Thom.

Inst. 1. Homo lapsus potest naturaliter cognoscere Deum, etiam ut auctorem naturæ, esse super omnia amabilem; ergo potest etiam naturaliter eum amare super omnia.

Respond. nego conseq. Disparitas est, quod, ut ait Divus Thomas 3. *Natura humana magis est corrupta per peccatum quantum ad appetitum boni, quam quantum ad cognitionem veri,* eo quod peccatum voluntate commissum est, & ideo amoris Dei perfectio, non cognitioni Dei super omnia amabilis, obstant infirmitas & corruptio naturæ.

Inst. 2. Homo lapsus habet naturalem inclinationem ad diligendum Deum summe bonum amore super omnia & perfectio; ergo potest illam naturaliter explere.

Respond. dist. ant. Habet naturalem inclinationem, &c. impeditam per naturæ corruptionem & infirmitatem, *conced.* expeditam, *nego ant.* Naturæ ergo infirmitas impedit, quominus
nus

nus natura sic vitiata possit innatam suam inclinationem perfecte explere.

Inst. 3. Deus, ut auctor naturæ, super omnia diligendus, non est objectum supernaturale; ergo potest sic naturaliter diligi.

Resp. dist. ant. Non est objectum supernaturale, hoc sensu, quod sic non sit objectum hominis beatificativum per intuitivam ejus visionem, *conc.* hoc sensu, quod non superet vires naturæ per peccatum corruptæ, *nego ant.* Est ergo æquivocatio, in hac voce, *supernaturale*, si tollatur æquivocatio, evanescit objectio.

Objicies 2. Homo lapsus propriis naturæ viribus ita potest patriam, aut creaturam aliquam super omnia diligere, ut pro ipsis mortem subiret; ergo similiter potest Deum super omnia diligere sine auxilio gratiæ.

Resp. nego consequ. Disparitas est 1. Quod homo lapsus facilius ac vehementius, ob corruptionem naturæ, ad sensibilia cupiditatum objecta, quam ad bona honesta & ad ipsum Deum afficiatur, quo sensu D. Joann. *Epist.* 1. cap. 4. dicit: *Qui non diligit fratrem suum, quem videt, Deum, quem non videt, quomodo potest diligere?* 2. Quod amor Dei, super omne perfectus; debet includere fugam omnium peccatorum, & omnium virtutum prosecutionem; econtra amor patriæ & creaturarum super omnia, vel ex vana gloria, vel ex affectu sensibili inordinato, qui modum nescit, procedit, unde amor ille vitium est, in quod natura corruptione sua provehitur.

ARTICULUS III.

*Utrum homo lapsus possit absque gratia
omnes vincere tentationes?*

Nota 1. **N**omine *tentationis*, intelligitur provocatio ad peccatum, facta a carne, mundo, & dæmone, & duplex est, gravis, nimirum, & levis.

Tentatio gravis, ea est, quæ vehementer ad peccatum impellit, sive ratione sui, sive ratione durationis per comparisonem ad eum qui tentatur.

Tentatio levis, ea est, quæ leviter hominem ad peccatum allicit, spectata ratione illius qui tentatur, nam eadem res, quæ leviter allicit hominem avaritiæ minime deditum, ea graviter avarum provocat.

Nota 2. Tripliciter potest vinci tentatio.
1. *Peccaminose*, ex motivo malo, alteri nimirum succumbendo tentationi, ut si quis luxuriam vincat ex motivo avaritiæ. 2. *Meritorie ad salutem*, ut si vincat ex motivo charitatis. 3. *Steriliter ad salutem*, ut si tentationem vincat ex solo motivo naturalis honestatis.

Certum est, 1. Gratiam non requiri ad vincendam tentationem *peccaminose*; Deus enim gratiam non dat ad peccandum.

Certum est, 2. Gratiam necessario requiri ad vincendam vel levissimam tentationem *meritorie & utiliter ad salutem*; nullus enim actus salutaris potest fieri absque gratia.

Tota ergo difficultas est de victoria tentationum sterili ad salutem, quæ ut diluatur:

CON-

CONCLUSIO I.

Homo lapsus potest aliquando levis aliquas vincere tentationes absque gratia supernaturalis auxilio. Est communis contra Bajum.

Prob. 1. Ex SS. PP. Pio V. & Greg. XIII. qui hanc 30. Baji propos. damnarunt: Si fures sunt & latrones, qui dicunt . . . nulli tentationi, sine gratia illius adiutorio, resistere hominem posse, sic ut in eam non incidat, aut ab ea non superetur. Quæ propositio damnata est propter suam generalitatem, quatenus nimirum tam levis, quam graves complectitur tentationes.

Prob. 2. Ex D. August. cujus patrocinio gloriantur adversarii, lib. de perfectione justitia, ait: In natura vitiata parum est ad non peccandum voluntatis arbitrium, ubi particula, parum, indicat aliquid valere ad non peccandum; ergo & ad vincendam levem tentationem: Divo Augustino concinit Doctor Seraphicus, in 2. dist. 28. quæst. 2. ad 3. dicens: Quod liberum arbitrium omni gratia destitutum, nec omni possit tentationi resistere, nec necesse habeat omni tentationi succumbere.

Prob. 3. ratione: Quia quando facultas aliquid potest naturaliter, id etiam potest cum levibus impedimentis, alioqui illud impedimentum, quod supponitur leve, æstimandum esset grave; atqui, (ut supra probavimus) homo lapsus aliquod bonum ordinis naturalis potest peragere absque gratia; ergo tentatio levis obstare non potest, quin illud naturaliter faciat, ergo potest naturaliter vinci levis tentatio.

Objicies: Scriptura, Concilia, & Patres, indefinite docent victoriam tentationum esse a

Deo; ergo leves tentationes non possunt vinci, nisi per gratiam Dei.

Resp. nego conseq. Non enim ideo Scriptura & Patres soli Deo adscribunt victoriam tentationum indefinite, quod nulla levis tentatio possit vinci absque gratia: sed. 1. *Quia* Scriptura semper, & SS. Patres plurimum, loquuntur de victoria meritoria, quæ absque gratiæ auxilio haberi non potest. 2. *Quia* SS. PP. loquuntur de universo tentationum agmine, quod non potest vinci absque speciali Dei auxilio, sicut neque ullæ graves. 3. *Quia* PP. Pelagianos impugnabant, qui, cum indistincte victoriam tentationum naturæ viribus tribuerent, efficacius refelli non potuerunt, quam si illarum indistincte victoriam ad gratiam Dei referrent.

Inst. Ex D. Augustino Epistola 95. *Oratio clarissima est gratia testificatio.* Atqui victoriam omnium, etiam levium tentationum, a Deo petimus, *ne nos inducas in tentationem*, ergo, &c.

Resp. dist. maj. Oratio est gratiæ testificatio, non semper necessariæ, *conc.* semper necessariæ, *nego maj.* Petimus enim a Deo ea etiam quæ naturaliter evenire possunt, v. g. pacem, pluviam, serenitatem temporis, &c. Ut ergo postulemus a Deo tentationum, etiam levium, victoriam, fatis est. 1. *Quod* levioribus etiam tentationibus non possimus diu, absque ejus auxilio, resistere. 2. *Quod* possint incurrere graviores, ubi leves accidunt, nec sciamus utrum leves sint futuræ. 3. *Quod* victoria tentationum, absque gratia, nihil quidquam ad salutem valeat, hæcque sola meritoria victoria postulatur a Deo.

CONCLUSIO II.

Homo lapsus nullam gravem tentationem potest, absque gratia auxilio, vincere, etiam victoria sterili. Est contra Pelagianos.

Probat. 1. Ex Scriptura aperte significante, opus esse gratiæ divinæ auxilio ad superandas tentationes. Psalm. 17. *In te eripiar a tentatione.* Psalm. 117. *Impulsus, eversus sum ut caderem, & Dominus suscepit me.* Matth. 26. *Vigilate & orate, ut non intretis in tentationem.* Quæ loca SS. Patres interpretantur generatim de tentationibus, & saltem de gravibus quibuslibet intelligenda innuunt.

Prob. 2. ex trad. PP. D. Hieron. lib. 2. contra Pelagianos, quibus cum opposuisset ista Christi verba: *Vigilate & orate, ne intretis in tentationem*, subjungit: *Debuisse dicere juxta vos, surgite, resistite, liberum enim habetis arbitrium, & semel vobis concessa a Domino potestate, nullius alterius indigetis auxilio.*

D. August. lib. de perfectione justitiæ, c. ult. ut necessitatem gratiæ contra Pelagianos evincat, ait: *Quisquis negat nos orare debere, ne intremus in tentationem (negat autem hoc, qui contendit ad non peccandum gratia Dei adjutorium non esse homini necessarium: sed sola lege accepta humanam sufficere voluntatem) ab auribus omnium removendum, & ore omnium anathematizandum esse non dubito.*

Prob. 3. ex Conciliis: Diospolitano, cap. 11. ubi damnatur hic Pelagii articulus: *Victoria nostra, non est ex Dei adjutorio, sed ex libero arbitrio.* Et Arausicano II. can. 9. *Divini muneris est cum recte cogitamus, & pedes nostros a falsitate & injustitia tenemus.*

Prob. 4. Ex definitione SS. Pontificum: pro

omnibus sit Innocent. I. qui, *Epist. ad Concilium Carthaginense*, ait: *Nisi magnis precibus gratia in nos implorata descendat, nequaquam terrena labis, & mundani corporis vincere conamur errores, cum pares nos ad resistendum non liberum arbitrium, sed Dei solum facere possit auxilium.* necesse est enim, ut quo auxiliante vincimus, eo iterum non adjuvante vincamur.

Prob. 5. ratione: Quia gravibus in tentationibus occurrunt impedimenta, quibus positis, voluntas nequit, saltem secundum moralem potentiam, illis resistere, nisi gratia Dei adjuvetur; ergo.

Solvuntur Objectiones.

Obijcies 1. Genes. 4. dicitur: Sub te erit appetitus ejus (peccati) & tu dominaberis illius. Ergo homo potest solis naturæ viribus vincere graves tentationes.

Resp. nego consequ. Quia appetitus peccati sub nobis non est, nisi supposita gratia, quæ si non supponitur, non est sub nobis secundum moralem potentiam, si gravis sit tentatio, licet sit sub nobis secundum potentiam physicam.

Inst. 1. D. Thomas, in 2. dist. 28. quest. 1. art. 2. docet hominem sine gratia vitare posse omnia peccata mortalia, licet difficile; ergo non habet moralem impotentiam ad omnes vincendas tentationes.

Resp. nego consequ. D. enim Thomas hanc, quam Junior tenuerat, sententiam, tacite retractavit in sua Summa, nempe, *prima secunda*, tum *quest. 63. art. 2. ad 2. ubi dicit: Sunt quædam peccata mortalia, quæ homo sine gratia nullo modo potest vitare.* Tum *quest. 109. art. 2.*

in

in conclus. in statu natura corrupta, mortalia & singula & omnia, venialia autem singula, sed non omnia (homo) vitare potest, si est natura per gratiam infusam reparata; alias enim ne mortalia quidem omnia, (praesertim tempore longo) vitare potest.

Inst. 2. Si homo, ex propriis suis viribus, non posset graves tentationes vincere, non peccaret eis succumbendo; falsum conseq. Ergo.

Prob. major. Non peccatur per hoc, quod non est in potestate agentis; atqui si homo, ex propriis viribus, non posset vincere graves tentationes, non esset in ejus potestate non succumbere; ergo succumbendo non peccaret.

Resp. dist. min. Non succumbere, non esset in potestate hominis, sine gratia, conc. cum gratia, nego minor. & conseq. Porro nunquam deest divinae gratiae auxilium ad tentationes superandas, vel proxime, vel remote sufficiens; gratia nimirum orationis, qua homo proxime sufficientem potest petere & obtinere; unde concludit D. Thom. (g) *Quia ejus defectu est, quod homo se ad gratiam habendam non praeparat, propter hoc a peccato non excusatur, quod sine gratia peccatum vitare non potest.*

Obicies 2. Nulla est gravior tentatio, quam metus mortis; atqui potest homo lapsus, naturae viribus, vincere tentationem mortis ex motivo pravo, verb. gr. ex vana gloria, ex pertinacia, &c. ergo & ex motivo naturali honesto.

Resp. nego conseq. Disparitas est, quod homo lapsus ab objectis delectabilibus & pravis multum afficiatur, & ideo vincit unam tentationem per aliam fortiolem, qualis est pertinacia,

(g) Quæst. 109. art. 8. ad 1.

cia, & inanis gloriæ cupiditas; e contra motivo virtutis & honestatis parum admodum afficitur, & sic illud motivum totam relinquit difficultatem, non tollit, neque minuit.

Quæres 1. *Utrum, ad observanda omnia legis naturalis præcepta, & vincendas graves tentationes, sufficiat exterior Dei protectio?*

Resp. *negative*: Nam requiritur ex parte intellectus illuminatio, quæ objectum amplectendum aut fugiendum repræsentet; ex parte autem voluntatis pia quædam motio, qua fiat suave quod est amplectendum, & fiat suavis resistentia, sicque voluntas a malo deterreatur; ergo requiritur gratia interior. Unde August. Epistola 95. dicit illud auxilium conferri, *subministratione spiritus, & occulta misericordia*.

Quæres 2. *Quanam gratia interior requiratur ad observanda omnia legis naturalis præcepta, & graves tentationes superandas?*

Resp. 1. *Requiritur gratia habitualis, non quidem absolute & ex rei natura, sed ex ordinatione Dei, & de lege communi?*

Probat. prima pars: Quia sola ignorantia in intellectu, & difficultas in voluntate, sunt impedimenta ex parte hominis ad observantiam mandatorum, & victoriam tentationum; atqui illa duo impedimenta removeri possunt per gratiam actualem, qua illustratur intellectus, & pie movetur voluntas; ergo ex natura rei non requiritur gratia habitualis.

Prob. secunda pars: Quia natura humana, nondum per gratiam habitualemente sanata, est in bono inconstans & ad malum proclivis, juxta illud Thren. 1. *Peccatum peccavit Jerusalem, propterea instabilis facta est*. Ergo, ex ordinatione Dei, ac de lege communi, *in statu nature corruptæ indiget homo gratia habituali sanare naturam, ad hæc, quod omnino a peccato abstin-*

abstineat, ait Divus Thomas 1. 2. *quest.* 109. *artic.* 8.

Resp. 2. *Ad observanda omnia legis naturalis præcepta, gravesque tentationes superandas, præter gratiam habitualement, requiritur gratia actualis interior.*

Prob. Ex Cælestino S. Pontif. in *Epistola* ad Episcopos Galliarum *cap.* 3. dicente: *Nemo, etiam per baptismatis gratiam renovatus, idoneus est ad superandas diaboli insidias, & ad vincendas carnis concupiscentias, nisi per quotidianum adiutorium Dei perseverantiam bonæ conversationis accipiat.*

Ratio est. Quia licet gratia habitualis interior sanet animam, tamen nec intellectus ignorantiam, nec voluntatis malitiam, nec appetitus sensitivi rebellionem tollit: ergo ne, inter tot, tantasque peccandi occasiones, labatur humana fragilitas, necesse est, ut gratia actuali, quæ teporem ejus excitet, & ad bonum alliciat, roboretur.

Quæres 3. *An gratia actualis, quæ requiritur ad observantiam præceptorum naturalium quoad substantiam tantum, & propter solam honestatem moralem, debeat esse supernaturalis?*

Resp. Debet esse supernaturalis ratione principii, non vero ratione objecti; *Ratio est*, quia illa gratia est supernaturalis ratione principii, non vero ratione objecti, quæ est quidem indebita, sed hominem non dirigit ad finem supernaturalem; atqui gratia, quæ requiritur ad observanda præcepta naturalia quantum ad substantiam duntaxat, indebita quidem est homini, seu eum non dirigit ad finem supernaturalem, sed ad finem naturalem tantum, nimirum ad morum honestatem; ergo.

C A P U T II.

De natura & divisione gratia actualis.

Nota 1. **G**ratia actualis interior, dividitur in gratiam excitantem, & adjuvantem.

Gratia excitans, est supernaturalis & indeliberatus intellectus & voluntatis motus, quo Deus nos, veluti torpentes & somno sopitos ad bonum supernaturale movet & excitat, & a malo retrahit. Hæc gratia vocatur etiam operans, & præveniens. *Operans*, quia Deus pium illum motum operatur in nobis sine nobis; non quidem sine nobis physice ac vitaliter agentibus, cum enim illustratio intellectus & pia motio voluntatis sint actus vitales, non possunt, nisi a potentia vitali & physica procedere; sed sine nobis libere consentientibus. Dicitur *præveniens*, quia prævenit ac præparat voluntatem, causando in ea boni motus initium.

Gratia adjuvans, est concursus supernaturalis Dei, quo nobiscum, per gratiam excitantem illustratis ac motis, concurrat ad omnes & singulos actus supernaturales & liberos. Hæc gratia vocatur etiam cooperans, & subsequens. Vocatur *cooperans*, quia bonam actionem nobiscum cooperatur. Vocatur *subsequens*, quia subsequitur, & executioni applicat bonum motum jam in voluntate per gratiam excitantem inchoatum, juxta illud D. August. lib. 2. contra duas Epistolas Pelagianorum cap. 10. ubi ait: *Heminis propositum bonum adjuvat quidem subsequens gratia; sed nec ipsum esset, nisi præcederet gratia.* Male ergo & erronee gratia subsequens a Semipelagianis dicitur ea, quæ præ-

vium

vium ac liberum voluntatis motum subsequitur, cum ideo tantum dicatur *subsequens*, quod bonum pietatis motum, gratiæ prævenientis beneficio productum, perficiat.

De utraque illa gratia D. August. *lib. de gratia & lib. arb. cap. 17.* sic loquitur: *Præparat voluntatem (Deus) & cooperando perficit, quod operando incipit. Quoniam ipse ut velimus, operatur incipiens, qui volentibus cooperatur perficiens. Propter quod ait Apostolus: certus sum quoniam qui operatur in vobis opus bonum, perficiet usque in diem Jesu Christi. Ut ergo velimus, sine nobis operatur; cum autem volumus, & sic volumus ut faciamus, nobiscum cooperatur. Tamen sine illo, vel operante ut velimus, vel cooperante cum volumus, ad bona pietatis opera nihil valemus.*

2. Gratia excitans subdividitur in *sufficientem & efficacem*, quæ cum sint celeberrimæ, gravissimisque intricatæ difficultatibus, non hic strictim sunt definienda, sed de eis fusius disputandum, duplici questione.

Q U Æ S T I O . I.

De Gratia sufficiente.

Nota 1. **U**T omnis tollatur æquivocatio, gratiam sufficientem sumi posse dupliciter, nimirum generice & specificè.

Gratia sufficiens *generice* sumpta, ea est, quæ voluntati subministrat vires pares & proportionatas effectui bono, ad quem proxime movet, & quem Deus ultimate intendit, producendo: quo sensu gratia efficax dicitur etiam sufficiens ab Apostolo 2. ad Corinth. 12. *sufficit tibi, (Paule) gratia mea.* Quidquid enim est efficax, est etiam sufficiens, non enim po-
test

test causa efficienter operari, nisi sit sufficiens ad operandum, eo modo, quo causa est.

Gratia sufficiens *specificè* sumpta, ea dicitur, quæ, licet vires pares & proportionatas subministret ad ponendum effectum ad quem datur, & quem Deus ultimate intendit, illum tamen non sortitur ex sola culpa voluntatis nolentis gratiæ consentire. Quo sensu opponitur gratiæ efficaci, diciturque, *mere sufficiens*, de qua sola hic agimus.

Nota 2. Gratia sufficiens, alia est proxime, alia remote sufficiens.

Gratia *proxime* sufficiens, ea est, quæ dat immediatam potentiam ad executionem operis a Deo ultimate intenti, verb. gr. ad executionem talis præcepti. Hæc vocatur, *gratia actionis*.

Gratia *remote* sufficiens, ea est, quæ non dat equidem immediatam potentiam exequendi operis a Deo ultimate intenti, sed dat immediatam potentiam ad implorandum per orationem uberius Dei auxilium, non conferendum a Deo, nisi prius oraverit homo, & certo conferendum, si reipsa oraverit, gratiæ primæ obsequens. Hæc vocatur *gratia orationis*, quam exprimit D. August. *lib. de natura & gratia c. 44.* dicens: *Non igitur impossibilia jubet, sed jubendo admonet & facere quod possis, & petere quod non possis, & adjuvat ut possis.*

Nota 3. Circa gratiam sufficientem gravissime erraverunt Calvinus, Lutherus, Bajus, Jansenius, Quesnellus, qui nullam aliam in statu naturæ lapsæ gratiam, quam necessitatem, admittentes, gratiam sufficientem penitus rejiciunt, sed cum aliis vocibus utatur Calvinus in exponenda sua necessitate gratiæ, aliis Jansenius, uterque modus ejusdem erroris tuendi, est hic exponendus.

Gra-

Gratia necessitans, juxta Calvinum, ea est, quæ sic determinat voluntatem ad actum, ut nullum libertati locum relinquat. Deus *voluntatem movet*, inquit lib. 2. instit. cap. 13. *Nō qualiter multis sæculis traditum est & creditum, ut nostra postea sit electionis, motioni aut obtemperare, aut refragari.*

Gratia necessitans, juxta Jansenium; ea est, quæ voluntatem humanam invicte ac insuperabiliter ita determinat ad unum, ut semper consensum voluntatis exprimat. Ratio est, quia modum operandi gratiæ constituit in quadam delectatione cælesti, quæ si sit gradibus superior opposita concupiscentiæ delectatione, gratia est semper *victrix*, plenumque & perfectum obtinet effectum; quod si gradibus inferior sit, semper est victa propter defectum virium. *Delectatio victrix*, inquit Jansen. lib. 8. de gratia cap. 2. *quæ Augustino est efficax adjutorium; relativa est; tunc enim est victrix, quando alteram superat; quod si contingat alteram ardentiorē esse, in solis inefficacibus desideriis hæbit animus.*

Hinc Janseniani duplicem admiserunt gratiam; *Primam*, quæ plenum atque perfectum effectum assequitur, & ad id a Deo datur; hancque vocant gratiam efficacem & victricem relative. *Secundam*, quæ efficit quendam vellicitatem & complacentiam boni operis inefficacem, & ad id duntaxat a Deo datur, hancque sufficientem appellare non recusant hodie Janseniani, asseruntque eam conferre completam, perfectam & expeditam ad præceptum observandum potentiam. Verum (quod maxime notandum est) nomine *potentia*, intelligunt potentiam absolutam duntaxat, & abstractam a præsentibus subjecti circumstantiis & dispositionibus, non vero relativam, & ad illas circumstan-

stantias comparatam. Deus enim, inquiunt, voluntate antecedente, & a præsentibus subiecti circumstantiis abstrahente, vult per hanc parvam gratiam opus perfectum impleri; verum, consideratis illis circumstantiis, non vult voluntate absoluta & consequente, opus perfectum per illam impleri, sed aliquod duntaxat imperfectum ac inchoatum boni operis desiderium. Ex quo:

Sequitur 1. Gratiam parvam Janſenianam esse efficacem, quia, juxta illos, omnem obtinet effectum, propter quem in talibus circumstantiis a Deo datur.

Sequitur 2. Illam gratiam esse insufficientem, quia propter defectum virium est impar & improporcionata ad oppositam concupiscentiæ delectationem superandam, ut ipſemet aſſerit Janſenius, lib. 2. de grat. c. 17. dicens: *Eam nullo modo ſufficere, ut homo Dei mandatum operetur, ut Deum ſuper omnia diligat, &c. Licet aliquid faciat, nempe velleitates quasdam excitet.* Ut hic error penitus proſiſigetur, videndum est 1. Quænam ſit natura gratiæ ſufficientis. 2. Utrum exiſtat in præſenti ſtatu. Ideo ſit

CONCLUSIO I.

Nomine gratiæ ſufficientis, ea intelligitur a Catholicis, quæ voluntati ad opus bonum exequendum conſert potentiam completam, expeditam, & relativam ad præſentes ſubjecti circumſtantias.

Prob. 1. Ex Script. *Iſaia 5.* ubi Deus, incredulitatem & contumaciam Judæorum increpans: ait: *Judicate inter me, & vineam meam, quid eſt quod debui ultra facere vinea mea, & non feci ei? an quod expectavi ut faceret uvæ, & fecit labruſcas?* ibi Deus queritur ſe feciſſe quod de-

debuisset, & nihil ex parte ejus bonitatis & misericordiæ defuisse, quominus populus Judaicus bene ageret & converteretur, qui tamen egit pessime; *Atqui* nihil defuisse Judæis ex parte Dei, est ipsos habuisse potentiam completam, & expeditam relative ad præsentem eorum circumstantias; *Ergo* &c. Alias falso diceret Deus, nihil defuisse ex sua parte, si eis defuisset potentia illa relative completa, frustra bonos fructus poenitentiae expectasset, nisi vires ad illos producendos pares gratia ipsis suppeditasset.

Prob. 2. Ex D. Greg. l. 9. mor. c. 46. ubi dicit: *Si mensuram judex temptationibus non præbet, eo ipso protinus stantem dejicit, quo ultra vires onera imponit.* Atqui si gratia non daret potentiam completam & expeditam relative ad subjecti circumstantias, non præberet mensuram temptationibus; ergo ultra vires onera imponderet, quod repugnat Apostolo, 1. Cor. 10. dicenti: *Fidelis autem est Deus, qui non patietur vos tentari supra id quod potestis.*

Prob. 3. Ex D. August. qui lib. 3. de lib. arb. cap. 16. ait: *Ex eo quod non accepit, nullus reus est: ex eo vero quod non facit quod debet, juste reus est. Debet autem, si accepit & voluntatem liberam & sufficientissimam facultatem.* Ex quo sic arguo; quilibet tenetur præceptis divinis parere, & ea transgrediendo reus est; atqui ex D. Augustino nullus tenetur implere præcepta, nullus reus est non implendo præcepta, nisi qui accepit & voluntatem liberam & sufficientissimam facultatem; ergo accepit sufficientissimam facultatem ad præceptum hic & nunc implendum.

Prob. 4. Ex damnatione primæ propositionis Jansenii: *Aliqua Dei præcepta hominibus justis, volentibus & conantibus, secundum præsentem quæ habent vires, sunt impossibilia, deest quæ*

que illis gratia qua possibilia sunt. Hæc prop. damnata est ut hæretica ; ergo hæc ejus contradictoria est de fide : *Aliqua Dei præcepta hominibus justis, volentibus & conantibus, secundum præsentem quas habent vires, sunt possibilia ; ergo ad præcepta implenda habent potentiam completam, non solum absolutam, sed relativam ad præsentem quas habent vires.*

Objicies : D. Aug. lib. de grat. & lib. arbitr. ait : Qui vult facere Dei mandatum, & non potest, jam quidem habens voluntatem bonam, sed adhuc parvam & invalidam : poterit autem, cum magnam habuerit & robustam. Ergo supponit D. Doctor hominem cum parva gratia non posse semper observare mandata, non defectu potentie absolutæ ; ergo defectu potentie relativæ.

Resp. dist. consequ. Supponit hominem cum parva gratia non posse semper observare mandata, defectu potentie relativæ proxime sufficientis, *conc.* remote sufficientis, *neg. consequ.* Semper enim (saltem justis) possunt orare, & per gratiam orationis uberius auxilium impetrare, ut docet D. August. *ibidem*, cap. 16. dicens : *Ideo jubet (Deus) aliqua, qua non possumus, ut noverimus quid ab illo petere debeamus, ipsa enim est fides, qua orando impetrat, quod lex imperat.* Et lib. de natura & gratia, cap. 44. *Non igitur impossibilia jubet, sed jubendo admonet, & facere quod possis, & petere quod non possis.* Ergo supponit D. Doctor semper esse præsentem orandi gratiam, neque enim potest quis sine gratia orare ut oportet.

Inst. 1. D. August. lib. 1. ad Simplic. quest. 2. ait : Nonne aliquando ipsa oratio nostra sic tepida est, vel potius frigida, & pene nulla, immo omnino interdum ita nulla, ut neque hoc in nobis advertamus, quia si hoc vel dolemus, jam
ora-

oramus. Ergo gratia illa orationis infirma, vires non confert pares ad orandum.

Resp. nego conseq. Agnoscit equidem D. Augustinus aliquando orationem ita esse tepidam, ut non oremus; at non dicit orationem ex presenti gratia non posse ardentiorē fieri, quod tamen requireretur, ut gratia orationis diceretur viribus paribus ad orandum destituta; immo D. August. *eodem lib. cap. 1. de iis*, quos non trahit Pater, loquens, ait: *Semel accipe & intellige: non traheris, ora ut traharis*; Ergo supponit eum, qui non trahitur, habere vires pares ad orandum, ut trahatur.

Instab. 2. Si gratia orationis pares conferret voluntati vires ad orandum actu, non requireretur ad id novum Dei auxilium; falsum conseq. Ergo.

Resp. dist. antec. Non requireretur ad actu orandum novum Dei auxilium excitans, *conc.* adjuvans, *nego ant.* Licet ergo gratia excitans pares & proportionatas conferat voluntati vires ad actu agendum, requiritur tamen auxilium gratiæ adjuvantis, ut opus perficiatur: nam, ut ait D. Augustin. *Sine illo (Deo) vel operante ut velimus, vel cooperante cum volumus, ad bona pietatis opera nihil valemus.*

Cæteræ objectiones solvantur conclusione sequenti, præsentis conclusionis confirmativa.

CONCLUSIO II.

Datur in statu natura lapsa gratia vere & relative sufficiens, cui tamen, dissensu libero, resistat humana voluntas. Est de fide.

Prob. 1. Ex Scriptura, Prov. 1. *Vocavi & renuistis: extendi manum meam, & non fuit qui aspiceret, despexistis omne consilium meum, & increpationes meas neglexistis.* Ubi vocatio, exten-

renfio manuum , confilium Dei , etiam intus pulfantis , gratiam vere ac relative fufficientem indicant , alias non effet iufta Dei increpatio & objurgatio ; atqui ei confenfu libero reftitit voluntas humana , & renuiftis : *despexiftis* , &c. Ergo .

Matth. 11. v. 20. *Tunc cœpit exprobrare civitatibus , in quibus facta funt plurima virtutes ejus , quia non egiffent pœnitentiam : va tibi , Corozain , va tibi , Betsaida , quia fi in Tyro & Sydone facta effent virtutes , qua facta funt in vobis , olim in cilicio & cinere pœnitentiam egiffent .* Ibi Chriftus exprobrat Corozaitis , quod non egiffent pœnitentiam ad aspectum tot miraculorum ; ergo revera cum gratia ipsis collata pœnitentiam agere , non tantum remote & absolute , fed proxime & relative potuerunt ; ergo datur gratia vere & relative fufficiens , cui refiftitur .

Janfenius illud testimonium explicat , 1. De gratia externa ; 2. De gratia imperfecta & parva ; fed ,

Contra est , 1. Quia pœnitentia , quam Corozaitæ potuerunt agere , & non egerunt , eft opus falutare ; atqui gratia exterior non fufficit ad agendum opus falutare , ut contra Pelagium definivit Ecclefia ; ergo .

Contra est , 2. Quia gratia parva Janfeniana , licet fit relative fufficiens ad velleitates , eft tamen relative infufficiens ad bonam voluntatem & actum falutarem ; atqui Chriftus loquitur de gratia vere & relative fufficienti ad actum pœnitentiæ falutarem ; ergo , fi fibi conftare voluerit Janfenius , non debet textum allatum explicare de fua parva gratia . *Confirm. minor.* Quia ut exprobratio Chrifti valida fit & iufta , neceffe eft , ut quemadmodum Tyrii & Sydonii , vifis Chrifti miraculis , vere , proxime , & re-

& relative doluissent ; ita Corozaitæ , eadem sibi affulgente gratia, pœnitentiam vere, proxime, & relative agere potuerint, alias nulla vis in Christi paritate, nullumque robur extitisset.

Prob. 2. ex Conciliis. Ex Conc. Arelatenſi III. in quo approbatur ſententia Fauſti anathematizantis ſententiam Lucidi Presbyteri, dicentis illos qui perierant, non accepisse, ut ſalvi eſſe poſſent, his verbis: *Anathema illi qui dixerit illum, qui periit, non accepisse, ut ſaluſ eſſe poſſet.* Lucidus vero inter ſuas aſſertiones retractatorias, ait: *Aſſero.... & periclitari eum, qui ſaluſ eſt, & eum, qui periit, potuiſſe ſalvari.*

Ex Concil. Senonenſi parte prima in decretis fidei, c. 15. dicitur: *Non tale eſt huiusmodi trahentis Dei auxilium, cui reſiſti non poſſit. Quoties enim Dominus voluit congregare filios Jeruſalem, ſicut gallina congregat pullos ſuos ſub alas, & noluerunt. Matth. 23. Fruſtra certe Stephanus, Act. 9. Iudaos dura cervicis & incircumciſi cordis argueret, qui Spiritui ſancto reſiſterent. Fruſtra Paulus Theſſalonicenſes admoneret, Spiritum ne extinguerent, ſi divinis inſpirationibus inevitabiliter raperentur. Nihil hic effugii relinquitur Janſenianiſ, nam Concilium loquitur de gratia interiori data ad actum perfectum, dicens: *Eo extendimus (liberum arbitrium) ut voluntas humana miſericordia prævenientis auxilio ſuffulta, & interiori quodam & occulto ſecretioris aſſatu contacta ſeſe convertat ad Deum.* Poſtea aſſerit illam Dei trahentis gratiam non eſſe talem, cui reſiſti non poſſit. Tandem ex variis Scripturæ locis illi ſæpe reſtitum fuiſſe, probat.*

Prob. 3. Ex damnatione 2. propoſ. Janſenii: Interiori gratia, in ſtatu natura lapſa, nunquam reſi-

resistitur. Quæ propos. damnata est ut *heretica*; ergo de fide est interiori gratiæ resisti posse; atqui Ecclesia per interiorem gratiam, intelligit gratiam vere & relative sufficientem, ut probavimus in propos. superiori; ergo.

Prob. 4. Ex SS. PP. Inter quos unum refero Augustinum, quem patronum prætendunt Janseniani, quibus quatuor Augustini testimonia opponimus:

Primum, Ex l. i. ad Simplic. q. 2. Nemo credit, non vocatus, sed non omnis credit vocatus: noluit Esau & non cucurrit, sed & si voluisset & cucurrisset; Dei adjutorio pervenisset, nisi vocatione contempta reprobus fieret. Ergo gratiæ vocationis internæ relative sufficienti obstitit; nam ejus resistantiæ unice adscribitur quod non pervenit; vires ergo pares habuit ut perveniret.

Secundum, lib. de natura & gratia, cap. 67. ait: Cum vero ubique sit præsens (Deus) qui multis modis, per creaturam sibi Domino servientem, aversum vocet, doceat credentem, consoletur sperantem, diligentem adhortetur, conansem adjuvet, exaudiat deprecantem; non tibi deputatur ad culpam quod invitus ignoras, sed quod negligis quarere quod ignoras; neque illud quod vulnerata membra non colligis, sed quod volentem sanare contemnis. Nihil certe evidentius probat gratiam vere sufficientem ad actum perfectum credendi, sperandi, &c. cui tamen resistit humana libertas.

Tertium, lib. 83. quæstionum quæst. 68. Neque illi debent sibi tribuere qui venerunt; neque illi, qui noluerunt venire, debent alteri tribuere, sed tantum sibi; quia, ut venirent vocati, erat in eorum libera voluntate, non quidem sibi relicta, sed vocata per gratiam: addit enim: *Et si quisquam sibi tribuit quod vocatus venit, non potest tribuere quod vocatus est.*

est. Ergo gratiæ vocationis, quæ sufficit, ut vocatus veniat, resistitur.

Quartum, lib. de peccat. merit. & remissione, de adulto ait: *Habet* (concupiscentiam) cum qua pugnet, eamque adjuvante Deo superet, si non in vacuum gratiam ejus susceperit, si reprobatus esse noluerit. Certe adjutorium, cujus ope superetur concupiscentia, nisi homo illud in vacuum suscipiat, & velit esse reprobatus, est gratia interior vere & relative sufficiens, cui humana voluntate resistitur; atqui tale admisit D. August. in allatis testimoniis, & infinitis aliis; ergo.

Probat. 5. ratione: Multi sunt, etiam justî, qui non implent divina mandata, atqui tamen habent gratiam vere & relative sufficientem, qua illa observare possent, ut docet Concil. Trid. sess. 6. de justificatione: *Deus impossibilia non jubet, sed jubendo admonet & facere quod possis, & petere quod non possis, & adjuvat ut possis*. Ergo gratiæ relative sufficienti resistunt.

Solvuntur Objectiones.

Obicies 1. Scriptura non aliam gratiam astruit, quam efficacem & victricem; ergo.

Prob. ant. Joann. 6. Christus ait: *Omnis qui audit a Patre, & didicit, venit ad me*. Ergo nullus veræ & internæ vocationi resistit.

Resp. nego conseq. Equidem citato loco Scriptura gratiam efficacem astruit, cum loquatur de iis, qui non solum audiunt, sed qui audientes, vocationi obediunt, ut verbo, *didicit*, designatur; sed non excludit gratiam sufficientem, cui resistatur.

Instab. 1. D. August. lib. de predest. SS. c. 2. ait: *Si omnis qui audit a Patre & didicit, venit, profecto omnis, qui non venit, non audit*.

vis a Patre, nec didicit. Ergo ex D. Augustin. Scriptura astringit gratiam efficacem per exclusionem gratiæ mere sufficientis.

Resp. dist. ant. Qui non venit, non audivit a Patre efficaciter, *conc.* sufficienter, *nego ant.* Ideo enim non venit, quia vocationi resistit, cum qua venire potuit; nam, ut ait D. Aug. lib. de gratia Christi, cap. 13. *Non est autem consequens, ut qui potest venire, etiam veniat, nisi id voluerit atque fecerit.*

Inst. 2. D. August. lib. de grat. Christi, c. 13. dicit: *Qui novit quod fieri debeat, & non facit, nondum didicit secundum gratiam, sed secundum legem: non secundum spiritum, sed secundum litteram.* Ergo gratia sufficiens, cum qua opus bonum non fit, vel nulla est, vel duntaxat externa.

Resp. dist. antec. Nondum a Deo didicit secundum gratiam, in hypothese Pelagianorum qui gratiam internam voluntatis & operationis rejiciebant, *conc.* in mente D. August. *subdist.* secundum gratiam efficacem, *conc.* secundum nullam omnino gratiam interiorē, *nego ant.* Hic itaque D. Doctor impugnans Pelagianos vult duntaxat probare, præter gratiam legis & doctrinæ, qua mens illustratur, adhuc necessariam esse gratiam voluntatis & actionis, qua id fiat, quod faciendum per legem cognoscitur; quod quidem probat, quia qui per legem cognovit quid faciendum est, si interna non moveatur gratia, omnino bonum opus agere nequit.

Objectiones 2. Apostolus Roman. 9. ait: *Igitur non est volentis, neque currentis, sed miserentis est Dei.* Atqui si esset in potestate vocati, vocationi obtemperare, vel non obtemperare, esset volentis atque currentis; ergo.

Resp. disting. maj. Non est volentis neque cur-

currentis, per solas naturæ vires, *conced.* per gratiam divinam, *subdist.* non est volentis primario & principaliter, *conc.* neque primario, neque secundo, quasi homo nihil divinæ gratiæ cooperaretur, *nego maj.* Hoc unum vult Apostolus, bonum opus magis esse a Deo per gratiam, quam ab homine, qui absque gratia nec conari, nec consentire potest. Se se explicat D. Doctor, *lib. de gratia & lib. arbit. cap. 5.* dicens: *Ne ipsa voluntas sine gratia Dei putetur boni aliquid posse, continuo cum dixisset: gratia ejus in me vacua non fuit, sed plus omnibus illis laboravi: subjunxit, atque ait: non ego, autem, sed gratia Dei mecum: Id est, non solus, sed gratia Dei mecum; ac per hoc, nec gratia Dei sola, nec ipse solus; sed gratia Dei cum illo.* Quibus verbis significat conversionem esse partim humanæ, partim divinæ voluntati tribuendam, licet primario & principaliter divinæ misericordiæ sit opus.

Inst. 1. Nemo potest se discernere in negotio salutis, juxta illud 1. ad Cor. 4. *Quis se discernit? quid autem habes quod non accepisti?* Atqui si duobus hominibus detur gratia sufficiens, cui unus obtemperet, alter reluctetur, qui obtemperaverit, se discernit ab eo qui obluetur; ergo non datur talis gratia.

Resp. dist. maj. Nemo potest se discernere, per vires proprias, *conc.* quatenus per gratiam motus & adjutus, *nego maj.* Neque enim qui sic per gratiam, qua excitatur, & juvatur, se discernit, contradicit Apostolo prohibenti solum ne homo gloriatur de bono opere, quasi principium illius efficiens non acceperit a Deo; quam interpretationem probat August. *lib. de spiritu & litt. cap. 33.* dicens: *Quando Deus agit cum anima rationali, ut ei credat, profectus*

Eto & ipsum velle credere Deus operatur in homine consentire autem vocationi Dei, vel ab ea dissentire, proprie voluntatis est. Quares non solum non infirmat quod dictum est: quid habes quod non accepisti? verum etiam confirmat: accipere quippe & habere anima non potest dona, de quibus hoc audit, nisi consentiendo: ac per hoc quid habeat, & quid accipiat, Dei est: accipere autem & habere utique accipientis & habentis est.

Inst. 2. Gratia communis non est idoneum discretionis principium, ex D. Augustini lib. de prædest. SS. cap. 5. Nunquid per hac dona, inquit, qua omnibus communia sunt hominibus, discernuntur homines ab hominibus? quis te discernit? gratia qua discernit bonos a malis, non gratia qua communis est bonis malis. Atqui gratia sufficiens communis est bonis & malis; ergo.

Resp. dist. major. Gratia communis, ad sensum Pelagianorum, qui, nomine, gratia communis, intelligebant naturam & liberum arbitrium, conc. gratia communis ad sensum catholicorum, qui, nomine, gratia communis, intelligunt gratiam vere & relative sufficientem, quæ communiter datur hominibus cum urget præceptum, nego maj. Sese explicat Augustini. verbis immediate præcedentibus, *In hac Apostoli evidentissima intensione*, inquit, qua contra humanam superbiam loquitur, dona Dei naturalia suspicari nimis quantum existimo absurdum est. At vero gratia vere & relative sufficiens, non est donum Dei naturale, sed est naturæ gratis superadditum ad supernaturale salutis meritum obtinendum.

Instab. 3. Gratia datur a Deo ex voluntate hominem salvandi; atqui voluntati salvandi hominem nunquam resistitur ex Augustino,

no,

no, (h) *volenti saluum facere nullum resistit hominum arbitrium*; ergo gratia ex tali voluntate collata nunquam effectu suo fraudatur.

Respond. dist. min. Voluntati Dei absolutæ, nunquam resistitur, *conc.* voluntati conditionatæ, *nego min.* conditionata autem est in Deo voluntas hominem salvandi, nimirum ex hypothese quod gratiæ suæ prævenientibus auxiliis cooperaturus sit; quæ voluntas duo includit. *Primum*, largitionem mediorum ad salutem idoneorum. *Secundum*, intentionem conferendi salutem ipsam, si media collata non contemnantur; voluntas ergo illa, quæ est conditionalis respectu salutis, est absoluta respectu collationis mediorum ad salutem consequendam necessariorum. De hac conditionata voluntate August. lib. de catechizandis rudibus num. 52. ait: *A quo interitu, hoc est, ab inferno, Deus misericors volens homines liberare, si sibi ipsi non sint inimici, & non resistent misericordia salvatoris sui, &c.*

Objicies 3. Discrimen fuit inter gratiam status innocentie, & gratiam medicinalem status naturæ lapsæ, ex Aug. lib. de corrept. & gratia cap. 11. dicente: *Quid ergo Adam non habuit gratiam? immo habuit magnam, sed disparrem*; atqui in hoc stat discrimen, quod gratia sanitatis fuerit tantum sufficiens, libero voluntatis arbitrio, quantum ad usum vel non usum; relicta, gratia vero medicinalis sit tantum efficax; ergo, &c.

Respond. nego min. Discrimen enim utriusque gratiæ, sanitatis & medicinalis, non in eo reponit D. Augustin. quod gratia medicinalis sit tantum efficax, sed 1. In eo quod homo innocens

cens sola indiguerit gratia sufficiente, cum econtra homo lapsus, præter gratiam sufficientem, prout ab efficaci distinguitur, indigeat etiam efficaci. 2. Quod gratia sufficiens sanitatis solam includat mentis illustrationem, non vero præviā, ut gratia medicinalis, voluntatis motionem, quia cum integra esset viribus, tali non indigebat prævia motione, qua nunc omnino indiget natura corrupta; unde Aug. cap. 48. asserit quod gratia naturæ inculpatæ, *Esset adjutorium Dei, & tanquam lumen sanis oculis, quo adjuvi videant, se præbere volentibus.*

Inst. D. August. ibidem cap. 12. ait: Ipsa adjutoria distinguenda sunt. Aliud est adjutorium sine quo aliquid non fit, & aliud est adjutorium quo aliquid fit . . . primo itaque homini . . . datum est adjutorium perseverantia, non quo fieret ut perseveraret, sed sine quo per liberum arbitrium perseverare non posset. Nunc vero sanctis in regnum Dei per gratiam prædestinatis, non tale adjutorium perseverantia datur; sed tale ut eis perseverantia ipsa donetur. Ex quo textu sic argumentor: adjutorium, quo, est gratia efficax; adjutorium vero, sine quo non, est gratia sufficiens; atqui ex D. Augustino in præsentī statu naturæ lapsæ datur duntaxat adjutorium, quo; ergo.

Resp. 1. nego maj. Nam per adjutorium, quo, D. Doctor non intelligit gratiam actualem efficacem, sed donum ipsum perseverantiæ, quo homo formaliter fit perseverans; siquidem initio cap. 10. ait, Hinc oritur alia questio non sine contemnenda . . . quaritur enim a nobis, quantum ad hoc donum Dei quod est perseverare usque in finem, quid de ipso primo homine sentiamus; idque manifeste probat exemplum beatitudinis quo utitur, ut exponat, quid per adjuto-

adjutorium, quo, intelligat; *Adjutorium enim est, inquit, non solum sine quo non fit, verum etiam quo fit propter quod datur. Quapropter hoc adjutorium & quo fit est, & sine quo non fit: quin & si data fuerit homini beatitudo, continuo fit beatus, & si data nunquam fuerit, nunquam erit. Ergo sicut adjutorium, quo, beatitudinis, est ipsa formalis beatitudo, ita auxilium, quo, perseverantiæ, est ipsa formalis perseverantia, ut ipsemet D. Doctor mentem suam exponit, lib. de dono perseverantiæ c. 6. Perseverantiam usque in finem, inquit, quoniam non habet quisquam nisi qui perseveraverit usque in finem, multi possunt eam habere, nullus amittere.*

Itaque D. August. docet Adamum accepisse duntaxat adjutorium, *sine quo non*, quia non ipsam perseverantiam accepit, sed tantum gratiam intellectus sine qua perseverare non poterat, & quacum, si voluisset, perseverare potuisset, absque ulla præveniente gratia voluntatis, quæ cum esset sana & integra, sufficientes habebat vires ad perseverandum, *cujus proinde meritum fuisset, si permanere voluisset*, ait Augustin. nunc autem propter naturæ nostræ lauciatæ infirmitatem ac perpetuo rebellantem concupiscentiam, opus etiam habemus gratia voluntatis, non solum ut perseveremus, sed etiam ut possimus perseverare, quare vocatur ab Augustino *adjutorium quo*; porro eo non indigebat integra primi hominis voluntas, cujus arbitrio relictum fuerat, ut cum gratia sufficiente intellectus perseveraret, si vellet.

Respond. 2. Dato etiam, & non concesso, quod D. Augustin. per, *adjutorium quo*, gratiam efficacem intellexerit; *nego minor. argu- menti*, nam tunc equidem ostenderet esse in

statu naturæ lapsæ gratiam efficacem, sed absque exclusione gratiæ sufficientis; quid inde contra nos?

Obijcies 4. Cum Jansenio, *lib. 3. de gratia, cap. 24.* gratia cui humana voluntas resistat, est inutilis; ergo.

Resp. dist. antec. Est inutilis, vitio voluntatis libertate sua abutentis, *conc.* defectu virtutis intrinsecæ & relativæ in gratia, *nego antec.* gratia enim dat potentiam relativam & expectatam ad bonum, ad quod natura sua tendit; non igitur ratione sui est inutilis, sed voluntas creata, dissensu libero, eam reddit inutilem.

Inst. 1. Gratia sufficiens est perniciosa, quam nemo unquam, fatentibus etiam scholasticis, nisi majorem damnationem, affectus est, ait Jansen. ibidem *cap. 3.* ergo, &c.

Resp. nego antec. Quia non ipsa gratia, sed resistantia libera, per quam voluntas abjicit gratiam, homini perniciosa est; ipsa enim, & non gratia multiplicat peccata, unde Alex. VIII. damnavit hanc Synnichi propof. *Gratia sufficiens, non tam utilis, quam perniciosa est, ut proinde merito possimus petere: a gratia sufficienti libera nos, Domine.* Et vero quis perniciosa dicat sacramenta, eo quod multi iis in sui perniciem abutantur?

Inst. 2. Jansenius *lib. 3. cap. 3.* Illud a recentioribus prolatum gratia sufficientis genus, quo adjuvante nullum unquam opus factum est, aut fuit unquam videtur monstrum quoddam singulare; atqui gratia nostra sufficiens est talis; ergo.

Resp. dist. maj. Monstrum est singulare, si gratia illa defectu virtutis intrinsecæ & relativæ non fortiatur effectum, *conc.* si unico voluptatis liberæ, & idoneis viribus instructæ, vitio,

vitio, *nego maj.* Quod enim gratia sufficiens, prout gratiæ efficaci opposita, nequaquam fortatur effectum, nihil est mirandum; gratia enim illa non appellatur, *mere sufficiens*, nisi consequenter ad liberam voluntatis resistentiam a Deo prævisam. Quod si talis gratia monstruosa dicatur, monstruosior certe gratia Jansenii *parva*, quæ ab initio lapsus hominis usque ad diem judicii, est insufficiens ad oppositam sibi concupiscentiam debellandam; & cum qua voluntas necessario *hærebit in solis inefficacibus desideriis*; an magis indecorum est gratiæ Christi quod ipsi voluntas libere resistat, quam quod necessario superetur a prædominante concupiscentia? valet ergo argumentum Jansenii contra parvam, quam propugnat, gratiam; at sponte ruit in systemate Augustini & Catholicorum.

Instab. 3. Si daretur gratia *mere sufficiens*, posset peti a Deo; absurdum conseq. Ergo.

Resp. dist. maj. Posset peti a Deo, qua *vere* sufficiens, *conc.* qua *mere* sufficiens, *nego maj.* Quod gratia sit *vere* sufficiens, habet ab intrinseco, nimirum a propria virtute; quod vero sit *mere* sufficiens, habet ab extrinseco, nimirum a libero voluntatis dissensu præviso & sic involvit resistentiam voluntatis; sane cum postulamus gratiam, non petimus dissensum & resistentiam gratiæ, sed gratiam generatim, ut est *vere* sufficiens.

Inst. 4. Gratia *mere* sufficiens, justitiæ severitatem potius arguit, quam misericordiæ indulgentiam commendat; ergo est Deo dante indigna.

Respond. nego ant. Quia gratia per se & ex primaria Dei intentione ad divinæ misericordiæ ostensionem tendit, licet per accidens & ex secundaria Dei intentione ad justitiæ divi-

næ ostensionem & gloriam pertineat, nempe ex hypothefi quod Deum sanare volentem contemnamus: *Infideles*, inquit Augustin. lib. de spiritu & littera c. 23. *contra voluntatem Dei faciunt, cum ejus Evangelio non credunt, experti in suppliciis potestatem ejus, cujus in donis misericordiam contempserunt.*

Obicies 5. Gratia sufficiens, cui voluntas resistat, est gratia possibilitatis Pelagiana, quam confutavit Aug. & damnavit Ecclesia; ergo admittenda non est.

Resp. nego ant. Nam adjutorium possibilitatis, quod impugnabat Aug. contra Pelagium, erat adjutorium non conferens, sed supponens possibilitatem qualis esset lex, atque doctrina; docebat enim liberum arbitrium per se solum valere ad quodlibet opus salutare, adeoque non indigere gratia ad posse simpliciter, sed tantum ad facilius posse, & hanc gratiam dicebat esse legem, doctrinam & exempla Christi, unde adjutorium possibilitatis reponebat in natura. Econtra gratia sufficiens, quam admittimus consistit, non solum in supernaturali illustratione intellectus, sed etiam in pia motione voluntatis indeliberata, quæ dat posse simpliciter velle, & agere bonum salutare, voluntatem immediate excitando & adjuvando ad illud volendum & agendum.

Inst. 1. Pelagius admittebat posse bene agere esse a Deo; ergo.

Resp. dist. antec. Pelagius admittebat, posse bene agere, esse a Deo, ut auctore naturæ, *conc.* ut interiorem agendi virtutem subministrante per gratiam Christi actuale, naturæ superadditam, *nego anteced.* Pelagius naturam & liberum arbitrium vocabat gratiam possibilitatis, legem vero & doctrinam vocabat adjutorium possibilitatis naturalis. Audiatur D. Aug. lib.

lib. de gratia Christi cap. 3. *Gratiam Dei*, inquit, & *adjutorium* quo *adjuvamus* ad non *peccandum*, aut in *natura* & *libero* ponit *arbitrio*, aut in *lege* atque *doctrina* *possibilitatem* datam *confitetur* a *Creatore* *natura*, nec *esse* in *nostra* *potestate*, sed *eam* nos *habere* *etiamsi* *no-*
limus.

Inst. 2. Pelagius deinceps *possibilitati* *natu-*
rally *subjungit* *adjutorium* *Dei* *actuale* : *Adju-*
vat nos, inquit apud Augustinum cap. 7. *Deus*
per doctrinam & *revelationem* *sua*, dum *cor-*
dis *nostri* *oculos* *aperit* : dum *diaboli* *pandit* *in-*
sidias, &c. Ergo in eo tantum arguebatur ab
Augustino quod nollet ubique eam esse con-
junctam cum effectu.

Resp. dist. antec. *Possibilitati* *naturali* *subjun-*
xit *adjutorium* *Dei* *actuale*, quod esset *lex*,
vel *doctrina*, vel *revelatio*, vel *exemplum*,
conc. quod esset *subministratio* *virtutis* *interio-*
ris, *nego* *ant.* Unde D. August. verbis Pelagii
immediate subjungit : *In his omnibus non neces-*
sit a *commendatione* *legis* atque *doctrina*
qua *demonstrat* & *revelat* *Deus* *quid* *agere* *de-*
beamus : non *qua* *donat* atque *adjuvat* ut *age-*
mus, cum ad hoc potius valeat *legis* *agnitio*, si
gratia *desit* *opitulatio*, ut *fiat* *mandati* *prævari-*
catio. Gratia autem *sufficiens*, quam *admittit*
Ecclesia *Catholica*, est *gratia* *interior* *naturæ*
superaddita, vires *pares* & *relative* *proportion-*
atas *subministrans*.

Objicies 6. Semipelagiani necessitatem admi-
ferunt *gratiæ* *sufficientis*, cui posset *humana*
voluntas *resistere*, vel *obtemperare*; atqui in
hoc fuerunt *hæretici*; ergo non est *admittenda*.

Resp. nego maj. & min. In quibus continetur
4. *propositio* *Jansenii*, quæ ab *Innocent. X.* &
Alex. VII. *damnata* est, ut *falsa*, & *hæretica*.

Prob. maj. Ex D. August. lib. de *prædest. S.*

c. 1. de Semipelagianis scribente: *Pervenerunt, ut praveniri voluntates hominum Dei gratia fiantur, atque ut ad nullum opus bonum vel incipiendum, vel perficiendum, sibi quemquam sufficere posse consentiant. Ergo gratiæ sufficientis necessitatem ad omne opus salutare incipiendum vel perficiendum admittebant.*

Resp. nego conseq. Necessitatem enim gratiæ non admiserunt ad initium fidei, dicentes, ut ait August. cap. 2. *Ex nobis quidem nos habere ipsam fidem, sed incrementum ejus ex Deo: tanquam fides non ab ipso donetur nobis, sed ab ipsa tantum augentur in nobis, eo merito; quo capiat a nobis. Et infra, post citata hæc Apostoli verba, Non sumus sufficientes cogitare aliquid quasi ex nobismetipsis, ait: Verba ista perpendant, qui putant ex nobis esse fidei caput, & ex Deo esse fidei supplementum.*

Instat. D. Hilarius, *Epist. ad August.* declarat Semipelagianos docuisse: *Ad nullum opus etiam incipiendum, nedum perficiendum, quemquam sibi sufficere posse. Atqui initium fidei haud dubie est bonum opus; ergo.*

Respond. dist. min. Est bonum opus, in rei veritate, conc. in doctrina Semipelagianorum, nego minor. Nam boni operis nomine, neque velle sanari, neque ipsum credere intelligebant, id testatur S. Hilarius dicens: *Neque enim alicui operi curationis eorum annumerandum putant exterrita & supplici voluntate unumquemque agrotum velle sanari; quod enim dicitur: crede & salvus eris; Unum horum exigi assentunt, aliud offerri, ut propter id quod offertur, deinceps reddatur. Ergo voluerunt initium salutis esse, tum in desiderio salutis, tum in fide, per quam obtineretur gratia ad opus bonum, sive incipiendum, sive perficiendum, necessaria.*

Inst. 2.

Inst. 2. Gennadius Semipelagianus, lib. de Eccl. dogmatibus, cap. 21. docet: *Initium salutis nostra, Deo miserante, nos habere, ut vero acquiescamus salutifera inspirationi, nostra est potestatis.* Ergo Semipelagiana doctrina eadem est ac nostra.

Respond. nego conseq. Quia Gennadius in libro citato, quem scripsit postquam ex errore Semipelagiano revocatus fuit, non tradit doctrinam Semipelagianam, sed Catholicam.

Inst. 3. Vitalis Carthagenensis, qui errori Semipelagian. nomen dedit, admisit gratiæ interioris prævenientis necessitatem, teste August. Epist. 107. Ergo.

Resp. dist. antec. Admisit necessitatem gratiæ prævenientis intellectum, ut est lex, doctrina, conc. prævenientis voluntatem, *nego ant.* Unde D. Augustin. ibidem, redarguens ejus sententiam, ait: *Hoc est illa Pelagianorum mala, meritoque reprobata, & ab ipso etiam Pelagio, timente daminari in Orientalium Episcoporum Concilio, sententia, quæ dicunt gratiam Dei, non ad singulos actus dari, sed in libero arbitrio esse, vel in lege atque doctrina.*

Q U Æ S T I O II.

De gratia efficaci.

Nota 1. **F**ide divina certum est, dari gratiam efficacem, qua Deus voluntates nostras certo & infallibiliter flectere potest quocumque voluerit, Prov. 21. *Cor Regis in manu Dei, & quocumque voluerit, inclinat illud.* Et Philipens. 2. *Deus est, qui operatur in vobis & velle & perficere pro bona voluntate.* De illa ergo una, eaque gravissima, restat difficultas solvenda, qua ratione nempe

gra

gratia efficax voluntatem moveat ad consensum, effectumque, ad quem datur, obtineat, proindeque quo pacto a gratia mere sufficienti distinguatur; porro ne in verborum æquivoco ludamus.

Nota 2. Gratia efficax spectatur, vel *in actu primo*, & antecederet ad consensum voluntatis; vel *in actu secundo*, & consequenter ad illum consensum. Item gratia efficax *in actu primo*, est talis late, vel stricte; quæ omnia accurate distinguere debent, ut multis difficultatibus via præcludatur. Unde:

Efficacia gratiæ *in actu primo late*, est virtus gratiæ prævenientis, par, & proportionata effectui bono, ad quem datur. Efficacia sic intellecta est essentialis & intrinseca gratiæ, sive fortiatur, sive non fortiatur effectum, quem apta est sortiri.

Efficacia gratiæ *in actu primo stricte*, est virtus gratiæ prævenientis, ut certo & infallibiliter illatura effectum, seu, consensum voluntatis.

Efficacia gratiæ *in actu secundo*, est eadem virtus gratiæ ut conjuncta cum effectui, qui illius vi elicitus est. Hæc includit gratiam adjuvantem & cooperationem voluntatis.

Nota 3. Hinc non est quæstio de gratia efficaci *in actu secundo*, quæ consensum involvit, quia est ipsamet formaliter operatio, cui consequenter voluntas non potest dissentire, cum sit impossibile ipsam, dum operatur, non operari. Nec de gratia efficaci *in actu primo late* dicta; nam sic gratia ipsa mere sufficiens, efficax dici potest, ut constat ex dictis quæst. præcedenti, & ex ejus definitione mox data. Solum ergo quæstio est de gratia efficaci *in actu primo stricte* sumpta, & quæ simpliciter dicitur gratia efficax, de qua quæritur, quo pacto a gratia

gratia mere sufficienti distinguatur, seu unde repetenda sit ejus efficacia.

Nota 4. Ut hanc intricatissimam quæstionem solverent, & hoc ænigma theologicum exponerent, in varias abiere sententias, non solum novatores, verum etiam Theologi Catholici; unde, 1. Præmittemus systemata Novatorum, eaque confutabimus. 2. Referemus varia Scholasticorum systemata, iisque confutatis, quæ nobis improbabilia visa fuerint, illud quod probabilius videbitur, stabiliemus duplici articulo.

ARTICULUS I.

Systema Novatorum circa gratia efficaciam.

I. Systema. **E**st Calvinus, docentis (i) gratiam efficacem esse vere ac physice necessitantem, ita ut non possit ipsi voluntas humana refragari; additque: *Medium quem Sophista*, (sic Catholicos appellat) *imaginantur motum, cui obsequi, vel quem repellere liberum sit, aperte excludi videmus, ubi asseritur efficax ad perseverandum constantia.*

Contra hoc impium systema, Concil. Trid. Sess. 6. can. 4. hoc anathema pronunciat: *Si quis dixerit liberum hominis arbitrium a Deo motum & excitatum, nihil cooperari assentiendo Deo excitanti atque vocanti, quo ad obtinendam justificationis gratiam disponat ac præparet, neque possit dissentire si velit . . . anathema sit.* Non ergo in hoc errore confutando immorabimur, qui commodius profligatur, Tomo 4.

II. Systema, est Jansenii, docentis efficaciam
gra-

(i), Lib. 2. Institut. cap. 3. num. 10.

gratiæ repetendam esse ex ipsius indeliberata delectatione, quæ sit superior opposita concupiscentiæ delectatione, item indeliberata, & illius relative per gradus victrice.

Janfenius itaque duplicem distinguit in voluntate delectationem, *calestem* nimirum, quæ ad bonum, & *terrenam*, quæ ad malum trahit; asseritque delectationem hanc unicum esse pondus, quo voluntas nostra, per peccatum infirma, necessario & indeliberate applicatur, sive ad bonum, sive ad malum, ita ut impossibile sit maiorem delectationem vinci a minori: *Major enim delectatio*, inquit lib. 4. de gratia, c. 6. *nunquam sane delectatione minore superabitur*. Et lib. 3. c. 8. *Perspicue apparet impossibile esse, ut adiutorium illud celestis delectationis non determinet, immo prædeterminet voluntatem, quia facit ut velis, & sine illa velle non possis: facit etiam ut ardentius velis, & sine illa ardentius velle non possis: facit denique ut necesse sit animum sequi, & secundum illud operari, quod amplius delectaverit*. Totâ igitur vis delectationis *relativa est*, ita ut, si major fuerit vis gratiæ, quam vis concupiscentiæ, necesse sit voluntatem bene operari: si econtra major fuerit vis concupiscentiæ, necesse sit voluntatem male operari, *Vigente enim delectatione carnali, impossibile est ut virtutis & honestatis consideratio prævaleat*, inquit Janfenius, l. 4. cap. 9. Ergo juxta ipsum, efficacia gratiæ repeti debet ex delectatione voluntatem ad unum determinante, quod est error Calvinii. Contra hoc systema hæreticum, sit:

C O N C L U S I O.

Hæreticum est efficaciam gratiæ repetere ex delectatione celesti indeliberata, superiori, & relative

lative ad minorem oppositam concupiscentiam victricem, voluntatem ad consensum necessitante.

Prob. 1. Hæreticum est asserere hominem non posse dissentire motioni Dei, illum ad bonum excitantis: non posse resistere gratiæ divinæ, tum cum ab ipsa movetur & excitatur ad bonum; ut definierunt Concilia Trident. supra cit. & Senonense, decreto 15. ubi loquens de necessitate gratiæ, definit: *Neque enim tanta gratiæ necessitas libero præjudicat arbitrio; nec enim tale est Dei trahentis auxilium, cui resisti non possit*; atqui illud asserit, qui gratiæ efficaciam repetit ex delectatione superiori relative victricem, cum in eo systemate major delectatio a minori opposita delectatione nunquam superari possit, ut asserit Jansenius supra citatus; ergo.

Prob. 2. Illud systema est hæreticum, ex quo, per connexionem evidentem & necessario, profluunt conclusiones hæreticæ; atqui ex systemate delectationis superioris relative victricis, necessario, & per connexionem evidentem, profluunt quinque famosæ propositiones Jansenii hæreticæ, cujus sunt conclusiones; ergo, &c.

Probat. minor. Referendo quinque propositiones Jansenianas, ab Innoc. X. & Alexand. VII. damnatas, & demonstrando earum cum systemate laudato connexionem.

I. Prop. *Aliqua Dei præcepta hominibus jactis, volentibus & conantibus, secundum præfentes quas habent vires, sunt impossibilia, deest quoque illis gratia qua possibilia fiant.* Damnata est, ut impia, temeraria, blasphema, anathemate damnata, & hæretica. Nunc quæro quare illis sunt impossibilia, nisi quia sola parva gratia instructi, absente gratia efficaci, non habent potentiam veram & relative expedi-

peditam, ad actualem majorem oppositæ cupiditatis delectationem superandam; ergo illa propositio, quasi e proprio fonte, fluit ex systemate delectationis superioris, & relative victricis.

II. Prop. *Interiori gratia, in statu natura lapsa, nunquam resistitur.* Damnata est, ut *hæretica*. Quare vero ei nunquam resistitur? quia eum omnem effectum semper consequitur, cujus est capax relative ad oppositæ concupiscentiæ delectationem; si hæc superior fuerit, gratia velleitates tantum quasdam ad bonum excitabit, & sic ei non resistitur, sed est efficax; *Quia*, inquit Sanbovius, Tract. de gratia, *ponit omnem effectum ad quem ordinatur a Deo; facit velle, licet non plene, sed imperfecte.* Si vero cupiditatis delectatio sit inferior, gratia perfectum obtinebit effectum, bonumque opus efficiet; & sic non solum est efficax, sed & oppositæ delectationis victrix, & consequenter nunquam ei resistitur; ergo illa propositio ex systemate delectationis relative superioris, profluit.

III. Prop. *damnata ut hæretica: Ad merendum & demerendum in statu natura lapsa, non requiritur in homine libertas a necessitate, sed sufficit libertas a coactione.* Ratio est, quia voluntas agens per delectationem superiorem & relative victricem, licet non sit coacta, tamen necessitate antecedente determinatur ad unum; ergo cum mereatur per illum actum necessario positum, necesse est ut ad merendum sufficiat libertas a coactione; inde patet connexio istius propositionis cum delectatione relative superiori.

IV. Propos. *Semipelagiani admettebant prevenientis gratiæ interioris necessitatem ad singulos actus; etiam ad initium fidei: & in hoc erant hære-*

hæretici, quod uellent eam gratiam talem esse, cui posset humana voluntas resistere, uel obtemperare. Damnata est, ut falsa, nimirum quoad primam partem, & hæretica quoad secundam, quæ manifeste sequitur ex systemate delectationis relative superioris ac victricis; si enim impossibile sit, ut minor delectatio superiorem vincat; sequitur impossibile esse ut voluntas resistat superiori delectationi, qua insuperabiliter ad unum determinatur.

V. Propos. *Semipelagianum est dicere, Christum pro omnibus omnino hominibus mortuum esse, aut sanguinem fudisse.* Damnata est, ut falsa, temeraria, scandalosa, & eo sensu intellecta, quod Christus pro salute tantum prædestinatorum mortuus sit, tanquam impia, blasphemia, contumeliosa, divina pietati derogans, & hæretica. Ratio hujus Jansenii doctrinæ, est, quia Christus non est mortuus nisi pro iis, quibus Deus gratias vere sufficientes ad salutem præparavit; atqui in systemate Janseniano, præter delectationem gratiæ relative superiorem ac victricem, non dantur gratiæ vere sufficientes ad actum salutarem perfectum; & quibus dantur insuperabiliter obtinent effectum; ergo Christus non est mortuus pro iis qui non salvantur; illud autem argumentum eruitur ex systemate delectationis relative superioris; ergo.

Confirmatur Propos. quia ex D. Augustino, lib. de gratia Christi, c. 47. valde difficile est liberum arbitrium concordare cum gratia efficaci; atqui si gratia efficax necessitet voluntatem, & necessitas cohæreat cum libero arbitrio, non erit difficile conciliare liberum arbitrium cum gratia efficaci: non enim alia in utroque conciliando difficultas est, quam ut per gratiam non necessitetur liberum arbitrium; ergo

ergo gratiæ efficacia non debet reperi ex systemate liberum arbitrium perimente.

Solvuntur Objectiones.

Objicies 1. Systema delectationis prævenientis relative superioris & per gradus victricis, est ipsissimum D. Augustini systema; ergo.

Prob. ant. Div. August. in *Epist. ad Galat.* ait: *Quod amplius nos delectat, secundum id operemur necesse est.* Ergo.

Respond. dist. antec. Quod amplius nos delectat, delectatione deliberata & electiva, conced. delectatione indeliberata, & consensum voluntatis præveniente; nego antec. Delectatio itaque duplex est: alia *indeliberata*, quæ est suavis quædam propensio versus bonum honestum, vel sensibile, excitata in nobis sine nobis. Alia *deliberata*, quæ rationis advertentiam & voluntatis consensum sequitur, & est nifus voluntatis versus bonum, sive honestum, sive delectabile. Porro Div. Augustin. non loquitur hic de delectatione indeliberata, ipse siquidem fatetur se non semper fecisse quod incomparabili affectu indeliberato magis placebat: *Et non faciebam*, inquit, lib. 8. Confess. cap. 8. *id quod & incomparabili affectu mihi magis placebat.* Et Tract. 26. in Joann. docet delectationem indeliberatam non necessitare: *Videte quomodo trahit Pater*, inquit, *docendo delectat, non necessitatem imponendo.* Ergo illa verba, *quod amplius delectat*, intelligit de delectatione deliberata, subsequente liberam voluntatis electionem & determinationem, similiter per ista verba, *secundum id operemur necesse est*, intelligit necessitatem consequentem, non antecedentem, ita ut illius effati hic sit sensus: si aliquid absolute & efficienter amplius

plius diligamus, necessario operamur secundum illud. Neque enim dicit: *Secundum hoc velimus necesse est*, sed, *secundum hoc operemur necesse est*. Per quod indicat se loqui de externa operatione imperata, quam vult nos operari, secundum quod magis volumus, sive secundum quod nobis facere placet.

Instab. 1. Ergo per hæc verba, quod amplius nos delectat Div. Augustin. intellexit amorem deliberatum; falsum conseq. Ergo.

Respond. nego minor. Cujus falsitas patet ex hoc quod addit Div. Doctor: *Manifestum est certe secundum id nos vivere, quod sectati fuerimus; sectabitur autem quod dilexerimus, itaque si ex adverso existant duo, praeceptum justitia, & consuetudo carnalis, id sectabitur quod amplius dilexerimus; ubi hæc verba: id sectabitur quod amplius dilexerimus, relativa sunt ad illa priora: quod amplius nos delectat, secundum id operemur necesse est; ergo idem significant, nempe amorem liberum & efficacem, quo unum præ alio eligimus, quo sensu dici solet; hoc amplius me delectat.*

Instab. 2. Amor deliberatus, non est delectatio, sed fructus delectationis præviæ; ergo per has voces: *Quod amplius delectat*, &c. Div. Augustin. non intellexit amorem deliberatum, sed indeliberatam delectationem.

Respond. nego primam partem anteced. Amor enim deliberatus simul est fructus delectationis, & delectatio, ac Div. Augustin. hic per tò, *delectare*, intellexit amorem deliberatum, ad quem significandum, illo verbo multoties usus est: sic *serm. 5. de verbis Apostol.* ait: *Concupiscentia mihi narrat de-*
lectatio-

Stationes, sed condelector legi Dei, id est, magis amo. Et tract. 26. in Joann. *Delectare in Domino, & dabit tibi petitiones cordis tui.* Per illud, *delectare*, significat amorem Dei meritorium; & per illud, *dabit tibi*, significat mercedem amoris; ergo delectationis liberæ.

Inst. 3. D. August. lib. de spiritu & littera c. 9. ait: *Per fidem confugiat ad misericordiam Dei, ut det quod jubet, atque inspirata gratia suavitate per Spiritum sanctum faciat plus delectare quod præcipit, quam delectat quod impedit.* Ergo ut præceptum Dei impleatur, necesse est ut præveniat nos indeliberata delectatio gratiæ, major, quam sit delectatio terrena impediens.

Resp. nego consequ. Nam hoc unum vult Div. Augustin. implorandam esse gratiam ulteriorem, ut libere exequamur præceptum, & per delectationem deliberatam, justitiam præferamus concupiscentiæ hætenus dominanti. Et vero in principiis Jansenii frustra hortaretur D. Augustin. ut confugeremus ad misericordiam & gratiam implorandam: si enim illecebra concupiscentiæ magis delectat, quam motio cælestis ad orationem excitans, oratio erit impossibilis; si minus delectat, oratio necessario sequetur.

Inst. 4. D. August. l. 2. de peccatorum meritis cap. 17. ait: *Tanto quidque vehementius volumus, quanto certius quam bonum sit novimus, eoque delectamur ardentius.* Unde sic arguo: delectatio indeliberata, est mensura volitionis deliberatæ, ita ut volitio eo sit vehementior, quo ardentior est delectatio præveniens & indeliberata; ergo volitio deliberata necessario sequitur majorem delectationem indeliberatam.

Resp.

Resp. nego ant. Nam D. Augustin. per tò *delectamur ardentius*, intelligit delectationem deliberatam & per tò *vehementius volumus*, intelligit actionem externam, unde sensus Div. August. est, nos eo vehementius opus bonum prosequi & agere, quo illud per electionem voluntatis ardentius amamus; quare inferius addit: *Tanto autem magis delectat opus bonum, quanto magis diligitur Deus, summum & incommutabile bonum.* Delectatio autem quæ concipitur propter amorem Dei, est deliberata, supponitque exercitium libertatis.

Inst. 5. In illo capit. 17. D. August. loquitur de delectatione gratiæ prævenientis, *Ut autem innotescat quod latebat, & suave fiat, quod non delectabat, gratia Dei est.* Atqui delectatio gratiæ prævenientis est indeliberata, lib. 1. ad Simpl. q. 2. *Voluntas ipsa, nisi aliquid occurrerit quod delectet, moveri nullo modo potest. Hoc autem ut occurrat, non est in hominis potestate.* Ergo loquitur de delectatione indeliberata.

Resp. dist. maj. Loquitur de delectatione gratiæ prævenientis, & simul de delectatione, quam voluntas concipit, libere sequendo motum gratiæ prævenientis, *conc.* loquitur de sola delectatione gratiæ prævenientis, *nego maj.* Diligenter ergo perpendi debent verba D. August. ut cognoscatur quando de indeliberata gratiæ delectatione loquitur, & quando de ea, quam, per motionem gratiæ, libere concipit.

Instab. 6. In conflictu duplicis delectationis præviæ & indeliberatæ, minor non potest superare majorem; ergo.

Respond. nego ant. Cum Div. Thom. 3. part. q. 70. art. 4. dicente: *Quod minima gratia possit resistere cuilibet concupiscentia, ac vitare omne peccatum mortale.*

Objicies 2. D. August. gratiæ efficaciam repetit ex omnipotentissima Dei potestate: *Sine dubio*, inquit lib. de corrept. & gratia c. 14. *Habens humanorum cordium quo placeret inclinandorum omnipotentissimam potestatem.* Atqui Dei omnipotentix nemo potest resistere; ergo gratia necessitat ad consensum.

Resp. dist. maj. Gratiæ efficaciam repetit ab omnipotentissima potestate, simul & scientia, quatenus nimirum Deus tot habet modos voluntatem humanam movendi, ut videat aliquem, quo reipsa flectenda sit, *conced.* gratiam repetit ab omnipotentissima potestate, quæ imprimat motionem irrepudiabilem; *negō major.* Itaque inter gratias innumeras, quarum aliæ præsciuntur sortituræ, aliæ non sortituræ, effectum, in his, vel illis circumstantiis, potest Deus pro boni voluntate illas dare, quas prævidit suum effectum sortituras, sicque voluntatem humanam, quo voluerit, infallibiliter flectere; unde D. Aug. lib. de spiritu & littera c. 3. sic se explicat: *Deus habet humanorum cordium, quo placet, inclinandorum omnipotentissimam voluntatem, non sic tamen ut eis adimat liberum arbitrium, quo bene vel male utentes, justissime judicentur.*

Inst. 1. D. August. lib. de corrept. & gratia c. 12. de gratia huic statui necessaria loquens, ait: *Subventum est igitur infirmitati humana, ut divina gratia indeclinabiliter & insuperabiliter ageretur.* Ergo nec voluntas non potest gratiæ resistere.

Respond. negō conseq. Nam verbum, *ageretur*, sumitur pro, *corroboraretur*, unde voces, *indeclinabiliter, insuperabiliter*, non cadunt in ipsam voluntatem, quasi a gratia ita moveretur, ut ei resistere non posset, sed cadunt in ipsam concupiscentiam, & adversitates hujus vitæ,

tæ, a quibus voluntas, gratia divina corroborata, superari non potest, si gratiæ firmiter obtemperare voluerit; quare D. August. addit: *Et ideo quamvis infirma, non tamen deficeret, neque adversitate aliqua vinceretur.*

Inst. 2. D. Aug. *lib. de pecc. meritis c. 19.* gratiam vocat, *Victricem delectationem*; atqui non est victrix, nisi quia oppositam concupiscentiam gradibus superat; ergo.

Respond. nego min. Gratia enim dicitur *victrix*, quia facit ut voluntas, ipsi libere cooperans, vincat oppositam concupiscentiam; non autem ideo *victrix* dicitur, quod, propter sui intensionem, vincat voluntatem, eamque resistere impotentem faciat, nam *lib. de spiritu & litt. c. 33.* ait: *Consentire autem vocationi Dei, vel ab ea dissentire propria voluntatis est.*

Inst. 3. Necessitas mutabilis & relativa non officit libertati; atqui talis est necessitas per delectationem relative superiorem inducta; ergo.

Resp. nego maj. Necessitas enim agendi, eo ipso quod oriatur ab aliquo antecedente liberum voluntatis exercitium, eodem prorsus modo se habet respectu actus voluntatis hic & nunc eliciendi, ac si necessitas absoluta esset & immutabilis; ergo hic & nunc tollit actus libertatem.

Instab. 4. In systemate delectationis victricis & relativæ necessitatis, voluntas retinet potentiam ad oppositum; ergo & libertatem.

Resp. dist. antec. Retinet potentiam absolutam, *conc. relativam & expeditam, nego antec.* Porro, ut jam dictum est, ad veram libertatem requiritur ut voluntas hic & nunc, & comparate ad præsentis sui circumstantias, possit agere vel non agere; ergo ut sit & dicatur libera, debet habere potentiam relativam & expeditam ad hic & nunc agendum.

Charmes, Theol. Schol. Tom. III. V A R.

ARTICULUS II.

Systema Scholasticorum circa gratia efficaciam.

I. Systema.

EST Thomistarum, docentium gratiæ efficaciam consistere in prædeterminatione physica, quæ, juxta illos, est prævia quædam qualitas transiens, seu, motio quædam virtuosa & activa causæ secundæ, a Deo solo impressa antecederet ad voluntatis actum, ad quem illam physice ita prædeterminat, ut repugnet omisio actus ad quem prædeterminatio datur, sicut repugnat actum illum, sive bonum, sive malum, poni absque illa prædeterminatione, quæ consequenter est per se & essentialiter connexa cum effectu ad quem datur, illumque infallibiliter & ex natura sua infert.

Dicitur 1. *prædeterminatio*, quia antecedit consensum voluntatis, *Non prioritate durationis, seu temporis*, inquit Gonet disput. 6. de concord. libert. cum præd. *sed duntaxat natura, seu causalitatis & dependentia.*

Dicitur 2. *Physica*, addit Gonet, *Non quod forma naturalis sit, sed quia ex propria essentia & ab intrinseco est efficax independenter a quocumque creato consensu, quod est esse physicum Theologice, non Philosophice, quod ut clarius intelligas.*

Nota, Thomistas duplicem agnoscere gratiam; *Prima*, est sufficiens, seu excitans, in actibus supernaturalibus indeliberatis intellectus & voluntatis consistens, quæ præcise, & qua talis, dat tantum posse agere, ita ut voluntas nunquam sit consensus datura, nisi illi gratiæ Deus addat gratiam physice prædeterminantem.

Secunda gratia, est efficax, seu physice prædeterminans, quæ natura antecedit consensum, atque ita voluntatem ad illum determinat, ut posita illa prædeterminatione, non possit voluntas in sensu composito dissentire, seu non possit cum tali gratia conjungere dissensum, ex quo concludunt necessariam & essentialem esse connexionem inter prædeterminationem, & actum, ad quem prædeterminatio datur.

Cum ergo voluntas libere consentit, tria occurrunt:

1. Gratia sufficiens quæ dat posse velle, & agere.
2. Gratia efficax, quæ voluntatem ad consensum physice prædeterminat, datque velle & agere, cum sit motio applicans ad actum, ad quem gratia sufficiens excitabat.
3. Ipse consensus & gratia concomitans, sicque gratiam efficacem constituunt mediam inter gratiam sufficientem & effectum liberum, asseruntque eam afficere actum secundum, quatenus est reductio potentix voluntatis ab actu primo ad actum secundum, quæ proinde ab actu, quem vi sua efficit, sejungi non possit. His diligenter notatis sit:

CONCLUSIO.

Gratia efficacitas non potest repeti ex prædeterminatione physica.

Prob. 1. In systemate prædeterminationis physicæ, gratia ex natura sua infallibilem & essentialem habet cum consensu voluntatis creatæ connexionem; atqui gratia efficax, qualis secundum fidei doctrinam admittenda est, non habet ex natura sua infallibilem & essentialem cum consensu voluntatis connexionem; ergo efficacia gratiæ non est repetenda ex prædeterminatione physica. *Probat. minor.* Gratia, cui

potest humana voluntas dissentire, non habet ex natura sua infallibilem & essentialem cum consensu voluntatis connexionem; atqui gratiæ efficaci, qualis secundum fidei doctrinam admittenda est, humana voluntas potest dissentire; ut constat tum ex Scriptura, Prov. 1. *vocaui & renuistis*. Tum ex Conc. Trid. sess. 6. can. 4. definiente: *Si quis dixerit liberum arbitrium hominis a Deo motum & excitatum nihil cooperari assentiendo Deo excitanti atque vocanti . . . neque posse dissentire si velit . . . anathema sit*. Ergo, &c. minor. est de fide; itaque.

Prob. maj. Posse gratiæ dissentire, est posse cum gratia conjungere negationem actus ad quem datur; atqui cum gratia, quæ ex natura sua infallibilem & essentialem habet cum consensu voluntatis connexionem, non potest conjungi negatio actus ad quem datur; ergo.

Resp. Thomistæ voluntatem illi gratiæ dissentire posse, non quidem in sensu composito, sed in sensu diviso. Quod ut intelligas:

Nota: Cum Alvarez, lib. 2. responsionum capit. 1. num. 34. sensum compositum non sic intelligi debere, *Quod videlicet quando gratia efficax est in voluntate, non possit voluntas non agere actum illum ad quem determinatur, ablata vero motione possit non agere*. Hic enim sensus confectus fuit a Calvino, (& Jansenio) .. sensus igitur legitimus illius propositionis: homo præmotus, non potest dissentire: In sensu composito accepta, est: hac duo simul esse impossibile, quod nimirum auxilium efficax ad consentiendum, sit in homine, & homo dissentiat. Rem sic explicat Gonet: *Efficaci Dei motione posita in voluntate, inquit, liberum arbitrium potest dissentire in sensu diviso, quia etiam, prout stat sub tali motione, semper retinet*

net potentiam proximam & expeditam ad dissentiendum. Non potest tamen dissentire in sensu composito, quia cum talis motio inferat infallibiliter consensum, & ille sit in eodem instanti temporis cum illa, nunquam potest componi cum actuali dissensu. Sed

Contra est 1. Quia hæc implicata & obscura explicatio sensus compositi & divisi, non videtur cohærere cum Canone Trident. hic enim clare innuit hominem, etiam in sensu composito gratiæ Dei moventis & excitantis, id est eo ipso momento, quo Deus voluntatem incipit movere, posse dissentire si velit; ergo.

Contra est 2. Quia distinctio illa, qualem eam explicant Thomistæ, involvit contradictoria, nam, juxta ipsos, 1. Impossibile est componi dissensum actualem cum gratia prædeterminante, ideoque non potest voluntas dissentire in sensu composito. 2. Potentia dissentiendi proxima & expedita cohæret cum gratia prædeterminante voluntatis consensum, adeoque voluntas potest dissentire in sensu diviso. Atqui duæ illæ propositiones sibi invicem contradicunt, dum secunda asserit dari potentiam proximam & expeditam ad dissensum, qui in prima asseritur impossibilis; ergo.

Prob. 2. Gratia physice prædeterminans videtur tollere libertatem; ergo, &c. *Prob. ant.* Quod inducit necessitatem antecedentem & ineluctabilem, tollit libertatem; atqui talis videtur esse gratia physice prædeterminans; ergo, &c. 1. *Videtur inducere necessitatem antecedentem*, nam quod est independens ab exercitio libertatis, & ex virtute sibi intrinseca infallibiliter est connexum cum voluntatis operatione, inducit necessitatem, quæ non provenit ex libertatis exercitio; atqui prædeterminatio physica; est independens ab exercitio libertatis,

tis, & ex virtute sibi intrinseca infallibiliter est connexa cum voluntatis operatione; ergo inducit necessitatem antecedentem. 2. *Videtur inducere necessitatem ineluctabilem*, ineluctabilis enim est necessitas, quæ tollit indifferentiam ad actum oppositum, atqui prædeterminatio physica tollit indifferentiam ad actum oppositum: nam physica prædeterminatio & indifferentia sunt duo contraria, quæ non possunt esse simul; ergo.

Probat. 3. Gratia efficax talis esse debet, ut cum ea salvetur dogma gratiæ vere sufficientis; atqui in systemate gratiæ physice prædeterminantis, non videtur salvari dogma gratiæ vere sufficientis; ergo.

Prob. min. Gratia vere sufficiens, secundum omnes Catholicos, potentiam confert ad agendum proximam, relativam, atque omnino expeditam; atqui in systemate Thomistico, non videtur dari talis gratia; ergo.

Prob. min. Gratia quæ prærequirit aliud superveniens auxilium, sine quo impossibile est ut actum exerat, proximam atque expeditam non confert potentiam ad agendum; atqui in systemate Thomistico, gratia sufficiens prærequirit aliud superveniens auxilium, nempe præmotionem physicam, sine qua impossibile est ut actum exerat; ergo.

Respondent Thomista ad major. Gratiam sufficientem nihil prærequirere ex parte potentiæ, seu ex parte principii, cum conferat homini quidquid necessarium est ut possit agere, licet indigeat gratia prædeterminante ut actu agat. Præmotio enim, juxta illos, non afficit potentiam seu actum primum, sed actum secundum: *Sicut enim*, inquit Alvarez disp. 79. n. 5. *Potentia visiva est sufficiens principium ad videndum, etiamsi actualis visio nunquam fiat nisi*

acce-

accedente lumine, & causa universali eam movente; ita similiter auxilium sufficiens ad credendum v. g. est vere sufficiens in suo genere; quamvis; ultra illud, sit simpliciter necessarium aliud auxilium efficax, quo Deus efficit ut homo credat. Sed:

Contra est 1. Quia gratia, ut sit vere sufficiens, non debet tantum dare potentiam expeditam ad posse agere, sed etiam ad agere; nam datur ut homo id faciat quod Deus præcipit; atqui Deus non præcipit homini ut possit observare mandata, sed ut illa de facto observet; ergo, &c. nec valet adducta oculi & luminis comparatio, alias sicut oculus, etiam perfecte sanus, non potest videre sine lumine, ita pariter homo non potest agere sine gratia efficaci; ergo, illa absente, nulla est in homine ad bonum salutare expedita facultas; ergo impossibilia ipsi sunt Dei mandata; ergo non est reus violati præcepti; ergo nec juste ob eorum transgressionem reprehendi, multo minus damnari potest; quæ omnia sicut falsa; ita & absurda.

Contra est 2. Quomodo gratia illa potest dici vere sufficiens, quæ, destituta auxilio efficaci, nunquam effectum assequitur, ac in tanta hominum, qui hætenus vixerunt, ac deinceps victuri sunt, multitudine, nunquam est assecuta, defectu auxilii prædeterminantis, quod homo non habet in sua potestate, neque immediate, cum a solo Deo imprimatur in nobis sine nobis libere cooperantibus, neque mediate, impetrando nempe auxilium uberius, nam illa impetratio esset pietatis actus; atqui, juxta doctrinam Thomistarum, ad omnem pietatis actum requiritur gratia physice prædeterminans, qua privatur qui gratiam tantum sufficientem habet; ergo non potest illud auxilium impetrare; ergo.

Solvuntur Objectiones.

Nota: Argumenta, quæ prædeterminantes ex auctoritate Scripturæ & Sancti Augustini desumunt, hic referre inutile duxi, tum quod facile solvi possint ex dictis; tum quod ex illis nihil concludi possit in favorem gratiæ physice prædeterminantis; Scriptura enim, & Div. Augustin. contra Pelagianos, astruentes absolutam gratiæ necessitatem, ut voluntas possit operari bonum, & operetur, de modo illius efficaciz altum servant silentium. Hic ergo restant solvenda quæ nobis ex Div. Thoma & rationibus theologicis, obijciuntur. Itaque.

Objicies 1. Div. Thom. admisit prædeterminationem physicam, qualem Thomistæ propugnant; ergo.

Resp. nego ant. Immo prædeterminatio physica repugnat doctrinæ Div. Thomæ, qui, 1. 2. quæst. 9. art. 6. ad 3. ait: *Deus movet voluntatem hominis, sicut universalis motor ad universale objectum voluntatis, quod est bonum sed homo per rationem determinat se ad volendum hoc vel illud, quod est vere bonum, vel apparens bonum.* Et lib. 1. contra gentes, capit. 68. *Dominiū quod habet voluntas supra suos actus, per quod in ejus est potestate velle, vel non velle, excludit determinationem ad unum.* Immo, in 2. distinct. 25. quæst. 1. artic. 1. dicit: *Liberum arbitrium non invenitur in illis quorum actiones non determinantur ab ipsis agentibus, sed à quibusdam aliis causis prioribus.* Atqui doctrina asserens voluntatem seipsam determinare ad volendum hoc vel illud; ex dominio, quod habet in suos actus, excludere determinationem ad unum, nec determinari ab aliqua causa priori, manifeste

festè repugnat gratiæ physice prædeterminanti; ergo.

Inst. 1. Div. Thom. quæst. 3. de potentia, artis. 7. ait: Sic ergo Deus est causa actionis cujuslibet in quantum dat virtutem agendi, & in quantum conservat eam, & in quantum applicat actioni. Ergo Deus applicat voluntates nostras ad actionem; atqui hoc est prædeterminare physice; ergo.

Resp. dist. 1. conseq. Deus applicat voluntates nostras ad actionem, per suum concursum cum voluntate nostra, *conced.* per motionem virtuosam nobis impressam, quam repugnat non esse conjunctam cum effectu, *nego conseq.* Deus itaque applicat voluntates nostras ad actum per concursum, cujus sint duo velut officia. 1. Movere virtutem causæ secundæ; 2. Cum causa secunda concurrere ad effectum, ad quod necesse non est ut recipiatur in causa secunda entitas aliqua ab ipso concursu distincta, ut constet de anima, quæ potest applicare aliquam suarum facultatum ad actionem, absque alia entitate distincta ab actu, ad quem eliciendum cum facultate concurrat.

Inst. 2. Idem, quæst. 24. de veritate, art. 8. ait: Gratia ad rationem suæ immutabilitatis liberum arbitrium pertrahit, ipsum conjungens Deo. Atqui gratia quæ ad rationem suæ immutabilitatis liberum arbitrium pertrahit, est ex natura sua efficax; ergo est prædeterminatio physica.

Resp. dist. major. Gratia patriæ ad rationem suæ immutabilitatis; &c. *conc.* gratia viæ, *nego maj.* Ibi enim Div. Thomas non loquitur de gratia viæ, sed de gratia patriæ, vi cujus beati confirmantur in bono, ac immutabiliter & necessario adhærent Deo.

Instab. 3. Idem, 1. 2. quæst. 10. artic. 4. ad
V 5 3. ait:

3. ait : *Quod si Deus movet voluntatem ad aliquid, impossibile est poni, quod voluntas ad illud non moveatur.* Ergo gratia ex natura sua est motio infallibiliter conjuncta cum effectu.

Resp. dist. antec. Impossibile est, impossibilitate consequente præscientiam divinam, *conc.* antecedente, & quæ oriatur ex natura motionis, *nego ant.* Ibi itaque Div. Doctor probare intendit voluntatem non necessitari a Deo : non necessitatur autem, quia, inquit in corp. *Omnia movet, Deus, secundum eorum conditionem, ita quod ex causis necessariis, per motionem divinam consequuntur effectus ex necessitate; ex causis autem contingentibus sequuntur effectus contingentes: quia ergo voluntas est principium activum non determinatum ad unum, sed indifferenter se habens ad multa; sic Deus ipsam movet, quod non ex necessitate ad unum determinat, sed remanet motus ejus contingens, & non necessarius, nisi in his ad qua naturaliter movetur.* Ergo D. Thom. nihil aliud vult probare quam quod voluntas a Deo non necessitetur.

Instab. 4. D. Thom. passim asserit causas secundas, etiam liberas, esse instrumenta Dei; ergo necesse est ut a Deo physice prædeterminentur & applicentur ad actus suos, sicut instrumenta determinantur & applicantur ab artifice.

Resp. dist. anteced. Asserit esse instrumenta Dei, activa, *conc.* mere passiva, *nego anteced.* Sunt quidem creature instrumenta Dei, quatenus illis uti potest ad exequenda sua consilia; at non sunt instrumenta mere passiva, quæ egeant determinari & applicari ad singulares actus suos, sicut panicillus determinatur & applicatur a pictore. Comparatio itaque D. Tho-

mæ

mæ analogæ est, non univoca. Et vero si Div. Thomas censuisset voluntates humanas ad actus suos liberos per Deum physice prædeterminari, simul Deum censuisset futura libera infallibiliter cognoscere in causis liberis: sic prædeterminandis; atqui hoc negat 1. part. 'quæst. 14. artic. 13. dicens: *Potest considerari contingens ut est in sua causa, & sic consideratur, ut futurum, & ut contingens nondum determinatum ad unum, quia causa contingens se habet ad opposita, & sic contingens non subditur per certitudinem alicui cognitioni. Unde quicumque cognoscit effectum contingentem in sua causa tantum, non habet de eo nisi conjecturalem cognitionem. Unde concludit futura contingentia a Deo infallibiliter cognosci non solum in suis causis, sed etiam prout unumquodque eorum est actu in seipso . . . unde infallibiliter a Deo cognoscuntur, in quantum subduntur divino conspectui secundum suam præsentialitatem. Infallibilitas ergo illius cognitionis desumitur ex divina præscientia, quod D. Thomæ ratiocinium manifeste contradicit prædeterminantium systemati.*

Obijcies 2. Gratia efficax, est motio prævia, ex sese essentialem habens cum effectu suo connexionem; ergo physice prædeterminat voluntatem ad actum.

Respond. nego anteced. Quia talis gratia foret necessitans, ut probatum est.

Instab. 1. Effectus formalis gratiæ efficacis, est determinare voluntatem ad actum; ergo habet ex natura sua infallibilem connexionem cum actu, ad quem datur.

Resp. dist. ant. Est determinare moraliter, inclinando scilicet & excitando ad actum per motionem, physicam quidem, sed repudiabilem, & cum actuali dissensu conjungibilem,

conc. determinare voluntatem ad actum, physice applicando per motionem irrepudiabilem, & cum actuali dissensu impossibilem, *negant.* Itaque gratia est motio prævia & physica, physice excitans & inclinans voluntatem ad actum, dando illi vires physicas & partes actui salutari, non tamen eam determinat ad actum; ipsa enim, ultra naturalem sui conditionem erecta per gratiam, actum suum liberum physice determinat.

Inst. 2. Si gratia efficax non prædeterminat physice voluntatem, voluntas libertate sua naturali determinat physice gratiam: falsum consequ. ergo.

Resp. nego seq. maj. Quæ supponit voluntatem & gratiam in actum influere tanquam duas causas, quarum alteram altera determinare debeat ad actualem influxum, quod est falsum; nam voluntas ut affecta & mota a gratia est causa totalis actus salutaris, ad quem non prædeterminatur physice per gratiam, neque ipsa gratiam determinat; sed ad quem se ipsa determinat per vires supernaturales a gratia acceptas, & consequenter non per libertatem naturalem tantum, sed per libertatem supernaturalem & divinitus factam per gratiam, cuius motionem & impulsus sequitur.

Inst. 3. Nisi Deus voluntatem physice prædeterminet per gratiam, sequitur Deum expectare consensum hominis, non facere; at consequens est hæreticum ex Conc. Arausicano II. Can. 4. *Si quis dixerit Deum expectare voluntatem nostram, ut purgemur a peccato, non autem facere ut velimus converti; resistit Spiritui sancto dicenti: preparatur voluntas a Domino, & operatur in nobis velle & perficere;* ergo.

Respond. dist. seq. maj. Sequitur Deum expectare

clare consensum hominis per vires a gratia præveniente acceptas, eliciendum, ita ut præcipuæ partes in toto hoc negotio gratiæ divinæ semper adscribantur, *conced.* per solas naturæ vires, ut volebant Semipelagiani, quos damnat Concil. Arausicanum; *nego antec.* Gratia ergo semper præit voluntati quam excitat, at vero posita illa prima gratia Deus aliquo modo expectat consensum hominis per vires a gratia acceptas dandum, ut homo simul concurrat cum gratia adjuvante, juxta illud: *Ego sto & pulso, si quis aperiet, intrabo.* Ita respondet Gamachæus Doctor Sorbonicus, in 1. 2. quæst. 111.

Objicies 3. Quod est indifferens ad agendum, debet determinari ab alio; atqui voluntas hominis est indifferens ad agendum; ergo debet determinari a Deo.

Respond. dist. maj. Si non habeat in se vim seipsum determinandi, *conc.* si vim illam habeat, *nego maj.* Porro voluntas hominis a Deo per gratiam completa & corroborata, habet vim seipsam ad agendum determinandi, nam habet liberum arbitrium a gratia Dei elevatum ad opus salutare perficiendum.

Objicies 4. Causa prima & primum movens præmovet physice; atqui Deus est causa prima & primum movens; ergo Deus præmovet physice.

Respond. dist. maj. Causa prima & primum movens præmovet physice, hoc sensu quod det, conservet, & compleat virtutem agendi causæ secundæ, *conc.* hoc sensu quod prædetermineat physice causam secundam liberam ad agendum, *nego maj.* Deus ergo in actibus salutaribus est causa prima ac primum movens, quatenus voluntatem, prius saltem natura quam agat, excitat, elevat, corroborat, & physice com-

complet ad agendum ; non quatenus physice prædeterminat voluntatem ad unum, cum illa prædeterminatio non videatur locum relinquere libertati, ut dictum est.

Instab. Si gratia physice prædeterminans locum non relinquat libertati, Thomistæ erunt hæretici, atqui falsum, & prohibitum asserere consequens; ergo.

Resp. nego seq. maj. Nam ut Thomistæ essent hæretici, necesse esset ut cognoscerent suum systema esse libertatis eversivum, vel ut Ecclesia id definiisset; atqui neutrum dici potest; nam, 1. Thomistæ negant ex suo systemate sequi ullam libertatis imminutionem, in quo catholice sentiunt, licet perperam ratiocinari videantur, 2. Non definivit Ecclesia libertatem everti per prædeterminationem physicam, immo post ejus & oppositi systematis discussionem in Congregationibus *de auxiliis* coram SS. PP. Clemente VIII. & Paulo V. habitis, Paulus V. decretum edidit, quo sancivit, donec aliud decerneretur, utrique parti liberum esse opinionem suam tueri sine censura opinionis oppositæ.

II. Systema.

Est eorum, qui se Augustinianos dicunt, gratiæ efficaciam repetentium ex cælesti quadam delectatione victrici, voluntatem ad consensum ita necessitante, ut ei moraliter sit impossibile tali gratiæ dissentire; ex qua morali impossibilitate dissentendi, sequitur infallibiliter & necessario consensus, nec tamen per illam tollitur libertas, quia, inquit, cum sit in genere morum, voluntatem relinquit flexibilem ad utramque partem, quamvis totam ejus lubentiam & inclinationem certissime & infal-

libi-

libiliter ad unam partem determinet ac necessitet, sive per superioritatem delectationis, ut volunt *Louvanienses*, sive per vehementiam motionis, ut volunt *Jueninus*, *Habertus*, &c. contra hoc systema.

C O N C L U S I O.

Gratia efficacia non debet repeti ex delectatione victrici voluntatem moraliter necessitante.

Prob. 1. Illud systema pugnat in terminis; ergo.

Probat. antec. Juxta illud systema, gratia efficax voluntatem ad consensum necessitat moraliter tantum, & tamen infallibiliter; atqui pugnat in terminis quod gratia voluntatem ad assensum necessitet moraliter tantum, & tamen infallibiliter; ergo.

Prob. min. Necessitas moralis, ea est, quæ licet difficile, immo difficillime, tamen quandoque superari potest, ita ut citra contradictionem supponi possit illam interdum superari: contra, necessitas infallibilis, ea est, quæ nunquam superari potest, ita ut citra contradictionem supponi non possit illam aliquando superari; atqui aliquando posse superari, & nunquam posse superari, pugnat in terminis; ergo pugnat in terminis, quod gratia voluntatem ad assensum necessitet moraliter tantum, & tamen infallibiliter.

Prob. 2. Illud systema male consulit, vel actus salutaris infallibilitati, vel actus ejusdem liberati; ergo.

Prob. ant. Ut consulatur actus salutaris infallibilitati, gratia efficax debet certo certitudine metaphysica inferre futurum voluntatis consensum: e contra, ut consulatur actus ejusdem

dem libertati, gratia efficax debet esse talis; cui voluntas dissentire possit, si velit; atqui illud systema illa duo conciliare non potest; ergo.

Prob. min. Ut gratia efficax certo, certitudine metaphysica, inferat futurum voluntatis consensum, in systemate non supponente usum scientiæ conditionatorum, debet ejus efficacia necessario & essentialiter esse connexa cum futuro voluntatis consensu; contra, ut voluntas possit gratiæ efficaci dissentire, debet esse cum eodem consensu connexa tantum contingenter, ita ut sine illo esse possit; atqui impossibile est, ut gratia sit essentialiter simul & contingenter connexa cum voluntatis consensu; ergo illud systema hæc duo non potest conciliare. 1. Quod gratia efficax certo certitudine metaphysica inferat futurum voluntatis consensum. 2. Quod talis sit, ut ei voluntas dissentire possit, si velit; ergo.

Solvuntur Objectiones.

Obicies 1. Divus Paulus habuit gratiam conversionis necessitantem, juxta illud D. August. lib. de gratia & lib. arb. cap. 5. *Ut de calo vocaretur, & tam magna & efficacissima vocacione converteretur, gratia Dei erat sola, quia merita ejus erant magna, sed mala.* Ergo gratiæ efficacia reperitur ex motione victrici voluntatem ad consensum necessitante.

Respond. nego consequ. Neque enim valet consequentia a particulari ad universale. Certum autem est, apud omnes, Deum habere in thesauris omnipotentiae suæ gratias, quæ, si darentur, prædeterminarent ac necessitarent moraliter; non ergo hic quaeritur utrum Deus possit

possit aliquam dare gratiam ita intensam ut moraliter necessitet, sed quæritur, utrum essentia gratiæ efficacis consistat in eo quod voluntatem moraliter necessitet, quod negamus, alioqui omnis gratia efficax moraliter necessitaret, & quæ non necessitaret non esset efficax, quod & Scripturæ & experientiæ repugnat. Non est ergo de essentia gratiæ efficacis, ut necessitet moraliter, neque ut non necessitet moraliter.

Obicies 2. Ea est voluntatis per peccatum infirmatæ conditio, ut semper morali necessitate id velit, quod eam magis delectat indeliberate; ergo.

Resp. nego antec. Quod repugnat, tum experientiæ; habemus enim ex intimo conscientiæ testimonio nos inspirationibus divinis quoadque multa cum difficultate obsequi, & virtutis actum ibi elicere, ubi vitium magna cum facilitate committi posset; ergo tunc agimus citra moralem impotentiam aliter agendi; ergo citra ullam necessitatem agendi bonum, quod agimus. Tum Scripturæ, Matth. 11. *Regnum calorum vim patitur, & violenti rapiunt illud.* Ergo homo sibi vim facere debet ad opus salutare agendum cum gratia efficaci; atqui si gratia efficax semper imponeret necessitatem moralem agendi, homo non deberet vim sibi facere ad consentiendum gratiæ & agendum opus salutare: immo deberet potius sibi vim facere ad dissentiendum gratiæ, & non agendum opus salutare; ergo.

Obicies 3. Necessitas moralis nihil officit libertati; ergo gratiæ efficacia recte repeti potest ex delectatione, seu motione moraliter necessitante.

Resp. dist. ant. Necessitas moralis superabilis nihil officit libertati, *conc.* necessitas moralis
lis

lis insuperabilis, *nego ant.* Porro qui gratiæ efficaciam repetunt ex necessitate morali, per necessitatem moralem, eam intelligunt, vi cuius actus semper fit, actusque contrarius, qui est moraliter impossibilis, nunquam fit: *Quæ sunt moraliter impossibilia*, inquit Habert, *nunquam existunt.* Talis ergo necessitas est insuperabilis; ergo, licet ab eis vocetur moralis, in rei veritate est physica, & consequenter libertatis everfiva.

Instab. 1. Causa, quæ agit delectando, & lubentiam voluntatis determinando, non inducit necessitatem physicam; atqui sic agit gratia moraliter necessitans; ergo.

Resp. nego maj. Nam visio Dei intuitiva delectando agit in beatis, atque lubentiam eorum voluntatis determinat; tamen beatis imponit necessitatem diligendi Deum physicam & simplicem, dum necessario, antecedenter, & irrepudiabiliter eorum voluntatem rapit delectatio orta ex bonitate Dei clare & intuitive visa.

Inst. 2. Viro sapienti & sui compoti nudo corpore per urbis plateas luce meridiana currere, moraliter ita est impossibile, ut nunquam id fiat; atqui tamen in hoc omittendo vere est liber; ergo libertas stat cum impossibilitate morali, vi cuius res nunquam fit.

Resp. nego maj. Quæ falso supponit impossibilitatem illam esse tantum moralem, cum vere & realiter sit impossibilitas physica; illa enim impossibilitas est physica, quæ procedit ex defectu unius ex physice prærequisitis ad agendum: atqui impossibilitas, qua vir sapiens & sui compos, nudo corpore per urbis plateas luce meridiana currere non potest, procedit ex defectu rationalis motivi, quod est unum ex physice prærequisitis ad agendum; ergo est impossibilitas physica qualem habet homo ad aman-

amandum malum, quatenus malum; ergo in hoc nullo modo est liber.

III. Systema.

Est Molina, & rigidiorum Molinistarum; gratiæ efficaciam repetentium a solo consensu voluntatis. Juxta hos gratia efficax ante consensum nullatenus differt a sufficiente, sed differt duntaxat penes consensum subsequentem: ita ut illud auxilium, inquit Molina, qu. 14. concordia, art. 13. disp. 40. Sive majus, sive minus in se sit efficax, dicatur, cum quo arbitrium pro sua libertate convertitur, cum tamen, nihil eo auxilio impediante, potuerit non converti, illud vero inefficax dicatur, cum quo arbitrium pro eadem sua libertate non convertitur, cum tamen potuerit converti. Unde in hac opinione gratia efficax a sufficiente distinguitur per solum voluntatis consensum. Contra hoc systema.

CONCLUSIO.

Gratia efficacia non est repetenda ex solo voluntatis consensu.

Probat. 1. Ex Scriptura, homo non potest semetipsum discernere in negotio salutis, ex 1. Cor. 4. Quis enim te discernit? quid habes quod non accepisti? atqui si gratiæ efficacia repeteretur ex solo hominis consensu, homo consentiens a non consentiente seipsum discerneret; ergo.

Prob. 2. Ex Div. August. lib. de Spiritu & littera cap. 34. dicente: Jam si ad illam profunditatem scrutandam quisquam nos coarctet, cur illi ita suadeatur ut persuadentur; illi autem non ita? duo sola occurrant interim, que respondere mihi placeat, o altitudo divitiarum, & nun-

¶, nunquid iniquitas apud Deum? hic Div. Doctor vult, ut qui ita suadentur vi internæ suasionis, ut etiam persuadeantur, majus beneficium accipiant, quam illi qui simpliciter suadentur; atqui hoc verum non esset, si efficacia gratiæ repetenda esset a solo voluntatis consensu; ergo.

Prob. 3. ratione. Gratia efficax in actu primo, de qua sola hic quæstionem movemus, debet esse prior consensu; ergo illius efficacia non est repetenda a consensu. *Conseq.* est certa, prius enim in suo esse constitui nequit per posterius.

Probat. antec. Licet gratia efficax in actu secundo includat essentialiter ipsum hominis consensum, tamen eadem in actu primo considerata, solum ordinem dicit ad consensum ad quem efficienter concurrit; atqui quod dicit ordinem ad aliquid, ad quod efficienter concurrit, est illo prius, neque enim effectus sua causa prior est; ergo.

Dices: D. Aug. lib. 12. de civit. Dei c. 6. ait: *Si aliqui duo equaliter affecti animo & corpore, videant unius corporis pulchritudinem, qua visa unus eorum ad illicite fruendum moveatur, alter in voluntate pudica stabilis perseveret; quid putamus esse causa, ut in illo fiat, in isto non fiat voluntas mala?* respondet: *Quid aliud apparet nisi unum voluisse, alium noluisse a castitate deficere;* ergo ratio cur gratia sit efficax, a consensu repetitur.

Respond. dist. conseq. A consensu repetitur tanquam a causa proxima, *conc.* tanquam a causa prima, *nego conseq.* Per causam proximam efficacitatis gratiæ, intelligitur cooperatio ipsimet gratiæ, seu consensus a voluntate per vires a gratia acceptas datus. Et per causam primam intelligitur virtus ipsa gratiæ ut certo & in-

fil.

fallibiliter illatura effectum, seu consensum voluntatis, hæc est a solo Deo, qui absoluta voluntate eam gratiam statuit conferre, cui voluntas certo consensura prævidetur, ut infra exponemus. Hanc responsionem nobis subministrat D. Thom. in c. 25. *Matth.* dicens: *Si quæris quare unus habet magis de gratia quam alter? dico quod ejus rei est causa proxima & causa prima: proxima est major conatus istius, quam illius: causa prima est divina electio.*

IV. Systema.

Est eorum, qui putantes gratiæ efficaciam vel humanitus esse inexplicabilem, vel explicandam esse ope scientiæ conditionerum, eam repetunt, *Vel ex motione duntaxat morali*, quæ voluntatem suadendo, inclinando & suaviter alliciendo, in bonum salutis inclinat, & infallibiliter adducit, sub lumine conditionerum scientiæ, *Vel ex congruitate*, seu attemperatione auxiliorum gratiæ ad hominis indolem & ingenium, aut ad varias temporis & personæ circumstantias: non quidem ex congruitate quæ antecederet ad prævisum voluntatis consensum certo & infallibiliter effectum suum esset habitura, nam sic esset ex sese efficax, iisdemque difficultatibus subjecta, quibus prædeterminatio moralis per se infallibilis; sed ex congruitate, in eo posita quod Deus gratiam opportune conferat, eo tempore, quo prævidit voluntatem esse consensuram, si daretur: magis enim homini congruum est, ut vocetur per gratiam, cui prævidit Deus eum consensurum, si daretur, quam per gratiam, cui homo prævisus est dissensurus.

Hi ergo efficaciam gratiæ repetunt a duobus;

1. Ab ipsa virtute gratiæ tanquam a principio
actio

activo. 2. A scientia Dei tanquam a principio directivo, ne scilicet Deus in concedenda gratia efficaci dicatur agere temere; nam temere non agit, non solum qui utitur modo *per se* infallibili ad obtinendum effectum; sed etiam ille, qui, quantumcumque medium *per se* fallibile sit, tamen videt illud in hac aut illa occasione, suum effectum obtenturum.

Circa hanc intricatissimam difficultatem aliquid positive asserere, non est mens mihi immo eam omnino prætermissem, nisi scholæ exercitium ejus tractationem a me exposulasset. Quare systema, quod probabilius mihi visum est, hic breviter exponam; itaque sit:

CONCLUSIO.

Probabilius est eorum systema, qui efficaciam gratia repetunt ex ipsa virtute gratia, tanquam a causa a qua effectus contingenter & libere egreditur in aliqua temporis differentia, sub directione scientia Dei media.

Prob. Ab eo repetenda est gratiæ efficacia, quo posito, rectissime conciliantur fidei nostræ circa libertatem hominis, & gratiæ divinæ operationem, dogmata; atqui posito systemate, quo gratiæ efficacia repetitur ab ipsa virtute gratiæ, tanquam a causa, a qua effectus contingenter & libere egreditur in aliqua temporis differentia, sub directione scientiæ Dei mediæ, rectissime conciliantur fidei nostræ dogmata, tum circa libertatem hominis, tum circa gratiæ divinæ operationem; ergo.

Prob. min. Fidei dogmata spectantia operationem gratiæ efficaciis & libertatem hominis sunt quinque:

1. Quod prædestinatio ad gratiam sit mere gratuita.

2. Quod

2. Quod gratia efficax per aliquid distinguatur a gratia mere sufficienti.

3. Quod libertatem nullatenus labefactet.

4. Quod sit speciale Dei beneficium.

5. Quod sit in manu Dei medium certissimum & infallibile ad voluntates nostras quocumque voluerit flectendas; atqui ista omnia rectissime conciliat supra dictum systema; ergo.

Prob. min. 1. Juxta hoc systema, Deus præsciens quibus gratiis voluntas esset consensura, & quibus esset dissensura, si darentur, has, vel illas dandas decernit ex mero suo beneplacito; ergo prædestinatio ad gratiam est mere gratuita; atque homini consentienti dici potest cum Apost. 1. ad Corinth. 4. *Quis te discernit?* nam ad hoc sufficit ut homo gratiam accipiat a Deo cum illa speciali misericordia, ut effectum suum consecuturam prævideat, cum alia gratia concedi posset aliunde sufficiens, quæ eundem effectum non obtineret; sed hoc fit a Deo in præsentī systemate; ergo.

2. Gratia efficax distinguitur a gratia mere sufficienti, quia est id a quo, tanquam a causa, operatio nostra libere & contingenter egreditur in aliqua temporis differentia, quatenus in iis circumstantiis confertur, in quibus Deus prævidet suum habituram effectum, quod de gratia mere sufficienti dici non potest, cum ex ea operatio libera egressura non sit.

3. Gratia efficax sic exposita libertatem nullatenus labefactat; quia licet ex suppositione præscientiæ divinæ necesse sit necessitate absoluta gratiam quam Deus decernit, cum prævisione boni exitus, esse illaturam effectum, hæc necessitas est tantum consequens, ortum nimirum ex præscientia infallibili, quæ liberam voluntatis determinationem supponit; atqui necessitas consequens est amica libertatis; ergo

liber.

libertas nullatenus labefactatur sub potenti motione gratiæ efficacis.

4. Gratia efficax est speciale Dei beneficium, quia eam Deus misericorditer & ex mero beneplacito largitur talem, & tunc, quando videt effectum suum certissime consecuturam. Et licet entitative sit minor illa quæ alteri, vel eidem alio tempore datur, attamen moraliter & ratione doni, est quid majus, quia utilior futura est, & ex præscientia majoris utilitatis, & ea intentione ex parte dantis confertur; unde quando Deus eam confert, dicitur magis misereri, immo quandoque simpliciter misereri, ut docet D. Aug. *lib. 1. ad Simplicianum q. 2.* dicens: *quod si vellet etiam ipsorum (qui vocati non veniunt) misereri (efficaciter) posset ita vocare, quomodo illis aptum esset; ut & moverentur, & intelligerent, & sequerentur.*

5. Gratia efficax est in manu Dei medium certissimum & infallibile ad voluntates nostras quocumque voluerit flectendas, quia a scientia Dei infallibili, habet infallibilitatem absolutam & metaphysicam; nam ex hypothese quod Deus præviderit talem gratiam voluntatis consensum expressuram, absolute repugnat eam non exprimere talem consensum, quia absolute repugnat scientiam Dei falli; atqui gratia quam absolute repugnat non exprimere voluntatis consensum, illum infert infallibiliter infallibilitate absoluta & metaphysica; ergo gratia efficax est in manu Dei medium certissimum & infallibile ad voluntates nostras quocumque voluerit flectendas.

Hinc si Deus velit vel infidelem ad fidem, vel peccatorem ad poenitentiam, vel justum ad perseverantiam completam perducere, hoc favorabile decretum potest certissime exequi, gratias illas decernendo, quas videt conjungendos

das cum effectu, si darentur; hoc enim supposito necesse est necessitate metaphysica gratias illas intentum a Deo habituras effectum.

Solvuntur Objectiones.

Obijcies 1. Gratia efficaciam repetere ab ejus virtute, tanquam a causa, a qua effectus contingenter & libere egreditur, est eam repetere a consensu; atqui ex dictis gratia efficacitas non repetitur a consensu; ergo.

Resp. nego major. Nam gratia efficaciam repetere ab ejus virtute, tanquam a causa a qua effectus libere egreditur, est eam repetere ab eo quod consensu prius est, cum gratia respectu consensus rationem causae efficientis obtineat; ergo non est efficaciam gratia repetere a consensu: nam causa efficiens definitur, *id unde est actus*, seu consensus; porro consensus non potest dici id unde est consensus, effectus enim est posterior sui causae, a qua necessario distinguitur.

Inst. Efficaciam gratia repetere ab ejus virtute, tanquam a causa a qua effectus libere egreditur, est gratiam efficacem explicare per efficacitatem, ut est in actu secundo; ergo per consensum.

Respond. dist. ant. Est gratiam efficacem explicare per efficacitatem ut est in actu secundo, ad quem in aliqua temporis differentia exprimendum tendit, *conc.* ut est in actu secundo quem formaliter includit, *nego ant.* Unde quia consideramus gratiam, ut est efficax in actu primo, sic non includit formaliter actum secundum, seu consensum, ad quem exprimendum ordinatur duntaxat; ergo illius efficacitas non repetitur a consensu quem praecedit.

Obicies 2. Gratia efficacia ex directione scientia media data, destruit gratia gratuitatem; ergo.

Prob. ant. Gratia ex directione scientia media data, decerneretur propter consensum praevisum conditionate futurum; ergo, &c.

Resp. dist. ant. Gratia decerneretur propter consensum, &c. particula, *propter*, significante causam finalem, *conca.* significante causam meritoriam, *nego anteced.* Hæc responsio est D. Thomæ, 1. p. quæst. 23. art. 5. ad 1. dicentis: *Usus gratia præscitus, non est ratio collationis gratia nisi secundum rationem causa finalis.* Itaque falsum est, quod consensus praevisus conditionate futurus, sit Deo motivum & regula concedendi gratiam iis, quos prævidet ea bene usuros; gratia enim ex mera Dei misericordia pro ipsius beneplacito confertur homini, non quia consensurus est, sed ut consentiat. Et vero multi prævidentur gratia consensuri, si daretur, quibus tamen non datur, ut patet exemplo Tyrionum & Sydoniorum, de quibus Christus, *Matth. 11.* asserit, *Si in Tyro & Sydone facta essent virtutes qua facta sunt in vobis, olim in cinere & cilicio pœnitentiam egissent.*

Instant. 1. Efficacia gratia ex directione scientia media data, pendeat a scientia Dei, atqui falsum consequens; ergo.

Respond. dist. maj. Pendeat a scientia Dei, improprie & directive, *conca.* proprie & efficienter, *nego major.* Porro nullum est absurdum, quod gratia efficacia pendeat a scientia Dei directive, id nimirum indicat D. Aug. lib. 1. ad Simplic. q. 2. *Nullius frustra Deus miseretur, inquit, cujus autem miseretur, sic cum vocat, quomodo scit ei congruere, ut vocantem non respuat.* Quibus verbis ostendit a scientia

Scientia Dei pendere, quod talis gratia concedatur, quæ consensum sit impetratura, quod est efficaciam gratiæ directive a scientia Dei pendere.

Inst. 2. Efficacitas gratiæ directive petita a scientia media, perfectissimum & absolutissimum Dei dominium in voluntates nostras destruit; ergo.

Resp. nego antec. Immo efficacitas gratiæ, petita directive a scientia media, probat absolutissimum Dei dominium in voluntates nostras, quas infallibiliter inclinare potest quocumque voluerit, & de illis facere quidquid efficaciter voluerit, quando ex infinitis, quæ in sua potestate habet, gratiæ auxiliis, ea selegit ac largitur, quibus prævidet emolliendam esse, penitusque frangendam humanæ voluntatis contumaciam, quod certe arguit perfectissimum Dei dominium in nostras voluntates.

Prob. antec. Fieri potest in systemate scientiæ mediæ, ut Deus nullum habeat medium efficax ad hominem convertendum; ergo.

Prob. antec. Fieri potest tantam esse humanæ voluntatis contumaciam, ut Deus videat eam restitutam omnibus & singulis gratis, quas ipsi posset decernere ad conversionem; ergo.

Resp. r. Permissa, non concessa hypothesi, *nego consequ.* quia si hominem ita contumacem vellet absolute salvare, posset illud suum decretum exequi per gratiam aut necessitantem, aut physice prædeterminantem, quarum possibilitatem non rejicimus, sed negamus illas dari ad actus salutes liberos.

Respond. 2. nego hypothesim: Tum quia repugnat finitæ creaturarum malitiæ; tum quia supponit voluntatis uniformitatem & constantiam in malo proposito, quæ pugnat cum ejus mutabilitate & flexibilitate in bonum, cujus operandi facilitas suavissima adducitur per gratiam.

& amotionem impedimentorum quæ rebelles hominum voluntates in malo detinere solent.

Objicies 3. In præsentī systemate, potest fieri ut homo se discernat in negotio salutis; atqui homo non potest se discernere in negotio salutis, juxta illud 1. Corinth. 4. *Quis te discernit?* Ergo.

Respond. nego antec. Nam se discernere in negotio salutis, est esse ex proprio quasi fundo auctorem sui meriti salutaris; at vero homo bonum salutare agens, non agit ex seipso, sive ex viribus naturæ sibi soli relictæ, sed ex viribus per gratiam acceptis; ergo se ipsum non discernit: hinc D. August. *lib. de gratia & lib. arb. cap. 6.* ait: *Si merita nostra sic intelligerent, (Pelagiani) ut etiam ipsa Dona Dei esse cognoscerent, non esset reprobanda ista sententia: quoniam vero merita humana sic prædicant, ut ea ex semetipso habere hominem dicant, prorsus rectissime respondet Apostolus, quis te discernit? quid habes quod non accepisti?*

Inst. 1. In præsentī systemate, fieri potest ut æquali gratiæ duobus hominibus concessæ, unus consentiat, alter dissentiat; atqui in hac hypothēsi, qui consentit, se discernit ab eo qui dissentit; ergo.

Respond. permissa, non concessa majore, nego min. Quia in tali hypothēsi discretio in eum refundi debet, cujus præcipuæ sunt & nobiliores in opere salutari partes; atqui gratia præcipuas & nobiliores partes habet in opere salutari, quandoquidem sine ea homo nihil boni supernaturalis cogitare, velle, aut operari potest; ergo in eam refundi debet discretio, *Non ego, ait Apostol. sed gratia Dei mecum.*

Dixi: permissa, non concessa majore: quia infidiose fit hypothēsis gratiæ æqualis datæ ei qui consentit, & ei qui dissentit, nam qui con-

sen-

sentit, recipit gratiam efficacem; qui vero dissentit, recipit gratiam duntaxat sufficientem; porro gratia efficax ratione beneficii est major, quam gratia mere sufficiens.

Inst. 2. In allata hypothese, qui consentit, nihil accipit a Deo, quod non accipiat qui dissentit; ergo æqualem gratiam uterque recipit.

Resp. dist. antec. Qui consentit, nihil accipit a Deo secundum entitatem & in ratione auxilii, quod non accipiat qui dissentit, *consecundum* moralem æstimationem, & in ratione beneficii, *nego ant.* Gratia ergo, quæ datur illi qui consentit, licet non sit major secundum suam entitatem physicam, ea quæ datur ei qui dissentit, quia tamen datur in iis circumstantiis, in quibus prævidetur habitura effectum, & ex efficaci intentione ut effectum habeat, longe majus est beneficium secundum æstimationem moralem, quam gratia data in iis circumstantiis in quibus prævidetur non habitura effectum. Deus enim erga consentientem habet specialem benevolentix affectum, quem non habet erga dissentientem.

Inst. 3. Consensus prævisus conditionate futurus, est causa cur ille qui consentit, majus a Deo recipiat beneficium; ergo semper recurrit hominem consentientem esse causam suæ discretionis.

Resp. nego ant. Causa enim cur qui consentit majus accipit beneficium, est solus Deus, qui gratuito ei donat gratiam, quam prævidit expressuram consensum salutarem, quem homo per solas naturæ vires non potest producere; ergo qui consentit, non est causa suæ discretionis, sed Deus, qui *dat quod jubet, cum adjuvat, ut faciat cui jubet*, ait D. Aug. lib. de gratia & lib. arb. cap. 15.

Instab. 4. In præsentī systemate, homo con-

sentiens, gloriari potest quod præ alio consenserit: atqui hoc repugnat Apostolo, 1. Cor. 4. dicenti: *Quid habes quod non accepisti? si autem accepisti, quid gloriaris quasi non acceperis?* Ergo.

Resp. nego major. Quia licet ejus, qui non consentit, culpa sit, quod non consentiat; tamen is, qui consentit, consensurus non esset, nisi Deus eum sic, & tunc vocasset, cum eum consensurum prævideret; ergo non potest gloriari quod præ alio consenserit; quia, ut ait Div. Augustin. lib. 1. ad Simplic. qu. 2. *Non est volentis neque currentis, sed miserentis Dei, qui hoc modo vocavit, quo aptum erat iis, qui secuti sunt vocationem.*

Inst. 5. Ille qui consentit gratiæ, potest gloriari quod consenserit simpliciter; ergo & quod consenserit præ alio.

Resp. dist. antec. Potest gloriari quod consenserit simpliciter, per gratiam, *conced.* quod consenserit per naturæ vires, *nego antec.* Itaque Apostolus per hæc verba: *quid gloriaris?* non excludit omnem gloriationem, sed eam tantum, qua homo de suo consensu gloriaretur, quasi eum non accepisset a gratia; in omni ergo sententia, quæ salvam relinquit libertatem, homo potest gloriari de bono opere, sed non nisi a gratia & per gratiam elicitò, quod permittit August. *Epist. 106.* qui ad hæc verba: *Si autem accepisti, quid gloriaris quasi non acceperis?* ait: *Hoc utique totum ideo, non ut homo non gloriatur; sed ut qui gloriatur, in Domino gloriatur.*

Inst. 6. In præsentī systemate, consensus illius, qui consentit, non est ipsi a Deo datus; ergo homo consentiens potest gloriari de aliqua re quasi non acceperit.

Respondi. nego antec. Nam Deus dando homini

mini gratiam, quam prævidit expressuram consensum, si detur, eamque dando ex speciali benevolentia affectu, & ex voluntate efficaci ut talis consensus eliciatur, merito dicitur dare illum consensum, cujus est causa primaria & principalis. Hinc homo gratia consentiens, non potest gloriari de suo merito, quasi ipse sibi illud fecerit, quia, ut ait Augustin. Epist. 106.

Et ipsum hominis meritum, donum est gratuitum.

Inst. 7. In præsentī systemate, consensus salutaris est a voluntate seipsam determinante; ergo non est donum Dei gratuitum.

Resp. dist. ant. Consensus salutaris, est a voluntate seipsam determinante, simul & a gratia tanquam a causa principali voluntatem excitante, ac elevante ad consensum, in quem prius saltem natura influit, *conc.* hoc constat ex Apost. dicente: *Non ego, sed gratia Dei mecum.* Est a voluntate seipsam determinante sola, *neg. antec.* Itaque consensus salutaris, est simul & indivisibiliter a gratia & a voluntate seipsam per gratia vires determinante; ita tamen ut sit a gratia tanquam a causa superiori & principali, quæ natura prius influit, tum in ipsam voluntatem quam complet ad consentiendum, tum in consensum, cui tribuit quidquid habet valoris & entitatis supernaturalis: a voluntate vero, tanquam a causa inferiori, subordinata, & dependente a gratia, a qua totam vim agendi supernaturaliter accipit. Quare consensus salutaris primario & principaliter gratia attribui debet.

Instab. 8. Si consensus salutaris, sit a voluntate seipsam determinante, etiam ut a causa inferiori & subordinata, gratia erit versatilis, pedissequa voluntatis, & subjecta libero ar-

bitrio ; atqui Semipelagianum consequens ; ergo.

Resp. Nego sequel. maj. quoad omnes partes .

1. *Enim gratia non est versatilis* ; id enim dicitur versatile , quod indifferens ad hoc vel illud , in partes oppositas flecti potest ; atqui gratia non potest flecti in partes oppositas , v. gr. in bonam vel malum : est enim de se determinata ad bonum , ad quod movetur quavis impedibiliter , neque illa quis uti potest ad malum ; ergo.

2. *Non est pedissequa voluntatis humana* , quia non supponit aliquem conatum ex solis naturæ viribus productum , cujus intuitu detur , ut volebant Semipelagiani , sed contra voluntas est pedissequa gratiæ , quæ in omni opere saluari voluntatem prævenire necessario debet , ita ut sine gratia præveniente nullum omnino possit actum salutarem efficere .

1. *Gratia non est subiecta libero arbitrio* . Neque enim pendet a libero arbitrio ut habeatur , & talis , vel talis sit virtutis ; ergo non est subiecta libero arbitrio , immo liberum arbitrium sibi subicit , illud siquidem non agit , nisi in virtute gratiæ , cui subordinatur tanquam causa inferior causæ superiori , per quam agitur quomodo illi aptum est ut & moveatur , & sequatur , ut ait D. Aug. *ad Simplic. qu. 2.* qui , *Epist. 107.* loquens de gratiæ virtute , ait : *Vocatio illa alia atque secreta sic agit sensum , ut accommodet assensum .*

Instab. 9. Juxta præsens systema , voluntas prævie gratiam applicabit ad actum ; ergo gratia subicitur liberæ voluntatis determinationi .

Resp. nego anteced. Immo ipsa voluntas per motionem gratiæ , qua afficitur , applicatur ad actum , sed impedibiliter , cum illa gratiæ motio

tio relinquat voluntati facultatem expeditam
dissentiendi.

Instab. 10. Juxta præsens systema, prius erit
voluntatem sese determinare ad actum, quam
gratiam inferre ipsum actum; ergo voluntas
gratiam prævie applicabit ad actum.

Resp. nego antec. Quia voluntatem sese de-
terminare ad actum, nihil aliud est, quam vo-
luntatem actum inferre & elicere; voluntas
autem non infert actum, nisi quatenus est af-
fecta per gratiam prævie moventem, ergo non
prius voluntas sese determinat ad actum, quam
gratia eundem actum inferat; sic dum ferrum
acuminatum pungit, non prius ferrum, non
prius acuminitas pungit, sed ferrum quatenus
acuminatum: ita pariter voluntas actum infert
quatenus affecta per gratiam, a qua virtutem
sese salutariter movendi accipit.

Inst. 11. In præsentī systemate, Deus expe-
ctabit voluntatem nostram, ut bonum velimus
& agamus; atqui hoc est damnatum in Conc.
Arausicano II. his verbis: *Si quis ut a peccato
purgemur, voluntatem nostram Deum expectare
contendit . . . resistit Spiritui sancto dicenti;
præparatur voluntas a Domino; ergo, &c.*

R-spond. nego maj. Intellectam in sensu Con-
cilii Arausicani, nam juxta præsens systema,
necesse est ut Deus voluntatem nostram præ-
veniat, præparet, ac compleat, ut ipsa velit
bonum salutare; ergo voluntatem non expe-
ctat. Porro Conc. Arausicanum damnat erro-
rem Semipelagianorum docentium hominem ex
solis naturæ viribus posse initium fidei & bo-
næ voluntatis concipere, Deumque expectare
bonum illud desiderium naturale, ut gratiam
det; quod ut hæreticum rejiciunt omnes Ca-
tholici cum D. August. Epist. 106. dicente:
Cum fides impetrat justificationem, non gratiam

Dei aliquid meriti precedit humani, sed ipsa gratia meretur augeri, ut aucta mereatur persici, comitante, non ducente, pedissequa, non pravia voluntate, quæ per gratiam prævenientem præparatur a Domino.

C A P U T III.

De dispensatione & distributione gratiæ
sufficientis.

Nota 1. **H**IC non-esse quæstionem, 1. Utrum omni tempore & momento singulis hominibus detur gratia sufficientis; *Certum est enim*, gratiam sufficientem, quæ est inspiratio, transiens, non perpetuo & indefinenter, sed certis tantum vicibus & temporibus dari, juxta illud Psalmi 90. *Cum ipso sum in tribulatione*, id est, pro loco & tempore opportuno; quod sufficit, ut homo dicatur habere gratiam sufficientem ad salutem consequendam.

2. *Non est quæstio*, utrum singulis hominibus ea semper detur gratia sufficientis, per quam proxime & sine ulteriori auxilio possint bonum salutare operari, tentationes superare, &c. *Certum est enim*, quandoque dari gratias remote tantum sufficientes, quibus si bene uterentur homines, proxime sufficientem obtinerent, ut docet D. August. lib. 3. de lib. arb. cap. 22, dicens: *Dum quis ignorat quid sibi agendum, ex eo est, quod nondum accepit: sed hoc quoque accipiet, si quod accepit bene usus fuerit, accepit autem ut pie & diligenter quarat, nimirum per gratiam orationis.*

Nota 2. Cum adulti & infantes partiantur genus humanum, ut plene dignoscatur gratiam sufficientem omnibus hominibus dari; videntum.

dum est, 1. An detur omnibus adultis, 2. Utrum detur infantibus.

Q U Æ S T I O I.

Utrum gratia sufficiens detur omnibus adultis?

Nota: **A** Dulti, vel sunt fideles, vel infideles; fideles; vel sunt iusti, vel peccatores; quæritur ergo utrum detur gratia sufficiens, 1. Iustis ad implenda præcepta; 2. Fidelibus peccatoribus ut a peccato resipiscant; 3. Infidelibus ut ad fidem adduci possint. Tribus articulis.

A R T I C U L U S I.

Utrum omnibus iustis detur gratia sufficiens ad præcepta implenda?

Nota: **J** Ansenius Yprensis, docet; *Aliqua præcepta hominibus iustis volentibus & comitantibus, secundum presentes quas habent vires, esse impossibilia; deesse quoque illis gratiam qua possibilia fiant. Contra hanc nefandam doctrinam:*

C O N C L U S I O.

Iustis omnibus, urgente præcepto, datur a Deo gratia vere & relative sufficiens ad servanda omnia præcepta; est de fide.

Prob. 1. Ex Script. 1. Cor. 10. ubi de omnibus iustis dicitur: Fidelis Deus est, qui non patietur vos tentari supra id quod potestis, sed faciet etiam cum tentatione proventum, id est, auxilium, ut possitis sustinere: ad quæ verba

D. August. lib. de Pastoribus cap. 5. ait : *Ne timeas, non deerit in tentationibus ille in quem credidisti*. Atqui si Deus non conferret justo gratiam vere & relative sufficientem ad implendum præceptum, dum urget, pateretur illum tentari supra id quod potest, nec faceret cum tentatione proventum, id est, facultatem sustinendi, sed deesset in tentationibus; ergo.

Matth. 11. *Jugum meum suave est*. Et Jo: 5. *Mandata ejus gravia non sunt*. Atqui jugum Christi non esset suave, ejusque mandata essent gravissima, si justis non daretur gratia vere & relative sufficiens ad illa mandata observanda; ergo.

Prob. 2. Ex Conciliis; Arausicano II. can. 25. *hoc etiam secundum fidem catholicam credimus, quod, accepta per baptismum gratia, omnes baptizati, Christo auxiliante & cooperante, qua ad salutem anima pertinent, possint ac debeant, si fideliter laborare voluerint, adimplere*. Ergo omnes baptizati, a fortiori omnes justi, habent gratiam vere & relative sufficientem, sine qua præcepta non possunt salutariter impleri.

Conc. Trid. sess. 6. can. 18. definit: *Si quis dixerit, Dei præcepta homini etiam justificato & sub gratia constituto esse ad observandum impossibilia, anathema sit*. Cujus definitionis rationem reddit cap. 11. his D. Augustini verbis: *Deus impossibilia non jubet, sed jubendo monet & facere quod possis, & petere quod non possis, & adjuvat ut possis*. Quibus verbis aperte significatur hominem habere gratiam vel proximè, vel remote sufficientem ad præcepta implenda.

Prob. 3. Ex D. Aug. lib. de natura & gratia cap. 26. *Cum Deus, inquit, impium ad perfectam sanitatem, hoc est, ad perfectam vitam, just-*

justitiamque perduxerit, non deserit, si non deseratur, ut pie semper, justeque vivatur. Atqui si Deus justis, urgente præcepto, non concederet gratiam vere & relative sufficientem, qua possent illud implere, vel saltem uberius implorare auxilium ut impleatur, certe prius justum desereret, quam ab eo deseretur; ergo, &c. Et cap. 69. ait: Eo ipso, quo firmissime creditur Deum justum & bonum impossibilia non potuisse præcipere, hinc admonemur, & in facilibus quid agamus, & in difficilibus quid petamus.

Hinc jure merito Innoc. X. & Alex. VII. ut hæreticam damnarunt primam prop. Jansenianam, jam a Pio V. & Gregorio XIII. damnatam in hac prop. Bajana: *Definitiva hac sententia, Deum homini nihil impossibile præcipisse, falso tribuitur Augustino, cum Pelagii sit.*

Nota: Argumenta quæ Janseniani opponunt
1. Ex gratia efficaci, sine qua asserunt justum nihil posse: 2. Ex impotentia relativa nonnullorum justorum ad aliqua præcepta hic & nunc observanda, non referemus; ea enim jam solvimus, ubi gratiam dari vere & relative sufficientem, probavimus. Itaque:

Solvuntur Objectiones.

Objectiones 1. Exemplum S. Petri, qui justus erat tunc cum negavit Christum; atqui tunc ipse defuit gratia relative sufficiens, ut posset Christum non negare; ergo.

Resp. permissa maj. dist. min. D. Petro fuit gratia relative sufficiens, qua posset proxime resistere tentationi & Christum non negare; *conc.* qua posset remote Christum non negare *neg. maj.* Itaque D. Petrus, quando negavit Christum, habebat gratiam orationis & humilitatis, qua

qua si bene usus fuisset, obtinisset gratiam proxime sufficientem, per quam tentationi restitisset, nec Christum negasset; hoc satis aperte tradit D. Aug. lib. de corr. & grat. c. 9. dicens: *Dixerat & ipse (Petrus) in abundantia sua: animam meam pro te ponam: Sibi festinando tribuens, quod ei fuerat postea a Domino largiendum.*

Dixi: *permissa maj.* quia D. Petrus quando Christum exterius negavit, jam interno præsumptionis peccato exciderat, ut docent Div. Chrysost. homil. 12. in Joann. Cum, (Petrus) in arrogantiam prolaberetur, & Christo contradiceret, sua admonetur fragilitatis. Et D. Aug. serm. 285. Interrogatus (Petrus) in corde suo præsumpserat se pro eo etiam moriturum viribus suis hoc tribuerat. Ergo jam interno præsumptionis peccato exciderat a sua iustitia, quando Christum negavit, ac proinde nihil facit ejus exemplum ad præsentem difficultatem, in qua de justis disputamus.

Inst. 1. D. Chrysostom. de D. Petro dicit hom. 83. in Matth. *Etsi bene animatus fuerat, divino tamen substracto auxilio, stare non potuit; ergo nullam habuit gratiam vere sufficientem, ut Christum non negaret.*

Resp. dist. antec. Substracto auxilio proxime sufficienti, conc. remote sufficienti, nego antec. Addit enim ibidem D. Doctor: *Totum sibi attribuebat, dicens: etsi omnes scandalizati fuerint, &c. Cum dicere debuisset, patrocínio tuo jurabis.* Ergo habebat sufficiens auxilium ad orandum, & uberius auxilium impetrandum, quo adjutus Christum non negasset.

Inst. 2. D. August. tract. 92. in Joann. de charitate loquens, ait: *Qua utique Petro defuit, quando mulieris ancilla interrogatione perterritus, non potuit verum testimonium perhibere.* Ergo Petro defuit gratia, qua relative ad præ-

presentem concupiscentiam potuerit testimonium Christo perhibere.

Resp. dist. conseq. Defuit gratia, qua proxime potuerit, &c. *conc.* qua remote potuerit, &c. *nego conseq.* suam mentem declarat D. Doctor lib. de unit. Ecclesie cap. 9. dicens: *Quis enim dubitaverit quod . . . Petrus si voluisset, ter dominum non negasset?*

Inst. 3. D. Hilarius (k) de S. Petro, ait: *Amariissime fleuit, recolens trepidationis culpam, se nec admonitum potuisse vitare.* Ergo D. Petrus nullam habuit gratiam, qua potuerit abnegationem Christi vitare.

Respond. nego conseq. Hæc enim verba: *Non potuisse*: ibi non significant impotentiam faciendi, sed defectum affectionis faciendi, quo sensu Christus Matth. 26. dixit Apostolis: *Non potuistis una hora vigilare mecum.* Sic enim eommunitur dicimur nos aliquando non posse, quia sic affecti sumus, ut nolimus, vel certe ut acturi non simus.

Obicies 2. D. August. lib. de natura & gratia, c. 53. ait, *Fideles orantes dicunt: & ne nos inferas in tentationem, sed libera nos a malo. Si adest possibilitas, ut quid orant? ergo.*

Resp. dist. antec. Si adest possibilitas, per solas liberi arbitrii vires, non est necessaria oratio, *conc.* si adest possibilitas per gratiam, *nego ant.* Hic D. Doctor redarguit Pelagium, quod diceret, hominem absque adiutorio gratiæ Dei posse esse sine peccato: *Quare*, inquit, *sine adiutorio gratia Dei dicitis hominem posse esse sine peccato?* quem ut refellat dicit: *Fideles orantes dicunt: & ne nos inferas in tentationem, sed libera nos a malo, &c. ex qua ora-*

(k) Cap. 38. in Matth.

oratione concludit hominem indigere gratia Dei ut liberetur, nec posse a tentatione eripi per solas naturæ vires: Unde, inquit, non liberatur homo sine gratia Salvatoris.

Inst. 1. Div. August. ibidem cap. 66. ait: Quod autem ex vitiis natura, non ex conditione natura sit quadam peccandi necessitas, audiat homo. Sed qui habet necessitatem peccandi, non habet gratiam vere & relative sufficientem ad præcepta implenda; ergo.

Resp. dist. maj. Est quædam necessitas peccandi, simpliciter & physice inevitabilis, nego maj. secundum quid & moraliter inevitabilis, subdist. sine gratia, conced. cum gratia, nego maj. Unde D. August. immediate addit: Atque ut eadem necessitas non sit, discat Deo dicere: de necessitatibus meis educ me ac per hoc opitulante gratia per Jesum Christum, & mala necessitas removebitur, & libertas plena tribuetur.

Inst. 2. Si omnibus justis, urgente præcepto, detur gratia vere & relative sufficiens ad implendum præceptum, justis reprobis dabitur gratia vere & relative sufficiens ad perseverandum in statu justitiæ; falsum consequ. ergo.

Resp. nego min. De omnibus enim justis loquens Conc. Trid. ait: In Dei auxilio firmissimam spem collocare, & reponere omnes debent. Deus enim, nisi ipsi illius gratia defuerint, sicut cepit opus bonum, ita perficiet, operans vellet & perficere. Ergo justis omnes perseverare possunt in accepta justitia, si non desint gratiæ Dei, & consequenter habent gratiam vere & relative sufficientem ad perseverandum.

Probat. minor. D. Augustinus, lib. de dono persever. cap. 22. ait: Si qui obeditis, si prædestinati estis rejiciendi, subtrahentur obedientes vires ut obedire cessetis. Ergo justis reprobis non

non datur gratia vere sufficiens ad perseverandum.

Resp. nego antec. Hæc enim D. Doctor non profert a se, sed ex sententia Semipelagianorum, quos impugnât; referens enim hanc sententiam cap. 15. ait: *Sed ajunt, ut scribitis si qui obeditis, &c.* ad quæ verba D. Prosper lib. 3. ad excerpta Genuensium, dubio 9. ait: *Ex hoc ergo potuistis advertere non ipsum (Augustinum) hæc dicere, sed eos de quibus dixit: sed ajunt, ut scribitis. Inferius autem (nempe cap. 22.) ubi plenius ad ista responderet, multo manifestius patet, quam hæc ab ipso nunquam taliter dicta sint, & quantum ei hujusmodi prædicationis forma displiceat: nam de illa ait: Hoc enim dicere, quid videtur aliud esse, quam male dicere, aut mala quodammodo prophetare?*

Inst. 3. D. August. in hoc uno duntaxat vult supra relatam sententiam emendari, quod secunda in tertiam mutetur personam, & dicatur: *Si qui obediunt, &c.* Ergo D. Augustinus non rejicit illam sententiam quoad substantiam.

Respond. nego antec. Nam juxta D. Prosperum, illam sententiam correxit, *Qua vera sunt temperans*, nimirum mutando secundam personam in tertiam, ut tolerabilior sit audientibus, *Et qua falsa sunt refecans*, nimirum refecando subtractionem virium obediendi, cujus nullum facit mentionem in hac propositione, quam in locum prioris substituit: *Si qui obediunt, sed in regnum ejus, & gloriam prædestinati non sunt, temporales sunt, nec usque in finem in eadem obedientia permanebunt; quod est verissimum.*

ARTICULUS II.

*Utrum fidelibus peccatoribus detur gratia
sufficiens, ut a peccato resipiscant,
& convertantur.*

Nota: **P**eccatores, alii nondum sunt excacati & obdurati; alii sunt mente excacati & corde indurati, juxta illud Joann. 12. *Excacavit oculos eorum, & induravit cor eorum.* Quod Deus præstat, non positive, ut vult Calvinus lib. 1. instit. cap. 18. sed negative, ut docet D. August. Epistola 105. dicens: *Non obdurat Deus impertiendo malitiam, sed non impertiendo misericordiam.* De utrisque hic procedit quæstio. Igitur:

CONCLUSIO I.

Omnibus fidelibus peccatoribus non obduratis datur, pro loco & tempore, gratia vere sufficiens, qua possint & peccata cavere, & a peccatis resipiscere. Ita omnes catholici.

Prob. 1. Ex Scriptura, Ezech. 33. *Vivo ego, dicit Dominus, nolo mortem impii, sed ut convertatur a via sua, & vivat.* Ex quo sic argumentor: Deus vult vere & sincere ut peccatores, saltem non obdurati non pereant, sed convertantur; atqui non possunt converti absque gratia sufficienti; ergo eis dat gratiam sufficientem, ut peccata cavere possint, & a peccatis convertantur.

Probat. 2. Ex D. Augustino lib. 1. retract. cap. 22. dicente: *Nisi quisque voluntatem mutaverit, bonum operari non potest, quod in nostra potestate esse positum Dominus alio loco docet, ubi ait: aut facite arborem bonam, & fru-*

fructum ejus bonum ; aut facite arborem malam , & fructum ejus malum . Quod non est contra gratiam Dei quam predicamus ; in potestate quippe hominis est mutare voluntatem in melius ; sed ea potestas nulla est , nisi a Deo detur . Ergo si converti , sit in potestate peccatoris , & non possit sine gratia Dei , habet gratiam ad hoc sufficientem .

Confirmabitur propos. sequenti , si enim detur induratis gratia sufficiens ad conversionem , a fortiori datur nondum induratis .

CONCLUSIO II.

Etiam peccatoribus induratis datur , pro loco & tempore , gratia vere sufficiens , qua possint & peccata cavere , & a peccatis resipiscere . Est communior contra paucos .

Prob. 1. Ex Scriptura , Act. 7. ubi S. Stephanus Judæos obduratos objurgat quod Spiritui Sancto , eos ad conversionem moventi , semper resisterent : Dura cervice , inquit , & incircumcisis cordibus & auribus , vos semper Spiritui sancto resistitis . Ergo .

Rom. cap. 2. An divitias bonitatis ejus , & patientia , & longanimitatis contempnis ? ignoras quoniam benignitas Dei ad poenitentiam te adducit ? secundum autem duritiam tuam & impoenitens cor , thesaurizas tibi iram in die ira , & revelationis justii judicii Dei . Ibi Apostolus commendat bonitatem , patientiam & longanimitatem Dei , quod peccatores induratos ad poenitentiam adducat & excitet , utique per gratiam interiorem , sine qua non potest esse vera poenitentia ; ergo .

Probat. 2. Ex PP. D. Augustin. supra hæc , Psalm. 6. verba : dedit eos in reprobum sensum , ut : ea est cecitas mentis , in eam quisquis datus
tux

tus fuerit, ab interiore Dei luce secluditur, sed nondum penitus, cum in hac vita est . . . penitus enim esse extra Deum quid est, nisi esse in summa cecitate? Ergo homo quandiu est in hac vita, non est obcæcatus & induratus, cæcitate & obduratione absoluta, quæ sit cujuscumque gratiæ subductio.

D. Prosper resp. 15. ad object. Vicentianas, ait: *nemini Deus correctionis viam adimit, nec quemquam boni possibilitate dispoliat. Atqui Deus correctionis viam obduratis adimeret, eosque possibilitate boni salutaris dispoliaret, si omnem penitus gratiam sufficientem subtraheret; ergo, &c. Hinc lib. 2. de vocatione gentium cap. ult. dicit, dum in hoc corpore vivitur, nullius est negligenda correctio, nullius est desperanda reparatio.*

D. Thom. 3. p. quæst. 86. art. 1. dicere quod aliquod peccatum sit in hac vita, de quo quis pœnitere non possit, erroneum est, 1. Quidem, quia per hoc tolleretur libertas arbitrii. 2. Quia per hoc derogaretur virtuti gratia, per quam moveri potest cor cujuscumque peccatoris ad pœnitentiam.

Prob. 3. ratione: Indurati peccant imputabiliter, ut docet D. August. lib. 5. contra Julian. cap. 3. de Judæis obcæcatis dicens: *Ista cecitas fuit Judæis grande incredulitatis malum, & grandis causa peccati ut occiderent Christum. Unde serm. 88. de tempore acerrime eos carpit, qui dicebant inter se: cur enim iniquitas illa Pharaoni imputatur, cum Dominus cor illius obdurasse referatur? Ergo habent gratiam, saltem remote sufficientem, ad non peccandum. Conseq. patet ex sensu adversariorum, qui sine gratia negant vitari posse peccatum; atqui in eo non peccatur, quod vitari non potest, ex August. lib. 3. de lib. arb. cap. 18. ergo.*

Sol-

Solvuntur Objectiones.

Objicies. Eccl. 7. dicitur: *Considera opera Dei, quod nemo possit corrigere quem Deus despexerit.* Ergo obduratis, a Deo despectis, non datur gratia sufficiens ad conversionem.

Resp. nego consequ. Ibi equidem probatur necessitas gratiæ ad emendationem vitæ praviæ, sed non astringitur adæquata desertio per Deum facta; neque enim Deus absolute despicit, sed comparate, quod scilicet tantas tamque congruas, neque etiam proxime sufficientes ad conversionem, gratias conferat; sed tunc saltem interdum habent gratiam remote sufficientem, nempe gratiam orationis, per quam obtinere possunt gratiam immediate sufficientem ad conversionem.

Inst. 1. Indurati, etiam orando, impetrare non possunt gratiam proxime sufficientem ad conversionem; ergo gratia illa induratis concessa, non potest dici sufficiens, *Resp. nego ant.*

Probat. antec. Ex 2. Machab. cap. 9. ubi de Antiocho dicitur: *Orabat autem hic scelestus Dominum, a quo non esset misericordiam consequenturus.* Ergo.

Resp. nego consequ. Antiochus enim ideo dicitur frustra orasse, quia oravit, de culpa admissa dolens, non propter Dei offensam, sed propter infirmitatem temporalem, quam patiebatur; non ergo oravit ex recto motivo, nempe ex amore Dei offensi, sed ex solo recuperandæ sanitatis desiderio; unde non fuit exauditus.

Instab. 2. Joann. 12. de induratis Judæis dicitur: *Propterea non poterant credere, quia iterum dixit Isaias: excacavi oculos eorum, & induavi cor eorum, ut non videant oculis, & intel-*

intelligent corde, & sanem eos. Ergo indurati non habent gratiam sufficientem ad credendum.

Resp. dist. ant. Non poterant credere impotentia consequente & voluntaria, *conc.* antecedente & involuntaria, orta ex subtractione omnis omnino gratiæ, *nego ant.* Ita D. August. tract. 53. in Joann. *Non poterant credere, inquit, quia hoc Isaias prädixit: hoc autem Propheta prädixit, quia Deus hoc futurum esse præscivit; quare autem non poterant, si a me queratur, cito respondeo, quia volebant: malam quippe eorum voluntatem prævídít Deus, & per Prophetam prænuñtiavit.* Ergo illa Judæorum impotentia, erat consequens liberam eorum determinationem ad nolendum credere.

Inst. 3. Ibidem dicitur, Deum excæcasse & obdurasse Judæos; atqui implicat Deum velle dare gratiam, ut resipiscant illi, quos vult indurare; ergo, &c.

Respond. dist. major. Deus dicitur excæcasse & obdurasse Judæos, positive, infundendo pravam inspirationem, *nego maj.* negative, non impertiendo gratiam, *subdist.* gratiam uberio-rem & proxime sufficientem, *conc.* omnimodam, etiam remote sufficientem, *nego major.* Equidem Deus induratis gratiam specialem & proxime sufficientem, qua *cujus* miseretur, *sic eum vocat, quemadmodum scit ei congruere, ut vocantem non respuat, non concedit, quod non impedit, quominus ipsis quandoque gratias communes eroget, aut saltem orandi auxilia, quibus ad gratias validiores venire possint, & tandem ad conversionem.*

Inst. 4. D. August. lib. 1. ad Simplic. *quæst. 2.* dicit: *obduratio Dei, est nolle misereri;* atqui illi, *cujus* non vult misereri Deus, non confert gratiam; ergo.

R. spond.

Respond. dist. min. Non confert gratiam specialem, qua, ut ait ibidem, *cujus miseretur, sic eum vocat quomodo scit ei congruere, ut vacantem non respuat, conc.* nullam confert gratiam, *nego min.* Nam D. Doctor in *Psalm. 6.* neminem in hac vita penitus ab interiori Dei luce vult excludi.

Inst. 6. D. Augustin. Epist. 107. ad Vitalem, ait: *scimus gratiam non omnibus hominibus dari; ergo D. August.* agnovit gratiam sufficientem non concedi omnibus.

Resp. nego consequ. Neque enim ibi D. Doctor agit de gratia sufficiente, sed de gratia justificationis per Baptismum acceptæ; dicit enim homines secundum Adam carnaliter natos contagium mortis antiqua prima natiuitate contrahere, nec liberari a supplicio mortis aterna . . . nisi per gratiam renascantur in Christo. Scimus gratiam Dei nec parvulis, nec majoribus, secundum merita nostra dari. Scimus non omnibus hominibus dari. Ex quibus constat D. Doctorem loqui de gratia regenerationis, non de gratia actuali.

Inst. 6. D. Augustinus in expositione quarundam prop. ex Epist. ad Rom. de Pharaone ait: Non ergo hoc illi imputatur, quod tunc non obtemperaverit, quandoquidem obdurato corde obtemperare non poterat, sed quia dignum se præbuit, cui cor obduraretur priori infidelitate. Ergo D. Doctor agnovit in Pharaone omnimodam impotentiam obtemperandi Deo præcipienti; & consequenter omnimodam privationem gratiæ sufficientis.

Respond. disting. consequ. Divus Augustinus in Pharaone omnimodam impotentiam obtemperandi agnoscit, propter persuasionem, in qua tunc erat, Deum non dare gratiam recte operandi, nisi prius volenti & credenti solis natura

turæ viribus, *conced.* propter persuasionem, quod Pharaoni denegaretur gratia etiam remote sufficiens in pœnam spretarum gratiarum antecedentium; *nego anteced.* Equidem eo loci agnoscit Divus Augustinus in Pharaone obtemperandi impotentiam, putatque nullam omnino adfuisse gratiam, qua præceptum redderetur possibile: sed quia Semipelagianorum placitis imbutus, tunc arbitrabatur hominis esse inchoare fidei meritum, quod si non inchoaret, non adduceret gratiam, quæ tollit impotentiam bene operandi. Non ergo ex hoc loco mens & doctrina D. Augustini est repetenda, sed ex aliis locis, in quibus docet, obdurationem & esse peccatum, & pœnam peccati, & causam peccati, sic, lib. 5. contra Julian. capit. 3. *Cacitas cordis*, inquit, *quam solus removet Deus illuminator, & peccatum est, quo in Deum non creditur, & pœna peccati, qua cor superbum digna animadversione punitur, & causa peccati, cum mali aliquid caci cordis errore committitur.* Et lib. 1. operis imperfecti, cap. 47. *Cacitas cordis, si peccatum non esset, injuste argueretur, arguitur autem juste; ubi dicitur: Pharisæe cæce.* Ergo peccatum est. Ergo datur gratia, qua, saltem remote, depelli possit. *Quis enim peccat*, inquit August. lib. 3. de lib. arbitr. cap. 18. *in eo, quod nullo modo caveri potest? peccatur autem; caveri igitur potest.*

ARTICULUS III.

*Utrum infidelibus detur gratia sufficiens,
ut ad fidem adduci possint?*

Nota: **D**Uplex est infidelium genus, alii *positivi*, qui Evangelium audire recusarunt, vel sibi annuntiatum contempserunt. Alii *negativi*, qui nec Evangelii prædicationem audierunt, nec audire recusarunt, utrosque spectat quæstio præsens. Itaque:

CONCLUSIO.

Infidelibus omnibus dantur, pro loco & tempore, gratia interiores vere sufficientes, quibus remote saltem & mediate ad fidem, atque adeo paulatim & certis gradibus ad salutem pervenire possint.

Probat. prima pars, quæ est de infidelibus positivis, i. Ex Script. *Matth. 10.* ubi Christus Apostolis dicit: *Quicumque non receperit vos, neque audierit sermones vestros . . . amen dico vobis: tolerabilius erit terra Sodomorum & Gomorrhæorum in die judicii, quam illi civitati.* Quare tolerabilius, si respuerit Evangelium omnis gratia interior, sine qua homo nihil potest in ordine supernaturali, defuerit? Ergo concludi debet, eos, qui respuerunt Evangelium, habuisse gratias vere sufficientes, ad illud amplectendum.

Joann. 16. Christus ait: *Cum venerit ille, (Spiritus sanctus) arguet mundum de peccato, &c. de peccato quidem, quia non crediderunt in me.* Atqui frustra arguerentur qui Evangelium respuerunt, si ipsis defuisset omnis gratia interior, sine qua non potuerunt credere: nam,

Charmes, Th:ol. Schol. Tom. III. Y ut ait

ut ait D. August. (1) *Nisi Deus interiore gratia mentem regat atque agat, nihil prodest homini omnis predicatio veritatis.*

Prob. 2. Ex SS. PP. Pro omnibus sit D. Chrysostomus qui, Homil. 14. in cap. 3. Matth. de infidelibus saltem positivis ait: Quomodo Deum culpemus, qui a fidelibus separat infideles, qui non proficiunt ad gloriam ejus? & illa quidem palea per naturam habent, ut sint palea, & triticum esse non possunt: infideles autem non per naturam habent, ut sint infideles; sed sunt palea propria voluntate, expellentes a se medullam justitia. Si ergo illa palea, qua non possunt esse triticum, comburuntur in igne, quanto magis infideles dignius comburentur, qui potuerunt esse triticum, nisi a se medullam justitia projecissent? Ergo.

Prob. 2. pars, quæ est de infidelibus negativis.

Probat. 1. Ex Scriptura, Sap. 12. dicitur: O quam bonus & suavis est, Domine, Spiritus tuus in omnibus: ideoque eos qui exerrant, id est, Ethnicos, partim corripis: & de quibus peccant, admones & alloqueris, ut relicta malitia, credant in te, Domine. Atqui Deus Ethnicos non admonet peccatorum, nec eos alloquitur, nisi per gratiam interiore; ergo.

Probat. 2. Ex PP. Div. Ambrosius in hæc, Psalm. 108. verba: Misericordia Domini plena est terra; ait: Mysticus sol ille justitia omnibus ortus est, omnibus venit, omnibus passus est; ideo autem passus est ut tolleretur peccatum mundi; si quis autem non credit in Christum, generali beneficio ipse se fraudat: ut si quis clausa
fene-

(1) Lib. 19. de Civ. Dei. cap. 6.

fenestris radios solis excludat, non ideo sol non ortus est omnibus, quia calore ejus se fraudavit: sed quod solis est, prerogativam suam servat: quod imprudentis est, communis a se gratiam lucis excludit.

D. August. tract. 35. in Joann. ait: Testimonium sibi perhibet lux, aperit oculos sanos, & sibi ipsa testis est ut cognoscatur lux; sed quid agimus de infidelibus? nunquid illis non est præsens? est præsens & illis: sed quibus eam videant, oculos non habent cordis. Audi de illis ex Evangelio ipso sententiam prolatam; Et lux lucet in tenebris, & tenebræ eam non comprehenderunt.

D. Chrysostomus, Homil. 7. in Joann. quærit, si illuminat omnem hominem venientem in hunc mundum, quoniam pacto tot homines sine lumine permanent? (neque enim omnes Christum cognoscunt) quomodo ergo illuminat omnem hominem? respondet: Illuminat profecto quantum in ipso est. Si qui autem sponte sua mentis oculis conniventibus ad hujus lucis radios aciem dirigere noluerint, non ex luminis natura, in tenebris perstiterunt, sed malitia sua, qui sponte tanto se dono indignos reddiderunt. Nam, inquit, gratia in omnes diffusa est: non Judæum, non Græcum, non Barbarum, non Scytham, &c. effugit, aut dedignatur, omnibus eadem est, omnibus se facilem exhibet, omnes pari honore advocat. Qui autem ejus munere frui negligunt, hanc suam cecitatem sibi ipsis imputent. Cum enim omnibus aditus pateat, & a nemine prohibeatur, perdit quidam, & nequam homines, propria duntaxat malitia ingredi recusant.

D. Prosper lib. 14. de voc. gent. ait: Neque ob hoc excusabiles sunt nationes, quæ alienata a conversatione Israel spem non habentes, & se-

no Deo in hoc mundo sub ignorantia tenebris perierunt; quia hac abundantia gratia, qua nunc universum mundum rigat, pari antea largitate fluxit. Semper enim est adhibita universis hominibus quadam superna mensura doctrina, qua etsi parioris, occultiorisque gratia fuit, sufficit tamen, sicut Dominus indicavit, quibusdam ad remedium, omnibus ad testimonium.

Paulus Orosius, S. Augustini discipulus, in Apologetico de arbitrii libertate, sic loquitur: Mea semper hac est fidelis, atque indubitata sententia. Deum adiutorium suum, non solum in corpore suo, quod est Ecclesia, cui specialia, ob credentium fidem, dona sua gratia largitur; verum etiam universis in hoc mundo gentibus propter longanimitatem suam, aeternamque clementiam subministrare. Et, interjecta una paginae columna, addit: Evidentissime declaratum est nemini hominum deesse Dei auxilium, praesertim cum & seductor insistat, & insit infirmitas.

Ratio a priori est, quod Deus omnes homines salvos fieri, & in agnitionem veritatis venire, velit, voluntate vera & sincera, ex qua defluunt in omnes, gratiae ad salutem sufficientes; quod Christus mortuus sit pro omnibus omnino hominibus qui in Adam peccaverunt; quod sit salvator omnium; verum illud argumentum fuit propositum & demonstratum in tract. de Deo uno.

Solvuntur Objectiones.

Objicies 1. Apostol. Act. 14. de infidelibus negativis, ait: Deus, qui in praeiis generationibus dimisit omnes gentes ingredi vias suas. Ergo gentibus ante Christum non est data gratia sufficiens.

Resp. nego consequ. Nam Apostolus loquitur

tan-

tantum comparate ad tempus gratiæ, quod gentibus non sit data gratia nisi generalis & modica, cum specialis & magna legi gratiæ reservaretur, ut tradit D. Prosper. l. 2. de vocat. gentium, cap. 4. *Sed ne in præteritis quidem sæculis, inquit, hac eadem gratia (qua post Domini nostri J. C. resurrectionem ubique diffusa est) defuit mundo. Quamvis enim speciali cura, atque indulgentia Dei populum Israeliticum constet electum, omnesque alia nationes suas vias ingredit, hoc est, secundum propriam permissa sine vivere voluntatem, non ita se tamen æterna Creatoris bonitas ab illis hominibus avertit, ut eos ad cognoscendum se atque metuendum, nullis significationibus admoneret . . . qui quidem in comparatione electorum videntur abjecti, sed nunquam sunt manifestis occultisque beneficiis abdicati.*

Obijcies 2. Fides est prima gratia; atqui infideles non habent fidem; ergo.

Respond. nego major. Intellectam de fide perfectam & christianam, multi enim, ex Apostolo & Augustin. vocati sunt ad fidem, qui tamen non crediderunt, unde Clem. XI. has prop. Quesnelliianas damnavit: 26. *Nulla dantur gratia, nisi per fidem.* 27. *Fides est prima gratia & fons omnium aliarum.* Porro per fidem, Quesnellus intellexit fidem perfectam & christianam, ut constat ex hac altera prop. damnata 29. *extra Ecclesiam nulla datur gratia.*

Inst. 1. Ex Conc. Trident. sess. 6. capit. 8. Fides est humana salutis initium, fundamentum, & radix omnis justificationis. Ergo est prima gratia.

Resp. nego consequ. Fides equidem est humanæ salutis initium, non quod sit prima gratia infideli concessa, sed quod sit proxima & immediata ad justificationem dispositio, sine qua,

addit Conc. Trident. *Impossibile est placere Deo, & ad filiorum ejus consortium pervenire; verum Deus infideles ordinarie vocat ad fidem per gratias remotas, quibus si bene uterentur, fidei donum acciperent, ut contigit Cornelio, cujus acceptæ fuerunt eleemosynæ, & exaudita orationes antequam credidisset in Christum; econtra Agrippa habuit gratiam remotam ad fidem, quando, Act. 26. dixit ad Paulum: Immodico suades me Christianum fieri. Cui cum restiterit, donum fidei non accepit.*

Inst. 2. Ex D. August. lib. de predest. SS. c. 7. de fide ait: Ipsa prima datur, ex qua impetrentur cetera, qua proprie opera nuncupantur, in quibus juxte vivitur; ergo fides est prima gratia.

Resp. dist. conseq. Est prima gratia, quæ proxime disponit ad justificationem, conced. est prima gratia simpliciter & absolute, nego conseq. Loquitur ergo D. Aug. de fide quatenus immediate disponit ad justificationem, ut constat ex his verbis: *In quibus juxte vivitur.* Sed non excludit alias antecedentes gratias, quibus remote saltem & mediate disponimur ad fidem perfectam & gratiam justificantem, immo eisclare admittit, cum ibidem de Cornelio dicit: *Quidquid igitur & antequam in Christum crederet, & cum credidisset, bene operatus est Cornelius, totum Deo dandum est, ne forte quis extollatur.*

Inst. 3. D. Augustinus, lib. de gratia & lib. arbit. cap. 13. ait: Gratia per fidem Jesu Christi eorum tantummodo est, quorum est ipsa fides. Ergo.

Resp. nego conseq. Nam ibi D. Doctor non loquitur de gratia actuali, sed de gratia sanctificante, contra Pelagianos qui docebant naturam & legem sufficere ad justificationem & salu-

lutem, contra quos docet fidem christianam primam esse dispositionem qua proxime & immediate acquirit homo gratiam justificantem.

Inst. 4. D. Aug. tract. in Joann. ait. Quam gratiam primo accepimus? fidem. Ergo fides est prima gratia.

Respond. dist. conseq. Fides est prima gratia, comparate ad gloriam, conced. absolute nego conseq. Itaque D. Augustin. ibi comparat fidem cum gloria; docet fidem, qua promerita est vita æterna, esse ipsa vita æterna priorem; nam, inquit: Cum promerueris Deum vivendo ex fide, accipis primum, immortalitatem & vitam æternam, quæ est gratia pro gratia; nam quia ipsa fides gratia est, & vita æterna gratia est pro gratia.

Inst. 5. D. Aug. lib. de gestis Pelagii, cap. 14. ait: Fides initium est, unde bona opera incipiunt. Ergo fides est prima omnino gratia.

*Respond. dist. conseq. Fides imperfecta & inchoata, conc. fides perfecta & Christiana, nego conseq. Duplicem ergo fidem distinguit D. Aug. unam perfectam, qua creditur explicite in Christum, hæc est fides Christianorum. Alteram imperfectam, qua creditur in Deum quomodocumque, non tamen sine aliquo supernaturali lumine, qualis fuit fides in Cornelio, antequam, Sacramentorum participatione, incorporaretur Ecclesiæ. Fidem perfectam D. Aug. comparat cum Nativitate; imperfectam cum Conceptione, *Fiunt ergo, inquit, lib. 1. ad Simplic. quæst. 2. inchoationes quadam fidei, conceptionibus similes, non tamen solum concipi, sed etiam nasci opus est, ut ad vitam perveniatur æternam. Prior non est in infidelibus, ut per se constat; posterior vero in ipsis est, ut August. ibidem asserit: Non enim Cathecumeni non credunt, inquit, aut vere Cornelius**

non credebatur Deo cum eleemosynis & orationibus dignum se praberet, cui Angelus mitteretur: sed nullo modo ista operaretur, nisi ante credidisset: nullo modo autem credidisset, nisi vel secretis per visa mentis aut spiritus, vel manifestioribus per sensus corporis admonitionibus vocaretur. Sed in quibusdam tanta est gratia fidei, quanta non sufficit ad obtinendum regnum calorum, sicut in Catechumenis, sicut in ipso Cornelio antequam Sacramentorum participatione incorporaretur Ecclesia. In quibusdam vero tanta est gratia fidei, ut jam corpori Christi & sancto Dei templo deputentur. Ex quo patet fidem perfectam & explicitam in Christo, non esse primam gratiam. Videatur Paulus a Lugdunens. lib. cui titulus: *Anti-hexaples*, pag. 227.

Inst. 6. D. August. lib. de predest. SS. cap. 8. ait: *Fides igitur & inchoata & perfecta donum Dei est: & hoc donum quibusdam dari, quibusdam non dari, omnino non dubitet, qui non vult manifestissimis sacris litteris repugnare. Ergo infideles non habent omnes gratiam imperfectam & inchoatam.*

Respond. disting. conseq. Infideles non habent omnes fidem inchoatam incipientem per Evangelii prædicationem, conc. incipientem per inspirationem Dei, qua nempe Deo interius & exterius monenti quis parere potest, *neque conf.* Hæc est vera mens D. Augustini, qui ibi refert & approbat quæ scripserat contra Porphyrium, ubi resolvens hanc quæstionem, cur tamdiu Deus distulerit adventum Christi? respondet repetendum ab altitudine sapientia & scientia Dei, quod fides inchoata uno, non alio tempore detur per prædicationem Evangelii.

Inst. 7. Eis Deus denegat auxilium fidei, si ve inchoata, si ve perfecta, quibus prohibet præ-

prædicari Evangelium; atqui aliquibus nationi-
bus Deus prohibuit prædicari Evangelium; sic,
Actor. 16. Paulus & Timotheus *vetati sunt a*
Spiritu sancto loqui verbum Dei in Asia; ergo.

Respond. nego maj. Quoad fidem inchoatam,
quæ certe potest haberi ante prædicationem
Evangelii, ut constat exemplo Cornelii, cujus
orationes & eleemosynæ meritum habuere, a-
requam ipsi Evangelium annuntiasset D. Petrus;
ergo jam in ipso erat inspiratio & inchoatio
fidei, ut docet D. August. dicens: *Nec tamen*
sine aliqua fide donabat & orabat. Ex textu er-
go sequitur duntaxat, quod Asiatici tunc pri-
vati fuerint gratia proxime sufficienti ad am-
plectendam fidem christianam; at nihilominus
habuerunt pro loco & tempore gratiam remo-
te sufficientem, qua si bene usi fuissent, gra-
tiam proxime sufficientem recepissent.

Obicies 3. Si infidelibus, qui nihil unquam
audierunt de Christo, dantur gratiæ sufficien-
tes, quibus ad fidem adduci possint, si illis
bene uti voluerint, nulla erit ignorantia my-
steriorum fidei invincibilis & inculpabilis; at-
qui consequens est falsum & damnatum in Bi-
jo; ergo.

Prob. seq. maj. Illud est culpabile, quod est
voluntarium in sua causa; atqui ignorantia illa
mysteriorum fidei est voluntaria in causa, nem-
pe in transgressione voluntaria legis naturalis,
ex qua sequitur; ergo.

Resp. nego min. Nam ut aliquid sit volunta-
rium in causa, non sufficit ut sequatur ex illa
causa, sed insuper requiritur, ut cognoscatur,
aut cognosci possit sequi ex illa causa; nam
quod nec cognoscitur, nec cognosci potest,
nullatenus est voluntarium; atqui infideles ne-
gativi nec cognoscunt, nec possunt cognoscere
ex transgressione legis naturalis sequi infideli-

tatem, cum inter utrumque non sit necessaria connexio; ergo illa infidelitas & ignorantia legis Evangelicæ nullatenus illis est voluntaria. Hinc si moriantur in infidelitate negativa, 1. Excluduntur a beatitudine, tum propter peccatum originale, tum etiam propter peccata actualia. 2. Suppliciiis positivis cruciantur propter peccata actualia, & liberam gratiis divinis resistantiam, non autem propter infidelitatem negativam.

Objicies 4. Infideles negativos non habere gratiam sufficientem ad credendum, satis aperte declarat Scriptura, Rom. 10. *Quomodo enim credent ei, quem non audierunt? quomodo autem audient sine predicante? quomodo vero predicabunt nisi mittantur?* ergo, &c.

Resp. dist. antec. Scriptura declarat infideles negativos non habere gratiam proxime sufficientem ad credendum, *conc.* remote sufficientem, *nego anteced.* Habent enim supernaturalia quædam auxilia, quibus illustrantur, excitantur, & adjuvantur ad servandam legem naturalem, quam si servarent, Deus ipsis provideret de gratia proxime sufficienti, ut docet D. Thom. lect. 3. in cap. 10. ad Rom. *Si quis tamen eorum, inquit, fecissent quod in se est, Dominus eis secundum suam misericordiam providisset, mittendo eis predicatorem fidei: sicut Petrum Cornelio, Act. 10. & Paulum Macedonibus, Act. 16. sed tamen hoc quod aliqui faciunt quod in se est, convertendo se scilicet ad Deum, ex Deo est movente corda ipsorum ad bonum.* Ubi agnoscit in infidelibus potestatem divina mandata observandi, ac proinde gratiam interiorum; necessaria enim est ut illa potestas sit initium consequendæ salutis, per quod ad gratias superiores perveniri possit.

Q U Æ S T I O II.

*Utrum omnibus infantibus detur gratia
sufficiens ad salutem?*

Nota: **G**ratia sufficiens non sumitur hic *proprie*, pro illuminatione intellectus & motione voluntatis, evidens est enim infantes hujusmodi gratiæ non esse capaces; sed sumitur *late* pro quocumque medio sufficiente ad salutem; expendimus ergo, utrum omnibus infantibus, sine baptismo decedentibus, Deus providerit de medio sufficienti ad salutem. Circa quod:

Certum est 1. Deum sufficienter providisse infantibus, qui in lucem editi, sine baptismo decedunt culpa, vel negligentia parentum: nam baptismus pro eorum salute institutus est, nec per Deum stat quominus ipsi applicetur, id enim provenit duntaxat ex parte parentum, sive fidelium qui negligentes sunt, sive infidelium qui converti nolunt; quia sicut sufficienter provisum est parentibus, ita & eorum infantibus.

Certum est 2. Sufficienter a Deo de remedio salutis provisum fuisse iis qui in utero materno negligentia aut culpa parentum, vel aliorum, extinguuntur; siquidem quod eis baptismus non applicetur, per accidens est respectu Dei, qui negligentiam, vel culpam parentum, aut aliorum, impedire non tenetur.

Controversia ergo tota est de iis, quibus in lucem editis, sive in utero materno absque ulla parentum, aut aliorum culpa morientibus, nulla humana industria & diligentia baptismus applicari potest, utrum scilicet Deus illis sufficienter providerit? circa quod sit:

CONCLUSIO.

Iis etiam infantibus, quibus, siue in lucem editis, siue in utero materno absque ulla parentum, aut aliorum culpa decedentibus, nulla humana industria baptismus applicari potest, Deus de remedio salutis sufficienter, quantum est ex se, providit.

Prob. 1. Illis Deus, non solum præparavit media salutis necessaria, sed etiam de illis applicandis sufficienter, quantum est ex se, providit, quos sincere vult salvos fieri, & pro quibus mortuus est; atqui Deus 1. Illos infantes vult sincere salvos fieri, ut docet D. Augustinus, qui lib. 4. contra Julian. cap. 8. hanc Apostoli sententiam, omnes homines vult salvos fieri, expendens, ait: Numquid parvuli homines, non sunt, ut non pertineant ad id quod dictum est, omnes homines? 2. Pro illis Christus mortuus est, cum in Adam mortui sint, & Christus mortuus sit pro omnibus qui in Adam mortui sunt; ergo.

Probat. 2. Deus baptismum instituit ad illorum infantium salutem, & iis per se facile applicari potest, licet propter impedimentum aliquod interveniens, illis applicari non possit; ergo illis Deus sufficienter, quantum est ex se, de remedii ad salutem necessarij applicatione, providit.

Prob. consëq. Ideo Deus illis infantibus non censeretur sufficienter, quantum est ex se, providisse de applicatione remedii ad salutem necessarij, quia occurrunt impedimenta, quæ tolli humana industria non possunt; atqui hæc ratio non impedit; ergo, &c. Prob. min. duplici exemplo.

1. Medicus, qui hominis ægroti famulo tra-

Adisset medicamentum, quod per se facile applicari potest, censeretur sufficienter, quantum est ex se, de illius medicamenti applicatione providisse, quamvis interea contingeret famulum in via occidi, vel detineri.

2. Qui mitteret hominem cum summa pecuniaria ad captivos redimendos, sufficienter quantum est ex se, providisse censeretur de illius pretii applicatione, quamvis homo missus in Piratas incideret; ergo a pari, &c.

Obijciat: D. August. lib. de dono persever. c. 12. de parvulis sine baptismo decedentibus ait: Plerumque enim festinantibus parentibus & paratis ministris, ut baptismus parvulo detur, Deo tamen nolente, non datur. Ex quo sic arguo: qui aliquibus parvulis non vult applicari remedium salutis, non sufficienter illis providit, quantum est ex se, de applicatione remedii salutis; atqui, ex D. August. Deus, aliquibus parvulis, non vult applicari remedium salutis.

Respondi disti maj. Qui non vult, voluntate negativa, quæ solam permissionem significat, nego major. qui non vult voluntate positiva, *subdist.* antecedenter ad prævisionem impedimentorum occurrentium non auferendorum, ob quæ parvulus sine baptismo moriturus est, *conc.* consequenter ad illorum impedimentorum prævisionem, nego maj. Atqui Deus aliquibus parvulis non vult applicari remedium salutis, voluntate conditionata; *conc.* voluntate absoluta, *subdist.* consequenter ad prævisionem obstaculorum non tollendorum, *conc.* antecedenter ad obstaculorum prævisionem, nego minor. Itaque Deus, voluntate antecedente & generali, vult sincere omnibus applicari remedium salutis; quod si prævideat aliqua impedimenta occurrentia, ob quæ puer sine baptismo moriturus

turnus est, tunc vult, voluntate permissiva & consequente, illum privari remedio salutis; quia, cum sit provisor generalis omnium causarum, permittit illas cursum suum naturalem fervare, nec, ut subveniatur tali puero, tenetur per miraculum, aut turbare naturalem rerum ordinem, aut puerum in vita conservare plusquam exigit ordo naturalis. Hicque est verus sensus D. Augustini, qui, postquam dixit: *Deo tamen nolente, non datur*, addit: *qui cum paululum in hac vita non tenuit, ut daretur.*

Inst. 1. Provisor non censetur sufficienter, quantum est ex se, iis, quorum curam gerit, providere, qui ab eis malum imminens non propellit, cum potest; atqui Deus omnia impedimenta, ob quæ parvulus sine baptismo moriturus est, propellere potest, nec tamen propellit; ergo.

Resp. dist. maj. Si sit tantum provisor particularis, *conced.* si sit provisor generalis, *nego maj.* Porro Deus est provisor generalis; ergo singulis rebus ita debet providere, ut nulli beneficiat dispendio & damno alterius; ac proinde non potest prohibere causas, quæ parvulo mortem procurant priusquam baptizetur, quin vim faciat naturæ causarum illarum, quod non tenetur facere. *Provisor universalis*, ait D. Thom. 1. p. quæst. 22. artic. 2. ad 2. *permittit aliquem defectum in aliquo particulari accidere, ne impediatur bonum totius. Unde corruptiones & defectus in rebus naturalibus dicuntur esse contra naturam particularem; sed tamen sunt de intentione naturæ universalis; in quantum defectus unius cedit in bonum alterius, vel etiam totius universi.*

Inst. 2. D. August. *ibidem*, revocat ad inscrutabilia Dei judicia, quod Deus uni puero pro-

procuret baptismum, applicari, non vero alteri: *Quare,* inquit, *illos potius, quam illos liberat?* respondet: *O homo! quis es: qui respondeas Deo?* *inscrutabilia sunt judicia ejus,* &c. atqui non esset locus recurrendi ad inscrutabilia Dei judicia, si Deus illis pueris sincere providisset de applicatione baptismatis, obstaretque duntaxat, vel parentum aut aliorum negligentia aut culpa, vel cursus naturalis rerum; ergo.

Resp. disting. minor. Non esset locus recurrendi ad inscrutabilia Dei judicia, cur uni puero non subveniatur, *conc.* cur uni subveniatur præ alio, *nego min.* In una ergo comparatione unius cum alio, (v. gr. *Cur providentia Dei non consulit omnibus parvulis felicitatem suorum, & nonnullis consulit etiam impiorum?* Epistola 105.) censet D. Doctor recurrendum ad inscrutabilia Dei judicia, atque docet exclamandum cum Apostolo, *O altitudo!* Neque enim hujus discriminis potest dari ratio: unde haud rationem propius inquirenti, respondendum cum Spiritu sancto. Eccl. 3. *Altera te ne quaesieris,* &c.

DISSERTATIO II.

De gratia habituali.

Nota: **G**ratia habitualis, est, *qualitas homini permanentiter inhaerens, quæ ipsum reddit Deo formaliter gratum, sanctum, Dei amicum & heredem vite æternæ.* Hujus naturam & effectus expendemus, duobus capitibus.

CAPUT I.

De natura gratia habitualis.

Nota 1. **C**alvinus, *lib. 3. instit. cap. 11.* & cum eo omnes ejus sectatores, & quidam Lutherani, negant in homine justo omnem interiorem justitiam; docentque hominem esse quidem justum, per extrinsecam duntaxat imputationem justitiæ Christi, qua nostra obteguntur peccata, ita ut gratia justificans sit ipsamet Christi justitia per fidem apprehensa & nobis imputata.

Nota 2. Theologi Catholici concorditer docent gratiam habitualement esse donum internum animæ nostræ inhærens: verum in assignando illo dono non conveniunt. *Thomista* volunt esse qualitatem distinctam a charitate habituali; contra, *Scotista* docent illud donum ipsam esse charitatem. His notatis:

CONCLUSIO I.

Gratia habitualis est donum internum animæ nostræ inhærens, atque permanentemente in nobis perseverans. Est de fide.

Probat. 1. Ex Scriptura, 1. Corinth. 3. *Nescitis quia templum Dei estis, & spiritus Dei habitat in vobis.* 1. Joann. 3. *Omnes qui nati sunt ex Deo, peccatum non faciunt, quoniam semen ipsius in eo manet.* Ex quibus sic arguo: gratiam sanctificantem habitare in nobis, manere in nobis, est hominem sanctum fieri per donum internum & permanentemente in ejus anima perseverans; atqui gratia sanctificans habitat & manet in nobis, juxta omnes interpretes, qui per *spiritum Dei*, & *semen Dei*, intelligunt gratiam sanctificantem; ergo.

Probat. 2.

Prob. 2. Ex PP. S. Basil. lib. de Spiritu sancto, cap. 17. ait: Sicut potentia videndi in oculo sano, ita & efficacia spiritus in anima purgata; atqui potentia videndi est intrinsece in oculo sano, in eoque perseverans; ergo.

S. Cyrill. lib. 4. in Isaiam, dicit: Formatur in nobis Christus, sancto nobis Spiritu divinam quamdam formam, per justificationem & justitiam inducente.

Prob. 3. Ex Concil. Trid. sess. 6. cap. 7. ubi exponens causas justificationis, ait: Unica formalis causa, est justitia Dei, non qua ipse justus est, sed qua nos justos facit: qua videlicet ab eo donati renovamur spiritu mentis nostra, & non modo reputamur, sed vere justi nominamur & sumus, justitiam in nobis recipientes unusquisque suam. Atqui nemo potest renovari, vere justus fieri, sine justitia intrinseca & permanentemente inhaerente; ergo.

Unde, Can. 12. definit: Si quis dixerit, homines justificari, vel sola imputatione justitiae Christi, vel sola peccatorum remissione, exclusa gratia & charitate, qua in cordibus eorum per Spiritum sanctum diffundatur, atque illis inhaereat: aut etiam gratiam qua justificamur, esse tantum favorem Dei, anathema sit.

Solvuntur Objectiones.

Objicies 1. Christus, ex Apostol. 1. Cor. 1. Factus est nobis sapientia a Deo, & justitia, & sanctificatio, & redemptio; ergo non per justitiam nobis internam & inhaerentem, sed per justitiam Christi nobis imputatam justii efficiamur.

Respond. dist. ant. Christus factus est nobis justitia & sanctificatio, efficienter & meritorie, conc. formaliter; nego ant. Hic enim per me-

tonimiam sumitur effectus pro causa; unde sensus est, Christus factus est a Deo causa efficiens & meritoria nostræ formalis justitiæ.

Inst. 1. Apostol. 2. Cor. 5. dicit: *Qui non noverat peccatum, pro nobis peccatum fecit* (Christum) *ut nos efficeremur justitia Dei in ipso*. Ergo, inquit Calvin. non in nobis, sed in Christo est justitia nostra.

Resp. nego consequ. Nam istæ particulæ, *in ipso*, significant, propter merita ejus; unde sensus est, Christum a Deo Patre factum fuisse pro peccatis nostris hostiam, ut propter ejus merita efficeremur justi justitia Dei, id est, justitia nobis a Deo data.

Inst. 2. Illa justitia, qua justī effīcīmur, vocatur justitia Dei; ergo non est justitia nobis inhærens.

Respond. nego consequ. Vocatur enim justitia Dei, non quod nobis non inhæreat; sed quod nobis detur a Deo, ut docet D. Augustinus, *tractat.* 26. *in Joann.* his verbis: *Justitia Dei hic dicitur, non qua justus est Deus, sed quam dat homini Deus, ut justus sit homo per Deum; id est, per gratiam Dei, & non ex sua virtute; addit D. August.*

Objicies 2. Qua ratione Adam nos peccatores constituit, eadem Christus nos justos constituit, juxta illud, Rom. 5. *Sicut per inobedientiam unius hominis peccatores constituti sunt multi: ita & per unius obedientiam justī constituuntur multi*. Atqui peccatum Adæ est forma, extrinsece tantum ejus posteros denominans & constituens peccatores; ergo & justitia Christi extrinsece tantum denominat justos.

Respond. dist. minor. Peccatum Adæ est forma, ejus posteros extrinsece denominans peccatores, & simul inferens intrinsecam peccati rationem, *conc.* non inferens intrinsecam peccati

cati rationem, *nego minor*. Equidem peccatum Adæ fuit ejus posteris extrinsecum, sed peccatum originale, inde derivatum, unicuique proprium est, neque consistit in mera imputatione peccati ab Adamo commissi. Valet ergo paritas adducta in majore, sed ex ea nihil concludi potest pro mera imputatione meritum Christi: sicut enim peccatum Adæ est causa peccati nostri originalis, ita & merita Christi sunt causa justificationis; & sicut peccatum originale est nobis intrinsecum, & permanens, ita justitia nostra est nobis intrinseca & in nobis permanens.

Inst. Ephes. 4. Apostolus jubet ut induamus novum hominem, id est, gratiam, qua effici-mur justi; atqui indumentum est extrinsecum; ergo.

Resp. dist. minor. Indumentum materiale, est extrinsecum, *conc.* indumentum spirituale, *negomin.* Itaque, qui justificatur, dicitur induere novum hominem, quia, ut ait Concil. Trid. *justificatio non est sola peccatorum remissio, sed & sanctificatio; & renovatio interioris hominis per voluntariam susceptionem gratia & donorum,* quibus justificati sunt Christo similes per intrinsecam & inhaerentem sanctitatem.

Obijcies 3. Formaliter justi constituimur per actus salutares elicitos per gratiam actualem; ergo frustranea & inutilis est gratia nobis infusa & permanenter inhaerens.

Resp. nego ant. Nam gratia sanctificans etiam infantibus per Baptismum confertur; atqui non sunt capaces actuum salutarium eliciendorum; ergo non sanctificantur per actus salutares virtute gratia actualis elicitos; ergo per gratiam permanenter infusam justificantur formaliter.

Inst. 1. Homo denominatur justus ex actibus justitiæ quos exercet, 1. Joann. 3. *Qui facit justis-*

justitiam, justus est. Ergo justus formaliter constituitur per actus ipsos justitiæ.

Resp. dist. antec. Homo ex actibus justitiæ denominatur justus, justitia dispositive sumpta, *conc.* justitia formaliter sumpta, *nego antec.* Equidem actus justitiæ a gratia actuali elicti, disponunt ad justitiam formalem; sed non sunt ipsa formalis justitia, ut clare innuit Concilium Tridentinum, *sess. 6. Can. 3.* his verbis: *Si quis dixerit, sine præveniente Spiritus sancti inspiratione, atque ejus adjutorio, hominem credere, sperare, diligere, aut pœnitere posse, sicut oportet, ut ei justificationis gratia conferatur, anathema sit.* Ergo gratia justificans diversa est ab actibus justitiæ; qui ad illam disponunt.

Instab. 2. Homo denominatur & formaliter constituitur peccator per peccatum actuale moraliter perseverans; ergo a pari denominatur, & formaliter constituitur justus per actus salutes moraliter perseverantes.

Resp. dist. antec. Homo denominatur & formaliter constituitur peccator per peccatum actuale moraliter perseverans, & simul propter privationem gratiæ sanctificantis, *conc.* propter solum peccatum actuale moraliter perseverans, *nego antec.* Ergo similiter homo non tantum denominatur justus propter actus bonos moraliter perseverantes, sed etiam propter infusionem gratiæ sanctificantis, per quam homo, ait Trident. *sess. 6. cap. 7. Ex injusto fit justus, & ex inimico amicus, ut sit hares secundum spem vite æternæ.*

CONCLUSIO II.

Gratia habitualis non distinguitur realiter a charitate, sed tantum virtualiter. Est Scotistarum contra Thomistas.

Prob.

Prob. prima pars, 1. Illi habitus non distinguuntur realiter, quibus tribuuntur iidem effectus: diversitas enim habituum colligitur duntaxat ex diversitate actuum, ad quos ordinantur; atqui gratiæ habituali & charitati iidem prorsus effectus tribuuntur a Scriptura; ergo.

Probat. min. 1. Effectus gratiæ sanctificantis est, quod hominem Filium Dei adoptivum constituat; atqui charitas eundem effectum præstat, 1. Joann. 3. *Videte qualem charitatem dedit nobis Pater, ut Filii Dei nominemur, & simus.*

Secundus effectus gratiæ sanctificantis, est, quod hominem Deo gratum & dilectum efficiat; atqui hoc etiam competit charitati, Jo: 15. *Qui diligit me, diligetur a Patre meo.*

Tertius effectus gratiæ, est, quod vitam spirituales conferat; atqui hoc etiam charitati tribuitur, 1. Joann. 3. *Qui non diligit, manet in morte scimus quia translati sumus de morte ad vitam, quoniam diligimus fratres.*

Quartus effectus gratiæ, est, quod sit fons & origo omnium virtutum, necnon omnium bonorum operum radix; atqui talis est charitas, 1. Cor. 13. *Charitas benigna est, patiens, &c.* unde, Roman. 13. dicitur: *Plenitudo legis, est dilectio.*

Quintus effectus gratiæ, est, quod nos Deo intime conjungat; atqui charitas nos Deo intime conjungit, 1. Joann. 4. *Qui manet in charitate, in Deo manet, & Deus in eo.*

Sextus effectus gratiæ, est, quod sit semen vitæ æternæ; atqui eadem est charitatis prærogativa, Jacobi 1. *Coronam vitæ repromisit Deus diligentibus se.*

Prob. 2. Ex D. August. qui, lib. de nat. & gr. cap. 42. de charitate ait: *Ipsa est verissima, plenissima, perfectissimaque justitia.* Et tractat. 9. Epi-

Epistola Joann. dicit : *Charitas est anima patriarchitudo*. Gratia autem sanctificans est vera animæ pulchritudo; ergo.

Prob. 3. Ex Concil. Trid. sess. 6. cap. 7. ubi explicans quænam sit unica causa formalis justificationis, ait: Quanquam enim nemo possit esse justus, nisi cui merita Passionis D. N. J. C. communicantur: id tamen in hac impii justificatione fit, dum ejusdem SS. passionis merito per Spiritum sanctum charitas Dei diffunditur in cordibus eorum qui justificantur, atque ipsis inhæret. Ubi nomine, charitatis, gratiam sanctificantem intelligit, constat. 1. Quia omnes Catholici ex verbis, inhæret & diffunditur, quibus utitur Concilium, colligunt gratiam sanctificantem esse formam intrinsicam ac permanentem. 2. Quia ibi Concilium agit de causa formali justificationis, quæ est gratia sanctificans, quamque dicit esse charitatem, quæ diffunditur in cordibus justificatorum, atque ipsis inhæret.

1. Probat. 2. pars: Ea distinguuntur virtualiter, quæ licet sint unum & idem realiter, diversa habent munia; diversisque funguntur officiis; atqui gratia sanctificans & charitas diversa habent munia, diversisque funguntur officiis; ergo.

Prob. prima pars min. Reddere hominem Deo gratum, & reddere hominem Dei dilectorem, sunt diversa munia; atqui charitas, quatenus est gratia, reddit hominem Deo gratum; quatenus vero est charitas, reddit hominem Dei dilectorem; ergo.

Prob. secunda pars minor. Esse principium essendi, & esse principium operandi; sunt duo officia diversa; atqui charitas, considerata ut gratia, est principium essendi supernaturaliter; & eadem, considerata ut est charitas,

ritas, est principium operandi supernaturaliter; ergo.

Solvuntur Objectiones.

Objicies 1. Causa & effectus distinguuntur realiter; atqui Scriptura distinguit gratiam & charitatem, tanquam causam ab effectu; ergo;

Probat. min. Rom. 5. dicitur: *Charitas Dei diffusa est per Spiritum sanctum, qui datus est nobis.* Ubi per tō, *Spiritum sanctum*, intelligitur gratia sanctificans; ergo gratia & charitas distinguuntur tanquam causa ab effectu.

Resp. nego antec. Nam nomine Spiritus sancti, qui datus est nobis, non intelligitur gratia sanctificans, sed ipsa Spiritus sancti persona, quæ in justificatione invisibiliter mittitur ad justificados, cuique per appropriationem tribuitur creatæ charitatis diffusio in cordibus nostris, eo quod sit charitas increata, seu amor substantialis Patris & Filii, cui proinde opera bonitatis appropriantur sicuti Patri opera potentiae, & Filio opera sapientiae.

Inst. 1. Scriptura, de gratia & charitate loquens, 2. Cor. 13. ait: *Gratia D. N. J. C. & charitas Dei*; atqui particula, &, est signum distinctionis gratiæ & charitatis, quas conjungit; ergo.

Resp. nego min. Particula enim, &, non est semper signum conjunctionis distinctorum, sed conjunctionis nominum synonymorum ad eandem rem expressius significandam, ut patet ex ipso textu objecto, qui sic est, *Gratia Domini nostri Jesu Christi, & charitas Dei, & communicatio Spiritus sancti*, ubi certo certius, communicatio Spiritus sancti, est charitas Dei.

Inst. 2. Conc. Trid. sess. 11. can. 11. ait: *Si quis dixerit homines justificari.... sola peccato-*

rum remissione, exclusa gratia & charitate... anathema sit. Atqui in illa loquendi forma, particula, &, est distinctorum conjunctiva; ergo.

Resp. 1. nego min. Satis enim exprimit Concilium, se non loqui de distinctione reali, cum post ista verba: *Exclusa gratia & charitate*: addit: *Qua in cordibus eorum per Spiritum sanctum diffundatur, atque illis inharent*. Si enim de duobus realiter distinctis locutam fuisset; debuisset dicere, *Diffundantur, inharent*.

Resp. 2. dist. min. An illa loquendi formula est virtualiter distinctorum unio, conc. realiter distinctorum, nego min. itaque ea, quæ virtualiter distinguuntur, per particulam, &, conjunguntur, sic dicitur: *Animalitas & rationalitas*, licet sint unum & idem a parte rei; ergo particula conjunctiva, &, non est semper signum distinctionis realis; alias juxta Concil. Trid. gratia distingueretur realiter a gratia, nam cap. 7. dicitur justificationem fieri per susceptionem gratia & donorum; atqui gratia est donum; ergo.

Instab. 3. Concil. Viennense (m) docet in baptismo infundi gratiam & virtutes; atqui per, *virtutes*, intelligit fidem, spem & charitatem; ergo sicut gratia distinguitur a fide & spe, a quibus separatur in peccatore fideli non desperante; ergo & charitas.

Respond. nego minor. Concilium enim per *to*, *Virtutes*, intelligit fidem, spem & alios habitus infusos, non vero charitatem, quæ est ipsa realiter gratia: unde sensus Concilii est, hominem renovari per susceptionem gratia sanctificantis, quæ est ipsa realiter charitas habitualis, quam semper comitantur alii habitus infusi;

(m) Clement. unica, de sancta Trinit.

fusi, & omnia dona Spiritus sancti. Responsio constat ex ipsomet Concilio dicente: *In baptismo virtutes & informans gratia infunduntur quoad habitum, etsi non pro illo tempore quoad usum.* Ubi Concilium videtur actum proprium assignare gratiæ, sicut aliarum virtutum proprius est actus; atqui non erit actus gratiæ proprius, si distinguatur a charitate; quis enim actus ipsi assignari potest, nisi dilectio?

Obicies 2. D. August. distinguit gratiam sanctificantem a charitate, in hoc quod gratia sanctificans sit causa charitatis; ergo.

Prob. ant. Lib. de gratia Christi, c. 30. ait: *Istam gratiam qua justificamur, id est, qua charitas Dei diffunditur in cordibus nostris per Spiritum sanctum, qui datus est nobis, in Pelagii & Coelestii scriptis nunquam, &c. ergo.*

Resp. nego confeq. Nam D. Aug. per gratiam, non intelligit hic gratiam sanctificantem, sed gratiam actualem, quæ est causa justificationis efficiens & dispositiva, de qua loquens l. de dono perseverantiæ, ait: *Gratia prevenit charitatem.*

Inst. D. August. lib. de spiritu & litt. c. 32. ait: *Charitas Dei dicta est diffundi in cordibus nostris, non qua nos diligit, sed qua nos facit dilectores suos.* Ex quo sic arguo: D. Augustin. per charitatem Dei qua nos diligit, intelligit gratiam sanctificantem: & per charitatem, qua nos facit dilectores suos, intelligit charitatem habitualement; atqui unam ab alia distinguit realiter; ergo.

Resp. nego min. Nam ibi equidem D. Doctor diversos charitatis effectus assignat, non vero diversam entitatem; porro quod sint diversi charitatis effectus, diversaque munia probatum est parte secunda hujus conclusionis.

Obicies 3. Charitas supponit in anima gratiam habitualement; ergo ab illa realiter distinguitur.

Charmes, Theol. Schol. Tom. III. Z. Probat.

Probat. antec. Virtus operandi supernaturaliter, supponit in subiecto esse supernaturale; atqui gratia dat esse supernaturale, charitas dat posse operari supernaturaliter; ergo charitas supponit in anima gratiam habitualement.

Respond. nego maj. Quæ si esset vera, sequeretur nec fidem, nec spem esse veras virtutes in peccatore fideli; siquidem in illo non supponunt gratiam sanctificantem, quæ sola dat esse supernaturale.

Inst. 1. Virtus supernaturalis non dat simul esse & posse; atqui prius est *esse* quam *posse*; ergo posse operari supernaturaliter, supponit esse supernaturale.

Respond. nego maj. Quia in supernaturalibus *esse*, est accidentale, sicut & ipsum *posse*; quod autem est accidentale potest dare *esse*, simul & *posse*; sic gratia sanctificans quatenus respicit animam, quam Deo reddit formosam & amabilem, dat *esse*; quatenus vero respicit operationem dilectionis Dei, ad quam per gratiam sanctificantem redditur habilis, dat *posse*; sub primo respectu gratia, sub secundo charitas denominatur.

Inst. 2. Virtus acquisita non dat *esse* naturale, sed illud supponit; ergo virtus infusa non dat *esse* supernaturale, sed illud supponit.

Resp. nego. conseq. Nam virtus acquisita non dat, sed supponit *posse* operari naturaliter; ergo a fortiori non dat, sed supponit *esse* naturale, at virtus infusa, qualis est charitas, dat ipsum *posse* operari supernaturaliter, & dando *posse*, dat & ipsum *esse* supernaturale.

C A P U T I E.

De effectibus gratia habitualis.

Nota. Duo sunt gratia habitualis effectus, **J**ustificatio nimirum & meritum, de quibus agemus duabus quaestionibus.

Q U A E S T I O E.

De justificatione.

Nota. Justificatio sumi solet quatuor modis. Nempe

1. Pro lege, quae justitiam docet, Pl. 118. *Docce me justificationes tuas.*

2. Pro declaratione justitiae, per quam reus ad iudicem delatus, declaratur innocens, Prov. 17. *Qui justificat impium, & qui condemnat justum, abominabilis est uterque apud Deum.*

3. Pro acquisitione justitiae, Romi. 3. *Justi facti gratis per gratiam ipsius.*

4. Pro augmento justitiae, Apocal. 22. *Qui justus est, justificetur adhuc.*

Nota 2. Calvinistae sumunt nomen justificationis secundo modo, docentes, 1. in justificatione impii peccata non deleri, nec auferri, sed tantum tegi & occultari justitia Christi, propter quam peccatori non imputentur, licet in ea revera remaneant. 2. Naturam justificationis formaliter consistere in hac peccati non imputatione, non vero praeterea in ulla interiori renovatione per gratiam habitualement animae inhaerentem.

Econtra, Catholici omnes nomen justificationis sumunt tertio modo, nimirum, pro acquisitione

quisitione justitiæ, per quam. 1. Peccatum vere & realiter deletur; 2. Anima interior sanctificatur per formam seu qualitatem intrinsece ipsi inhærentem: unde justificatio a Concilio Trident. definitur: *Translatio ab eo statu, in quo homo nascitur filius primi Ada, id est a statu peccati: In statu gratia & adoptionis filiorum Dei, per secundum Adam Jesum Christum.*

Nota 3. Justificationis sic sumptæ exponendum habemus: 1. Naturam. 2. Dispositiones ad illam acquirendam. 3. Proprietates.

ARTICULUS I.

De natura & essentia justificationis.

Natura cujuscunque rei, ex ipsius definitione repeti debet; hinc cum justificatio sit translatio a statu peccati ad statum justitiæ, videndum est. 1. Utrum in justificatione vere deleantur peccata. 2. Utrum in justificatione fiat interior hominis renovatio per gratiam animæ ejus inhærentem.

CONCLUSIO I.

In justificatione impii peccata vere remittuntur & eradicantur. Est de fide contra Calvin. definita in Concil. Trident. sess. 5. can. 5. his verbis: *Si quis per Domini nostri Jesu Christi gratiam, qua in Baptismo confertur, reatum peccati originalis remitti negat, aut etiam assertis non tolli totum quod veram & propriam peccati rationem habet, sed illud dicit tantum radi, aut non imputari, anathema sit.*

Prob. 1. Ex Scriptura, quæ aperte pronuntiat Deum peccata vere delere & auferre: Isaia 43. *Ego sum ipse qui deleo iniquitates tuas propter me.*

me. Mich. 7. *Quis Deus similis tui qui auferat iniquitatem?* Joann. 11. *Ecce Agnus Dei, ecce qui tollit peccata mundi.* Ergo, &c.

Prob. 2. Ex PP. D. Chrysoft. lib. 2. de compunctione cordis, ait: *Cordis compunctio, sicut ignis, omne anima vitium perurit, & adimit, & quantacumque in ea repererit mala, abstergit universa, & penitus delet.* Atqui peccatum illud vere deletur, quod perurit, adimitur, abstergitur & penitus deletur; ergo.

D. August. lib. 1. contra duas Epistolas Pelagianorum, cap. 13. qui ut retunderet calumniam Pelagianorum asserentium Catholicos docere: *Baptisma non dare indulgentiam peccatorum, nec auferre crimina, ut omnium peccatorum radices in mala carne teneantur*, ait: *Quis hoc adversus Pelagianos, nisi infidelis affirmet?* dicimus enim Baptisma dare omnium indulgentiam peccatorum, & auferre crimina, non radere, nec ut omnium peccatorum radices in mala carne teneantur, quasi rasorum in capite capillorum, unde crescant iterum refecanda peccata.

Prob. 3. ratione Theologica. Si peccata in justificatis penitus non deleberentur, sed in eis revera subsisterent, sequeretur justificatum, nec a peccato vere resurgere, nec perfecte lavari & mundari; atqui falsum consequens ex Scriptura dicente: 1. Joann. 5. *Nos scimus quoniam translati sumus de morte ad vitam, quia diligimus fratres.* Psalm. 50. *Lavabis me, & super nivem dealbabor.* Ezech. 36. *Effundam super vos aquam mundam, & mundabimini ab omni bus inquinamentis vestris.* Ergo.

Solvuntur Objectiones.

Objicies. 1. Peccata in justificatione solummodo teguntur; ergo penitus non delentur.

Probi. ant. Psalm. 31. dicitur : *Beati quorum remissa sunt iniquitates ; & quorum tecta sunt peccata.* Ergo, &c.

Resp. nego conseq. Duplex enim est peccatorum tectio ; *Prima*, qua duntaxat occultantur ne appareant, *Secunda*, qua curantur ne remaneant. De secunda intelligendus est praesens textus, ut tradit D. August. *enarratione secunda in hunc Psalm.* dicens : *Deus tegat vulnera, non tu, nam si tegere volueris erubescens, medicus non curabit . . . sub tegmine medici sanatur vulnus, sub tegmine vulnerati celatur vulnus.*

Inst. 1. D. Aug. loco cit. ait : *Si cecit peccata Deus, noluit advertere ; si noluit advertere, noluit animadvertere ; si noluit animadvertere, noluit punire ; noluit agnoscere, maluit ignoscere ; ergo peccata sunt duntaxat tecta ne appareant.*

Resp. nego conseq. Peccata enim ita teguntur, ut simul deleantur, juxta illud Psalm. 50. *Dele iniquitatem meam* : unde D. August. postquam dixit : *Cooperta sunt peccata, tecta sunt, abolita sunt ;* addit : *Nec sic intelligatis quod dixi : cooperta sunt, quasi illa sint & vivant.*

Instab. 2. In eodem Psalmo legitur : *Beatus vir cui non imputavit Dominus peccatum.* Atqui peccati non imputatio, est simplex illius occultatio ; ergo.

Resp. nego min. Nam, *non imputare*, idem significat, ac, *non punire* ; porro duplex est non imputatio, una qua non punitur id quod est ; altera qua non punitur id quod non est ; textus autem debet intelligi de secunda non imputatione, ut insinuat secunda pars illius versus, *Nec est in spiritu ejus dolus*, id est peccatum ; si non est, quomodo remanet ?

Inst. Illud peccatum simpliciter occultatur, quod duntaxat dissimulatur ; atqui peccatum duntaxat dissimulatur, juxta illud Sap. 11. *Miserere.*

Misereris omnium, quia omnia potes, & dissimulas peccata hominum propter poenitentiam; ergo.

Resp. nego min. In textu enim, dissimulare, sumitur pro, *delere, auferre*; unde Syriaca versio habet: *Misereris omnium, quia omnibus benefacis: & aufers iniquitates hominum quam poenituerit eos.* Qui textus potest insuper intelligi de peccatis nondum remissis, ut sensus sit, Deum ita esse misericordem, ut nolit statim exterminare peccatores, sed expectet, & concedat tempus ad agendam poenitentiam, juxta illud D. Petri, Epist. 2. cap. 3. *Patienter agit propter vos, nolens aliquos perire, sed omnes ad poenitentiam reverti.*

Objicies 2. Psalm. 144. dicitur: *non justificabitur in conspectu tuo omnis vivens.* Ergo peccata vere non delentur.

Resp. dist. ant. Non justificabitur, &c. Propriis meritis, *conc.* per gratiam justificantem, *subdist.* comparate ad Dei justitiam, *conc.* absolute, *nego antec.* Itaque non negat Psalmista hominem vere justificari, cum dicat Psalm. 7. *Judica me Deus secundum justitiam meam.* Sed negat hominem posse justificari comparate ad Deum, quo sensu Job, cap. 9. dicit: *scio quia non justificabitur homo compositus Deo; id est comparate ad Deum, justitia quippe nostri quotidianis defectibus obumbrata, pro nihilo reputatur in comparatione justitiæ Dei.*

Instab. 1. Atqui homo non potest justificari absolute; ergo.

Prob. antec. Nemo justificatur, nisi perfecte impleat præceptum charitatis, nam 1. Joann. 3. *qui non diligit, manet in morte*; atqui ex Divo Augustino, lib. de perfect. justitia cap. 8. Præceptum charitatis perfecte non implebitur nisi in futura gloria; ergo.

Resp. dist. minor. Non implebitur perfecte
Z 4 quoad

quoad intentionem, *conc.* quoad appretiationem, *nego min.* Equidem non possumus in hac vita diligere Deum secundum omnimodam intentionem, qua dilectio illa potest a creaturis exerceri pro quovis statu; sed possumus eum diligere secundum appretiationem, illum omnibus omnino rebus anteponendo, quod sufficit & requiritur ad justificationem.

Instab. 2. Nullus est qui non debeat orare, & dicere: *dimitte nobis debita nostra*; ergo nullus est qui non coinquinetur peccatis.

Resp. dist. consequ. Nullus est qui non coinquinetur peccatis venialibus, *conc.* mortalibus, *nego consequ.* Porro peccatum veniale non dissolvit amicitiam cum Deo, neque privat ipsius gratia & habitibus virtutum infusis, quibus homo formaliter constituitur justus, & habitualiter instructus ad bene operandum supernaturaliter in omni genere virtutum.

Inst. 3. D. Paulus erat justificatus; atqui tamen illius peccata non erant vere remissa; nam de seipso, Roman. 7. ait: *Jam non operor illud, sed quod habitat in me peccatum ergo.*

Resp. nego minor. Nam D. Paulus per peccatum, intelligit concupiscentiam, quæ vocatur peccatum materialiter, non formaliter, non quod vere & proprie in renatis peccatum sit, ait Concilium Tridentinum sess. 5. Can. 5. *sed quia ex peccato est, & ad peccatum inclinatur.* Hæc consequenter non impedit, quin homo sit justus.

CONCLUSIO II.

In justificatione impij, fit interior hominis renovatio; per gratiam animæ ejus inharentem.
Est de fide contra Calvinistas.

Nota: Hæc conclusio coincidit cum ea, quæ

qua superius probavimus gratiam habitualement esse donum internum animæ nostræ permanentem inhærens; unde paucis eam probabimus: itaque;

Prob. 1. Ex Scriptura, Ezech. 36. Mundabitur ab omnibus inquinamentis vestris . . . & dabo vobis cor novum & spiritum novum ponam in medio vestri. Et Ephes. 4. Renovamini spiritu mentis vestra, & induite novum hominem, qui secundum Deum creatus est in justitia & sanctitate veritatis. Ergo in justificatione impii, præter peccati remissionem, includitur formaliter & essentialiter interior hominis renovatio.

Probat. 2. Ex Concil. Trid. sess. 6. c. 7. dicente: Justificatio . . . non est sola peccatorum remissio, sed & sanctificatio, & renovatio interioris hominis per voluntariam susceptionem gratia & donorum. Et ex Concil. Mogunt. ult. cap. 7. in quo dicitur: Justificatio cum peccatorum remissione, etiam sanctificationem, & interni hominis renovationem confert.

Prob. 3. ratione: Nemo potest novam formam intrinsecam positivam recipere, absque vera sui mutatione; atqui homo in justificatione recipit novam formam intrinsecam positivam, nempe gratiam sanctificantem, qua ex injusto fit justus, ex inimico Dei, amicus, & hæres vitæ æternæ; ergo vera mutatur per interioriorem sui renovationem.

Objectiones. Apost. Rom. 4. dicit: Christus dicitur traditus propter delicta nostra, id est, propter remissionem peccatorum; ergo justificatio nostra consistit tantum in remissione peccatorum.

Resp. dist. ant. Propter remissionem peccatorum, prout includit & peccati deletionem, & interioriorem animæ sanctificationem, conced. prout præscindit ab interiori animæ sanctificatione, nego ant. nam idem Apostolus, cap. 5.

comparat Christum nos justificantem cum Adamo nos inficiente peccato originali : *Sicut enim*, inquit, *per inobedientiam unius hominis peccatores constituti sunt multi : ita & per unius obeditionem justii constituuntur multi*. Atqui peccatum originale, fatentibus Calvinistis, importat interiorum deformitatem ; ergo & justificatio importat interiorum renovationem & sanctificationem.

Instab. 1. Dicitur, 1. Joann. 5. *In hoc apparuit Filius Dei, ut dissolveret opera diaboli*. Atqui operum diaboli dissolutio, non alia est, quam peccati remissio ; ergo.

* *Resp. dist. maj.* Ut dissolveret opera diaboli, per deletionem peccati, & novæ vitæ supernaturalis largitionem, conc. per solam exclusionem peccati, nego maj, nam, Joann. 10. dicit Christus : *Ego veni ut vitam habeant, & abundantius habeant*. Ex quo patet falsitas minoris argumenti.

Inst. 2. Apost. 2. Cor. 5. ait : *Deus erat in Christo mundum reconcilians sibi, non reputans illis delicta ipsorum*. Ergo justificatio consistit in sola peccatorum remissione.

Resp. nego. conseq. Equidem Apostolus ibi de una tantum justificationis parte, quæ in peccatorum remissione posita est, expresse loquitur, sed non excludit aliam, consistentem in infusione justitiæ inhærentis, quam exprimit alibi ; immo, Coloss. 2. de utraque expresse loquitur, dicens : *Et vos, cum mortui essetis in delictis, convivificavit cum illis (Christo), donans vobis omnia delicta*.

ARTICULUS II.

De dispositionibus ad justificationem.

Nota 1. **N**on agimus hic de parvulorum justificatione, quæ fit in Baptismate; cum enim non sint rationis & liberæ compotes, aperte constat ipsos nullius esse dispositionis capaces; de sola ergo adultorum justificatione est sermo, de qua duo quærentur. 1. Utrum aliquæ dispositiones requirantur ad justificationem. 2. Quot & quænam illæ sint.

§. I. Utrum aliquæ dispositiones requirantur ad justificationem?

Nota: De fide est hominem per solas naturæ vires non posse sese ad justificationem præparare, ut aperte tradit Scriptura, Psalm. 20. *Prævenisti eum in benedictionibus dulcedinis.* Joannis 6. *Nemo potest venire ad me, nisi Pater meus traxerit eum.* Et definivit Concil. Trid. sess. 6. Can. 3. *Si quis dixerit sine præveniente Spiritus sancti illuminatione, atque ejus adjutorio hominem credere, sperare, diligere, aut pœnitere posse, sicut oportet, ut ei justificationis gratia conferatur, anathema sit.* Unde solum hic resolvendum est, utrum in homine prærequirantur aliquæ dispositiones physicæ & morales, quibus, cum divinæ gratiæ auxilio, sese possit ad gratiam justificationis præparare, circa quod:

CONCLUSIO.

In adultis prærequiruntur dispositiones ad justificationem. Est de fide, definita in Concil. Trid. Z. 6.

Trid. sess. 6. Can. 9. Si quis dixerit sola fide impium justificari, ita ut intelligat nihil aliud requiri, quod ad justificationis gratiam consequendam cooperetur, & nulla ex parte necesse esse eum sua voluntatis motu preparari, atque disponi; anathema sit.

Prob. 1. Ex Scriptura, Isaia 45. Convertimini ad me, & salvi eritis. Zachar. 1. Convertimini ad me, & ego convertar ad vos. Atqui illa conversio ad Deum fieri nequit absque motu liberi arbitrii; ergo ille motus est requisitus: hinc, Prov. 16. dicitur: *Hominis est animam preparare*, nimirum, cum adjutorio Dei tangentis cor hominis per auxilium gratiae, ait D. August. lib. 2. ad Bonifacium, cap. 9.

Prob. 2. Ex D. August. tractat. 72, in Joann. Salutem in impio, sed non sine impio, Christus operatur. Et Serm. 15. de verbis Apostoli. *Qui fecit te sine te*, inquit, *non te justificat sine te. . . . fecit nescientem, justificat scientem.*

Ratio a priori, est voluntas Dei; ratio a posteriori, est, quia sicut homo libere se avertit a Deo per peccatum, congruum est, ut cum Deo non reconcilietur, nisi prius ad eum libere sese converterit.

Soluntur Objectiones.

Objicies 1. Non requiritur actus liberi arbitrii, ad hoc ut adultus justificetur; ergo.

Prob. ant. Ex D. Agust. qui, lib. 4. Confess. cap. 4. refert quemdam ex suis amicis morbo lethali laborantem, baptizatum fuisse nescientem, & renatum fuisse; ergo non requiritur actus liberi arbitrii ad hoc, ut adultus justificetur.

Resp. dist. conseq. Non requiritur actus liberi arbitrii, ad hoc, ut adultus mentis compos
justi

justificetur, *negō*; mentis impos, *subdisting.* si nunquam rationis usum habuit, *conced.* si aliquando usum rationis habuit, *iterum dist.* non semper requiritur actus liberi arbitrii præsens. cum baptizatur, aut absolvitur, *conced.* non requiritur actus liberi arbitrii antecedens Baptismum, aut absolutionem, *negō conseq.* Ad hoc enim, ut aliquis adultus, qui fuit rationis compos, baptizetur, vel absolvatur, necesse est, ut, antequam in lethalem morbum, qui rationis usum extinguit, incidat, prius Baptismum, aut absolutionem sacramentalem fuerit deprecatus, ut explicabitur in *Dissertatione de Baptismo.*

Instab. 1. Si ad justificationem requireretur actus liberi arbitrii, Deus expectaret voluntatem nostram; atqui ex Concil. Arausicano II. *Ut a peccato purgemur, Deus voluntatem nostram non expectat*; Ergo.

Resp. dist. maj. Deus expectaret voluntatem nostram, quæ cum gratia adjuvante ad gratiam justificationis sese præpareret, *conced.* quæ præveniat gratiam excitantem, & adjuvantem, *negō maj.* Hoc ultimo sensu Concil. Arausicanum definivit Deum non expectare voluntatem nostram, ut a peccato purgemur.

Inst. 2. Si homo posset per proprios liberi arbitrii actus sese disponere ad justificationem, hæc propositio, *Homo se justificat propriis actibus*, esset vera; atqui illam, ut falsam, rejiciunt plurimi Theologi; ergo.

Resp. dist. major. Illa propositio esset vera, intellecta de justificatione dispositiva per actus proprios gratiæ prævenientis & adjuvantis auxilio elicitos, *conced.* intellecta de justificatione formali, aut de actibus per solas naturæ vires elicitis, *negō maj.* Hoc autem ultimo tantum sensu Theologi illi propositionem supra dictam dant.

damnant, cum certum sit neminem, illam, in priori sensu intellectam, posse falsitatis infimulare, similes namque propositiones in Scriptura leguntur; sic, Jerem. 4. *Lava a malitia cor tuum*. 2. Corinth. 7. *Mundemus nos ab omni inquinamento carnis & spiritus, perficientes sanctificationem in timore Dei*. 1. Joann. 3. *Omnis qui habet hanc spem in eo sanctificat se*.

Obicies 2. Gratia justificationis conservatur sine motu liberi arbitrii; ergo & sine eo infunditur.

Respond. nego consequ. Disparitas est, quod in infusione gratiæ sit quædam transmutatio animæ, & ideo requiritur motus proprius animæ, ut moveatur secundum modum suum; at conservatio gratiæ est absque animæ transmutatione, unde non requiritur aliquis motus ex parte animæ, sed sola continuatio influxus divini.

§. II. *Quot & quanam dispositiones requirantur ad justificationem.*

Nota 1. Fide constat necessario requiri fidem ad nostram justificationem, ut aperte testatur Scriptura, Matth. ult. *Qui non crediderit, condemnabitur*. Et Joann. 1. *Dedit eis potestatem filios Dei fieri, his qui credunt in nomine ejus*. Hinc Concil. Trid. sess. 6. cap. 8. ait: *Cum Apostolus dicit justificari hominem per fidem & gratis: ea verba in eo sensu intelligenda sunt, quem perpetuus Ecclesia Catholica consensus tenuit, & expressit ut scilicet per fidem ideo justificari dicamur, quia fides est humana salutis initium, fundamentum, & radix omnis justificationis, sine qua impossibile est placere Deo, & ad filiorum ejus consortium pervenire*.

Nota 2. Hæretici hujus temporis, dicit Cal-

xino, lib. 3. instit. cap. 2. triplicem distinguunt fidem, historicam, nempe, miraculorum, & promissionum.

Fides *historica*, seu dogmatica, ea est, qua credimus vera esse quæ a Deo revelata sunt.

Fides *miraculorum*, quam Calvinus, loco mox citato, definit: *Edendorum miraculorum facultas*; verius definiri potest, fides historica, annexam habens facultatem edendorum miraculorum.

Fides *promissionum*, est certa fiducia qua credimus veras esse Dei promissiones, de gratuita peccatorum remissione per Christi merita: & hanc iterum duplicem esse dicunt, nempe *generalem*, qua credimus omnibus, qui in Christum credunt, promissam esse peccatorum remissionem. Et *particularem*; qua unusquisque sibi divinam promissionem applicans, credit, seu potius confidit, sibi omnia sua peccata esse dimissa per Christum: his positis:

Nota 3. Hæretici docent. 1. Fidem, quæ disponit ad justificationem, esse fidem promissionum, eamque specialem. 2. Solam fidem promissionum ad justificationem disponere. Contra quos:

CONCLUSIO I.

Fides necessaria ad justificationem, est fides dogmatica, seu historica, non vero fides promissionum. Est de fide in Concil. Trid. sess. 6. Can. 12. definita his verbis: *Si quis dixerit fidem justificantem nihil aliud esse, quam fiduciam divina misericordia peccata remittentis propter Christum . . . anathema sit.*

Probar. 1. Ex Scriptura, quæ actum fidei ad justificationem disponentis describens, illum explicat per assensum datum divinæ revelationis;

li.

fic Marci ult. *Prædicate Evangelium omni creatura: qui crediderit, (omnia in eo contenta) saluus erit.* Joann. 10. *Hæc autem scripta sunt, ut credatis, quia Jesus est Christus Filius Dei; & ut credentes, vitam habeatis.* Rom. 10. *Hoc est verbum fidei quod prædicamus, quia si confitearis in ore tuo Dominum Jesum, & in corde tuo credideris, quod Deus illum suscitavit a mortuis, saluus eris.* Ex quibus sic argumtor: fides, quæ his textibus exprimitur, est fides dogmatica, ut per se patet; atqui illa est, quæ ad justificationem disponit, nam disponit ad vitam æternam; ergo.

Prob. 2. Ex PP. Pro omnibus sit D. Leo, qui serm. 4. de Epiphania, ait: *Hoc est quod justificat impios, . . . si in uno eodemque Domino nostro Jesu Christo, & vera deitas, & vera credatur humanitas.* Atqui fides, qua Christi divinitas & humanitas creduntur, est fides dogmatica; ergo.

Prob. 3. ratione: Fides justificans debet præcedere justificationem, cum sit dispositio ad illam; atqui fides specialis promissionum justificationem non præcedit; ergo.

Probat. minor. Fides illa specialis promissionum, quam fingunt hæretici, est ea qua homo credit sibi esse remissa peccata propter Christi merita; ergo ea fides non præcedit, sed sequitur justificationem.

Solvuntur Objectiones.

Obicies 1. Matth. 9. Christus dixit: *Confide fili, remittuntur tibi peccata tua;* ergo fides prærequisita ad justificationem, est fides promissionum specialis, qua quilibet sibi confidit remissa esse peccata per Christum.

Respond. nego consequ. Equidem ad remissio-

nem peccatorum requiritur fiducia, quæ sit actus spei, qua peccator sperat sibi remittenda peccata per Christum, sed nec sola requiritur, cum presupponat actum fidei, quo peccatores libere moventur in Deum, credentes vera esse, qua divinitus revelata, & promissa sunt, ut docet Concil. Trident. sess. 6. cap. 6. nec est illa hæreticorum fides, qua unusquisque credit sibi remissa esse peccata, sed est vera spes Theologica, ut constat ex ipso textu.

Instab. 1. Apost. Rom. 4. ait: *Ideo ex fide, ut secundum gratiam firma sit promissio omni femini.* Ergo fides est certa expectatio promissæ misericordiæ Dei ad remissionem peccatorum.

Resp. nego consequ. Neque enim Apostoli textus intelligitur de promissione justificationis facta huic, aut illi in singulari, quam hæretici volunt includi in certa fiducia, quæ sit fides promissionum, ut loquuntur: sed loquitur Apostolus de promissione vocationis gentium ad fidem, facta Abraham, quam firmam & stabilem asserit, ex ea fide dogmatica, qua credidit Abraham Deo, & reputatum est illi ad justitiam; ergo si, per fidem dogmaticam, Abraham coram Deo justificatus est; eadem fides dogmatica est prima dispositio ad justificationem acquirendam.

Inst. 2. 1. Joann. 5. dicitur: *Hac scribo vobis, ut sciatis quoniam vitam habetis æternam, qui creditis in nomine Filii Dei.* Ergo fides justificans, ea est, qua quisque credit, seu confidit, sibi peccata esse remissa, sequæ vitam æternam habiturum.

Respond. nego consequ. Sensus D. Joannis est, quod qui credunt in Filium Dei, sicut oportet, habent vitam æternam in spe, eandem habituram, si non excident a justitia, quam per illam

illam fidem adepti sunt; nihil ergo præfatus textus patrocinatur novatorum confidentiæ.

Objicies 2. Ex Apostol. Hebr. II. *Fides est sperandarum substantia rerum;* ergo fides justificans nihil aliud est, quam fiducia, qua quisque sibi confidit sibi remissa esse peccata.

Resp. nego consequ. Nam fiducia hæreticorum pertinet ad voluntatem, fides autem, quam describit Apostolus, pertinet ad intellectum; dicit enim quod sit *argumentum non apparentium*. Id est demonstratio & convictio, non quidem per ipsas res facta, sed per Dei revelantis veracitatem habita, demonstratio autem & convictio pertinent ad intellectum.

CONCLUSIO II.

Sola fides ad justificationem non sufficit. Est de fide definita in Conc. Trid. sess. 6. Can. 9. *Si quis dixerit sola fide impium justificari, ita ut intelligat nihil aliud requiri, quod ad justificationis gratiam consequendam cooperetur... anathema sit.*

Prob. 1. Ex Scriptura, Jacobi 2. versic. 14. *Quid proderit, fratres mei, si fidem quis dicat se habere, opera autem non habeat? nunquid poterit fides salvare eum? & versic. 24. Ex operibus justificatur homo, & non ex fide tantum.* Et versic. 26. *Sicut enim corpus sine spiritu mortuum est, ita & fides sine operibus mortua est.* Hæc verba ita clare probant nostram propositionem, ut Lutherus coactus fuerit Epistolam Jacobi, velut Apocrypham, rejicere; hanc tamen admittit Calvinus cum sequacibus.

Probat. 2. Ex iis Scripturæ locis, ubi præter fidem, alii actus supernaturales exiguntur ad justificationem: qui quatuor enumerantur a Conc. Trid. sess. 6. cap. 6.

1. Exigitur timor, Eccl. 1. *Timor Domini expellit peccatum, nam qui sine timore est, non poterit justificari.*

2. Exigitur actus spei, Prov. 28. *Qui sperat in Domino sanabitur.* Et Rom. 8. *Spe salvi facti sumus.*

3. Requiritur actus dilectionis Dei, 1. Joann.

3. *Qui non diligit, manet in morte.* Quenam autem dilectio requiratur, ad gratiam justificationis obtinendam, tam in Sacramento, quam extra Sacramentum, dicetur in dissertatione de poenitentia.

4. Exigitur poenitentia, Actor. 2. *Poenitentiam agite, & baptizetur unusquisque vestrum in nomine Jesu Christi in remissionem peccatorum vestrorum, & accipietis donum Spiritus sancti.* Lucæ 13. *Si poenitentiam non habueritis, amnas similiter peribitis.* Ergo falsum est, quod obtrudunt Novatores, Scripturam solius fidei mentionem facere, ubi sermo est de justificatione & remissione peccatorum.

Prob. 3. ex BP. Pro omnibus sunt D. Chrysost. Hom. 7. in Matth. ubi ait: *Ne fideles sola fide se salvari posse confidant.* Et D. Aug. serm. 6. cap. 6. de verbis Apostoli: *A fide incipit homo, inquit, sed quia demones credunt & contremiscunt, necesse est addere spem & charitatem; ergo.*

Prob. 3. razione Theologica: Qui solam fidem habent, possunt esse fures, avari, ebriosi, maledici, rapaces; atqui ex Apostol. 1. ad Cor. 6. *Neque fures, neque avari, neque ebriosi, neque maledici, neque rapaces, regnum Dei possidebunt; ergo fides non est sola dispositio requisita ad justificationem.*

Solvuntur Objectiones.

Objicies 1. Scriptura sacra solam fidem requirit ad justificationem, Lucæ 8. *Crede tantum & salva eris*; ergo ceteræ dispositiones superflue sunt.

Resp. nego ant. Neque enim, in textu, sermo est de justificatione, sed de suscitatione mortuæ puellæ, quam Christus reddidit patri propter fiduciam, quam habebat in ejus bonitate & potentia suscitandæ puellæ.

Inst. 1. Atqui Scriptura testatur justificari hominem per solam fidem; ergo.

Prob. anteced. Rom. 4. dicitur: *Credenti in eum qui justificat impium, reputatur fides ejus ad justitiam secundum propositum gratia Dei*. Ergo sola fides disponit ad justificationem.

Respond. nego consequ. In textu enim, licet solius fidei mentio fiat, tamen alii actus concurrentes ad justificationem non excluduntur; sicut cum dilectioni tribuitur justificatio, Lucæ 7. *Remittuntur ei peccata multa, quoniam dilexit multum*, non excluditur fides, nec alii actus ad justificationem disponentes.

Inst. 2. Apost. Rom. 3. A dispositionibus justificationis excludit opera: *Arbitramur*, inquit, *hominem justificari sine operibus legis*. Ergo sola fides sufficit.

Resp. dist. ant. Excludit opera fidem præcedentia, & a fide non profecta, *conc.* excludit opera bona ex fide & gratia Christi facta, *neg. ant.* Alias sibi esset contrarius Apostolus, qui eadem Epist. cap. 2. ait: *Reddet unicuique secundum opera ejus . . . factores legis justificabuntur*. Expresse tamen solius fidei meminit, *Quia*, ut ait Conc. Trid. *Fides est humana salutis initium, fundamentum, & radix omnis*

nis justificationis. Et ideo est prima dispositio; a qua aliæ pendent, & quæ ad alias prærequiritur.

Instab. 3. Idem Apost. cap. 4. dicit: *Si enim Abraham ex operibus justificatus est, habet gloriam, sed non apud Deum.* Ergo Apostolus a justificationis dispositionibus excludit omnia opera.

Resp. dist. conseq. Excludit omnia opera externa sine fide facta, *conc.* opera per fidem facta, *neg.* conseq. Sensus enim Apostoli hic est: si enim ex operibus externis justificatus esset Abraham, haberet quidem unde glorietur apud homines, qui vident externa; sed non haberet unde glorietur apud Deum, qui cor & animum hominis in primis intuetur: sicque politice tantum justificatus esset Abraham: at certissime, non politice tantum, sed vere, interne, & coram Deo justificatus est.

Inst. 4. Ephes. 2. dicit idem Apost. *Gratia enim estis salvati per fidem... non ex operibus.* Ergo.

Resp. dist. antec. Non ex operibus sine fide & gratia factis, *conc.* cum gratia factis, *neg.* ant. rejicit itaque Apostolus opera ante fidem facta, quæ non sunt salutaria, quæ cum fides sit omnis meriti fons & prima origo; nullum est ante ipsam opus meritorium; verum non rejicit opera facta per fidem & gratiam; unde Div. Augustin. *libr. de gratia & libr. arb. cap. 7.* ait: *Homines non intelligentes quod ait Apostolus putaverunt eum dicere homini sufficere fidem etiamsi opera bona non habeat, quod absit.* Nam Apostolus non loquitur de fide nuda, sed de fide vestita operibus spei, charitatis, poenitentiae, de qua loquens ad Galat. 5. ait: *In Christo Jesu neque Circumcisio aliquid valet, neque praputium, sed fides qua per charitatem operatur.*

Obji-

Obijcies 2. D. Hilarius, cap. 8. in *March.* ait: *Fides enim sola justificat.* Ergo:

Respond. dist. antec. Fides sola justificat per exclusionem caeremoniarum legalium, conc. per exclusionem operum ex gratia factorum, nego ant. De enim Hilarius manifeste declarat se excludere caeremonias legales a dispositionibus justificationis, loquitur enim ibi de paralitico, cui Christus remisit peccata, & ait: *Movet Sribas remissum ab homine peccatum . . . quod lex laxare non poterat; fides enim sola justificat.* Eodem modo respondendum est aliis Patribus, qui cum videntur dicere solam fidem justificare, loquuntur de fide formata qua per dilectionem operatur. De qua loquens August. lib. de fide & operibus, c. 14. ait: *Qui credit Deo, debet facere quod praecepit Deus, & qui propterea facit, quia praecepit Deus, necesse est ut credat Deo.*

ARTICULUS III

De proprietatibus justificationis.

Notae: Circa proprietates justificationis graviter erraverunt Haeretici.

1. Jovinianus docuit aequalem in omnibus esse justificationem, homines non posse in accepta Dei gratia crescere, nec unum altero sanctiorem esse posse; hunc secuti sunt Lutherus, qui serm. de Nativit. Beatæ Mariæ Virginis blasphemavit, dicens: *Omnes Christiani aequi magni sumus, sicut Mater Dei, & aequi sancti sicut ipsa; & Calvinus, cujus error refertur in Theologia Calvinistica VVindelini, lib. 11 cap. 24. dicentis: Aequalitas justificationis est quia Christi justitia, per fidem apprehensa, omnibus a Deo aqualiter impartatur, etiam si*

iamſa aliorum fides robustior, aliorum imbecillior eſt.

2. Calvinus, lib. 3. inſtit. capit. 2. & ejus ſequaces docent, eum qui ſemel juſtificationis gratiam adeptus eſt, eam per nullum ſubſequens peccatum poſſe unquam amittere.

3. Lutherus, in ſuis Theſibus publicis, docuit quemlibet fidelem poſſe eſſe certum, certitudine fidei, ſe eſſe juſtificatum, idque teneri credere fide divina, cum in dubium revocare non poſſit, quominus Chriſti juſtitia ſibi imputata, a Deo Patre acceptetur. Hunc errorem amplectuntur Calvinus lib. 3. inſtit. cap. 2. num. 7. & omnes ejus ſequaces. Contra hos errores ſit:

CONCLUSIO I.

Juſtitia non eſt aqualis in omnibus, ſed unus altero eſt ſanctior & juſtior. Eſt de fide.

Prob. 1. Ex Scriptura, Matth. 11. dicitur: *Inter naſos mulierum non ſurrexit major Joanne Baptiſta.* Ergo teſte ipſomet Chriſto unus altero eſt ſanctior; ergo, &c.

Prob. 2. Juſtitia poteſt augeri, Eccleſ. 18. *Na varearis uſque ad mortem juſtificari*, id eſt, creſcere in juſtitia, 2. Petri 3. *Creſcite in juſtitia.* Apoc. ultimo, *Qui juſtus eſt, juſtificetur adhuc.* Ergo juſtitia non eſt æqualis in omnibus.

Prob. 3. ex PP. D. Auguſtin. Epist. 57. ad Dardanum, *In ſanctis alii aliis feliciores abundantius habentes habitatores Deum.* Idem habet D. Hieron. in cap. 4. ad Ephesios.

Probat. 4. Ex Concilio Tridentino ſeſſ. 6. Can. 24. definiente: *Si quis dixerit juſtitiam acceptam non conſervari atque etiam augeri coram Deo per bona opera, ſed opera ipſa fructus ſolusmodum & ſigna eſſe juſtificationis ad-*
pra,

pta, non autem ipsius augenda causa, anathema sit.

Prob. 5. ratione. Dabitur in cælo inæqualitas gloriæ, juxta illud Joann. 14. *In domo Patris mei mansiones multe sunt; ergo datur inæqualitas gratiæ in terris, quia gloria succedit gratiæ, & gratia est semen gloriæ.*

Objicies: D. August. *Enchiridii*, c. 121. ait: *Hic venire potest ad tantam magnitudinem charitatis, qua major esse non possit. Ergo censet D. Doctor charitatem in terris habere posse ultimum accretionis terminum.*

Resp. nego consequ. Ibi enim D. August. agit de charitate, non secundum intensiorem habitum, sed secundum exhibitionem operis ex genere suo maximi, quale est martyrium pro Christo perpeßum, juxta illud Joann. 19. *Majorem charitatem nemo habet, ut animam suam ponat quis pro amicis suis. Quod opus præstantissimum, potest quis in hac vita exercere, ut fecerunt omnes Martyres.*

Instabis: Si potest augeri gratia sanctificans, id fieret per bona opera a gratia elicitæ; atqui per bona opera a gratia elicitæ, non potest augeri gratia sanctificans; ergo. *Resp. nego min.*

Prob. min. Augmentum gratiæ, est vera gratia; atqui gratia non datur propter bona opera; nam *si ex meritis, jam non est gratia*, ait Apostolus; ergo gratia sanctificans non potest augeri per bona opera, etiam a gratia elicitæ.

Resp. dist. maj. Augmentum gratiæ, est vera gratia, ratione sui principii, *concr.* ratione sui, *nego maj.* Atqui gratia ratione principii, non datur propter bona opera, *conced.* ratione sui, *nego min.* Itaque augmentum gratiæ, est vera gratia ratione principii, quia conceditur solum ratione operis meritorii, quod per gratiam

tiam actualem & habitualem simpliciter gratis concessam, fuit elicatum; sed ratione sui, est quid homini bonum ex gratia operanti debitum.

CONCLUSIO II

Justificatio est amissibilis, & revera amittitur per subsequens peccatum mortale. Est de fide.

Prob. 1. Ex Scriptura, Ezech. 18. Cum averterit se justus a justitia sua, & fecerit iniquitatem, morietur in eis: in injustitia, quam operatus est, morietur; ergo justus justitiam suam amittere potest. Hinc Apost. Philipp. 2. hortatur, ut cum metu & tremore salutem nostram operemur.

Prob. 2. ex SS. PP. Div. Hieron. lib. 2. adversus Jovinianum, inter illius hæretici errores computat: quod gratiam sanctificantem injustis inamissibilem assereret. Et D. August. lib. de dono persever. cap. 13. ait: Quosdam lapsos quousque redeant non exire de hac vita, qui utique perirent, si antequam redirent, exirent. Ergo censent justos posse a gratia sanctificante excidere.

Prob. 3. Ex Conc. Trid. sess. 6. can. 23. definiente: Si quis hominem semel justificatum dixerit amplius peccare non posse, neque gratiam amittere: atque adeo eum, qui labitur & peccat, nunquam vere justificatum fuisse, anathema sit.

Prob. 4. Ex horrendis illius nefariz doctrinæ consequentiis, quas expendit Grotius in discussione apologiz Andreæ Riveti, pag. 217. ubi sic ait: Christiani pectoris est, horrescere ea dogmata quæ pietati nocent, quale illud est a nonnullis defensum: Pecca fortiter, sed crede fortius, & nihil nocebunt tibi centum homi-

Charmes, Theol. Schol. Tom. III. A a ci

cidia & mille stupra : hi sunt genuini fructus illius dogmatis , credere quemque debere justitiam Christi sibi habitari , quasi ipse eam praestitisset : certo se perseveraturum : certo & absolute salutem sibi destinatam : peccata fidelium , ut magna & gravia esse possint , non imputari ipsis propter fidem in Jesum Christum , posse eos cadere in rebellionem , homicidium , adulterium , &c. nihilominus tamen eos pro certo firmoque habere se nunquam aut totaliter , aut finaliter excidere , neque excidere posse ex paterna Dei charitate & gratia erga se.

Solvuntur Objectiones.

Obicies 1. Dicitur 1. Joann. 3. Omnis qui natus est ex Deo , peccatum non facit , quoniam semen ipsius in eo manet , nec peccare potest , quia ex Deo natus est. Ergo justus a sua justitia excidere non potest.

Resp. nego consequ. Textus enim debet intelligi in sensu composito , ut intelligatur impossibilitas peccati cum gratia & filiatione divina , quia justus non peccat , nec potest peccare secundum quod natus est ex Deo , & semen illius in eo manet , juxta illud D. Augustini , lib. de gratia Christi , c. 21. Charitas , secundum quam ex Deo natus est , non agit perperam , nec cogitat malum : cum ergo peccat homo , non secundum charitatem , sed secundum cupiditatem peccat , secundum quam non est natus ex Deo.

Inst. 1. Apostolus , 1. Cor. 13. ait : Charitas nunquam excidit . Ergo justus non potest deficere a charitate.

Resp. nego consequ. Sensus Apostoli est , quod charitas perseveret etiam in patria , ubi alii habitus fidei , spei , & alia dona , v. g. linguarum , pro-

prophetiæ, &c. cessabunt: non vero sensus, est quod charitas, qua quis semel est justus, non amittatur, contrarium enim docetur, *Apo. 2.* ubi Deus Episcopo Ephesino sic exprobrat: *Habeo adversum te, quod charitatem tuam primam reliquisti: memor esto unde excideris, & age poenitentiam, & prima opera fac.*

Instab. 2. Cant. 8. de charitate viæ dicitur: *Aqua multa non potuerunt extinguere charitatem.* Ergo charitas viæ non extinguitur.

Respond. dist. conseq. Non extinguitur in eis, in quibus est constans & fervens, qualis fuit in Apostolis & Martyribus, *conced. iis qui, ut dicitur Lucæ 8. ad tempus credunt, & in die tentationis recedunt,* quod exprobratur Episcopo Ephesino, *nego conseq.* Per se ergo charitas est amissibilis, per accidens autem & ratione illius fervoris fit ut non amittatur.

Inst. 3. Dicitur 1. Joann. 3. Exierunt ex nobis, sed non erant ex nobis; nam si fuissent ex nobis, mansissent utique nobiscum. Ergo qui habent veram justitiam, non possunt ab ea excidere.

Respond. nego conseq. Dicitur enim, *non erant ex nobis,* non quod non fuerint fideles & vera Ecclesiæ membra sicut ceteri, sed quod non fuerint, ut ceteri constantes & generosi Christiani, sed inconstantes & leves, sicut Judas, qui vere fuit Apostolus, & a Christo vere electus, de quo Christus, *Joann. 6.* dicit: *Nonne ego vos duodecim elegi: & ex vobis unus diabolus est?* & tamen a fide & justitia excidit.

Objicies 2. D. August. Epist. ad Julianum, ait: Charitas, qua deleri potest, nunquam vera fuit. Ergo ubi vera charitas habetur, nunquam deperditur.

Resp. nego antec. Nam hæc verba non repe-

riuntur in Epistola ad Julianum, licet Gratianus per errorem ita illa citet & referat; reperiuntur quidem in *lib. de salutaribus documentis*, qui non est D. Augustini, licet inter ejus opera referatur.

Resp. 2. nego consequ. Auctor enim illius libri per *charitatem*, non intelligit *justitiam*, sed amicitiam, docetque amicitiam, quæ ita ex amici præsentia pendet, ut non perseveret eo absente, non esse veram amicitiam; hæc sunt ejus verba: *Licet enim me mutationis locus longe tulisset a vobis corpore, sed nullatenus charitate: quia charitas quæ deferri potest, nunquam fuit vera.* Quo sensu Divus Hieronymus Epistol. 41. ad Rufinum, dixit:

Amicitia, quæ desinere potest, vera nunquam fuit.

Instab. Divus Petrus, trina sua negatione, peccavit mortaliter, ut tradunt Patres; atqui tamen non amisit justificationem; ergo.

Respond. nego minor. Quæ destruit majorem, nam si D. Petrus non fuit averſus a charitatē, non peccavit; peccatum enim est averſio a Deo.

Prob. min. S. Leo de Petro dicit: *Vidit in te Dominus non fidem fictam, non dilectionem averſam, sed constantiam esse turbatam;* ergo D. Petrus, per suum peccatum, non amisit justificationem.

Respond. nego consequ. Hoc enim unum intendit D. Leo, quod Petrus non peccavit directe contra fidem & charitatem in Christum, sed indirecte tantum, ex nimio nempe timore hominum, & potarum, quas videbat pati Magistrum.

CONCLUSIO III.

Nemo citra specialem Dei revelationem, potest de sua justificatione esse certus certitudine fidei. Est de fide.

Probat. 1. Ex Scriptura: Eccles. 9. dicitur, Sunt iusti atque sapientes & opera eorum in manu Dei, & tamen nescit homo utrum amore aut odio dignus sit; sed omnia in futurum servantur incerta. Quem locum exponens D. Hieron. ait: Inveni justorum quidem opera in manu Dei esse, & tamen utrum amentur a Deo, aut non, nunc eos scire non posse, & ambigue fluctuare, utrum ad probationem sustineant, qua sustinent, an ad supplicium; ergo.

Proverb. 20. Quis potest dicere: mundum est cor meum, purus sum a peccato? Hinc est quod Apostolus 1. ad Corinth. 4. de seipso dicit: Nihil mihi conscius sum, sed non in hoc iustificatus sum; qui enim me iudicat Dominus est. Si enim Deus in Angelis suis reperit pravitatem, ex Job 4. quomodo homo, qui suos omnes affectus inter nos non videt, potest certo scire, atque fide divina credere se esse iustum coram Deo, qui solus de homine potest certum ferre iudicium?

Prob. 2. ex PP. D. August. lib. de perfectione iustitiæ, cap. ait: Quantalibet iustitia sit pradi- tus homo, cogitare debet ne aliquid in illo, quod ipse non videt, inveniatur esse culpandum. D. Gregor. lib. 6. Epist. 22. interrogatus a Gregoria Augustæ cubicularia, utrum sibi remissa essent peccata, respondit: Rem mihi difficilem & ti- bi inutilem postulasti: difficilem, quia indignus sum cui revelatio immittatur a Deo: tibi inu- tilem, quia securitas negligentiam parit.

Prob. 3. Ex Concilio Tridentino sess. 6. cap. 9.

dicente : *Cum nullus scire valeat , certitudine fidei , cui non potest subesse falsum , se gratiam Dei esse consecutum . Et Can. 15. definit : Si quis dixerit hominem renatum & iustificatum teneri ex fide ad credendum se certo esse in numero predestinatorum , anathema sit .*

Prob. 4. rat. Justificatio non solum pendet ex promissione divina ; sed ex nostra conversione & preparatione ; atqui 1. Non est revelatum homini iustificato quod sit iustus ; 2. Homo iustificatus non potest esse certus infallibiliter , quod sit vere conversus ad Deum , quia nescit utrum ista conversio sit ex gratia , an ex concupiscentia : Mens enim humana sibi saepe mentitur , ait D. Greg. 1. p. sui Pastoralis , c. 29. Et fingit de bono amare , quod non amat . Ergo .

Solvuntur Objectiones .

Objicies 1. Apost. Rom. 8. ait : Certus sum quia neque mors , neque vita , neque Angeli , neque Principatus neque creatura alia poterit nos separare a charitate Dei . Ergo homo potest esse certus , & credere debet , se esse iustum .

Resp. nego conseq. Ex hoc textu sequitur equidem quod nulla creatura possit iustum invitam a sua iustitia dimovere , sed non sequitur , quod iustus possit scire , absque speciali revelatione , quod sit iustus .

Inst. 1. Ille certus est de sua justificatione , qui certo cognoscit se esse in Christo , & habere Christum in se ; atqui iustus certo cognoscit se esse in Christo , & habere Christum in se , juxta illud Joann. 13. In illo die cognoscetis , quia ego sum in Patre meo , & vos in me , & ego in vobis ; ergo .

Resp. nego min. Textus enim non loquitur de
tem-

tempore hujus vitæ, sed de tempore vitæ beatæ, in qua Deum videbimus sicuti est, ut interpretatur D. Aug. tract. 75. in Jo: dicens: *In quo die? nisi de quo ait: & vos vivetis; tunc enim erit, ut possimus videre quod credimus... in illo ergo die, quando vivemus ea vita, qua mors absorbebitur, cognoscemus quia ipse in Patre, & nos in ipso, & ipse in nobis.*

Inst. 2. Atqui etiam in hac vita debemus esse certi, & fide divina credere nos esse justos; ergo.

Prob. subs. Tenemur fide divina assentiri testimonio Spiritus sancti; atqui, Rom. 8. *Ipse Spiritus (Sanctus) testimonium reddit spiritui nostro, quod sumus filii Dei; ergo.*

Resp. dist. maj. Ita ut tò, *sumus*, intelligatur de tota Ecclesia, *conc.* ita ut intelligatur de unoquoque particulari, *nego min.* Illa autem verba intelligenda esse de tota Ecclesia, cui Spiritus sanctus testatur, quod habeat spiritum adoptionis, constat ex versu præcedenti, in quo confert Ecclesiam cum Synagoga, & docet Ecclesiam habere spiritum adoptionis, Synagogam vero habuisse spiritum timoris: *Non enim, inquit, accepistis spiritum servientis iterum in timore, sed accepistis spiritum adoptionis filiorum, in quo clamamus, Abba (Pater).*

Inst. 3. Dicitur, 1. Joann. 3. *Scimus quoniam translati sumus de morte ad vitam, quoniam diligimus fratres.* Ergo quilibet justus potest esse certus de sua justificatione.

Respond. nego conseq. Textus enim intelligitur de toto fidelium coetu, quem fide divina certum est, de morte ad vitam translatum esse; non de ullo particulari adulto, cujus justificatio est incerta, nec de ea potest, nisi moralem & conjecturalem, habere certi-

audinem: quis enim absque speciali revelatione, nosse potest se diligere fratres, sicut oportet ad salutem?

Inst. 4. Apocal. 2. dicitur: *Vincenti dabo manna absconditum, quod nemo novit, nisi qui accipit.* Atqui per, *manna absconditum*, intelligitur gratia justificationis; ergo qui illam recipit, de ea infallibiliter certus est.

Respond. nego minor. Nam per, *manna absconditum*, intelligitur gloria aeterna, ut constat ex cap. 3. vers. 21. ubi dicitur: *Qui vicerit, dabo ei sedere mecum in throno meo: sicut & ego vici, & sedi cum Patre meo in throno ejus.*

Objicies 2. Potest quis certo cognoscere se non peccasse mortaliter; ergo potest certo scire se esse in gratia.

Resp. dist. antec. Potest quis certo cognoscere, certitudine conjecturali & morali, conced. certitudine physica & fidei, *nego antec.* Hoc evidenter declarat Apostolus, cum dicit: *Nihil mihi conscius sum, sed non in hoc justificatus sum.* Quantumcumque ergo adhibeamus examen, non possumus de nostra justificatione habere, nisi moralem certitudinem.

Instant 2. Quilibet homo potest sic ratiocinari, & quidem demonstrative, *Omnia rite baptizatus, habet gratiam justificantem, donec peccaverit mortaliter; atqui ego sum certus physice me esse rite baptizatum, & ex eo tempore non peccasse mortaliter; ergo & certus sum physice, me habere gratiam baptismalem, ergo.*

Resp. nego min. argumenti expositorii. Nec enim quis potest certitudine physica scire se esse rite baptizatum; tum quia non potest esse physice certus quod cum debitis dispositionibus receperit Baptismum; tum quia nullus cer-

certitudine physica scire potest baptizantem adhibuisse omnia necessaria ad Sacramentum, & maxime debitam intentionem; talis ergo non habet de sua justificatione, nisi moralem certitudinem.

Inst. 2. Potest quis certo scire se habere perfectam contritionem; sed hæc contritio certissime justificat; ergo.

Resp. dist. major. Potest scire certo moraliter, *conc.* physice, *neg. maj.* Nescit enim homo certitudine physica, vel fidei divinæ, absque speciali revelatione, *An odio, vel amore dignus sit.*

Inst. 3. Nisi justus sit certus fidei certitudine de sua justitia, semper erit anxius, nec pace fruetur, quam Christus Apostolis & omnibus fidelibus dedit *Joann. 14.* dicens: *Pacem meam do vobis.* Atqui falsum consequens ex *Apost. Rom. 5.* dicente: *Justificati ergo ex fide pacem habeamus ad Deum;* ergo.

Resp. nego maj. Ad hoc enim ut pace Christiani justus perfruatur, sufficit quod habeat certitudinem moralem de sua justificatione; licet enim talis certitudo non auferat omnem formidinem, & ideo cum metu & tremore nostram salutem operemur oporteat, omnem tamen aufert anxietatem, qua sola conscientie pax interturbari potest.

Q U Æ S T I O II.

De merito bonorum operum.

Nota: 1. **M**eriti nomine intelligitur, *Opus retributione dignum, & sic malis operibus, non secus ac bonis, tribuitur nomen meriti, nam sicut opus bonum, est dignum præmio; ita opus malum, est dignum*

Supplicio; usus tamen invaluit ut bonum opus vocetur *meritum*, opus vero malum dicatur *demeritum*. Nomen meriti in bonam partem tantum hic sumitur.

Nota 2. Duplex distinguitur meritum, *de condigno*, nempe, & *de congruo*.

Meritum *de condigno*, est opus bonum, cui præmium debetur ex aliqua iustitia.

Meritum *de congruo*, est opus bonum, cui præmium debetur ex aliqua duntaxat decentia & congruitate; quod si habeat promissionem adjunctam, dicitur *de congruo infallibili*, tale est meritum contritionis perfectæ in peccatore respectu justificationis; si vero non habeat promissionem adjunctam, dicitur meritum *de congruo fallibili*, tale est omne meritum de congruo in homine iusto.

Omnia, quæ meritum spectant tribus complectemur articulis, quorum 1. Erit de existentia meriti. 2. De conditionibus ad meritum requisitis. 3. De objecto meriti. Itaque:

ARTICULUS I.

De existentia meriti.

Nota: **N**omen meriti Novatoribus Lutheranis & Calvinistis ita est exosum, ut illud penitus rejiciant tanquam fastuosum ac superbiam redolens, doceantque hominem nihil vere mereri apud Deum, *Quia*, inquit Calv. lib. 3. instit. c. 15. *Nihil ab homine erit quantumcumque perfectum, quod non sit aliqua macula inquinatum.* Contra quos:

CON-

CONCLUSIO.

Bona justorum opera apud Deum sunt vere & proprie meritoria. Est de fide.

Prob. 1. Ex Scripturæ locis, in quibus Deus dicitur bonis justorum operibus retribuere mercedem: Gen. 15. Ego protector tuus sum, & merces tua magna nimis. Eccles. 13. Ne verearis usque ad mortem justificari, quia apud Dominum est merces bonorum operum. 1. Corint. 15. Unusquisque suam mercedem accipiet secundum suum laborem. Atqui merces refertur ad meritum; ergo opera justorum sunt vere meritoria.

Prob. 2. Ex iis Scripturæ locis, in quibus expresse habetur quod Deus reddet mercedem operibus meritoriis, Eccles. 15. Omnis misericordia faciet locum unicuique secundum meritum operum suorum, & secundum intellectum peregrinationis sue, id est, secundum mensuram operum, quæ egit ut peregrinus in terra. Roman. 4. Ei autem qui operatur, merces non imputatur secundum gratiam, sed secundum debitum. Atqui merces reddita secundum debitum, arguit verum, & proprium meritum; ergo.

Probat. 3. ex PP. Div. Cyprian. lib. de unio. Ecclesia, ait: Accipiunt merita nostra mercedem.

Div. Ambros. Serm. 7. in Psalm. 118. de iusto ait: Scit sibi coronam bonorum repositam esse meritum.

Div. Augustinus Epist. 105. Nullane igitur sunt merita justorum? sunt plane, quia iusti sunt. Et infra: Sicut merito peccato tanquam stipendium redditur mors, ita merito iustitiæ tanquam stipendium vita æterna. Et Serm. 18.

de verbis Apost. ait: *Cum Deus coronat merita tua, nihil coronat, nisi dona sua.*

Prob. 4. Ex Conc. Arausicano II. Canon. 18. Debetur merces bonis operibus si fiant, sed gratia, qua non debetur, precedit ut fiant. Et Trident. sess. 6. can. 32. Si quis dixerit hominis justificati bona opera, ita esse dona Dei, ut non sint etiam bona ipsius justificati merita . . . anathema sit.

Prob. 5. ratione Theologica: Christus ex Symbolis nostræ fidei venturus est judicare vivos & mortuos; atqui, si non sint merita, non potest judicare vivos & mortuos, juxta illud Div. August. Epist. 46. Alioqui si non sunt merita, quomodo judicabit Deus hunc mundum? ergo.

Solvuntur Objectiones.

Objectiones 1. cum Calvino, Omnia opera nostra sunt immunda; ergo tantum abest, ut aliquid mercedis mereantur apud Deum, quin potius Dei indignationem provocent.

Probat. antec. Ex Isaïæ 64. Facti sumus ut immundus omnes nos: & quasi pannus menstruatorum universa justitia nostra. Ergo omnia opera nostra sunt immunda.

Resp. nego consequ. In textu enim non est sermo de bonis justorum operibus; sed de fictis justitiis, perfidorum Judæorum, nempe de sacrificiis expiatoriis, lotionibus manuum, & calicum, &c. eum intus pleni erant rapina, & iniquitate, ut ait Christus, Lucæ 11. vers. 39.

Inst. 1. Lucæ 17. dicitur: Cum feceritis omnia, que precepta sunt vobis, dicite, quia servi inutiles sumus; ergo per opera nostra nihil meremur.

Respond. nego consequ. Non enim debemus dicere

cere nos servos inutiles esse, quod non mereamur, sed propter triplicem causam: 1. Quia si aliquid, quod ad vitam æternam utile sit, facimus, id per gratiam & adoptionem divinam facimus, unde si quam Deus mercedem pro opere bono nobis rependat, *Nihil*, ait D. August. Epist. 105. *aliud coronat, quam munera sua*. 2. Quia nostro obsequio nihil utilitatis Deo contulimus; unde per observationem mandatorum, sumus utiles respectu nostri, inutiles vero respectu Dei, cui, cum Psalmista, Psalm. 15. dicere debemus: *Deus meus es tu, quoniam bonorum meorum non eges*. 3. Quia si tantum facimus id quod præceptum est, nihil singulare & ultra mercedem promissam consequemur, quod ultimum videtur spectare Christus, cum dicit: *Quod debuissem facere, fecimus*.

Inst. 2. Ad meritum de condigno requiritur condignitas operis cum mercede; atqui ex Apost. Rom. 8. *Non sunt condigna passionibus huius temporis ad futuram gloriam qua revelabitur in nobis*; ergo.

Respond. dist. min. Non sunt condignæ, si spectentur in se, *conc.* si spectentur prout sunt gratia informatæ, *nego minor.* Sic enim sunt opera amicorum Dei, *Vos autem dixi amicos*; ait Christus Joann. 15.

Inst. 3. Apostol. Roman. 6. dicit: *Gratia autem Dei vita æterna*; ergo vita æterna non datur ut merces.

Respond. nego consequ. Vita æterna dicitur, & gratia, & merces; gratia, quia principium meriti habemus ex gratia gratuito data; merces vero, quia retribuitur bene operantibus per vires a gratia acceptas, ut tradit Conc. Arausicanum: *Debetur merces bonis operibus si fiant*; sed gratia, qua non debetur, præcedit ut fiant.

Charmes, Theol. Schol. Tom. III. Aa 7 Inst. 4.

Inst. 4. Gloria, est nostra hæreditas, Apost. Rem. 8. dicente : *Si filii & hæredes, hæredes quidem Dei*. Atqui hæreditas confertur filiis absque ullo labore & merito ; ergo .

Resp. dist. major. Est hæreditas jure adoptionis ineunda, *conc.* jure nativitatis, *nego maj.* Porro condiciones adoptionis divinæ sunt observatio mandatorum, Matth. 19. *Si vis ad vitam ingredi, serva mandata*. Ergo filius adoptivus non potest vitam ingredi, nisi observatis Dei mandatis.

Objicies 2. Merita nostra, si darentur, derogarent meritis Christi ; ergo non sunt admit-
tendi :

Prob. ant. Si merita nostra essent necessaria, merita Christi essent insufficientia ; atqui hoc derogat meritis Christi, ipsique injuriosum est ; ergo .

Resp. nego maj. Merita enim nostra non sunt necessaria ut compleant aliquam meritorum Christi insufficientiam ; quod dicere injuriosum est Christo, qui superabundanter pro nobis meruit, & satisfecit ; sed ideo necessaria sunt, ut nobis applicentur merita Christi, quæ sunt verum & unicum meritorum nostrorum fundamentum ; quod Christo valde gloriosum est .

Objicies 3. Si homo de condigno mereretur gloriam, justo deberetur ex justitia ; atqui gloria non debetur justo ex justitia ; ergo .

Prob. min. Inter Deum & hominem nulli intercedit justitia ; ergo gloria justo non debetur ex justitia .

Resp. dist. ant. Inter Deum & hominem nulla intercedit justitia stricte dicta, *conc.* late dicta, *nego ant.* Justitia late dicta, est fidelitas in promissis ; porro ex illa fidelitate Deus obligatur præmium bonis operibus promissum persolvere ; unde D. Bernard. *lib. de grat. & lib. arb.*

arb. præmium vitæ æternæ dicit esse. *Promissum quidem ex misericordia, sed tamen ex justitia persolvendum.* Nempe ex justitia late dicta, non vero ex justitia stricte dicta & commutativa, quæ non potest esse inter Deum & hominem. 1. Quia meritum hominis fundatur in gratia Dei. 2. Quia omnia bona nostra, Dei sunt, qui sibi ea omnia vindicare potest.

Inst. Repugnat Deum obligari erga hominem ex justitia etiam late dicta, & ex fidelitate; ergo.

Resp. nego ant. Nam obligari ex fidelitate in promissis, non est proprie Deum obligari alteri; sed potius est Deum obligari sibi ipsi; Quia actio nostra, inquit D. Thom. 1. 2. q. 114. art. 1. non habet rationem meriti, nisi ex præsuppositione divina ordinationis, non sequitur quod Deus efficiatur simpliciter debitor nobis, sed sibi ipsi, in quantum debitum est, ut sua ordinatio impleatur.

ARTICULUS II.

De conditionibus ad meritum requisitis.

Nota. CUM in merito adæquate sumpto, tria spectentur, nempe persona merens, opus meritorium, & persona præmians, videndum est quænam conditiones ad meritum requirantur ex triplici illo capite: ideo:

CONCLUSIO I.

Ad meritum de condigno, dua essentialiter requiruntur conditiones ex parte hominis merentis, prima, quod sit justus; secunda, quod sit amator.

Prob. prima pars 1. Ex Scriptura Joann. 15. ubi Christus dicit: Sicut palmes non potest ferre fructum ex semetipso, nisi manserit in vite; sic nec vos, nisi in me (per gratiam sanctificantem) manseritis. Ergo.

Hinc Concil. Trident. sess. 6. cap. 16. Inter conditiones ad merendum requisitas, hanc ponit, ut qui merentur sint justificati & Christo tanquam viva membra inserti: Cum enim, inquit, ille ipse Christus Jesus tanquam caput in membra, & tanquam vitis in palmites, in ipsos justificatos jugiter virtutem influat: qua virtus bona eorum opera semper antecedit, & comitatur, & subsequitur, & sine qua nullo pacto grata, & meritoria esse possent, &c.

Prob. 2. ex PP. Div. August. lib. de spiritu & litt. Opus enim, inquit, quod qui fecerit vivet in eo, id est, meritorium de condigno, Non fit, nisi a justificato. Et Div. Prosper ad capitula Gallorum cap. 6: ait: Justificatus homo, id est, ex impio pius factus, nullo precedente bono merito, accipit donum quo medio acquirat & meritum. Ergo ut homo mereri possit de condigno, debet informari dono gratiæ sanctificantis.

Prob. 3. ratione: Homo extra gratiam sanctificantem, est Dei inimicus; atqui inimicus Dei, non potest mereri vitam æternam, cum sit dignus morte æterna, quæ est impossibilis cum vita æterna; ergo.

Prob. secunda pars 1. Ex Scriptura, Joann. 9. dicit Christus: Venit nox quando nemo potest operari. Ubi per, Noctem, intelligit mortem, hinc Apostolus monet Galatas, ut operentur bonum, quandiu sunt in hac vita: Cum tempus habemus, operemur bonum, ad Galat. 6.

Prob. 2. ex PP. D. Cyprian. ad Demetrium, circa finem, ait: Quando isthinc excessum fuerit,

rit, nullus jam poenitentia locus est, hic vita aut amittitur, aut tenetur.

D. Hieron. exposit. Épistol. ad Galatas 6. ait: Cum ista via transferit, operandi tempus aufertur.

D. August. in Enchiridio cap. 11. Nemo, inquit, speret, quod hic neglexit, cum obierit apud Deum promereri.

Ratio a priori, est voluntas Dei, qui hanc mortalem vitam constituit ad vitam æternam promerendam.

Objicies. contra primam partem: Ad vitam æternam merendam sufficit mandatorum observatio, juxta illud Matth. 19. Si vis ad vitam ingredi, serva mandata. Atqui potest quis extra statum justitiæ servare mandata; ergo.

Resp. nego min. Nam primum mandatum est de amore charitatis, vi cujus homo justus fit, si nondum sit justus, est enim ultima ad justitiam formalem dispositio; ergo nemo injustus potest omnia servare mandata.

Objicies 2. Homo potest mereri apud hominem, etiam si sit ejus inimicus; ergo & apud Deum.

Resp. nego conseq. Disparitas est, quod homo solum opus exhibitum considerat, quod potest ipsi esse gratum, licet operans sit ipsi inimicus; at vero Deus non opus solum, sed & operantem respicit, a quo non potest elici opus Deo gratum, nisi & ipse sit Deo gratus & amicus; etenim, Eccl. 34. Dona iniquorum non probat Altissimus..

CONCLUSIO III.

Ad meritum, de condigno, tres necessariæ requiruntur conditiones ex parte actus: prima, quod sit liber a necessitate; secunda, quod sit bonus;

bonus & honestus ; tertia , quod sit supernaturalis , & quoad entitatem & quoad modum .

Prima pars , fuse probabitur in tractatu de Actibus humanis , tomo 2 .

Prob. secunda pars , Nempe , quod actus , ut sit meritorius , debeat esse bonus & honestus ; *Prob.* inquam , ex Scriptura quæ non aliis operibus , quam bonis & honestis , tribuit rationem meriti apud Deum , 2. Petri 1. *Satagite ut per vestra bona opera certam vestram vocationem & electionem faciatis .* Et 1. Joann. 5. *Procedent , qui bona fecerunt , in resurrectionem vitæ , qui vero mala egerunt , in resurrectionem iudicii .* Hinc Augustinus lib. de gratia & lib. arbit. cap. 6. ait : *Qua mala sunt , non coronat Deus .*

Ratio est , quia actus meritorius debet esse præmio , hoc est , laude & gloria , dignus ; atqui tale est solum opus bonum ; ergo .

Prob. tertia pars , Nimirum , quod actus meritorius debeat esse supernaturalis in entitate : *Prob.* inquam ; actus supernaturalis in entitate , est is , qui elicitur ex actualis gratiæ auxilio ; atqui ut actus sit meritorius , debet elici ex actualis gratiæ auxilio , ut fuse probavimus contra Pelagianos , pag. 288. & seq. Ergo .

Ratio est , quia actus meritorius debet esse ejusdem ordinis cum præmio , siquidem debet habere aliquam æqualitatem proportionis cum illo : atqui præmium est supernaturale , nimirum perfecta Dei possessio per visionem intuitivam & amorem fruitivum ; ergo .

Prob. quarta pars , Nimirum , quod actus meritorius debeat esse supernaturalis quoad modum : *Prob.* inquam ; actus supernaturalis quoad modum , est is qui elicitur ex imperio charitatis ; atqui ut actus sit meritorius , debet elici ex imperio charitatis ; ergo , &c.

Prob.

Prob. min. 1. Ex Scriptura, 1. Corinth. 10. ubi Apostolus nos hortatur: *Sive manducatis, sive bibitis, sive aliud quid facitis, omnia in gloriam facite*; ergo necessarium est ad merendum, ut actus imperetur a charitate. Unde D. August. lib. 4. contra Julianum, cap. 3. de charitate loquens, ait: *Hoc amore opus est, ut bonum beatificum sit*, id est, meritorium beatitudinis.

Prob. min. 2. Ex D. Thom. 1. 2. quest. 114. art. 4. ubi dicit: *Meritum vite æternæ primo pertinet ad charitatem; ad alias autem virtutes secundario, secundum quod earum actus a charitate imperantur.* Et ad 3. ait: *fidei actus non est meritorius, nisi fides per dilectionem operetur.*

Prob. min. 3. Quia communis ratio meriti postulat, ut opus fiat in obsequium præmiantis, nisi fiat, aut saltem imperetur a charitate; ergo...

Obijcies contra quartam partem. In variis Scripturæ locis, actibus virtutum a charitate distinctarum beatitudo æterna promittitur, nulla facta mentione illorum relationis ad Deum; ergo ut illi actus meritorii sint, non requiritur ut imperentur a charitate.

Resp. nego consequ. Licet enim Scriptura non faciat mentionem expressam relationis actuum illorum ad Deum, illam tamen sufficienter supponit, ex hoc quod in aliis locis eam exigat ut conditionem necessariam ad merendam beatitudinem; sicut supponit statum gratiæ necessarium esse, licet illius mentionem expressam tunc non faciat.

Inst. 1. Ad meritum condignum sufficit, quod opus ex se, & ex circumstantiis bonum, elicited sit ab homine iusto; ergo non requiritur ut sit imperatum a charitate.

Resp.

Resp. nego antec. Quia actus quantumvis ex se, & ex circumstantiis bonus, & ab homine iusto elicitus, est informis absque hac virtuali ad Deum ordinatione per charitatem facta; ergo est insufficiens ad meritum beatitudinis; *actus patientia & fortitudinis*, ait D. Thom. cit. *non est meritorius nisi aliquis ex charitate hac operetur.*

Inst. 2. Concil. Trid. *sess. 6. c. 16.* ad meritum requirit tantum, ut opera sint bona, & fiant a iusto per auxilium gratiæ; ergo.

Resp. nego ant. Nam insuper requirit Concilium, ut opera *in Deo sint facta*; atqui opera non sunt proprie in Deo facta, nisi ad Deum tanquam finem supernaturalem actualiter, aut virtualiter referantur per affectum dilectionis; ergo, &c. Unde Concilium addit: *Non enim injustus est Deus, ut obliviscatur operis vestri, & dilectionis quam ostendistis in nomine ipsius.*

Obijcies 2. D. Thomas, in 2. dist: 40. *quest. 1. art. 5.* ait: *non potest esse aliquis actus de deliberata voluntate procedens, in habente gratiam, qui non sit meritorius.* Ergo, &c.

Resp. Fateor, sed hanc sententiam, quam tenuit cum scriberet in sententias, mutavit in sua Summa, ex qua genuina mens D. Thomæ colligenda est, cum sit ultimum opus ab eo conscriptum.

CONCLUSIO III.

Ad meritum de condigno, requiritur ex parte Dei repromissio mercedis.

Prob. 1. Ex Scriptura, Jacobi 1. dicitur: *Beatus vir qui suffert tentationem, quoniam cum probatus fuerit, accipiet coronam vite quam repromisit Deus diligentibus se.* Unde Aposto-
lus

ius vitam æternam vocat promissionem, Hebræos. 6. *Fide & patientia hereditabunt promissiones.* Et cap. 10. *Ut voluntatem Dei facientes, reportetis promissionem.*

Prob. 2. Ex Concil. Trid. sess. 6. c. 16. *Bene operantibus usque in finem, inquit, & in Deo sperantibus, proponenda est vita æterna, & tanquam gratia filiis Dei per Jesum Christum misericorditer promissa, & tanquam merces ex ipsius Dei promissione bonis ipsorum operibus & meritis fideliter reddenda.*

Prob. 3. ratione: Meritum de condigno, non solum dicit condignitatem operis, sed etiam obligationem in Deo remunerandi; atqui Deus, qui est supremus omnium Dominus, non potest nobis debitor fieri, nisi intercedat promissio quædam, & pactum ex parte ipsius, quo se obliget ad nobis reddendum præmium pro hoc vel illo opere bono; ergo, &c. Hinc D. August. in Psalm. 83, ait: *Debitorem Dominus ipse se fecit, non accipiendo, sed promittendo: non ei dicitur: redde quod accepisti, sed redde quod promisti.*

Solvuntur Objectiones.

Obicies r. Ut homo mereatur apud hominem, non est necessaria promissio; ergo nec ut mereatur apud Deum.

Resp. nego ant. Nam, etiam inter homines, non potest esse meritum ex iustitia sine aliquo pacto; vel expresso, vel tacito.

Prob. ant. Qui alterius videntis, aut volentis, vineam colit, mercedem ex iustitia meretur apud dominum, qui in iudicio compellitur ad debitum pretium solvendum, quamvis pactio de tali mercede non intercesserit; ergo.

Resp. dist. ant. Quamvis pactio expressa de tali

tali mercede non intercesserit, *conc.* pactio tacita, *nego ant.* Qui enim videt aliquem, alias non obligatum, laborare in suam utilitatem sub spe lucri consequendi; tacite consentit se obligare ad tale pretium solvendum, & ad id compellitur in iudicio.

Inst. Ut peccatum mereatur poenam æternam, non necesse est interveniat aliqua pactio; ergo ut bonum aliquod opus mereatur vitam æternam, non necesse est ut interveniat Dei promissio.

Resp. nego consequ. Disparitas est, quod homo per peccatum seipsum debitorem poenæ apud Deum constituat, ad quod non requiritur pactio; e contra homo per meritum de condigno Deum sibi debitorem facit; Deus autem non potest fieri debitor respectu creaturæ absque libera & gratuita sua promissione, ut probatum est.

Obijcies 2. Ex nostra doctrina sequitur plures justos non potuisse mereri vitam æternam; falsum consequ. ergo.

Prob. seq. maj. Promissio non obligat, nisi fuerit acceptata; atqui a pluribus justis non potuit acceptari; ergo.

Prob. minor. Ut acceptetur promissio, debet esse cognita ei qui operatur; atqui plurimis justis incognita fuit promissio Dei de mercede reddenda; ergo, &c.

Resp. dist. major. Ut acceptetur promissio, debet esse cognita confuse, *conc.* distincte, *nego maj.* Porro nullus est justus sine fide in Deum remuneratorem, juxta illud Apostoli, Hebr. 11. *Accedentem ad Deum, oportet credere, quia est, & quod inquirentibus se remunerator sit.* Sed qui credit in Deum remuneratorem, habet confusam saltem cognitionem vitæ æternæ, quam repromisit Deus diligentibus

se; ergo talem promissionem acceptat, saltem virtualiter & interpretative; quia unusquisque censetur velle operibus suis acquirere, quidquid potest illis acquiri.

Quæres: Quanam condiciones requiruntur ad meritum de congruo?

Resp. Requiritur ex parte merentis, ut sit viator, non vero requiritur ut sit iustus, ut per se & ex dictis, patet.

Ex parte actus, requiritur, 1. Ut sit liber. 2. Ut sit bonus. 3. Ut sit supernaturalis quoad entitatem, id est, ut eliciatur per vires a gratia actuali acceptas; nihil enim possumus operari in ordine ad salutem per solas naturæ vires, ut definitum est in Conciliis Arausicano II. & Tridentino.

Ex parte Dei, non requiritur Dei promissio de danda mercede; nam tale pactum non est necessarium ad hoc, ut bonum opus habeat aliquam congruitatem cum præmio: hinc plura sunt, quæ homo meretur de congruo, puta donum perseverantiæ, quæ tamen Deus non promittit dare merentibus.

ARTICULUS III.

De objecto meriti.

Notæ: **D**UO sunt quæ cadunt sub meritum, gratia nimirum & gloria.

Quod spectat ad gloriam, certum est, ex dictis Articulo 1. hominem iustum posse per bona opera mereri de condigno gloriam æternam, & gloriæ æternæ augmentum, ut definit Concil. Trid. sess. 6. can. 32. his verbis: *Si quis dixerit, hominis iustificati bona opera ita esse dona Dei, ut non sint etiam bona ipsius iustificati merita, aut ipsum iustificatum bonis*
ope-

operibus, quæ ab eo per Dei gratiam & Jesu Christi meritum, cujus vivum membrum est, sunt non vere mereri augmentum gratiæ, vitam æternam, & ipsius vitæ æternæ, si tamen in gratiâ decesserit, consecutionem, atque etiam gloriæ augmentum, anathema sit.

Quod spectat ad gratiam:

Certum est 1. hominem nullatenus, nequidem de congruo, posse mereri primam gratiam actualem, ut fide constat, tum ex dictis contra Pelagianos, tum ex Conc. Trid. sess. 6. cap. 5. ubi declarat ipsius justificationis exordium in adultis a Dei per Christum Jesum præveniente gratiâ sumendum esse, hoc est, ab ejus vocatione, qua nullis eorum existentibus meritis vocantur, &c. ratio est, quia omne meritum supponit ipsum gratiæ actualis auxilium, ex pura misericordia nobis a Deo concessum; hinc illud axioma Theologicum: *Principium meriti non cadit sub merito.*

Certum est 2. hominem adultum, qui justificatur, non mereri de condigno primam gratiam sanctificantem, alias homo non justificaretur gratis, cum mereretur causam formalem suæ justificationis, quod repugnat Apostolo, Rom. 3. dicenti: *Justificati gratis per gratiam ipsius.* Et Concil. Tridentino, sess. 6. cap. 8. quod explicans laudata Apostoli verba, sic ait: *Gratis autem justificari ideo dicimur, quia nihil eorum, quæ justificationem præcedunt, sive fides, sive opera ipsam justificationis gratiam promerentur; merito nempe de condigno.*

Certum est 3. hominem adultum mereri de condigno augmentum gratiæ sanctificantis, prout definivit Concil. Trident. sess. 6. can. 32. supra laudato; ratio est, quia ibi nullæ conditiones ad meritum de condigno desiderantur, est enim promissio divina, Prov. 4. *Justorum*

florum autem semita, quasi lux splendens procedit & crescit usque ad perfectum diem.

Certum est 4. hominem mereri posse de congruo primam gratiam sanctificantem, & quidem infallibiliter per contritionem perfectam, ut tradit D. August. Epist. 105. dicens: *Sed nec ipsa remissio peccatorum, qua scilicet cum prima gratia conjuncta est, sine aliquo merito est, si fides hanc impetrat, neque enim nullum meritum est fidei.*

Ratio est, quia ad meritum de congruo sufficit, ut actus sit liber, bonus, supernaturalis, ab homine viatore elicitus; atqui talis est contritio perfecta, & dilectio Dei super omnia, quæ est ultima ad justificationem dispositio; ergo.

Tria igitur restant hic resolvenda 1. Utrum justus possit mereri reparationem post lapsum. 2. Utrum possit mereri gratiam perseverantiæ finalis; 3. Utrum possit mereri gratiam alteri; pro quibus solvendis:

CONCLUSIO I.

Justus non potest mereri de condigna reparationem suam post lapsum futurum, sed tantum de congruo fallibili.

Prob. prima pars: Ex Ezech. 18. *Si justus averterit se a justitia sua, & fecerit iniquitatem, omnes justitia, quas fecerat, non recordabuntur.* Atqui maxime recordarentur, si Deus intuitu illorum operum conferret ex justitia homini reparationem post lapsum; ergo.

Prob. 2. ratione: Quia ad meritum condignum requiritur Dei promissio, atqui nullibi Deus promisit justo reparationem post lapsum; ergo.

Prob. secunda pars: Justi petunt reparationem.

nem suam, si contingat eos a gratia excidere, Psalm. 70. *Cum defecerit virtus mea, ne derelinquas me.* Atqui frustra id peterent, nisi posset mereri de congruo, & impetrari; ergo.

Dices contra primam partem: Regi Josaphat dictum est, 2. Paralip. cap. 19. *Impio præbes auxilium . . . & idcirco iram quidem Domini merebaris, sed bona opera inventa sunt in te;* ergo Josaphat meruit reparationem suam post lapsum.

Resp. nego consequ. Tum quia non est sermo de merito reparationis post lapsum, sed de evasione poenarum temporalium, quas Deus non infligit propter bona opera præcedentia; tum quia Josaphat jam justificatus erat per se-riam poenitentiam; unde cum dixisset Prophe-ta, *Sed bona opera inventa sunt in te*, addit, *eo quod præparaveris cor tuum ut requireres Do-minum Deum patrum tuorum.* De eo quippe refertur cap. præcedenti, quod, cum esset in conflictu, *Clamavit ad Dominum, & auxilia-tus est ei.*

Inst. Hebr. 6. dicitur: *Non est injustus Deus, ut obliviscatur operis vestri, & dilectionis quam ostendistis in nomine ipsius, qui ministrastis San-ctis & ministratis.* Ergo Deus promisit justis reparationem post lapsum.

Respond. nego consequ. Non enim ibi loquitur Apostolus de operibus per peccatum mortifi-catis, sed de operibus vivis, quæ justi facie-bant ad solatium fidelium in persecutione, ut constat ex illis verbis, *Et ministratis.* Vel lo-quitur de operibus alias quidem mortificatis, sed jam vivificatis mediante poenitentia suffi-cienti ad remissionem peccatorum; & repara-tionem gratiæ sanctificantis.

Dices contra secundam partem. D. Thom. 1. 2. quæst. 114. art. 7. ait: *Nullus potest sibi me-mereri;*

veri reparationem post lapsum futurum, neque merito condigni, neque merito congrui; ergo nequidem de congruo potest mereri reparationem post lapsum.

Resp. dist. conseq. Nullus potest mereri reparationem post lapsum, de congruo infallibili, *conc.* de congruo fallibili, *nego conseq.* Ad meritum congruum infallibile requiritur promissio divina, ut dictum est, quæ cum hic non reperiatur, ideo non potest justus reparationem post lapsum mereri de congruo infallibili, de quo intelligendus est D. Thomas, qui, 2. 2. *quæst.* 186. *art.* 10. docet, Religiosum, qui peccat non ex contemptu, sed vel infirmitate, vel ignorantia, facilius a peccato resurgere, scilicet ob bona opera, quæ justus fecit.

CONCLUSIO II.

Justus secundum viam ordinariam, non potest de condigno mereri gratiam perseverantia finalis; potest tamen de congruo fallibili.

Probat. prima pars: Ad meritum de condigno requiritur promissio aliquid justorum operibus retribuendi tanquam mercedem; atqui nulla in Scripturis reperitur Dei promissio retribuendi justorum operibus perseverantiam finalem tanquam mercedem; immo monentur justi, ut cum timore & tremore suam salutem operentur, 1. Corinth. 10. *Qui se existimat stare, videat ne cadat.* Roman. 11. *Tu autem fide stas; noli altum sapere, sed time.* Ergo est incerta perseverantia; ergo nulla est Dei promissio illam justorum operibus retribuendi per modum mercedis.

Hinc Concil. Trid. sess. 6. Can. 16. definit: *Si quis magnum illud perseverantia donum se-
certo.*

certo habiturum absoluta & infallibili certitudine dixerit, nisi hoc speciali revelatione didicerit, anathema sit. Præterea Can. 32. referens omnia, quæ, Vere, id est, de condigno meremur, non meminit perseverantiæ; ergo.

Prob. secunda pars: Ex D. August. lib. de dono perseverantiæ cap. 6. dicente: Hoc ergo Dei donum suppliciter emereri potest. Atqui suppliciter emereri, est mereri de congruo; ergo, &c. Unde cap. 17. ait: *Restat in his bonis usque in finem perseverantia, quæ frustra quosdam a Deo postcitur, si non eam Dominus per gratiam suam in illo, cujus orationem exaudit, operatur.*

Ratio est, quia valde congruum est, ut amicus concedat amico suo conservationem amicitiae suæ, quando illam ferventer petit; ergo valde congruum est, ut Deus justo ferventer & perseveranter roganti, concedat perseverantiæ donum, *Quod a se posci imperavit, quando imperavit, ut ei Sancti ejus dicant orantes: ne inferas nos in tentationem.* Ita D. Aug. c. 6.

Obicies contra primam partem: Christus promisit Patrem daturum orantibus quidquid petierint in nomine suo, Joann. 26. Amen, amen, dico vobis, si quid petieritis Patrem in nomine meo, dabit vobis. Atqui justī petunt perseverantiam in nomine Christi, id est, per merita Christi; ergo.

Respond. dist. maj. Christus promisit Patrem orantibus daturum per modum doni gratuiti, quidquid petierint in nomine suo, conc. per modum mercedis, nego major. quidquid precibus conceditur, habet rationem gratiæ, non mercedis; ergo non meretur de condigno, sed orando impetratur & suppliciter emere-
tur.

Inst. Qui meretur majus, mereri potest minus;

nus; atqui justus de condigno meretur gloriam: quæ est quid majus perseverantia; ergo.

Resp. dist. maj. Si cætera sint paria, *con.* si non sint paria, *neg. maj.* Porro in facta hypothesi cætera sunt paria; nam Deus promisit perseverantibus gloriam per modum mercedis, Matth. 10. *Qui autem perseveraverit usque in finem, hic salvus erit.* Non sic autem promisit perseverantiam orantibus.

Inst. 2. Concil. Trid. sess. 6. Can. 22. definit: *Si quis dixerit justificatum, vel sine speciali auxilio Dei, in accepta justitia perseverare posse, vel cum eo non posse, anathema sit.* Atqui hoc esset falsum, nisi justificatus posset donum perseverantiæ mereri de condigno; ergo Concilium supponit, hoc donum cadere sub meritum condignum.

Prob. min. Si justus non posset donum perseverantiæ mereri de condigno, illud non esset in ejus potestate, etiam cum auxilio qualicumque; ergo.

Resp. nego ant. Nam ut donum perseverantiæ sit in justis potestate, sufficit quod possit illud mereri de congruo. Fatemur ergo justum per concursum gratiæ adjuvantis posse crescere in gratia, & merito, & novas semper vires contra peccatum acquirere, & Deum movere per suam fidelem cooperationem ad novas semper gratias ei largiendas, & specialem protectionem, ne ab accepta justitia decidat, vel si deciderit, ut resurgat citius & tandem perseveret finaliter, & in gratia moriatur; sed hæc protectio est specialis Dei favor, qui non cadit sub meritum de condigno; ita ut Deus ex justitia teneatur hanc illi præstare, sed tantum ex congruitate, decentia, & pietate sua.

CON;

CONCLUSIO III.

Iustus non potest alteri mereri primam gratiam de condigno, sed de congruo fallibili tantum.

Prob. prima pars: 1. Ex Scriptura, quæ promittit Deum nobis daturum quidquid in nomine Christi petierimus, Amen, amen, dico vobis: si quid petieritis Patrem in nomine meo, dabit vobis. Non autem sic promisit dare aliis, si quid in eorum favorem petierimus: unde D. August. Tract. 192. in Joann. explicans verba laudata, ait: Ita sano intelligendum est quod ait: dabit vobis: Ut ea beneficia significata sciatur his verbis, quæ ad eos qui petunt, proprie pertinent: exaudiuntur quippe omnes Sancti pro seipsis, non autem pro omnibus exaudiuntur, vel amicis, vel inimicis suis, vel quibuslibet aliis: quia non utcumque dictum est, dabit: sed, dabit vobis.

Prob. 2. Ex D. Chrysost. Homil. 12. ad populum, ubi docet neminem proprie mereri alteri, sed sibi: Utinam, inquit, possibile esset, me pro vobis laborantem omnibus recte agere, sed non licet hoc . . . ex propriis operibus punimur & salvamur.

Ratio est, quia nullibi Deus promisit iustum pro altero gratiam meriturum; hæc tamen promissio necessaria est ad meritum de condigno; ergo.

Prob. secunda pars; Ex Scriptura, quæ nos hortatur, ut oremus pro invicem ut salvemur, Jacobi 5. Orate pro invicem, ut salvemini. Hinc Deus iratus amicis Job, eos remittit ad illum, ut pro ipsis oret, & impetret veniam peccati eorum, Job 42. Itæ ad servum meum Job, inquit Deus, & offerre holocaustum pro

pro vobis: Job autem servus meus orabit pro vobis: faciem ejus suscipiam, ut non vobis imputetur stultitia. Et D. August. Serm. 1. de Sanctis, ait: Sic ergo exauditus est S. Stephanus: ut ejus orationibus deleteretur peccatum quod commiserat Saulus. Et Serm. 2. Si martyr Stephanus non sic orasset, Ecclesia Paulum hodie non haberet.

Ratio est, quia congruum videtur, ut amicus ab amico gratiam alterius enixe & perseveranter postulans, illam obtineat.

Porro gratia sanctificans, quam justus alteri meretur, non ei confertur immediate vitalis meriti, sed per media ordinaria, verb. grat. per actum contritionis perfectæ, quem alter elicuerit, per Sacramenta quæ susceperit, &c.

Hæc itaque per Dei gratiam, de gratia ipsa scripta, Sanctæ Romanæ Sedis judicio subjecta volo; instrui paratus, si qua in re sum falsus: corrigi, si qua lapsus: reduci, si qua devius; sic me Deus adjuvet, ac gratiæ suæ donis cumulet in terris, ut cum ipso regnare merear in cælis.

F I N I S.



MAG 1872



